



وَصِيْرُ دَوْلَتِ

شاهزاده محمد علی

حقوق خصوصیه دول

مؤلفی

رسومات امانتی معاونی و مکتوبجیسی ، مکتب حقوق
شاهانه حقوق عمومیه و خصوصیه دول معلمی

اوریک اغاسی زاده

حسن سری

برنجی طبعی



در سعادت

محمود علی مصطفی

۱۳۲۶

دولت‌رایچون حقوق و وظائف حدوشنه باعث اولور ، که بوندن ده علم حقوق دول بحث ایدر .

فقط مناسبات دولیه یالکمز دولت دینیلن اشخاص معنویه بیتده جریان ایتمکه قانز ؛ بواسطه اشخاص معنویه ایله کنیدیلرینک اجزاء مرکبه سی اولان افراد ایله ده اولور . اگر بر دولت ایله اودولتک ملکی داخلنده کی افراد تبعه سی بیتده جاری مناسبات موضوع بحث اولورسه بونک صورت و کیفیت جریانی ایله حقوق عمومیّه داخلیه اشتغال ایدر . بر دولت ایله اودولتک ملکنده ساکن اجانب ویا بر دولت ایله اودولتک ممالک اجنبیه کیدن واورالده بولن ان تبعه سی آره سنده کی مناسباتدن بحث ایتک ایسه حقوق خصوصیه دوله عاندر .

افادات مبسوطه دن حقوق خصوصیه دولک درجه اهمیت میدانه چیقار ؛ علی الخصوص ملکمزده بولن ان تبعه اجنبیه مقیداری نظره آلنیرسه بوعلمک بزجه نه قدر مهم اولدینی آکلاشیلیر . قایتولاسیون دینیلن عهد عتیقه ایله ممالک عثمانیه ده متمکن تبعه اجنبیه یه وقتیه بخش اولمش اولان و امتیازات اجنبیه نامیه معروف بولن ان معاملات استثنائیه یه علاوه اجنبیلر حقنده برده هیچ برعهده ، هیچ بر مقاوله دولیه یه مستند اولمقسنین تأمین ایدیان برطاقم معاملات فوق العاده اشته ب بو حقوق خصوصیه دوله وقوفسزلق سیئه سی اوله رق میدانه کلشدر .

ملککتمزده بوعلمک ایلك دفعه اوله رق تدریسنه جمله مؤسسات حضرت پادشاهیدن اولان مکتب حقوقده باشلانمش

و تدریسی وظیفه سی بو عاجزه احاله اولمشیدی . اثر من
او درس لرك طویلا نمنسندن میدانه کلمشدر . لسانمزده بو علمه
دائر هنوز برشی تدوین اولنماش اولسی حسیله ، علی الخصوص
بوکا عائد بولنان اصطلاحاتک مقابلرینی بولق خصوصنده ،
برجوق مشکلاته دوچار اولدم . حالاده کتابک اوجھتی یک
چوق نواقصی شاملدر . مع مافیه لسانمزده بو موضوع ایچون
یازیلان آثارک برنجیسی اولق کبی برشرفی حائر اولسی قبول
تامه یه مظهریتنه برضماندر .

ساده جه (حقوق خصوصیه دول) نامی ایله بوکون
نشره موفق اولدیم شوائر ، مندرجاتک سهولت ضبطی
ایچون ، ابواب مختلفه یه تقسیم اولنش ونهایتده ده ملکمزده
بولنان تبعه اجنیه نک بوکون کورمکده اولدقلری معاملاتده دائر
عهد عتیقه احکامی ایله سائردهن باحث بر لاحقه علاوه
ایدلمشدر .

کتابمز مکتب طلبه سنه مخصوص اولدینی ایچون بالطبع
تفصیلاتدن عاری بر اثر مختصردر . محبان معارفک بو خصوصده کی
حسن نیتیزی تأمل ایتمیزی ایله مظهر حسن قبوللری اولورسه
صاحب اثر متتدار ایدلمش اولور . ومن اه التوفیق

پاشا باغچه سی — اغستوس ۱۳۲۴ اوریک اغاسی زاده

حسن سری



مدخل

بر مملکتی که بر حکومتک امرینه تابع و بر نوع قانونک حمایه سینه
مودودع اشخاص یکدیگر بیه مناسبانده بولندینی کی ، حاکمیت
مالک و دولت صورتند متشکل هیأت اجتماعیه بیننده ده مناسبات
مدنی و تجاریه و تقابل منافع بولنق و بوندن ده حقوق و وظائف
متقابل تولد و اختلاف تحصیل اتمک طبیعیدر . افرادک مناسباتیه
بوندن حاصل اولان اختلافات متبوعلری اولان دولتک قوانین
داخلیه سینه تابع ایسه ده ، دولتیر بیننده متکون اختلافات ،
بونلرک فوقنده ظاهرأ بر قوه حاکمه نك فقدانندن دولایی ،
علی الا کثر حل اولنه من . بناء علیه ایکی دولت بیننده ظهور
ایدن اختلافک حتی ایچون تأثیری بالجمله دولتیر شامل اولوب
استقلال لرینه خلل کتیرمیه جک وجهله جمله سنک مظهر قبولی
اوله بیه جک بر اساس عالمی آرامق ایجاب ایدر ، که اوده
حقوق دول Droit international در .

حقوق دول ایچون انگلیز مشاهیر ارباب تألیفندن بنام
Bentham انگلیزجه اوله رق ایلك دفعه International law
تعبیری قوللانش و بو تعبیر علی الخصوص ایتالیا ، انگلتره
و آمریکا ارباب علم حقوقجه قبول اولنش ایسه ده ، تعبیر

مذكورك لاتینجه سی اولان *Juris inter Gentes* ترکیبی
 برنجی دفعه اوله رق استعمال ایدن ینه انکلتزه علماسندن موغ
Zouch در . المانیاده رومالیرک *Jus gentium* ترکیلرینک
 ترجمه سی اولق اوزره *Voelkerrecht* تعیری مستعملدر .
 فرانسزلر ایسه *Droit international* و *Droit des gens*
 تعیرلرینی بلا تفریق قوللانیورلر . فرانسزجه یه *Droit des gens*
 صورتنده ترجمه اولنه ییلان رومالیرک *Jus gentium* تعیرلری
 یرلیر ایله اجنیلره شامل صرف حقوق خصوصیه دن عبارت
 ایدی : مثلا بیع *Jus gentium* دائره سنده ایدی ؛ حالبوکه
 روما قانوننده یدرک اولادی اوزرنده جاری اولان قدرت
 ونفوذی حقوق مدنیه *Juris civilis* عدادنده اولوب ، یالکز
 رومالیر استفاده ایدرلردی . بناء علیه روماده *Jus gentium*
 حقوق داخلیه نک بر قسمی ایدی . زمانزده حقوق دول
 دیدیکمز شی ایسه « دولترک علی العاده تطبیق ایتدکری وحقوق
 طبعیه نقطه نظرندن تدقیق وقبول ایلدکری قواعدک هیئت
 مجموعه سیدر . » (۱) شو حالده بو علمه *Jus gentium* ترجمه سی
 اولق اوزره *Droit des gens* یعنی مقروق اقوام دئک هیچ
 موافق اولمز . بوندن دهها زیاده مناسب اولان *Droit*
international یعنی حقوق بین الملل تعیریدر . مع مافیه
 لسانزده مستعمل اولان مقروق دول تعیری جمله سندن انجیدر .
 مناسبات دولیه حق وعدلک تأثیرینی تسلیم خصوصنده

Weiss, Traité élémentaire de droit inter- [۱]

national privé مدخل ، صیفه ۴

عموم متحد اولیوب ، دولتلرک حقندن زیاده قوته رعایت
ایندکری و کندیلرینه مقتضای حق قبول ایتدیرمک ایچون
بونلرک فوقنده بر قوت بولندینی مقام اعتراضده درمیان اولنیور.
واقعا، امثال تاریخیه نظراً ، دولتلر بیننده اختلاف ظهوره
کدکجه سلاحه صاریلر ق غالب اولان طرف مطالبی طرف
مغلوبه قبول ایتدیرمشدر، که حالا زمانمزد قواء کلیه عسکریه
بولندیرلمسی بولتیقه نك دوامیدر . آنجق شایان دقتدرکه ،
بویله قوتله حقه غلبه یه چالشدینی حالده بیله ، ینه طرف غالب
کندینك حقلی اولدینی ادعا ایدیور ، یعنی هر حالده حقه
رعایتدن کلیاً وارسته قالئمیور . — دولتلرک فوقنده بر قوت
بولندینی بحثه کلنجه ، بونی ادعا ایدنلر دیورلرکه ، د بردولت
دیکرینك حقوقنه تجاوز ایلدیکی حالده دوچار تجاوز اولان
دولت ایچون یاییله حق شی ، فوقلرنده حکمی کندیلرینه قبول
ایتدیره جك بر محکمه عالییه بولندینی ایچون ، کندی قوتنه
مراجعتدن عبارتدر . افراد آره سنده وقوعه کلن اختلافات
محاکم واسطه سیله حل اولنورسده ، بین الدول تحدث ایدن
منازعات ایچون بویله بر شی یوقدر . بالفرض دولتلر بیننده
متکون دعاوی بی رؤیته مخصوص بر محکمه نك وجودی تصور
اولنسه بیله ینه اوده مقرراتی موقع اجرایه وضع ایتمک
خصوصنده عاجزدر . « بوادعاده بولسانلر مو ایله قانونه ی
بربرینه قارشدیوریورلر . حریت شخصیه سنه مالک ایکی شخص
بربرده بولندینی حالده همه حال مو فکری ظاهر اولور :
بونلرک هر بری قدرت فاطره نك کندینه بخش ایتدیکی قوای

مادیه و معنویه دن استفاده هغه مالک و دیکرینک بونوع حقوقه تجاوز ایتامک و وظیفه سیله مکلفدر . بناءً علیه ، کړک افراد بشر دن مرکب هیئتلرده ، کړک دولتلردن متشکل جمعیتلرده ، مطلقاً مور و وظیفه توأم اوله رق موجود بولنور . بونک ایچون مطلقاً قوه تشریعیه نک مداخله سته لزوم یوقدر . قانون حقک شکل ظاهریسی ، کسوه انتظام پراسیدر ؛ فقط حقک او کسوه دن محرومیتی معدوم اولسنی ایجاب ایتز . بعض اتم سالفهده حق تصرف قانونک تأییدسینه مظهر دکلدی ، مع مافیه سارقلر اغیر جزادن وارسته قالمزدی . برده حقوق دولک مطلقاً قوه تأییدیه دن محرومیتی ادعاسی دوغری دکلدر . علم تاریخ بر مواخذ محق ومنصف اولدیغندن ، دولتلر بونک دوچار مواخذ و تنقیدی اولماق ایچون حل اختلافات خصوصنده قواعد حقوقدن بستون تباعد ایتک استمز لر . شو صوک زمانلرده زیاده اهمیت کسب ایلان بین الدول مهم اصولی ایسه قواء تأییدیه نک اک معتزلرننددر . حکم اصولنک تطبیقده علاقه دار اولان دولتلر حکمک رأینی قبوله مجبور اولور و بر صورتله اختلافک حلنده قوته دکل ، حقه رعایت اولنور . بوجهله حل اختلاف اولندیغنک امشالی چوق اولوب ، اک مشهوری ۱۸۷۲ سنه سننده جنورهده اجتماع ایدن رآلاباما ایشیله مشغول اولان هیئت حکمیه در . اخیراً روسیه امپراطوری ایکسجی نیقولانک تکلیفی اوزرینه لاهه شهرنده اجتماع ایدن صالح قونفرانسی بین الدول تکیون ایده چک اختلافاتی صلحاً

تسویه چاشمق اوژره دائمی بر حکم هیئت تشکیله قرار
 ویرمیشدر. دیتک اولور که حقول دول، قواء تأییدیہ دن بستون
 محروم اولدیغندن واولسه بیله قانون شککنده مدون اولماسی
 حقک معدوم اولمستی ایجاب ائیمه چکندن، هر حالده موجوددر.
 مناسبات دولیه تزايد ایدوب بوکا متعلق بولسان قوانین
 احکامی ده متخالف بولمقدجه، مناسبات مذکورہ فی تعیین و
 قوانین بیننده کی فرقلری ازاله ایتک مابه الاشتغالی اولان،
 حقوق دولک لزوم وفائده سی تزايد ایدر. مناسبات دولیه نک
 کوندن کونه ترقیسی حسبیله هر دولتک دول سائر ایلہ تبعه سنک
 حقوقه رعایت ایتسی طبیعیدر. تبعه محلیه اجانب ایلہ اختلاطده
 بولمسه بالطبع هیچ براختلاف ظهور ایتمز و حقوق دول ده لزوم سر
 اولور. واقعا ازمنه قبل التاریخیه ذه افراد بشر همجنسی ایلہ اختلاطدن
 توقی ایدرک عادتاً حال انفرادده یشامعه باشلامش سه ده، جناب
 حق انسانی مدنی بالطبع اوله رق خلق بیوردیغندن، حال افراد
 و عزالت، افرادک بر آره یه طولانیملریله، جمعیات بشره منقائب
 اولمش، و، فقط جمعیات سائر ایلہ مناسبات خاطره کلدیکندن،
 اک اول مقروق دایمیه (مقروق عمومی و مقروق مخصوصه) ایلہ
 توغل اولمشدر. هیأت اجتماعیه انسانیه نک تکمیلی ایلہ اراضی،
 حکومت، قانون، عسکر تقرر ایدنجه هر بر هیئت سیاسیه
 امنیت واستقلالانی قومشورینه قارشی مدافعه و وقوعه کلن
 تجاوزاتی منع ایلہ برابر تکرر وقوعه میدان ویرمامک اسبابی
 تهیه ایتکی دوشونمش، وبوصورتله مقرونه دول رواج بولمغه
 باشلامشدر. انجق اقوام سالفه نزدنده حقوق دول ایکی هیئت

سیاسیه بیننده کی مناسبات حربیه دن عبارت اولوب ، بونلر عندنده مناسبات صلحیه همان مجهول دینه جک درجه ده واجنبیلر بک دون بر مرتبه ده ایدی . اقوام قدیمه نك اجانب حقیقه بسلدیکی حس عداوت تادین مبین اسلامک زمان ظهورینه قدر دوام ایتدی . دین اسلام ظهوریله برابر السانلرک حضور جناب باریده مساواتی و افراد بشرک درجه متساویه ده حائز حقوق اولدیغنی اعلان ایتسیله ، اون ایکی عصر صکره اوروپا حکما سنک تلقینه چالشدینی بر حقیقت عدلیه یی زمانزدن تام اون اوج عصر اقدم افکار اسلامیه ده تقریر ایلدی . بوصورتله ده اوروپا ده اجانب داخل ممالک قبول اولنمز و یا خود بر چوق معاملات استثنائی غیر محقه ده دوچار ایدیلیرکن ، ممالک اسلامیه ده بونلر دائما شریعت غرانک تحت حمایه مخصوصه سنده بولندیلر . بوکون وسائط نقایه نك کثرتیله اختلاطده کی مهولت حسنیله هریره بر چوق تبعه اجنبیه طاغلمشدر . بونلرک حائز اولدقلری حقوقی ، بولندقلری محالرده دخی ، دول متبوعه لری حمایه اتمک مجبور اولدیغندن ، دول مذکور نك شو حق حمایه سیله ملکی داخلنده بولندقلری دولتک حق حکمرانیسنی تألیف اتمک بر مسئله مهمه در ، که حلی حقوق دوله عاندر .

برده بتون هیئت اجتماعی بشر وحدت سیاسیه تشکیل ایدوبده جمله سنک قوانین و منافی بر اولسه ایدی اختلاف قلمز و حقوق دولک اسباب وجودیه سنک اک مهمی اورقده دن قالمش بولوردی . انجق بویله اولمدقدن بشقه حتی بر چوق مملکتلرده مختلف اصول و احکام قانونیه مرعیدر . از جمله

المانیاده تجارت و اصول محاکمات قانونلری بتون ایمپراطورلق داخلنده جاری اولمقله برابر ینه هیئت متحده بی تشکیل ایدن حکومتک قانونلری بشقه بشقه در . اوستریا قانون مدینسک بالمله احکامی مجارستان ، خرواتستان ، اسقلاوونیا ، وترانسیلوانیاده جاری دکلدر . نفس انکلتره ایله اسقوجیا و مستملکات اکثری مختلف قانونلره تابعدر . شمالی آمریکا حکومت متحده سیله اسویجره حکومتندن هر برینک قوانین خصوصیه سی واردر . لهستان ایله فنلاندیاده ، روسیه ممالکندن اولمقله برابر ، قوانین مخصوصه جاریدر . بالفرض دولتلر کندی ملکری داخلنده وحدت قانونیه تأسیسنه موفق اولسه لر بیله ، حکومت مختلفه نک اختلاف منافع وعاداتی قانونلرینک اتحادینه امکان برافتر . واقعا تابعیتک اکتساب و ضیاعی ایله تجارت بریه و بحریه متعلق قوانین احکامک هر ملکده بر اولسی آرزو اولنه بیلیرسده ، بعض قانونلر واردر که اقلیم وعاداتک وعائد اولدقلری قومک تشکلات سیاسیه واجتماعیه سک تاثیراتندن قورتوله مز . شو حالده بونوع قانونلر ایچون هر یه قابل تطبیق اوله بیله جک احکام آرامق عهت اولور . اشته قوانین احکامک بوجهله تخالفی بین الدول اختلافات حدوتنه سبب اولور ، که بو اختلافاتک تزیادی و دیگر طرفدن دولتلرک موضوعات قانونیه سی بیننده کی فرقلر حسبیله ، حقوق و منافع دولیه بی تألیف ایتک چارملرینی تحری ایله مشغول اولسی لازم کلن حقوق دولک لزوم و اهمیتی ناقابل رد وانکار اولدینی میدانه چیقار .

ازمنه سالفهده اخلاق وعادانك وممالك مختلفه آره شده كى مسافاتك تاثيريله بين الاقوام مناسبات همان مفقود كى ايدى. طبایع ائمه موجود اولان خشونت پیدرپی رهین زوال اولدیغه مبنی ، اوللری یالکیز قاتولوق دولتلره حصر وتطبیق اولنق استیلان حقوق دول قواعدی، وستفالیه معاهده سنك زمان عقدی اولان، ۱۶۴۸ تاریخنده پروتستان حكومتانده شمشیل ایدلمش فقط مع التأسف اوروپا لیلرجه دول اسلامیه نك بوندن استفاده سی ، سلطنت سنیة عثمانیه نك اوروپا هیئت دولیسه سنه تاریخ دخولی اولان، ۱۸۵۶ سنه سنده انجق ممکن اوله بیلمشدر. شوراسی کمال استغرابله شایان تذکاردرکه روسیه لی موسیو دومارتنس کبی ، بعض حقوق دول منتسبلری بوعلمی یالکیز اوروپا مدنیتی قبول ایتش اولان اقوامه حصر ایله بونك خارجنده قالان هیئات سیاسیه حقوق دول قواعدینك شمولی حالا انکار ایتك استیورلر [۱]. برقسى ايسه اقوام موجوده یی عیسوی وغیر عیسوی به بالتفریق ، حقوق دولدن استفاده حقنك انجق اقوام عیسویه عائد بولندیقنى ادعا ایدیورلر . حالبوکه احکامی افراد انسانیه به عائد و جمله سنه شامل اولان ، علم حقوق کبی ، برعلم جلیل القدرک اقسامندن بولسان حقوق دول قواعدینك فوائدینی یالکیز اوروپائی ویا عیسویلره حصر ایدوب ، بوندن اوروپا ویا عیسویت خارجنده یشایان دول واقوامی استئنا ایتك جائز اولدینی شهسز اولقله

de Martens, Traité de droit international, [۱]

برابر ، هر دولتک طرز حکومتی ده مدنیله لایق بر صورتده اولیق وبو وجهله علم حقوق دولک فوایدندن استفاده حقنی بحق ادعا اید بیلیمک لازمدر . اوروپا دولترینک دول اسلامییه وحکومات سائر شرقیه ایله یک اسکی زمانلردن بری معاهده عقد ایتدکری وبو معاهداتک صورت عقد وتنفیذنده حقوق دول قواعدینی کوزتدکری دریش ملاحظه اولنورسه تطبیقاتده قواعد مذکوره احکامک اوروپالی ویا عیسوی اولیانله شمولی ینه اوروپا دولترینک تحت اعتراف وتسلیمنده اولدینی کورولور . ذاتاً حقوق دولک اوروپالی ویا عیسوی اولیانله شمول وتعلقنی انکار ایدنلر یک محدود اولوب ، حقوق دول علماسنک اک مشهورلردن اولان پوفند ورف وبلونچلی کبی ، [۱] افاضل علما و، مونتسکیو [۲] کبی ، دقیقه سنجان حکما بونده اختلاف دار ومذهبک اصلاً تأثیری اولدینی واقوام وحشییه وارنجیه قدر بالجمله هیأت بشریه سیاسییه ایله اولان مناسباتده قواعد حقوق دوله رعایت هر دولت ایچون لازمه دن اولدینی بیان واثبات ایلمشلردر ، که بو حقیقت زمانزده کوندن کونه تسایم اولنمقده واوروپا مشاهیر ارباب تالیفی میاننده بونک طرفدارلری بر طرفدن چوغالقمده در .

دولت دینلن هیأت سیاسییه نک یکدیگریله اولان مناسبتلرنده قواعد حقوق دوله رعایت ایتلری لزومی اکلاشلدینی بر صرمده ، ایچلردن بعضیسنک یولسز حرکاتی کورلدیکی حالده

[۱] صفحه ۱۹۹، Bluntschli ; Droit international codifié,

[۲] Montes quieu, Esprit des lois

بونی دائره عقل وغدله ارجاع ایچون دول سائرته نك فعلیاته
 قالقشمیری ، تعیر آخرله اودولنك امور داخلیه سنه مداخله
 ایتلمیری جائز اولوب اولیه جنی مسئله سی مؤلفلرجه موضوع
 موقع بحث وتدقیق اولمشدر . فی الواقع ازمئه قدیمه ده قدرت
 ومكنت صاحبی اولان هر دولت کندنن ضعیف اولانلری
 تضییق ایدرک هر برامل وآرزوسنی اجرا ایتدیرردی . یقین
 زمانلره قدر دولتلر شویکدیگرینك امور داخلیه سنه مداخله
 یولتیقه سنی بعضاً ترویج ایتمشلردر . مع مافیه مداخله ، استقلال
 دول قاعده اساسیه سنه منافی اولدینی ایچون ، حقوق دولجه
 قطعاً غیر جائزدر . حقوق دول یالکز بین الدول جاری
 اولان مناسباته متعلق قواعدی احاطه ایدر . بومناسبات
 قواعد حقوقیه و تعامل وعادات دولیه یه موافق اولدقجه
 ودولتلرک افعال وحرکاتی سائرلرینك حاکمیت وبقالرنجه موجب
 تهلمکه اولدقجه ویا بر تعرض وتجاوز شکلی آلدقجه ، هیچ بر
 دولنك امور داخلیه سنه مداخله اصلاً جائز اولیوب [۱] ،
 هر دولت امور واداره داخلیه سنی استدیکی ومنفعته موافق
 کوردیکی صورتده وفقط ملکنده ساکن اولان افرادک حقوق
 وحریتنه تعرض وتجاوز اولماق شرطیله تنظیم وترتیبده کاملاً
 سربستدر . ذاتاً مداخله آنجق سائقه منفعتله وقوعه کله بیلیر ،
 منفعت ایسه حق تشکیل ایتمز . اکر مداخله برحقه مقرون
 اولسه ، تعیر آخرله بردولنك دیگر بردولت امور داخلیه سنه

[۱] Weiss, Traité élémentaire de droit international

حق مداخله سی بولنسه ایدی ، بوکا مقابل ده مداخله ایله تسایجی قبول ایتک وظیفه سی موجود اولمق لازم کلیردی .
 حالبوکه هیچ بردوات ایچون بویله بر وظیفه بولندیغنی تصویره امکان یوقدر . چونکه هیچ بر دولت دیکر لرینک منافی اغورنده کندی منافع خصوصیه سی قدا ایدهرک ، اوکا کوره خط حرکتی تعذیه مجبور اوله مز ؛ بویله بر مجبوریت استقلال دول قاعده اساسیه سی اخلاص ایدر . واقعا منقعلرینی تأمین واستحصال خصوصنده دولترک حق انکار اولنه مزسه ده ، منافی اخلاص ایدیلن دولت ایچون بوبابده مداخله دن بشقه مراجعت ایدهرک وسائط مفقود دکلدر . [۱] فی الواقع حقوق دول مؤلفری بیننده بیله دولتر ایچون حق مداخله نک وجودینی ادعا ایدنر بولنمش سه ده ، متأخرین علماء حقوق میاننده بو فکرک مروجی همان قالمامشدر . شمدی حقوق دولک بر طرفدن دائرة شمولنده کی وسعت تأیید و دیکر جهتن یالکز حیات خارجیة دولة اولان تأثیر و تعلقی تسلیم اولنمقدهدر .

مزاج و ماهیتی ایله کیفیت شمولانی بالاده ذکر ایتدیکمز حقوق دولک منافی دولترک مفروق تشریعه سی ایله تراضی دول و اراء ارباب تألیفدر . دولترک حقوق تشریعه سی جمله سندن اولان مفروق عمومیه Droit public ایله مالک اجنبیه سفرانک صورت اعزامی ، سفراء اجنبیه نی قبول حقنک داخل

ملکده کیمه عائد اولدینی و معاهداتک تنظیم و تعاطیسیله صاح و حربک عقدینه کیمک صلاحیتدار بولندینی تعین اولنور .
 مفروق مفروضه Droit privé برملکت داخلنده بولان اجانبک حقوق ووظائف ایله بونلرک منسوب اولدقلری قوانین مختلفه بیننده تحدت ایدن اختلافاتک صورت حلنی و اجانب حقننده محاکم محلیه نك صلاحیتی ایله محاکم اجنبیه دن صادر اولان حکملرک درجه تأثیراتی تصریح ایدر . مفروق مزایه Droit criminel ایسه قوانین جزائیه نك زمرلرده و کیملر حقننده جاری اوله جفنی و مجرمین اجنبیه نك نه کی خصوصاتده محاکم محلیه یه تابع بولنه جفنی توضیح ایلر . بوضورتله دولتلرک حقوق تشریعیه سی منابع حقوق دولک مهملرندن معدود اولورسه ده ، محاکدن صادر اولان مقررات ، او حقوقک وضع ایتیش اولدینی قانونلرک تطبیقاتی حکمنده اولدینی کی ، دولتلرک خط حرکتجه برر امثال تشکیل ایتدیکنندن ، مقررات مذکورده منابع حقوق دولک بوقسمنده بر موقع مهم اشغال ایدر .

حقوق ووظائف بختنده ، دولتلرده اشخاص عادیه کی شخصیتلرینه مالکدرلر . بناء علیه اشخاص بیننده کی مناسبات حقوقیه علی الاکثر طرفینک ضمنی ویا علنی رضا و موافقتیه حصول بولدینی کی ، اشخاص مغنویه دن عبارت اولان دولتلر آره سنده ده مناسبات حقوقیه رضا و موافقتیه حاصل اولور . بو موافقت یعنی تراضی دول ایسه یا علنی ویا ضمنیدر ؛ اکر موافقت دولیه احکام عهدیه یه مستند ایسه علنی ، واکر تعامل

دولیدن منبعث ایسه ضمنی اولور . موافقت علیه دولك اك
حائز اهمیت اولان شكل خارجى معاهده لردر . معاهداتك
موضوعى بك چوق اولوب ، بر طاقى عقد صلحه ویا تأسیس
اتفاقه متعلق ؛ بر قسمی مناسبات تجاریه و صناعیه نك تنظيمی
وافراد تبعه نك منافع شخصی سنك تأمینى خصوصاً لرینه ، و
بعضلری ده اعاده مجرمینه عائد اولور . بعض معاهده لرده ،
هر نه قدر ایکی دولت آره سنده متحدث بر اختلافك حانه
متداثر اولور سه ده ، یوقاریده ذكری سبق ایدن آلابام مسئله سی
حقننده انكلتزه ایله آمریکا حكومات متحده سی بیننده ۱۸۷۱
سنه سنده عقد اولئان معاهده كبی ، او قییلدن ظهور ایدن
اختلافاتك حلنجه مدار تطبیق اوله جق بعض قواعد مندرج
بولور . بعضلری ایسه منافع عمومیه یه متعلق خصوصاً نده
قواعد اساسیه وضع ایدر و ، بونلرده ماضیدن زیاده استقبال
نظر اعتبارده طوتلدیغندن ، بر چوق دولتلرك اشتراكه سبب
اولور . [۱]

- [۱] بوقییلدن اولان معاهداتك باشلیجه لری شونلردر :
- ۱ - حقوق بحریه یه متعلق اوله رق ۱۶ نیشان ۱۸۵۶ ده تنظیم
اولئان یارمن بیاننامه سی . بو كا اسپانیا ، آمریکا حكومات متحده سی
ومكسیقادن بشقه بالمله دولتمنده اشتراك ایتشدر .
 - ۲ - مجروحین عسکریه حقننده اوله جق معامله یه دائر ۲۲ اغتوس
۱۸۶۴ ده منعقد مهنوره وقابل اشتغال مرملر حقننده $\frac{2}{16}$ تشرین
ثانی ۱۸۶۸ ده منعقد بیرسبورغ مفارقه لری .
 - ۳ - حقوق صناعیه ، تجاریه و ادبیه نك حمایه سی ایچون متشکل اتحادلرایله
پوسته ، تلفراف و شکوکات اتحادلری .

موافقت ضمنیه دیمك اولان تعامل دولی به كلنجه ، بونك
حقوق دوله اولان اهمیتی مستغنی بیاندر . هر دولتك تعامل
داخلیسی وارسه ده ، بونكه تعامل دولی بیننده مهم بر فرق
واردر : تعامل دولی عادتاً بر مقارله ضمنیه دیمكدر ؛ تعامل
داخلی ایسه عرف و عاده مستند بر قانونه حکمنده در .
تعامل دولی بین الدول وجودی فرض اولسان بر موافقتدن
نشئت ایدر ؛ تعامل داخلی دول قوه تشریعیه دن صدوری
فرض اولسان بر امره مستند اولور . بناءً علیه تعامل دولینك
مناسبات دوايه ده کی حکم وقوتی نسبیدر ، حالوکه تعامل داخلی
قانون حکم وقوتی حائزدر . عادتاً مقاوله دولیه متابه سنده
اولان اشبو تعامل دولی تاریخدن ، قونفرانس وقونفرملر ایله
مذاکرات سیاسییه ضبطنامه لرندن ، مسائل خارجییه به دائر
مجالس عمومیه ده جریان ایدن مذاکره لرندن ، خارجییه نظارتلری
بیننده تعاطی اولسان تقریر لرندن ، خارجییه نظارتلری جانبندن
ممالک اجنبیه ده بولسان سفرایه ارسال اولسان محررات عمومیه دن
استنباط اولنور .

غرو چيوس ، پوفندورف ، هوبنر ، وائل ، بشام کی
علماء حقوق ایله مانجینی ، وویتون ، دودلی فیلد ، وایس کی
حقوق خصوصیه دول متوغللرینك آناری ده علم حقوق دولك
منابع مهمه سندن معدود اولمق طبعیدر . بوکی ارباب تألیفك
مدوناتنده کوزولان تدقیقات فیه مناسبات دوايه ده حلی جای
تردد اولان بر حقوق نقاط مهمه حقیقه برز منهاج حائز
الاعتباردر . بونلرندن بشقه یکریمی ، اوتوز سنده بری اکثر

ممالك متمدنه ده تشكىل ايدن و منحصرأ علم حقوق دوله متعلق
تدقيقات و تتبعات ايله اشتغال ايليان جمعيات علميه نك ممالك
مختلفه نك موضوعات قانونيه سى و دول متمدنه نك مناسبات
جاريه سى حقه معلومات مدققانه يى حاوى نشر ايتديكى مجموعه
ورساله لرده ، مندرجانلر نيك اهميت علميه سى اعتباريله ، منابع
حقوق دول مياننده آنار مؤلفيندن پك ده كرى قالمز . بونلردن
بالچيقانك غان شهرنده متشكىل (حقوق دول جمعيتك) نشر
ايتديكى *مقرون دول و اداره عمرله مجموعه سى* Revue de
droit international et législation comparée ايله حقوق
دولك اصلاحي و قانون شكلنه افراغى ايچون انكلتره ده متشكىل
جمعيتك لوندرده هرسنه نشر ايتديكى اجتماعات سنويه لايحه سى
Report of the annual Conferences وپارسده ۱۸۷۴ سنه -
سندن برى موسيو قلوته معرفتيله نشر اولنان *مقرون مخصوصيه*
Journal du droit international privé *دول غزنه سى*
بالخاصه شايبان ذكردر .

هيچ بر دولت احتياج و مناسقى ايله قابل توفيق اوله حق
صورنده اداره عدليه سنى ترتيب ايتك اقتدارينى حائز اولمديجه
مستقل عد اولنه مز . بناء عليه هر دوات مواد حقوقيه و
جزائيه ده قانونلرينك درجه تأثيراتى ، اموال منقوله و غير
منقوله نك صورت تصرف و ضياعنه متعلق احكام عموميه يى ،
اشخاصك احوال مدنيه سى ايله بوندن ظهوره كن تعهدات
و حقوق و وظائفك معتبر عد اولنوب اولنماسنه مقتضى شرائط

عمومیه بی ، حاصلی قوه عدلیه نك اجرا و تنفیذینه متعلق كافة خصوصاتی تعیین ایتك حقنه مالك اولمق لازم کلیر . بر دولت کندی ملکی داخلنده یو حقوقی هیچ بر مانعیه تصادف ایتکسزین اجرا ایدر ؛ تحت اداره سنده بولنان اراضی ایچنده کی بالمله اشخاص و اشیا ایله او ملکده اجرا اولنان افعال حقنه یو حقوقی تطبیق ایدر ؛ بالکیر دولتک یرلی اهالیسی دکل ، او ملک داخلنده ساکن اولان اجنبیلر دخی بوقوه عدلیسه یه تابعدرلر . دولت کندی ملکی داخلنه اجنبیلرک دخولنه مساعدنه ایتکله بولنلرک اوراده بولندقلری مدتجه ضرر وزیان و یاسوء معاملیه دوچارارلیه جقلریخی کندیلرینه تأمین ایتمش اولور . بوندن بشقه ، اجنبیلرده تابع اولدقلری دولتک حمایه سنه مراجعت حقنی محافظه ایدرلر ، و دولت متبوعه لری ، بولنلر اوزرنده اساساً موجود اولان حقوقک هیچ برندن واز کچمدیکی ایچون ، کندیلری ملکک خارجنده بولندقلری حالده دخی ، قانونلرندن بعضیسنک تنفیذ احکامنی و بعض وظائفک اجراسنی بولنلر دن طلب ایده بیلیر . دولتلرک حق حاکمیتلری تماماً مطلق و خارج حدوده تجاوز ایتماکله مقید اولمیدیکی ایچون ، دول اجنبیه دن صادر اولان قوانین و اوامرک حدود خارجنده حکم و قوتی اولمیدیکی ادعا اولنه من . حق حاکمیتک بویولده محدود و مختصر عد اولنسی دولتلرک بر برلرینه قارشى اولان حرمت و رعایتلرینه و منافع دولیه یه منافی اوله جفتدن ، بعض احوالده قوانین اجنبیه نك تحت تأثیرنده حاصل اولان مناسباته رعایتیه مجبور اولورلر .

اصل حقوق نقطه نظرند هر دولتک قانونلری یالکز
 کندى ملکی داخلنده جاری اولمق لازم کلیر و هیچ بر دولت
 مستقله ملکی داخلنده اوامر و اعلامات اجنبیه نك اجراسنه
 مساعدیه مجبور اولمزهده ، اوامر اجنبیه نك احکامی ملک
 صاحبی اولان دولتك حقوق و منافعجه تعرض میدانه
 کتیر مزسه بونلرک اوراده جریان نفوذینه مانع اولماق لازم
 کلیر . مع مافیه دولترک شوقوه تشریعیه وعدلیه لرینک خارج
 ملکده اجرایی بعض تقیداته تابعدر .

بعضاً بر کیمسه کندى مملکتی خارجنده املاک صاحبی
 اولور و یا خود مقاوله عقد ایدر ، یا خود محافظه حقوقی ایچون
 اقامه دعوی ایلر . علی الاکثر دولترک قوانینی یکدیگرندن
 فرقی بولندیغدن ، او کیمسه نك تابع اولدینی دولته املاکک
 بولندینی و یا خود تعهداتک عقد اولندینی مملکت متصرفی اولان
 دولت بیننده قوه تشریعیه و منافع عمومیه جه اختلاف Conflicts
 ظهور ایدر . حلّی حقوق دوله تعلق ایدن شو اختلافلری
 نظر اعتباره آلدیغمز حالده بونلرک اینکی به انقسام ایتدیکنی
 کوریرز : بعضاً اختلاف منافع عمومیه نشئت ایدر ؛ حقوق
 عمومیه عائد بر مسئله نك ، حاکمیت ، تحدید حدود ، عقد صلح ،
 اعلان حرب ، حق سفارت کی خصوصاتک ، حل و تعینی ایجاب
 ایدر . بو حالده میدانده بولنان منافع شخص معنوی اعتبار اولنان
 دولتك منافع اولدینی ایچون دولت اونامه حرکت ایدر .
 بعضاده بالعکس اختلاف منافع خصوصیه به متعلق اولور :
 بر فرانسر بر مملکت اجنبیهده تأهل ایتسه بواز دواجک مقبولیتی

هانکی قانون ایله تعیین اولنه جق ؟ بونک شکلی ، شرائطی و تأثیرات قانونیه سنی تعیین ایده جک اولان قانون فرانسز قانونیی یوقسه اجنبی قانونیمیدر ؟ بر انکلیز فرانسه ده وفات ایده رک بر طاقم اموال غیر منقوله ترک ایلسه بونک متروکاتی حقنده هانکی قانونک احکامی جاری اوله جق ؟ متوفانک تابع اولدینی انکلیز قانونیی یوقسه اموالک بولندینی محک قانونی اولان فرانسز قانونیی اجرای حکم ایده جک ؟ بو خصوصانده دولت آنجق تبعه سنک منافع خصوصیه سنک محافظی صقیله نزاعک حلنه مداخله ایدر . یوقاریکی فرضده اولدینی کی ایکی حاکمیت یکدیگرینه مقابل بولنور . بناء علیه بونده ده اختلاف Conflit international واردر ، یالکیز موضوع بحث اولان منافع بشقه در . ایشته بوفرق حقوق دولک ایکی مهم قسمنه مقابله در ، که اولرده مفروض عمومی *Droit public* و حقوق خصوصی *Droit privé* در .

اختلاف منافع عمومییه متعلق اولدقجه بونک حلی مفروض عمومی دوله *Droit international public* عائددر ؛ بالعکس اختلاف منافع خصوصییه دائره سنده محصور قالیرسه حلی ایله مفروض مخصوصیه دول *Droit international privé* مشغول اولور [۱] .

شوحالده حقوق خصوصیه دول ، پارس حقوق دارالفنونی معلملرندن موسیو آندره وایسک تعریفه نظر آ ، « قوانین

خصوصیه لرندن ویاخود تبعه لرینک منافع خصوصیه لرندن دولای ایکی حاکمیت بیننده ظهوره کله یلن اختلافاتک حلتیه تطبیق اولسان قواعدک هیئت عمومییه سی در» [۱] .

علمای حقوقدن موسیو فرانچوده پانیه حقوق خصوصیه دولی « افرادک مناسبات خصوصیه لری سببیه مختلف دولتارک قوانینی یکدیگره تقابل ایتدیکی زمان بونلرک هر برینک دائرة حدودینی تعیین ایدن حقوقدر . » [۲] دیه تعریف ایتشدیر .

موسیو دومارتنس ایسه « بین الدول مناسبات خصوصیه مختلف دولتلره تابع اولان اشخاص بیننده کی مناسبات ایله معاملات عدلیه ده تطبیق اولنه حق قانونی تعیین ایدن قواعدک هیئت مجموعه سیدیر . » طرزنده بر تعریف در میان ایلمشدر .

اشبو تعریفادن و علمای حقوقک دها بو بولده کی افاد اتندن ویوقاریده اولان ایضاحاتندن ده استنباط اولنور ، که حقوق خصوصیه دول بر دولتک ممالک اجنبیه ده بولان تبعه سیله کندی و برده کندی ملکنده ساکن اولان تبعه اجنبیه ایله ینه کندی آره سنده کی مناسباتک تعییننه اساس اولان قواعدی بزه تعلیم ایدر . بعض مؤلفلرده « مختلف تابعیتده بولان اشخاص بیننده کی مناسباتی » تعیین ایتدیکنی ادعا ایتشه لردن . حالبو که منافع خصوصیه نک تقابلندن متحدث اختلافات دولیه نک جمله سی بوفاده احاطه ایدمیز . مثلاً ، بالاده ذکر اولسان مثاللرده

Andre Weiss, Traité élémentaire de droit [۱]

international privé. Paris, 1890 ۲۲ مقدمه صفحه

Précis du droit international privé, ۱۸ [۲] صفحه

فرض اولادینی اوزره ، بر مملکت اجنبیهده تأهل ایدن ایکی فرانسیزک نکاحلرینک تابع اوله جنی شرائط ایله بونک تأثیراتی تعیین ایتک حقوق خصوصیه دوله عائد اولدینی شبهه سزدر ؛ حالبو که طرفینک ایکسی ده مختلف دکل بر تابعیتده در . کذا فرانسهده وفات ایدن برانکلیزک متروکات غیر منقوله سنک ، ینه انکلیز اولان ، ورثه سی بینده صورت تقسیمی هانکی قانونه تابع اولمق لازم کله جکسی تعیین ایتک — تابعیت مختلف اولما مقله برابر — ینه حقوق خصوصیه دوله عائددر .

اشته بویولده ایضا حنه جالدشیلین حقوق خصوصیه دول علاقه دار اولان دولتلرک ضمنی ویا علی موافقتلریله ماکلرنده جاری اوله حق احکام عدلیه یی کورتر . بوموافق قوانین اجنبیه نک یا جمله سنه ویا خود بر قسمنه شامل اولور . علناً موافقت یا قانونلریله ویا خود بین الدول تعهدات ایله اظهار اولنور ؛ ضمناً موافقت صلاحیتدار اولان مأمورین عدلیه ویا اداره نک حکملرندن ویا خود ارباب تألیفک رأیلرندن استنباط اولنور . مأمورین ومحاکم قوانین اجنبیه یی تطبیقه موافقت استدکاری حالده اجرامی متحتم بروظیفه یه متابعت اتمش اولیوب ، منافع متقابله مطالعانه تابع اولمش اولورلر . اشخاص حقنده اولدینی کبی ، دولتلر ایچون ده مالک ساثره قانونلرینک تأثیرات خارجییه سنی انکار اتمامک موجب منفعت عظیمه در . فی الواقع بر دولت تبعه سی دیگر دولت تبعه سیله عقد روابطدن هیچ بر وجهله منع اولنه مز و بر محاکم قانونلرنجه معتبر اولان برشیانک ، اختلاف قوانیندن طولانی ، دیگر بر محله تأثیر سز عد اولنسی کبی

تجارت و مناسبات دولیه چه مضر هیچ برشی اوله من . دولتر ایچون بویولده برمساعده منفعتلری محافظه ایله لدی الحاجه معامله متقابله دن استفاده خصوصنده تأمینات مقامنده در ؛ افراد ایچون ایسه معاملاتده سربست اولمقده وعقد ایتدکاری تمهدات ایله کنیدیلرینه قارشی تنظیم اولتان مقاولانک مقبولیتی امرنده برسهولتدر .

اشته بومطالعادن قوانین اجنبیه احکامنک داخل ملکده مرعیتنه دولترجه ضمناً موافقت اولنسی کیفیتی نشئت ایلمشدره . بعض دولتر ، معامله متقابله یه زیاده سیله رعایت ایدرک تبعه لری خارجه نصل معامله کورر ایسه کنیدی ملکتلری داخلنده بولتان تبعه اجنبیه حقنده ده اویولده معامله ایدرلر ؛ دیگرلری ده قانونلرینک بعضلرینه یالکز تبعه لرینه مخصوص اولمق صفتی ویرلر واوندن اجابی استثنایدرلر . مع مافیه شوراسی محققدر که زمانمزد دولتر کنیدی ملکری داخلنده ، حقوق حاکمیتلری ایله تبعه لری منافعنک مستلزم اوله بیله جکی بعض قیود تحتنده اوله رق ، قوانین اجنبیه نک تطبیقی اساساً قبول ایدیورلر .

قوانین اجنبیه بردولتک حق حاکمیتنی ویاخود تبعه سنک منافعی اخلال ایدرسه ویاخود امنیت داخلیه سنی ، تبعه سنک سعادت حالتی ، قوه عدلیه سنک اجرا آتتی سکتهدار ایلرسه دولت اونک تطبیقنه مساعده ایدر من . بوندن بشقه ، انکلیز ارباب علم حقوقدن فیلمورک قولنجه ، بر قانونک شکل وحالی برملکت اجنبیه ده تطبیق اولمنغه مساعد بولمنزه او قانون تطبیق

اوله میه جنی کی ، اعاده مجرمین معاهده لرینک تعیین ایتدیکی
بعض تعدیلات مستثنا اولمق اوزره ، بر دولتک قوانین جزائییه سی ده
دیگر بر دولت ملکنده جاری اوله مز .

دولتلك احكام قانونیه سنك کیفیت شمولی و جریان تفوذی
حقنده باشلیجه اوج قاعده یه متابعت اولنور :

اولا هر دولتک قانونلری کنندی ملکی داخلنده بولنان
اشخاص و اشیانك جمله سی حقنده جاریدر ؛

ثانیا بر دولتک ملکی داخلنده ، موقتاً اولسون ، ساکن
اولان اشخاصك جمله سی اودولتک تبعه سنندن عد اولنور ؛

ثالثاً بر دولتک ملکی داخلنده کنندی قانونلرینه توفیقاً
عقد اولنان هر بر مقاوله — دیگر دولتلك کرک کندیملری کرک
تبعه لری حقنده هیچ بروجهاه محذور و مضرتی داعی اولدیغی
حاله — هر یرده مقبول و معتبر عد اولنور .



برنجی باب

تابعیت

برنجی فصل

مطالعات عمومی

تابعیت « بر مگر قومك اجزا سندن بولمق اعتباريله بر شخص
ويا بر شيدك صفتيدر . » [۱] ديه تعريف اولمشدر . بوتعريفى
ايضاح ايمك استر مەك دبرز كه تابعيت بر شخصك ويا خود
بر شيدك منسوب اولدينى هيئت اجتماعيه يعنى دولت ايله حقوق
ووظائف متقابله جه اولان روابط و مناسباتى تعيين ايليان
صفتدر . تعريفده شخص وشى دنيلمسى يالكز اشخاصك دكل
ايشيانك دخى تابعيتلى اولمى سبيله در ؛ چونكه بر كيمسه نك
تابعيتى دينلديكى كى ، بر شركتك ، بر ملكك ، بر شمند و فرك ،
بر سقيمه نك ، تابعيتى دخى دنيلير . بوراده موضوع بحث اوله حق
اولان تابعيتى اشخاصك صفت تابعيتلى در .

هر شخص ، مدنى بالطبع اولمق سبيله ، هيئت خارجيه
ايله اولان مناسباتنده هيئت اجتماعيه يى تركيب ايدن افراد ايله

آزجوق مناسباتده بولمق وکنديسنك اونلر ايله روابطی اولمق
طبیعیدر: قرابت ویا صهریت مناسبتیله عائلهیه ، اقامتگاهی ايله
شهره ، تابعیتی ایلده هیئت اجتماعییه مربوطدر . بر شخصی
هیئت اجتماعییه ترکیب ایدن افراد ویرلمش اولان حقوق مدنییه
و سیاسیه دن استفاده ایتمه و دولتک وضع ایتدیکی وظائفی ایفا
ایلمکه سوق ایدن تابعیتدر .

تابعیت کله سنك السنه اجنییه ده مقابلی اولان Nationalite
لفظی ملت معناسنه اولان Nation کله سندن مأخوذ اولوب
بوده لاینجه Natio و Natus لفظلرندن مشتقددر . بولفظلر
لغتجه تولد معناسنی متضمن اولدیغندن ، بر قومك افرادی بیننده
ولادتجه مناسباتی اراشه ایدر ، شو حالده قوم بر آرض اوزرنده
ساکن ، بر نوع قوانینه تابع و بر حکومتك تحت اداره سنده مجتمع
بر طاقم افرادك هیئت مجموعه سی دکل ، ممالك مختلفه یه داغلمش ،
حکومات متعدده اداره سنه عرض تبعیت ایتمش اولدینی حالده
جنس و مذهب و منفعتلرینك بر درجه یه قدر متحد اولمسی
کندیله رینی بر برینه دوغری توجیه ايله بر مقصد عمومی یه خدمته
سوق ایدن خیالی بر جمعیت بشریه در . قوم بو صورتده نظر
اعتباره الندینی حالده بالطبع حقوق دول اشخاصدن اوله من .
بونی ترکیب ایدن افراد بیننده موجود بولسان رابطه سیاسی
دکل ، طبیعی و معنوی بر رابطه در که هر شیئه غلبه ایدر .
علی الا اکثر حکمانك و بعضاً رجال دولتك قلملرندن صادر اولان
قوم و قومیت (تابعیت) فکرلری بویولده در . کله نك مشتق
منه ی اعتباریله قوم و قومیتك بویولده تلقیسنی الك زیاده ترویج

ایدنلر ایتالیائی ارباب علم حقوق اولمشدر . بونلر بوکی روابط معنویه ایله یکدیگره مربوط اولدینی حالدہ ممالک مختلفہ داغلمش اولان افراد انسانیه نك هیئت عمومیه سنه ملت دید کلرندن ، بردولتک تحت تابعیتندہ بولنان اشخاصه همشری و تبعه نك دولت متبوعه لرله اولان ارتباطلرینی ارأه ایدن صنفه ، ملیت و تابعیت رینه همشریه نك اطلاق اولمنسی تنسیب و توصیه ایدرلر . حالبوکه زمانمزدہ ملت کله سنك معناسی تعین ایتیش و بوکله تعبیرات حقوقیه صره سنه کچمشدر . [۱]

ملت کندینی احاطه ایدن و کندینه مشابہ اولان هیأت اجتماعیه ایله مناسباتندہ ، حقوق دولجه مدار اشتغال عداولنه حق ، حقوق ووظائف احرازینه مستعد بر شخص مغنویدر ؛ روابط معنویه اساسلرینه مستند اولان بر جمعیت خیالیه ده ایسه بویله حقوق ووظائف احرازینه مستعد صورته بر شخصیت تصورینه امکان یوقدر ؛ بناءً علیه حقوق دولجه معروف اولان ملتلر شکل خارجیلری دولت طرزنده بوانانلردر . اونك ایچون ملت و دولت حقوق دول نقطه نظرندہ بردر . بوندن دولایی بر طرفدن ملت Nation و دولت Etat دیگر طرفدن ملیت ، تابعیت Nationalité ، رعیت Allégeance, Sujétion کلمات

[۱] بومدعانك دلائل تأییدیه سندن اولق اوزره ایتالیا قانون مدینسنك شو فقره سی ذکر اولنور : « افرادك احوال مدنیه سی و صلاحیتی ایله عائله مناسباتی منسوب اولدینی ملتك قانونلری موجبجه تعین اولنور . »

مترادف دندر . [۱] بوکا مبنی تابعیت افراد تبعه سنک هر برینی دولته ربط ایدن رابطه در .

تابعیت طرفین بیننده عقد اولنش بر مقاوله حکمنده در که بونده طرفین دولت ایله بونی ترکیب ایدن افرادک هر بریدر . دولت طرفندن بویه بر مقاوله نك وجوده کلمسنه موافقت اولمسی یا ، مملکتنده ساکن اجنبیلردن تولد ایدن چوجقار ایله تابعیتدن چیقمش اولان تبعه اصلیه دن میدانه کلن اطفال کی ، تحت تابعیتنه قبوله صالح کوردیکی اشخاصه بر طاقم شرائط تحتنده اوله رق صفت تابعیت اعطاسنی متضمن قانون نشرندن ، یا خودالحاق اراضی معاهده لرندن و یارئیس دولتک امریله تفویض تابعیت اولمسندن نشئت ایدر . تابعک موافقتی ایسه یا علنی و یا ضمنی اولور ، یعنی یا کندیسنی تابعیتی طلب یا کندینه تفویض اولنان تابعیتی قبول ایدر ، که احوالده موافقت علنی اولمش اولور ؛ و یا خود قانون و یا معاهده نك کندینه بخش ایتدیکی فوائددن استفاده ایلمکدن امتناع ایتمز ، و بر تابعیت جدیده اکتسابنه چالیشمز ، که بوده ضمناً موافقت دیمک ارلور . بوصورتله عقد اولنان مقاوله طرفین ایچون بر طاقم حقوق و وظائف تولید ایدر . فی الواقع دولت تبعه سنه قانونلرینک حمایه سنی بخش ایدر و بخش ایتمکه مکلفدر . تبعه سنک حقوق مدنیه و سیاسیه سنی طانیر ، و هر کسی بونلره رعایتیه مجبور قیلار . دولت تحت

A. Weiss, Traité théorique et pratique de [۱] droit international privé, Paris, 1892..

تابعتنده بولنان افرادك هر بری حقنده كوسترديكي شو حايه
 حدود ملكيه سی داخلنده قالمز ؛ خارج ملكده دخی حكمی
 جاری اولور . حریت شخصی ، حریت مذهبی ، حق
 تصرف ، حق تجارت ، اقامه دعوی ایتك حق کبی ، بر
 طاقم حقوق واردر که بونلرک اجرایی یالکزر بر ملک داخلنه
 منحصر اولمز ، فردك اقامت ایتدیکی هر محله مرعی الاجرادر .
 دولت بو حقوقی تبعه سنه ، هر زرده بولنورلر سه بولنسونلر ،
 معاهدات واسطه سبله تأمین ایدر ؛ ایجابی حائنده سفرا
 و شهیندرلری معرفتیه مأمورین اجنبیه قارشى تبعه سنك و کیلی
 صفتنده بوانور ، و محاربه و سائر قاریشقلق یوندن تبعه سنك
 دوچار اولدینی ضرر و زیانك تضمینی طلب ایدر .

بوکا مقابل دولت حق خارج مملکته چیقمش اولان
 تبعه سندن بیله قانونلرینك جمله سنه تماماً رعایت اولمنسی طلب ،
 و کندیلرینك صلاحیت و عاقله جه اولان مناسبتلرینی بو قوانین
 ایله تعیین و اداره و قباحتلرندن دولای حققرنده جزا ترتیب
 ایلمك حقنه مالکدر ؛ کندیلرینی خدمات عمومی ایله مدافعه
 مملکت خصوصلرینه اشتراکه اجبار ایدر .

هرشیده اولدینی کبی ، تابعیت خصوصنده بر دولت ایله
 افراد تبعه دن هر برینك حقوق و وظائف متقابله سی واردر .

جمعیت محلیه قارشیدنده اجنبیه نسبتله تابعك حقوقی ده
 واسع و وظائفی ده مهم اولسی بونلرک بالاخیار قبول ایتمش
 اولدینی بر مقاوله دن انبعاث ایتسندن ناشیدر . مع مافیه بو کیفیت
 اختیار مطلق دکل ، مقیددر . واقعا تابعیت میرا کیسبه تحصیل

اوله مز؛ آنجق هر کیمه نك تابعیتی اوطن مقتضیر ؛ فقط هیچ
کیمه نك ایکی تابعیتی اوله مز .

تابعیت کیمه یه تحمیل اوله مامسی بو خصوصه دولتک
تحدید اقتدارینی تضمن ایتمز . دولت ، ملکی داخلنده حاکم
مطلق اولدیغندن ، تابعیتک استحصال و ضیاعنه متعلق قوانین
و قواعدی وضع و تأسیسده سربستدر ؛ بوکا قارشی قوانین
اجنبیه نك احکام متضاده سی حائز تأثیر اوله مز . مملکتده متولد
ویا متمکن هر بر کیمه یه تفویض تابعیت ایده بیلیر . بالمقابلیه تبعه
اصلیه ده تبدیل تابعیت ایده رک بر صفت جدیده احراز ایتک
صلاحیتی حائزدر .

ازمنه قدیمه ده بعض ممالکده ، ومثلاً اسپارطه ده ، تبعه
محلیه نك ترك دیار ایده رک ، ممالک سائر یه کیتملرینه وبوصورتله
بر صفت جدیده کسب ایلملرینه مساعدده اولمز دی . یقین وقته
قدر انکلتزه و شمالی آمریکا حکومات متحده سی ایله اسویچره نك
Allégeance perpétuelle تبعیت دائمه
اصولی جاری ایدی . روسیه ده ایوم بواصول موجوددر .
انکلتزه و آمریقا ده ، حکومت اسکی دره بکک مؤسساتی
استخلاف ایتدیکنندن ، واسالک سوزره نندن و تابعک متبوعندن
فک ارتباطی انجق وفات ایله ممکن اوله بیله جکی فکری رواج
بولدینی جهتله ، تبعیت دائمه یرلشمش ایدی . بوکون اصول
مذکوره اسویچره و انکلتزه ده کلیاً ترك اوله رق ، هر کسک
تبدیل تابعیت ایتک صلاحیتی تصدیق اولمش ، و آمریقا ده ترکی
یا قلاشمشدر . روسیه ده ، ۱۸۶۴ سنه سننده نشر اولنان قانون

حکمنجه ، روسیه تابعیتنه داخل اولان اجنیلر تکرار ترک تابعیت ایله اجنبی اوله بیلیرلر؛ آنجق عن اصل روسیه لی اولانلرک تبدیل تابعیت ایتملرینه هنوز مساع قانونی یوقدر . سلطت سینه دخی داخل اولدینی حالده ، ممالک سائرده تبعه نک ، بعض شرائطه توفیقاً ، تابعیت اصلیه لرینی ترکه تبعیت اجنبیه احراز ایتملری جائزدر .

شوراسی نظر دقتدن دور طوتلماق اقتضا ایدرکه تبعه محلیه دن برینک ترک تابعیت ایتمسی بعض شرائط قانونیه یه تابع اولمق طبعیدر . مثلاً فرانسه ده مکلفیت عسکریه داخلنده اولدینی حالده خدمت عسکریه سنی ایفا ایتماش اولانلرک بر اجنبی دولت تابعیتی اکتساب ایتملرینه مساعده اولمز . برده تبعه محلیه دن بعض کیمسه لرک علی الانفراد تبدیل تابعیت ایتملری جائز اولسه ده ، بر جوق خلقک بردن تابعیتدن حقیقسی اصلاً تجویز اولنه مز ؛ بو حال ، قانون دیمک اولان ، مقصد دولته منافی اولور ؛ بوکا مساعده اولنسه جمعیتک دوامی ممکن اولمز . [۱]

افراد بشر ، بر مقتضای خلقت ، حال انفرادده یشایه میه . جفتدن ، همه حال بر جمعیت انسانییه ، بر دولته منسوب اولمق لازم کلیر . انسان عاقله سز اوله مدینی کی ، وطن سزده اوله مز . مناسبات بشریه حیات خارجه نک لوازمیدن اولوب ، آنجق بر دولته منسوبیتله کسب انتظام و کمال ایدر ؛ بناء علیه هر شخص ایچون بر صفت تابعیت بولمق طبعیدر .

مع مافیه ، برصفت جدیده استحصال ایتمکسزین ، دولته اولان روابطی خللدار اولمش وطنسز اشخاص نادر دکلدور . مثلاً تبعه سنک دولت اجنبیه خدمت عسکریه سنه دخولنی منع ایدن و بوحالده بولنائلری تابعیتدن اخراج ایلان بر دولت تبعه سندن برکیمسه بر مملکت اجنبیه ده خدمت عسکریه در عهده ایده رک دولت متبوعه سنک تابعیتدن چیقار و فقط دیگر بر تابعیت استحصال ایتمزسه ، او کیمسه تابعیتسز ، وطنسز در . اسویچره قانوننک آلمانجه دن اقتباساً ، Heimathlos مابماندور یعنی وطنسز تسمیه ایتدیکی ، بوکی اشخاصک بر مملکتده بولنمسی محاذیر عیدیه نی موجب اولور . بونلر قانونک تبعه محلیه تحمیل ایتدیکی وظائفدن قورتلحق ایچون ترک تابعیت ایدر و بر تابعیت جدیده اکتساب ایتمزلر ؛ مع مافیه حمایه قوانیندن ده محروم قالمزلر . بولندقلری مملکته نسبتله اجنبی معامله سی کوررلر ؛ فقط ، هیچ بر دولته منسوب اولمدقلرندن ، هیچ بر یرده تبعه عائد وظائفه ، مدافعه مملکت کی خصوصاته اشتراک ایتمزلر .

بوکی کیمسه لرک بر مملکتده تکثری مضر اوله جفندن ، ممالک مختلفه ده بونلره قارشى چاره لر تحریسنه توسل اولنمشدر . مثلاً فرانسه ده ۱۸۸۹ سنه سنده نشر اولان قانون موجبجه ، اوراده تولد ایدن و مقیم اولان بر اجنبینک ینه فرانسه ده تولد ایدن چوجقلری فرانسه تبعه سندن عد اولنور . آلمانیا ده تابعیتی بولنمیان هر شخص سن رشده بلوغندن اعتباراً بش سنه ویا ازدواجندن صکره التی هفته المانیا طیراغنده اقامت ایدرسه

ویا خود اوراده ازدواج ایدر ویا تولد ایلر سه المانیا تبعه سندن
عد اولنور .

ممالک عثمانیه داخلنده بولنان هر کیمسه بر دولت اجنبیه
منسوبیتنی اثبات ایتدکجه قانوناً عثمانلی عد اولنور [۱] بناءً علیه
ممالک عثمانیه ده حایماتلوز بولنه مز .

برده ممالک عثمانیه ده ، هر اجنبینک داخل مملکت کله -
بیلیمسی ایچون منسوب اولدینی دولت مأمورلری طرفندن
ویرلمش و حکومت سینه شهیندرلری جانبندن تصدیق اولنش
پسپورطی حامل اولسی مقتضی اولوب ، پسپورطسز کسه لر
داخل مملکت قبول اولمدقلرندن و بویله وطنسز سرسری
اشخاصک دولت متبوعلری اولمدینی جهتله یدلرنده پسپورط
دخی بولنه میه جفندن ، بوکی کیمسه لر ممالک شاهانه یه بالطبع داخل
اوله مز لر .

برکیمسه ، ایکی ویاده زیاده شرکت تجاریه و مالیه داخل
اوله بیلیرسه ده ، ایکی دولتک بردن تحت تابعیتنده بولنه مز .
فرانسه ارباب تألیفندن پرودونک Proudhon قولنجه « بر
کیمسه نک ایکی والده سی اوله مدینی کی ، ایکی وطنی ده اوله مز » .
خدمت عسکریه ایفامی امرنده بر شخص بر آنده ایکی دولته
بردن خدمت ایدم مز : منسوب اولدینی دولتلر بیننده حرب
ظهوره کلسه هانکیسنک اردولرینه داخل اوله جنی تعیین
اولنه مز و برینک حرکات حربیه سینه اشتراک ایتسه دیکری
نظرنده بحق اهانت ایتش عد اولنور .

[۱] تابعیت عثمانیه قانوننامه هایونی : طقوزنجی ماده .

یونانستان قدیمده بر شخصك ايكي تابعيتي بولمسي ، تعبير
آخريه بر آدمك ايكي دولت تبعه سندن اولمسي جائز ایدی .
آنحق زمانمزده بوكا مساعده اولتمز . آلمانيا كي ، آمريقا
كي ، اسويچره كي ، اتحاد حائده بولنان دولترده بر كيمسه نك
ايكي تابعيتي اولديغي واقعدر ، حتی اورالرده تابعيت ايكي قسمدن
مر كيدر . فقط - ايلريده ايضاح اولنه جني اوزره - اورالرده
جاري بوكيفيت تابعيتك تعدادي ديمك ذكلدر .

دولت عليه بر كيمسه نك ايكي تابعيتي بولمسنه مساعده ايتمز .
تابعيت عثمانيه قانوننامه هايوني حكمنجه ، تبعه عثمانيه دن برينك
تبدیل تابعيت ايله بر تبعيت اجنبيه احراز ايتمسي حكومت سنیه نك
رخصت رسميه سنه منوط اولوب ممالك اجنبيه ده بلارخصت
تبدیل تابعيت ايدنلرك صفت جديده لري نظر حكومت سنیه ده
كان لم يكن [۱] اولديغندن بوكيلر ايكي دولت تبعه سندن عد
اولنه مز .



ایکینجی فصل

تابعیت اصلیه

— ۱ —

نسل اساسی

هیچ کیمسه نك بردولته منسوب اولماسی جائز اولمديغندن،
برچوچق میدانہ کلدیکی زمان هانکی تابعیتده بولندیغی تعیین
ایتمك لازم کلیر . بونك تعییننده باشلیجه اوج اساسه متابعت
اولنور :

۱ چوچق محل ولادتی نظر اعتباره آلمقسنزین والدینك
بولندیغی تابعیتده عد اولنور، که بوکا نسل اعتبارله تعیین تابعیت
Jus sanguinis دینیر ؟

۲ چوچق تولدایتدیکی مملکتده مربوط عدا اولنور ، بوده
مولد اعتبارله تعیین تابعیت Jus soli در ؟
۳ برده چوچقك تعیین تابعیتی خصوصنده نسل ومولد
اساسلری مزاج ایدیلیر .

اشته شواوچ اساسك برینه توفیقاً تعیین اولنان تابعیت
تابعیت اصلیه Nationalité d'origine تسمیه اولنور . بونك
ایلریده ایضاح اولنه جق صورتلرده ضیاعیله میدانہ کان صفت
جدیده به تابعیت مکسوبه Nationalité acquise تعیر اولنور .

فی ۲۵ ربیع الاخر سنه ۱۲۸۹ تاریخیه نشر اولنان تابعیت عثمانیه قانوننامه سی حکمنجه ، تبعه عثمانیه نك تابعیت اصلیه سی برنجی اساسه توفیقاً یعنی نسل اعتباریه تعیین اولنورسه ده ، ایلریده کوریه جکی اوزره ، اوچنجی اساس ده بسبتون متروک دکلدر . اسپانیا ، اسویجره ، اسوج ، آلمانیا ، آوستریا و مجارستان ، ایتالیا ، باحیقا ، روسیه ، فرانسه ، فلمنک ، یونانستان ممالکنده نسل اعتباریه تعیین تابعیت اولنور ؛ انکلتره محل ولادتی نظر اعتباره آلهرق حتی اجنبی والدینک چوجقلرینی ، اگر انکلیز طپراغنده تولد ایتمش ایسه لر ، انکلتره تبعه سندن عد ایدر . پورتوغال ، دانیمارقه دولتریده بدرجه یه قدر انکلیز اصولنه تابعدر . آمریقا حکومترلرینک قبول ایتدکلی صورت محل ولادت اساسیدر .

یونانستان قدیم ایله روماده چوجقلرک تابعیت اصلیه لری نسل اساسنه توفیقاً تعیین اولنوب ، بونده محل ولادتلری نظر اعتباره آلمز ، کندیلرینه پدرلرینک صفقی اسناد اولنوردی . زیرا بو ایکی مملکت سوق تصادفله مملکتلری داخلنده تولد ایدن اشخاصه همشهریلک حقوقی *droit de cité* ویرمک استمز لردی . آتینه ده حقوق وطنداشی استحصالی ایچون چوجقلک پدر و والده سی مطلقاً آتینه همشهریلرندن اولمق لازم کلوب ، بونلرک بری اجنبی اولسه چوجق ده اجنبی اولوردی . روماده ده بویله اولمقله برابر بعض تغیرات اولوردی . واقعاً حقوق مدنییه توفیقاً عقد اولنان ازدواجلردن *Justae nuptiae* متحصل چوجقلر پدرلرینک صفقتی احراز ایدر لردی ؛ و بوکی

ازدواج بر علی الاکثر رومالیلر آره سندده واقع اولدیغندن ،
 بونلرده زوجینک صفقی بر برندن فرقلی اولمزدی . فقط ،
Jus connubii دینیلن حق ازدواج لاتینلره حتی اجنیلره
 بیله ویرلدیکندن ، مثلاً بر رومالی ایله لاتین ویا اجنبی بر قادین
 بیننده وبالعکس بر رومالی قادین ایله لاتین ویا اجنبی بر ارکک
 آره سندده ، منعقد ازدواجلردن متحصل چوجقلر بوقیلدن
 عد اولنه مامق طبعیدر . شو حالده ، اگر پدری رومالی ایسه
 قاعده اساسیه نظرآ ، چوجقده اوصفتی احراز ایدردی ؛
 والدسی رومالی اولورده پدری اجنبی بولنورسه ، پدرینک
 صفتنه بالاستتنا باقلمیوب ، والدسینه نظرآ ، چوجقینه
 رومالی عد اولنوردی .

مناسبات غیر مشروعه دن متولد چوجقلر والدلرینک صفقی
 کسب ایتدکاری کبی ، پدرلری مجهول اولان چوجقلره ده
 والدلرینک صفقی اسناد اولنوردی . بر اجنبی ایله مناسبات غیر
 مشروعه ده بولنان رومالی بر قادینک تولید ایتدیکی چوجقده ،
 شو قاعده یه **کور**ه ، رومالی عد اولنمق لازم کلیرسه ده ،
Latini Veteres دینیلن لاتینلردن بریله مناسباتده بولنان
 رومالی قادینک تولید ایتدیکی چوجق بالاستتنا رومالی اوله میوب
 اجنبی قالیر فقط *Latini coloniarum* و *Latini junianii*
 دینیلن لاتینلردن بریله بر رومالی قادیندن صورت غیر مشروعه ده
 متولد چوجق رومالی عد اولنوردی . بواسبتنا آدریانوس
 زمانندن اول مرعی اولوب ، اوندن صکره لغو اولنمسیله ،

صکریه لری صورت غیر مشروعه ده تولد ایدن چوجقاره علی
الاطلاق والده لرینک صفقی اسناد اولندی .

بزده تعیین تابعیت کیفیتنی نسل اساسنه تابع ایدن ماده
قانونیه شودر :

« والدینی ویاخوڭ یالکز والدی تابعیت دولت علیه ده
بولندیغی حالده تولد ایدن اشخاص دولت علیه تبعه سندن
معدوددر . [۱]

اشبو ماده قانونیه حکمنجه والدینی تابعیت دولت علیه ده
بولندیغی حالده تولد ایدن چوجق - کرک ممالک شاهانه
داخلنده کرک بر مملکت اجنبیه ده تولد ایتمش بولنسون -
هر حالده تبعه دولت علیه دندر . اگر ، بعض احوالده اوله -
بیایدیکی وجهله ، والدهسی تبعه اجنبیه دن ایسه یالکز پدرینک
تبعه عثمانیه دن بولنسی قانوناً چوجقک تابعیت دولت علیه ده
عد اولنمنسه کافیدر .

فرانسه ده مولوداتک تعیین تابعیتلرینی نسل اساسنه توفیق
ایدن ماده قانونیه ده « فرانسه داخلنده ویاخارجده بر فرائسزدن
تولد ایدن هر بر شخص فرائسزدن « دینلمشدر . زوجین
مختلف تابعیتده بولندقلری حالده - عبارته قانونیه نک صریح
اولماسنه بناءً - چوجققرک عجبا والده لرینک تابعیتلرنده عد
اولملری ده جائز اولوب اوله میه جنی فکری میدانه چیقیدیغندن ،
مؤلفلر بوخصوصده مختلف رایلر درمیان ایلمشلوبعضلری
مولودات اوزرنده کی حق مادرانه حقوق پدردن اشاغی اولمدیغی

بیانیہ ، چوجق-لرک پدر ویا والدہ-لرینک منسوب اولدینی تابعیتلردن برینی ترجیحده مختار اولملری لازم کله جکفی سویله - مشلردر . حالوکه بوبابده پدرک والدہ یه رجحانی طبعی اولدیغندن ، نسل اساسی مقبول اولان محللرده ، پدری معلوم اولان مولوداتک صفت تابعیتلری ایچون والدہ-لرینی دوشونمکه محل یوق ایسه ده ، بالاده سویلدیکمز کی ، فرانسه ده کی متن قانونک واضح اولمامسی بوکی مطالعاتک ده اورتیه آتلمسینه سبب اولمشدر . قانون عثمانیده « یاخود یالکز والدی تابعیت دولت علیه ده » دینلمسی بویولده بر مطالعه درمیان اولنمسنه محل برافز ، زیرا بوحالده آرتق والدہ سنک صفتی آرامق جائز اولمیوب ، مختلف تابعیتده بولن-ان زوجیندن - یالکز پدر عثمانلی اولدینی حالده - تولدایدن چوجق پدره نسبتله عثمانلی اولور .

چوجق-لرک رحم مادرده حصولی آنندن می یوقسه زمان تولدلرندن می اعتباراً تابعیتلرینی تعیین ایتمک ایجاب ایده جکی مسئله سی مؤلفلرک برچوغنی دوشوندیرمشدر . مؤلفلرک برطاقی چوجقک رحم مادرده دوشمسندن اعتباراً تعیین تابعیتی ایجاب ایده جکی مطالعه سنده بولنمشلردر . بوکیلرک رأینجه برقادین حامل قالدقن صکره زوجی تبدیل تابعیت ایتسه صفت جدیده چوجقک صفتته تأثیر ایده میوب چوجق پدرینک تابعیت اصلیه - سنده قالمق لازم کلیر ؛ چونکه چوجق رحم مادرده حصول ایله برابر پدرندن آیرلمش ، ارتق اوندن صکره پدرک وظیفه سی ختام بولمش دیمک اولدیغندن ، پدرک اکتساب ایتدیکی تابعیت

جدیده نك بوكا تعلق اولماق اقتضا ايدر . بر قسم مؤلفلر
چو جق رحم مادرده حين حصولنده پدرينك بولنديني تابعيتي
احراز ايتك فقط صكره استرسه زمان ولادتنده پدرينك حائز
اولديني تابعيتي ترجيح خصوصنده حق اختياره مالك اولمق
لازم كله چكي رأينده بولمشلر ؛ بعضلری ده مدت حمل ائساننده
پدرينك بولنديني تابعيتلردن بری چو جفك تولد ايتديكي
مملكهتك تابعيتي اولورسه چو جني اوتابعيتده عد ايتك اقتضا
ايده چكنی بيان ايتمشلردر ؛ نهايت بر طاقم مؤلفلر ك قولنجده
چو جق حين تولدنده پدرينك حائز اولديني تابعيتده عد اولمق
احجاب ايدر .

فرانسه قانونی بوصوك فكری ترویج ايدرك « برفرانسزدن
تولد ايدن هر بر شخص فرانسزدر » ديمشدر كه مؤلفلر بونك
تفسيرنده واضع قانونك تولد تعبيريني قوللامسندن چو جفك
حين ولادتده پدرينك حائز اولديني تابعيت نظر اعتباره
آلنديني و رحم مادره سقوط زمانك فرانسه قانوننجه معتبر
بولنديني درميان ايتمشلردر .

اگر چو جفك رحم مادره سقوطی ائساننده پدرينك حائز
اولديني تابعيتي نظر اعتباره آليرسه ، رحم مادرده حصول
زمانی تماماً تعيين ايتك مشكل اولديغندن ، چو جفه اسناد
اولنه جق صفتي تعيين ايتك ده زياده سيله دشوار اولور ؛ برده
بوممكن اولسه بييله ، پدری صكره دن تبديل تابعيت ايتمش
اولديني حالده ، چو جق حين ولادتنده پدرينه قارشى اجنبى
قالمق لازم كلير ؛ حالبوكه بر چوق ممالكده ، تبعه محليه دن بولنان

بر شخصك وفاتنده متروكاتى اجنيدين بولنان ورثه سنك توارث ايتمنه مساغ قانونى اولديغندن ، حين ولادتنده پدرينك تابعيت جديده سنى اكتساب ايدمه يهرك اجنبى قالمش وهنوز سن رشده واصل اولديغندن دولايى تبديل تابعيت ايله پدرينك تابعيت جديده سنه كيرمكه وقت بولدن پدرينى غائب ايتمش اولان بر چوجق پدرينك ميراثندن محروم اوله رق ، بلكه ده بيسوك بر ثروت صاحبي اولسى ملحوظ ايكن ، بستانون فقير قاله بيلير . بوندن بشقه بر طاقم مطالعات ده اواردركه چوجغك حين ولادتنده پدرينك منسوب اولدينى تابعيته بولمنسى ايجاب ايدر : هر حالده بر چوجغك پدرينك بولندينى مملكت قانونلرينه تابع اولسى و پدرينك خدمت ايتديكى مملكتيه خدمت ايتمنسى مقتضيدر ؛ اكر حين تولدنده پدرينك بولندينى تابعيته بولمنسى اساسى قبول اولنمزه چوجق بونلردن ده محروم اولور . بر چوجغه رحم مادرده حصولى آنده و يا خود تولدى زماننده پدرينك حائز اولدينى تابعيتى ترجيح ايتك صلاحيتنى ويرمكه ده ، دولترك موضوعات قانونيه حاضره لرينه نظراً ، غير جائز و اساساً بى لزومدر . بويله بر صلاحيتدن آنجق سن رشده وصولدن صكره استفاده ايديله بيلوب ، اوزمان ايسه اصولاً تبديل تابعيت ذاتاً ممكنندر .

چوجغك حين ولادتنده پدرى وفات ايتمش بولنورسه ، ولادى ائناسنده چوجغك تابع اولسى لازم كن بر تابعيت مفقود اولديغندن ، بعض مؤلفلر مولودك والده سنك تابع اولدينى

تابعیتده طوتلمسی لازم کله جگنی [۱] و بعضاری ده رحم مادره
سقوطی آنده پدرینک تابع اولدینی تابعیته منسوب اولمسی
اقتضا ایده جگنی سویلمشلردر.

قانون عثمانی « والدینی و یاخود یا لکز والدی تابعیت دولت
علیه ده بولاندینی حالدله قولم ایدن اشخاص » عباره سیله
چوجغک تابعیتی حین ولادتنده پدرینک منسوب اولدینی
تابعیت اولمق لازم کله جگنی اشراپ ایدیور. بونده نظر اعتباره
آله حق ایکی جهت واردر : یازوجه ، حامل قالدقدن صکره
زوجنک وفاقی ایله و یاخود طلاق صورتیه آریله رق ، زوج
اخر ایله تزوج ایدر و یاخود زوجیه سی حامل قالدقدن صکره
زوج تبدیل تابعیت ایدرک چوجغک حین ولادتنده بشقه بر
تابعیته کیرمش بولنور .

کرک زوج وفات ایتسون کرک زوجین بیننده طلاق واقع
اولسون ، زوجه زوج آخرله تزوج ایتک ایچون شرعاً
مدت عدته انتظار لازم کلوب اومتک مرورندن صکره تأهل
ایده بیله جکسندن ، او مدت ظرفنده کنديسنک حامل اولدینی
تحقق ایدرسه چوجق زوج سابقک اولور؛ پدرک وفاقی حالنده ده
مادام که بوسورتله چوجق شرعاً پدر متوفایه اسناد اولنیور ،
تابعیت خصوصنده ده ، تابعیت اصلیه تعییننده اصل اولان اساس
نسل اصولی اولدیغندن ، بوکی چوجقکرک پدرلرینک صفتی

Weiss, Traité théorique et pratique de (۱)
droit international privé.

اخراج ایتملری طبعییدر؛ بونلری، پدری مجهول اولان مولودات غیر مشروعه کی، والدہ لرینک حائز بولندیغی تابعیتده عد ایتکه محل یوقدر. بناءً علیه قانونک عبارده سنده کی تولد تعبیرینک بوکی احوالده حکم و تأثیری اوله من. قادینک زوجی چوجغک رحم مادره سقوطندن صکره تبدیل تابعیت ایدوبده حین ولادته بشقه تابعیته کیرمش بولنورسه مولودک تعیین تابعیتی ایچون، تولد تعبیرینک تضمن ایتدیکی معنایه بناءً، زوجک تابعیت سابقه سی نظر اعتباره المنز، مولود والدینک تابعیت جدید سنده عد اولنور.

شو تفصیل ایتدیکنز احکام تولدات مشروعه حقنده در، یعنی والد و والدہ سی نکاح ایله بربرینه مربوط بولنان زوج وزوجه دن میدانه گلن، ورده لاجل الاستیلاذ استقراش اولنان جاریه دن حاصل اولوب تفصیلاتی کتب فقهیه ده مندرج احکام وقواعد تابع بولنان، چوجقلر حقنده جاریدر. مناسبات غیر مشروعه محصولی اوله رق تولد ایدن چوجقلر ایچونده نسل اساسنه بناءً تعیین تابعیت اولنورسه ده، بونده دیگرینه نسبتله برفرق واردرکه اوده چوجغک استلصاق اولنمش اولمسیدر.

استلصاق Reconnaissance، فصل مخصوصنده ذکر

اولنه جنی اوزره، نکاح خارجنده تولد ایدن چوجقلرک ابونی طرفندن حضور حاکمه قبول و اعتراف اولنمسیدر. بو یولده تولد ایدن اطفال غیر مشروعه یا یالکیز پدری و یا خود یالکیز والدہ سی طرفندن استلصاق اولنور؛ یا هر ایکسی ده چوجنی

بر زمانده وبر حکم ايله استلصاق ايدر ؛ ياخود ابوينك هر برى بشقه بشقه استلصاق ايلر . بعضآده ابوينك هيچ برى استلصاق ايلمديكندن ، آتيده بحث اولنه جق اولان ، لقيطه لر حكمنده قالير . برنجي حالده ، يعنى يالكز پدرى ويا يالكز والدهسى طرفدن استلصاق اولندينى تقديرده ، چوجغك تابعيتي پدرينك وياخود والده سنك منسوب اولدينى تابعيت اولور . اكر چوجق ابوينك هر ايكيسى طرفدن بر زمانده استلصاق اولنورسه ، استلصاق اولنان بو كى اطفال غير مشروعه بعض مملكتلرده پدرينه و بعضلرنده والده لرينه تابع طوتد قلرندن ، بولندينى مملكتك احكام قانونيه سنه كوره يا پدرينك وياخود والده سنك منسوب اولدينى تابعيته قالير . اكر ابوينك هر برى ولد غير مشروعى مختلف زمانلرده استلصاق ايلرسه ، بعض مملكتلرك قانونه نظراً ، چوجق هر حالده پدرينك بولندينى تابعيته قالير سده ، بعض يرلرده ابويندن هانكيسى اولاستلصاق ايدرسه چوجق اونك منسوب اولدينى دولت تبعه سندن اولور . اكر مناسبات غير مشروعه محصولي اولان بر چوجغى ابوينك هيچ برى استلصاق ايتمزسه وياخود چوجغك تولد ايتديكى مملكت قانونلري بو كى مولودات غير مشروعه نك استلصاقه مساعد بولنمزسه ، بو كى چوجقلر او حالده والدينى مجهول اولان لقيطه لر كى اولورلر .

احكام شرعيه يه نظراً ، زنا ايله نسب ثابت اولمديغندن ، بين الاسلام استلصاق مرعى اوليوب ، چوجقلرك ثبوت نسبي

بونلرک مطلقاً فراش محصولی اولملرینه متوقفدر . آتیده فصل مخصوصنده ذکر اولنه جنی اوزره ، فراش ضعیف ، متوسط وقوی اولق اوزره اوچ قسم اولوب ، بواقسام ثلثه نك محصولی اولان چوجقار ، پدرلرینه تبعاً ، دولت اسلامیہ تبعه سندن اولورلر . فراش ضعیف ومتوسطدن میدانه کلن چوجقار نفی ایله وفراش قویدن حاصل اولانلر ، زمان تهنیت ظرفده ، لعان ایله رد اولدقلری تقدیرده والدہ لرینه اسناد اولنور ووالده لرینک بولندقلری تابعیتہ داخل اولورلر . زوجہ منکوحه دن متولد چوجق ، فراش قوی ثمره سی اولدیغنه نظراً ، هر فصل اولورسه اولسون لعان اولدقچه نفی اولنه میه جفتدن ، والدہ سنک زوجنه اسناد اولنورق ، اونک بولندیغی تابعیتده قالیر . محرماتدن بر قادیله بیلمکسزین ازدواج ایدن بر کسه نك مالیدن حاصل اولان چوجق ، ولو صکره دن اکلاشیله رق آرہ لرندہ کی نکاح منفسخ اولسه بیله نکاح فاسد محصولی اولان مولودات پدرلرینه تابع اولدقلرندن ، پدرینک منسوب اولدیغی تابعیتہ داخل اولور .

— ۲ —

مولد اساسی

چوجقارک تعیین تابعیتلری خصوصنده دولت علیہ نك قبول ایتدیکی اساس ، یوقاریده کوردیکمز وجهله ، نسل

اساسی اولدیغندن ، حتی ممالک اجنبیهده بیله ، عثمانلی والدین ویاخود والدین حاصل اولان چوجقار دولت علیه تبعه سندن عد اولنورلر . بوکامقابل ممالک شاهانهده متمکن تبعه اجنبیهدن میدان ککن چوجقار ، نسل اساسنه توفیقاً ، پدرلرینک منسوب اولدقاری دولت تابعیتند طوتیلورلر . بوخصوص مطلق اولقله برابر بردرجهیه قدر مولد اساسیلده ممزوج اولوب ، شوامتراج تبعه اجنبیه نک تابعیت عثمانیه یی احراز ایتلمی خصوصیته حائز تأییدر . تابعیت عثمانیه قانوننامه هایوننک ایکنجی ماده سنده « والدینی اجنبی اولدینی حالده ممالک شاهانهده متولد اولان شخص سن رشده وصولی تاریخندن بدأ ایله اوج سنه ظرفنده تابعیت دولت علیه یی بحق طلب ایده بیلیر » دیه محرردر . بناءً علیه داخل ممالک شاهانهده تولد ایدن هراجنبینک سن رشده وصولنده تابعیت عثمانیه یی طلب واستدعایه حق اولوب ، انحق زمان مذکور دن اعتباراً اوج سنه ظرفنده مراجعت ایتمی لازم کلیر ؛ بوائساده مراجعت ایتدیکی حالده کنیدیسی تابعیت دولت علیه یی ترجیحده کی حق اختیارینی استعمال ایتش اولور ؛ بومدت مرور ایتدیکی تقدیرده آرتق اوحقندن استفاده سنه محل قالمیه رق ، اوحالده ، بالاخره ینه عثمانلی اولمق استرسه ، اوجنجی ماده احکامنه تابع اولور . اوجنجی ماده ده ایسه « سن رشده واصل اولان بر اجنبی ممالک عثمانیهده علی التوالی بی سنه اقامت ایلدیکی حالده بالذات ویا بالواسطه خارجیه نظارت جلیله سنه براستدعا تقدیمیه تابعیت دولت علیه یی استحصال

ایده بیلیر « دیه مذکوردر . شو حالده رشید اولان بر اجنینک
 تابعیت عثمانیه بی احراز ایده بیلرسی ایچون داخل ممالک شاهانه ده
 بلافاصله بیه سنه اقامت ایتیمی اقتضا ایدر؛ حالبوکه اجنینک ممالک
 محروسه داخلنده تولد ایتیش ایسه سن رشده وصولنده ، ممالک
 شاهانه داخلنده آیر یجه اقامته لزوم اولمقسزین ، صفت
 عثمانیه بی ، ارزو ایتدیکی تقدیرده ، احرازه حق واردر .
 دیمک اولورکه واضع قانون ممالک شاهانه ده تولد ایتیش اولغی
 نظر اعتباره آلیور ، یعنی نسل و محل ولادت اساسلرینی تعیین
 تابعیت خصوصنده قسماً مزج ایدیور .

بویجند برده پدر و ووالده سی مجهول اولان چوجقار حقنده
 اولنه حق معامله مسئله سی واردر ، که بوکی چوجقار له قیطه
 enfant trouvé تسمیه اولنور . بونلرک والدینی معلوم
 اولمدیغندن ، کندیلرینه نسل اساسنه توفیقاً تابعیت اسنادی
 قابل اوله میه جنی جهته هر مملکتده بولندقلری مملکت قانوننه
 تابع و اودولت تبعه سندن عداولنورلر . ممالک محروسه داخلنده
 بولنان بوکی چوجقار له بوراده تولد ایتیش نظریله باقی له رق
 کندیلری بالطبع تبعه عثمانیه دن عداولندقلری کی ، کندیلرینک
 هانکی مذهبه سالک بولندقلرینه دائر بر اماره بولنورسه او
 مذهب سالکاری جماعته تسلیم اولنورلر . بویولده اماره نک
 فقدانی حالنده شهود ایله مسلم و یا غیر مسلم اولدقلری اثبات
 اولنورسه جماعت اسلامیه یه و یا خود جماعات غیر مسلمیه تسلیم

ایدیلرلر . هیچ بر مذهبه منسوبیتلری اثبات اولنه مدینلی حالده بولقیطه لر مسلمان عد اولنور .

استلصاق اولنمیان چوجققلرده ، نسبلی تعیین اولنه مدینغندن دولایی بالطبع لقیطه حکمنده اولملریله ، ممالک شاهانه ده تبعه دولت علیه دن معدوددرلر .

ممالک عثمانیه ده ساکن اولوب ده بر دولته منسوبیتی معلوم اولمیان اشخاصه کلنجه ، بونلر حقننه قانوننامه هایونده ماده مخصوصه واردر . بوکا دائر اولان طقوزنجی ماده ده « ممالک محروسه پادشاهیده اقامت ایدن هر بر شخص تبعه دولت علیه دن معدود اولوب ، حقننه دولت علیه تابعی معامله سی اجرا اولنور ؛ اگر کندوسی تبعه اجنبیه دن ایسه تابعیتی اصولاً اثبات ایلمسی لازم کلور » دیه مذکوردر . بناءً علیه صفت اجنبیه سی مجهول اولان کسه لک منسوب اولدقلری بر مملکت مفقود اولدیغندن ، بوراده مقیم اولملری حیثیتیه ، ممالک شاهانه یه منسوبیتلری فرض اولنه رق ، کندیملری عثمانلی عد ایدیلر . شو حالده ، بالاده کوسترلیدیکی اوزوه [۱] ، ممالک شاهانه ده حایماتلوز قسمنه منسوب کسه لک بولمنسنه امکان یوقدر .

— ۳ —

بعض قوانین اجنبیه

دول اجنبیه نک همان جمله سنده تابعیت اصلیه او مملکت

تبعه‌سندن اولانلرک ، حتی ممالک اجنبیه‌ده بیله ، دنیا یه کلن چوجقلرینه اسناد اولنور . فقط کندی مملکتلرنده مقیم تبعه اجنبیه‌دن وجوده کلن چوجقلرک تعیین تابعیتی حقنده احکام قانونیه‌لری تخالف ایدر . بو خصوصده دولتلر درت قسمه آریله بیلوب ، برنجی قسمده بولنانلر نسلی ، ایکنجی قسمده اولانلر مولدی اساس اتخاذا ایدر ، دیگر ایکی قسمده داخل اولانلرده بویکی اساسی مزج ایلرلر سده ، بعضیسی نسل و بعضیسی مولد اساسلرینه زیاده اهمیت ویررلر . منحصراً نسلی اساس اتخاذا ایلان مملکتلر کرک داخل کرک خارج مملکتده اجنبی والدیندن تولد ایدن چوجقلر بیننده هیچ بر فرق کوزتمیوب جمله‌سی حقنده مساوی معامله ایدر وهپسینی اجنبی عد ایلرلر ، بو چوجقلرک تابعیت محلیه یه قبول اولنملری خصوصنده داخل و یا خارج مملکتده تولد ایتیش اولملری نظر اعتباره آلمز . بو قسمده داخل اولان دولتلر آلمانیا ، اسوچ ، اسویچره ، آوستریا ، رومانیا ، مجارستان ، نوروچدر .

آلمانیا‌ده تابعیت ایکی قسمدن مرکبدر ، که برینه ایمپرا-طوراق تابعیتی Reichsangehoerigkeit و دیگرینه حکومت تابعیتی Staatsangehoerigkeit نسیمیه اولنور ؛ برنجی قسم شخصی آلمانیا ایمپراطورلغی تابعی قیلار ، دیگر ی ایمپراطورلغی تشکیل ایدن حکومتلردن برینک تبعه‌سندن عد ایلر . بر شخص ایمپراطورلق تبعه‌سندن عد اولنه بیلماک ایچول همه حال ایمپرا-طورلغی تشکیل ایدن قراللق و یا خود پر نسلکلرک برنده حکومت تابعیتله متصف اولق لازم کلیر . بر شخصک آلمانیا طبراغنده

تولد اېتمش اولمى او شخصك تابعيته هيچ بروجمله حائز
تأثير اولمىوب ، دائماً اجنبى قالير و آلمانيا تبعه سندن عد اولنه .
بيلمى على العموم اجانب حقننده موضوع اولان شرائطى
بالاكمال تسليم اولمىسنة متوققدر .

مناسبات غير مشروعه دن متولد چوجقلر مطلقاً والده لرینه
اسناد اولنه رق ، اولنرك بولندينى تابعيته قاليرلر . پدر طرفندن
استلصاقت چوجقلر صفت تابعيته تأثيرى يوقدر .

اسوچده اولاد مشروعه پدرلرينك واطفال غير مشروعه
والده لرينك بولندينى تابعيته داخل اولورلر .

اسويچرده قانطونلردن برينك تبعه سندن اولان اشخاصك
صلمندن كلن چوجقلر اسويچره تبعه سندن اولورلرسده ،
مولودات غير مشروعه والده لرینه تابع اولورلر .

آوستريا ، رومانيا ، مجارستان ، نوروچده دنخى تابعيت
اصليه نك تعيينى امرنده بو صورت جاريدر .

منحصراً مولدى اساس اولق اوزره نظر اعتباره آلان
دولتلىر وقيله بك چوق ايكن بوكون بك آزمىشدر . على
العموم اوروپاده بو اصول غير جارى اولوب ، يالكز بعض يكي
تشكل ايدن و ، نفوسنك آزلغندن دولايى ، ماسكرينه هجرت
ايدن اجانبك اهالى محليه ايله امتزاجى منفعتلىرى اقتضاسندن
بولنان حكومتلرده جاريدر . اورالرده اجانبينى تولد ايدن
چوجقلرك صفت اجنبيه سنى تصديق ايتك داخل مملكتده
مقدار اجانبى تزديد ايله ثروت محليه نك اجنبى يدينه كچمىنى
انتاج ايده جكنه و حالبوكه تبعه اجنبيه اولاديني محل ولادتلىرى

کوزتھرک ، یرلیدن عدايتک اھالی محلیہ نک تزايد مقداریلہ
 عمران مملکتک تکماتہ خادم اولہ جفہہ بناء ، تولد ایدن
 چوجقار ، والدینک صفت تابعیتلری نظر اعتبارہ آلمیہرق ،
 تبعہ محلیہدن عد اولنورلر . بو حکومتلر جنوبی آمریقادہکی
 ارژانتین ، اوروغوای ، برہزیلیا ، بولیویا ، پاراگوای ، پرو ،
 خط استوا ، شیلی ، قولومبیا ، ونہزونیلا حکومتلری اولوب ،
 آفریقادہکی اورانژایلہ سن دومینقو حکومتی بواصولہ تابعدرلر .
 آرژانتین قانوننہ نظراً ، سفراء اجنبیہ و مأمورین سفارت
 مستثنا اولمق اوزرہ ، ارژانتین داخلندہ تولد ایدن علی العموم
 چوجقار ایلہ ارژانتین تبعہسندن بولنان ابویندن بر مملکت
 اجنبیہدہ تولد ایتدیکی حالہ ابوینک صفتی اختیار ایدن ،
 ارژانتین سفارتلرنده و یا خود سفائن حربیہسندہ تولد ایدن
 و آچیق دکزلدہ ارژانتین سفینہلری اوزرندہ حاصل اولان
 چوجقار ارژانتین تبعہسنددر .

اوروغوای قانونی حکمنجہ ، اوروغوای اراضیسندہ
 تولد ایدن ہر بر شخص ایلہ اوروغوای تبعہسندن بولنان ابویندن
 ممالک اجنبیہدہ تولد ایتمش و مؤخرآ اوروغوای مملکتی داخلندہ
 اقامتکاه اتخاذ ایلمش اولان کسہلر اوروغوای تبعہسنددرلر .
 برہزیلیادہ برہزیلیا خدمتہ داخل اولوب خارجدہ بولنان
 اجانبیدن بیلہ حاصل اولان چوجقار ایلہ پدرلرک بر مملکت
 اجنبیہدہ تولد ایدوب برہزیلیادہ اختیار اقامت ایلان اولاد
 مشروعہ سی و والدہلرک اولاد غیر مشروعہ سی و برہزیلیا

خدمتده اولدینی حالدہ ممالک اجنیہده بولنان برہ زیلیا تبعہ -
سندن میدانہ کلن چوجقار، برہ زیلیا تبعہ سندن درلر .

بولیویا قانونی موجبہ ، بولیویا داخلندہ تولد ایدن ،
ممالک اجنیہده بولیویا خدمتده بولنان بولیویا تبعہ سندن حاصل
اولان چوجقار بولیویا تبعہ سندن اولدقاری کی ، ینہ ممالک
اجنیہده بولیویا تبعہ سندن بولنان بویندن حصولہ کلوب مؤخرآ
بولیویا داخلندہ تأسس ایدنلر بولیویا لیدرلر .

پاراگوایدہ تولد ایدن ہر برشخص ایلہ پاراگوای خدمتده
اولوب خارجده بولنان پاراگوای تبعہ سندن حاصل اولان
چوجقار پاراگوایلی اولورلر .

برودہ تولد ایدن چوجقار ایلہ پرو تبعہ سندن ممالک
اجنیہده حاصل اولوب ابوینک ویا کندیلرینک ارزولریلہ نفوس
دفترلرینہ قید اولمان کمسہلر پرو تبعہ سندن عداولورلر .

خط استوا حکومتی اراضیسندہ تولد ایدنلر خط استوا
تبعہ سندن درلر ؛ حکومت مذکورہ تبعہ سندن خارجده تولد
ایدنلر مملکت مذکورہده اختیار اقامت ایدرلرسہ تبعہدن
اولورلر .

شیلی مملکتده تولد ایدنلر ایلہ مملکت مذکورہ تبعہ سندن
خارجده تولد ایدوب مؤخرآ شیلیدہ اقامتکاخ اتحاد ایلیانلر وکذا
خارجده تولد ایدوب شیلی تبعہ سندہ بولنان ابوینی شیلی خدمتده
اولانلر شیلی تبعہ سندن درلر .

قولومیادہ تبعہ محلیہدن ویا خود اورادہ اقامتکاهی بولنان

اجانبیدن تولد ایدنلر ایله قولومیا تبعه سندن خارجه تولدایدوب مملکت مذ کورده اقامتگاه اتخاذ ایدنلر قولومیاالی اولورلر .

ونه زوئه لا مملکتسده تولدایدن هر شخص ومملکت مذ کوره تبعه سندن خارجه تولد ایدوب مؤخرآ اوراده اقامتگاه اتخاذ ایله و نه زوئه لالی اولمق استیکان کسه لر و برده جنوبی آمریکا داخلنده بالتولد و نه زوئه لایه کلرک اورالی اولمق ارزو ایلیان هر کسه و نه زوئه لا تبعه سندن معدود اولور .

اورانئر حکومتده حکومت مذ کوره اراضیسده ساکن هر بیاض آدمدن تولد ایدن چوجق اورانئر تبعه سندر .

سن دومینقو مملکتسده تولد ایدن هر چوجق ایله مملکت مذ کوره تبعه سندن خارجه تولد ایدوب صکره اورایه کلرک اقامتگاه اتخاذ ایدن واورا اهالیسندن اولمق استیکان و برده جنوبی آمریکا ایله انتیل آطه لرنده تولد ایدوب کذا اورا اهالیسندن اولمق اولمق ارزو ایلیان هر شخص سن دومینقو تبعه سندن اولور .

اوجنچی قسمده بولنان دولتلر ایکی اساسی یکدیگرینه مزج ایدرلر سده ، اصل نسل اساسی نظر اعتبارده طوتار و یالکمز کندی تابعیتلرینی ملککری داخلنده تولد ایدن اطفال اجنبیه نک سهولتله استحصال ایده بیلملری ایچون مولد اساسی ده بر درجه یه قدر نظر اعتباره آلیرلر .

یوقاریده کورلدیکی وجهله ، دولت علیه عثمانیه نک تابع اولدینی اصول بو اولدینی کبی ، اسپانیا ، ایتالیا ، بلجیقا ،

فرانسه، روسیه، قوستاریقا، لوکسنبورغ، موناکو، یونانستان دولتری ده بو اصوله تابعدر.

اسپانیا قانونه نظراً، اسپانیا تبعه سندن ممالک اجنبیه ده بیله تولد ایدن چوجقار اسپانیولدر؛ اطفال مشروعه ایله استلصاق اولنان اطفال غیر مشروعه پدرلرینه واستلصاق اولنیا چوجقار، والده لرینه تابعدر. یالکیز والده سی اسپانیول اولان چوجقار اگر والده لری طرفدن ادعا اولمز لرسه، پدرلرینک منسوب اولدینی تابعیته داخل اولورلر. اسپانیا داخلنده اجانبیدن تولد ایدن چوجقار سن رشده وصوللری سنه سنده اسپانیا نفوس مأمورلرینه و یا خود اسپانیا سفر اومامورین سیاسیه سنه مراجعتله اسپانیا تابعیتی احراز ایده بیلیرلر. سن رشده وصوللرندن اول کندی ناملرینه پدرلری بوحق اختیاری استعمال ایده بیلیرلر. ایتالیا قانونجه، ایتالیا تبعه سندن حاصل اولان چوجقار، ایتالیان و ایتالیاده تبعه اجنبیه دن تولد ایدن چوجقار اجنبیدر. پدری مجهول اولان چوجقار والده لرینه تابعدر. لقیطه لر تبعه محلیه دن معدوددر. ایتالیاده لا اقل اون سنه مدت اقامتگاه اتخاذ ایتیمان بر اجنبیدن ایتالیاده تولد ایدن چوجقار یکریمی بر یاشنی اکمال ایتدیکی زمان ایتالیاده اقامتگاهی اولدیغنی اثبات ایتدکجه اجنبی عد اولنور. بوقیلدن بر چوجقار ایتالیا خدمت عسکریه سنه داخل اولورسه تبعه دن اولور. اون سنه دن زیاده بر مدت ایتالیاده اقامتگاه اتخاذ ایدن بر اجنبیدن اوراده حاصل اولان چوجقار سن رشده وصولنده پدرینک صفتنی ترجیح ایتمزسه ایتالیاندر. عن اصل ایتالیا تبعه سندن ایکن تبدیل

تابعیت ایدن بر کسه نك ایتالیا ده تولد ایدن چو جقلمری ایتالیا ده اون سنه دن زیاده اقامتگاه صاحبی اولان اجانب چو جقلمرینه ، و بویله تبدیل تابعیت ایدن سابق بر ایتالیا نك ممالك سائر ده تولد ایدن چو جقلمری ده ایتالیا ده لاقول اون سنه مدت اقامتگاه اتخاذا ایتیمان اجانب اطفالنه قیاس اولنورلر .

بلجیقاده نسل اساسی قبول اولنمش اولوب ، مولد اساسنك تطبیقنده غایت کوچك بر فرق ایله فرانسه اصولی جاری ، ووالدینی مجهول اولان چو جقلمر بلجیقا تبعه سندن معدوددر . روسیه ده تابعیت اصلیه نسل اساسیله تعین ایدرسه ده ، مولد اساسی ده شوصورتله نظر اعتبارده طوتولور ، که روسیه ده تولد ایدوب بیویان ویاخود مکاتب عالیہ ویا تالیه ده تحصیل کورن تبعه اجنبیه اولادی سن رشده وصوللری سنه سنده روسیه تابعیتی بحق طلب ایده بیلیرلر .

فرانسه قانون مدنیسی حکمنجه ، تابعیت اصلیه نك تعییننده نسل اساسی معتبردر . والدینی خارجه ده تولد ایتدیکی حالده کندی فرانسه اراضیسندن تولد ایدن فقط فرانسه ده اقامتگاهی بولنمیان اجنبی چو جقلمر سن رشده وصولرنده فرانسه ده اقامتگاه اتخاذا ایدر ویاخود خدمت عسکریه قبول ایملرلر سه فرانسه تابعیتنه کیرمش اولورلر ، کذا والدینی خارجه ده تولد ایتدیکی حالده فرانسه داخلنده تولد ایدن و فرانسه ده اقامتگاهی بولنان چو جقلمر ، اجنبی تابعیتنه بولندقلرینی ویاخود دوات متبوعلری خدمت عسکریه سنی ایفا ایلدکلرینی اثبات ایده مدکلری حالده ، فرانسه تبعه سندن عد اولنورلر . فرانسه ده تولد ایدن بر اجنیدن

ینه فرانسه ده حاصل اولان چو جققلر فرانسه تبعه سندن در .
 لقیطه لر ایله والدینی مجهول اولان چو جققلر فرانسه در .
 قوستاریقا قانوننه نظراً ، قوستاریقا تبعه سندن بولنان بر
 پدردن حاصل اولان اولاد مشروعه ، قوستاریقالی بر قادیندن
 حاصل اولان اولاد غیر مشروعه ، اجنبی بر قادینک تولید
 و قوستاریقالی برار ککک استاصاق ایتدیکی اطفال غیر مشروعه ،
 قوستاریقا اراضی سنده بولنان لقیطه لر ایله والدینی و یا خود بر
 دولته منسوبیتی مجهول اولان چو جققلر قوستاریقا تبعه سندن در .
 لوکسنبورغ غراندوقه لغنده تبعه محلیه اولادی لوکسنبورغ
 تبعه سندن در ؛ لوکسنبورغ اراضی سنده تبعه اجنبیه دن حاصل اولان
 چو جققلر پدر لرینه تابع ایسه لرده سن رشده وصول لرنده
 لوکسنبورغ تابعیتی طلب ایده بیلیر لر ؛ آنجق المانیا هیئت متفقه سی
 خدمت عسکریه و ملکیه سنده بولنانلر ایله مأمورین سیاسیّه
 اجنبیه نك لوکسنبورغ داخلنده تولد ایدن چو جققلری بوندن
 مستنادر . لوکسنبورغ اراضی سنده تولد ایدوب چو جققلر زمان
 ولادتنه قدر لوکسنبورغ داخلنده ساکن اولمش اولان اجنبیلرک
 لوکسنبورغده تولد ایدن و اوراده اقامتکاه اتحاد ایلیان
 چو جققلری ، سن رشده وصول لرنده تابعیت اجنبیه ادعا سنده
 اولد ققلری خالد ، لوکسنبورغ تبعه سندن در لر .

موناکو پرنسلیکی داخلنده نسل اساسی جاریدر . آنجق
 خارجه تولد ایتمش اجانبیدن موناقوده تولد ایدن چو جققلر
 سن رشده وصول لرنده موناکو تابعیتی ارزو ایتدکلیری خالد
 اجنبی قایلر سده ، موناقوده متولد اجنبیلرک ینه اوراده تولد

لر ایستقاده ایله ، موناکو تابعیتی ارزو ایتدکلیری خالد
 اجنبی قایلر سده ، موناقوده متولد اجنبیلرک ینه اوراده تولد

ایدن چوجقاری سن شده وصولرنده اجنبی تابعیتی ترجیح
ایتمزلهسه موناوقو تبعهسندن اولورلر. موناوقوده متولد بر اجنینه
موناوقوده حاصل اولان چوجقندن ینه موناوقوده میدانه کلن
چوجق بهمه حال موناوقو تبعهسندندر .

یونانستانده یونانی برپردن حاصل اولان ، یونانی بر
قادیندن صورت غیر مشروعهده میدانه کلن ، یونانستانده تولد
ایدوب والدینی مجهول اولان چوجقار ایله اجنبی بر قادینک
صورت غیر مشروعهده میدانه کتیره رک یونانی برپدرک استلصاق
ایتدیکی مولودات یونان تبعهسندندر . بوندن بشقه یونانستانده
اجنبی والدیندن تولد ایدن اشخاص سن رشده وصولنده یونا-
نستانده تأسس ایدر ویونان حکومتته صداقت یمینی ایلرسه
یونانی اولدینی کبی ، یونان تبعهسندن بر قادینک صورت غیر
مشروعهده تولید واجنبی بر ارکک استلصاق ایتدیکی
چوجقارده یونان تابعیتی طلب ایده بیلیرلر .

دردنچی قسم دولترلر ، ینه ایکی اصولی یکدیگره مزج ایتمکه
برابر ، مولد اساسنی دهها زیاده نظر اعتبارده طوتارلر ؛ شمالی
آمریکا حکومت متحدهسی ، انکلتره ، پورتوغال ، دانیمارقه ،
سالواتور ، غواتهمالا ، فلمنک ، مکسیقا حکومتلری بواسوله
تابعدرلر .

شمالی آمریکا حکومت متحدهسی قوانینجه ، « حکومت
متحده ممالکی داخننده تولد ویاخود استحصال تابعیت
ایدن و آمریکا قوانینته تابع اولان هر شخص حکومت متحده
ایله کنديسنگ داخل ملکنده ساکن اولدینی حکومت تبعهسندن

معدود در [۱] . « ویرکی به تابع اولیان یرلیلر مستثنا اولق اوزره ، حکومت متحده ممالکی داخلنده تولد ایدوب هیچ بر دولت اجنبیه به منسوب اولیان هر شخص حکومت متحده تبعه‌سندندر [۲] . « پدری حکومت متحده تبعه‌سندن اولدینی حالده حکومت متحده حدودی خارجنده شمدی به قدر تولد ایدن وپا بوندن صکره تولد ایده‌جک اولان هر شخص حکومت متحده تبعه‌سندندر ، فقط پدرلری داخل ممالکده هیچ اقامت ایتامش اولان چوجققلر تبعه‌دن عد اولمز [۳] . « شو افاداته نظراً حکومت متحده داخلنده تولد ایدن هر چوجقک تعیین تابعیتی خصوصنده محل ولادت اساسی نظر اعتباره آلیورسه‌ده ، تبعه‌دن بولنان کیمسه‌نک ، داخل ممالکده مسکنی اولق شرطیه ، خارج ممالکده اولان اولادینک تابعیتی تعیین خصوصنده نسل اساسنه مراجعت اولیور . « آمریقا قوانینه تابع اولان » قیدینک داللتدن مستبان اولدینی اوزره ، قوانین مذکوره به تابع اولقسزین حکومت متحده ممالکی داخلنده تولد ایدن اشخاص ، یعنی سفرا و مأمورین اجنبیه اولادی ، بالاستثنا حکومت متحده تبعه‌سندن عد اولمز . بوندن ماعدا دولت مشارالیه ممالکده تولد ایدن کسه‌لر امریقایدرلر . بوکا مقابل آمریقا تبعه‌سندن بولنان کسه‌لرک ، اگر داخل مملکتده مسکنلری یوقسه ، ممالک اجنبیه‌ده تولد ایدن چوجققلری محل ولادتلیری تابعیتده داخل بولنورلر .

[۱] آمریقا حکومت متحده سنک ۱۸۶۸ تاریخلی قانونی

[۲] حکومت مذکوره نک ۱۸۶۶ تاریخلی قانوننک برنجی ماده‌سی .

[۳] حکومت مذکوره نک ۱۸۵۵ تاریخلی قانونی .

انگلتره ده ، یالکز دول اجنبیه دیپلوماسی مأمورلری ابله
 اجنبی قوای عسکریه سی قوماندانلری اولادی مستثنا اولمق
 اوزره ، انگلتره دولتی اراضیسندہ تولدایدن هرچوجق انگلتره
 تبعہ سندن معدوددر . انجق ۱۸۷۰ سنہ سندن نشر اولنان قانون
 جدید محل ولادت اساسنک شوشدتی برآز تعدیل ایلدی ؛
 بوقانونک دردنجی ماده سی حکمنجه ، انگلتره طبراغندہ اجنبیدن
 تولدایدن هرچوجق انگلیز تبعہ سندن معدود ایسہ دہ سن رشدہ
 وصولندہ ترک تابعیتلہ والدینک تبیتنی ادعا ایتک حقنہ مالکدر .
 بوکامقابل مولد اساسی جاری اولان ممالکدہ انگلیز تبعہ سندن
 تولدایدن چوجققلر ، ہر نہ قدر انگلیز قانونی حکمنجه انگلیز
 تبعہ سندن معدود ایسہ لردہ ، سن رشدہ وصولارندہ مأمورین
 محلہ ویاخود انگلیز مأمورین سیاسیہ سی حضورندہ انگلیز
 تابعیتی ترک ایلہ بولندقلری محل تابعیتی استحصال ایدہ بیلیرلر .
 انجق تولدایدن چوجق سن رشدہ وصولندن صکرہ ترک تابعیت
 خصوصنی دوشونمیدیکی حالده مشکلات ظاہر اولور ؛ مثلاً فرانسه
 تبعہ سندن بر شخصک انگلترہ دہ تولدایدن چوجفی قانوناً انگلیز
 تبعہ سندنر ، حالبوکہ فرانسه قانونی اوچوجفی فرانسر عد
 ایدر .

انگلترہ حکومتی بوکا چارہ اولمق اوزره ۱۸۵۸ سنہ سی
 مارتندہ خارجیه نظارتی طرفدن پارسدہ کی انگلترہ سفیرینہ
 ارسال ایتدیکی برتحریرات ایلہ بوکی چوجققلرک ، اوزرلرندہ
 حمایہ ادعاایدن دولت اراضیسندہ ، حمایہ لرینہ قالقشمیہ جفی

تبلیغ ایشدر . بناءً علیه فرانسه تبعه سندن انکلتزده تولدایدن
چو جقار فرانسه اراضیهی خارجنده هر یرده انکلتزده تبعه سندن
عدا و نه رق اوزر لر نده انکلتزده حکومتی طرفدن حمایه اجرا
اولنه جقسده ، فرانسه اراضیسنده بولنانلر اوزر نده کی حمایه
ادعا سندن انکلتزده فارغ اولشدر [۱] .

پورتوغالده ، مأمورین سیاسیه اولادی مستثنا اولوق
اوزره ، تولدایدن هر چو جق پورتوغال تبعه سندنر . آنجق اجنبی
والدیندن تولدایدن چو جقار ، سن رشده وصولار نده ،
بولندقلری محل مأمورین بلدییه سنه مراجعت ایدهر ک ابویلرینک
بولندقلری تابعیتی اختیار ایدهر بیلرلر . — پورتوغال واسپانیا
حکومتلری آره سنده ۲۱ نیشان ۱۸۶۶ تاریخنده عقد اولان
معاهده حکمنجه ، اسپانیا تبعه سندن برینک پورتوغال مملکتنده
دنیا به کلن چو جق سن رشده وصولانه قدر اسپانیول عد اولنوب ،
اوزمان پورتوغالده اقامته دوام ایدرسه ، اسپانیا تابعیتی صریحاً
اختیار ایتدیکی حالده ، پورتکیز عد اولنور ؛ بالعکس پدری
اسپانیا حکومتی خدمتمنده ایسه چو جق ، زمان رشندنه پورتکیز
اولوق آرزوسنده بولمدینی حالده ، اسپانیول قالیر .

دانیارقه ده تابعیت بریلک indigénat و رعیت sujétion
اولوق اوزره ایکی نوعدر . دانیارقه ممالککنده ، حتی اجانبین
بیله ، تولدایدن هر شخص بریلک صفقی ایله دانیارقه تابعیتی
وبناءً علیه خدمات عمومیه اشتراک ایله حق انتخابی حائزدر .
یالکیز بونک ایچون دانیارقه طپراغنده ساکن اولوق اقتضا

ایدر . حالبوکه دانیمارقه مامکنده مسکن دائمی اتخاذ ایدن
کیمسه صفت رعیتی احراز ایدر و بونکله انتخابات بلدییه ایله
حق تجارتیه نائل و دانیمارقه قانونلری ایله خدمت عسکریه به
تابع اولور .

سان سالوادور جمهوریتده ، بالتصادف اوراده بولنش
اولان اجنیلر ایله مأمورین سیاسییه نك اولادی مستثا اولق
اوزره ، تولد ایدن چوجققر و برده سالوادور تبعه سندن ممالک
اجنیه ده تولد ایدوب هنوز صبی ایکن پدر ویا وصیلری و یا خود
رشید اولدقن صکره کندیلری طرفدن مراجعتله سالوادور
تابعیتی اختیار ایدن چوجققر سالوادور تبعه سندن معدوددرلر .
غوانه مالاده تولد ایدن هر چوجق غوانه مالا تبعه سندن
عد اولنورسه ده ، عائله سنك منسوب اولدیغی مملکته کیتدیکی
حاله ، غوانه مالا تابعیتدن چیقار .

(٤) فلمنکده ، تاسیس ایدره کیمسه لردن حاصل اولان
چوجققر فلمنك تبعه سندن در . اوروپاده کی فلمنك مملکته ده
اوج سنه اقامت ایدنلر ایله فلمنکده یراشمک نیتنده اولدیغی
دائرة بلدییه بیان ایدوب بوندن اعتباراً بر بحق سنه اوراده
ساکن اولانلر فلمنکده تاسیس ایتیمه عد اولنورلر . فلمنکده
تاسیس ایتیمه اجنیلردن حاصل اولان چوجققر ، سن رشده
وصوللری سنه سنده مأمورین بلدییه بالمراجعه فلمنکده اقامت
ایتمک نیتنده بولندقلرینی بیان ایتزلرله ، اجنبی عد اولنورلر . —
صورت مشروعه ده میدان کلن چوجققر پدرلرینه تابع ایسه لرده ،
اطفال غیر مشروعه ابویندن هانکیسی استلصاق ایدرله اوکا تابعدر .

مکسیقادہ، مکسیقالی بر پدرن حاصل اولان چوجقلر ایله
 مکسیقالی بر والدہ ایله قوانین محلیه نیک پدر اوله رق طانیدیغی بر
 کیمسه دن تولد ایدن، مجهول ویا تابعیتی مشکوک ابویندن
 مکسیقادہ تولد ایلیان، مکسیقالی بر پدرن مکسیقا خارجنده
 حصوله کان و مکسیقالی بر والدہ ایله مجهول بر پدرن کذا
 مکسیقا خارجنده میدانہ کان چوجقلر مکسیقا تبعه سندن در . —
 بوکا مقابل اجنبی بر پدرن ویا خود اجنبی بر والدہ ایله مجهول
 بر پدرن مکسیقادہ حاصل اولان چوجقلر سن رشده وصول لرینه
 قدر اجنبی عد اولور لر. رشید اولدقلری سنه سا کن اولدقلری
 محل مأمور لرینه مراجعتله ابوینلرینک منسوب اولدقلری تابعیتده
 قاله جقلرینی بیان ایتزلر سه مکسیقا تبعه سندن اولور لر . مکسیقا
 سفائن حریبه و تجاریه سی اوزرنده تولد ایدنلر مکسیقا ارا .
 ضیاع سنده تولد ایتش عد اولدقلری کی، مکسیقا مأمورین
 خارجیه سنک ممالک اجنبیه ده تولد ایلیان چوجقلری مکسیقا
 طبراغنده تولد ایتش حکمنده در لر .

— ۴ —

تابعیتی اصلیه تعیینی خصوصنده اختلاف ظهوری .
 دولت لک تابعیت اصلیه نیک تعیینی خصوصنده تابع اولد .
 قلمی قوانین احکامی هر یرده یکدیگره مشابه اولسه ایدی
 یینلرنده اختلاف ظهورینه امکان قالمزدی . مثلا نسل اساسی
 هر یرده جاری اولسه ایدی هر دولت کندی ملکی داخلنده
 اجنبی والدیندن تولد ایدن چوجقلری اجنبی عد ایده رک
 اوزرلرنده حق حمایه ادعا سنه قالقشمز و کندی تبعه سندن خارج

ملککده تولدایدن چوجققلری حمایه خصوصصنده ده مشکلاته تصادف ایلمزدی بونک کی مولد اساسی جاری اولسه ایدی هر دولتک کندی ملکی داخلنده اجانبده تولدایدن چوجققلر اوزرنده حمایه ادعاسنه اعتراض ایدلر و هر دولت کندی تبعه سندن مالکی خارجنده تولدایدن چوجققلری طوغد ققلری ملکک تبعه سندن عدا یتمکده تردد ایلمزدی .

فقط ، یوقاریده کورلادیکی کی ، بو خصوصده مختلف اساسلر واردر . و بواسلرک مشکلاتنی برطرف ایتمک ایچون ایدیلان تشبثات ، علی الخصوص بویولده کی اختلافاتک حانه یاردم ایده چک قواعد عمومیه نک فقدانندن دولایی ، بین الاقوام پک چوق مشکلات تولید ایدر . ایشده علاقه دار اولان کیمسه ، اصل منازع فیه اولان شی کندی تابعیتنی تعیین مسئله سی اولدیغندن ، تابع اولدینی دولت قانوننک نظر اعتباره آلمسنی ادعا ایده مز . بوباده آتی الذکر قاعده درمیان اولنه بیلیر :

« بری رأینه مراجعت اولنان حاکمک منسوب اولدینی تابعیت اولمق اوزره ایکی تابعیت آره سنده اختلاف ظهور ایلمدیکی حالده ، حاکم یالکزر نامنه اعطای حکم ایتدیکی قانونی ، قانون محلی یی lex fori نظر اعتباره آلمغه مجبوردر . »

بناءً علیه برتابعیت مسئله سنک حلنده محاکمک وظیفه سی یک بسطدر ؛ بونلر هانکی قانون نامنه اعطای حکم ایدیورلر سه آنجق اوقانون احکامنه رعایت ایدرلر ؛ اگر اوقانون قوانین اجنبیه یه التفات اولمغه مساعد ایسه اووقت قوانین اجنبیه احکامنی ده کوزه تیرلر . فقط ارباب سیاسته بو خصوصده ترتب ایدن وظیفه غایتله نازکدر . تابعیت قانوننرینک احکامی

علی الا کثر اشخاص عهده سنده ایکی صفتک اجتماع ایتمنی انتاج
ایلر . حالبوکه رجال سیاسیہ بر شخصک بردن زیاده تابعیتی حائر
اولماسی خصوصنی تأمین ایتمکه مکلفدرلر .

بوابده بعض مثاللرایله مسئله قولایجه اکلایشیه بیلیر :

۱ . — نسل اساسنه تابع اولان ایکی مملکت قانونلری

بیننده اختلافی تحدث ایده بیلیر . مثلاً بر فرانسز پدرایله المانیالی
بروالده دن صورت غیر مشروعه ده حاصل اولان چوجق پدری
طرفندن استلصاق اولنسه فرانسه قانونی نظرندۀ فرانسز
اولورسده ده مولودات غیر مشروعه پی والدیه اسنادایدن آلمانیا
قانونی نظرندۀ والدۀ سنه نسبتله هر حالده آلمان عد اولنور .

کذلک برولد غیر مشروع اولا فرانسز اولان والدۀ سی
وصکره ایتالیا تبعه سندن بولنان پدری طرفندن استلصاق ایدلسه ،
فرانسه قانونتجه الاول کیم استلصاق ایدرسه چوجق اوکا تابع
عداولندیغندن ، فرانسه حکومتجه اوچوجق فرانسه
تبعه سندنر ؛ حالبوکه ایتالیا قانون مدینسنجه پدرک استلصاقی
نه وقت اولورسده اولسون معتبر اولدیغندن چوجق اوکا بناءً
ایتالیان عداولنور .

بونک کبی صورت مشروعه ده حاصل اولان برچوجغک
مقدما اجنبی بولنان پدری زمان تولدندۀ تبعۀ عثمانیه دن اولورسده
اوچوجق قانون عثمانی نظرندۀ عثمانلیدر ؛ حالبوکه پدرینک
اسکی منسوب بولندیغنی دولت بدایت حملی تعیین تابعیتده مبدأ
عدایدیورسده بوچوجغکده ایکی تابعیتی اولور .

بوکی اختلافک حلنه چاره مولودات غیر مشروعه یه ده

یادریلرینک و یا والدہ لرینک صفتی اسناد ایدلمسی خصوصاً لرندہ
بین الدول برائتلاف وجودہ کتیرلمسیدر .

۲ . — مختلف اساسلرہ تابع بولسان ایکی مملکت قانونی
آرہ سنندہ اختلاف ظهور ایدر . مثلاً برفرانسزدن وەنەزوئەلادہ
برچوجق حامل اولسە بوچوجق وەنەزوئەلا مملکتیندە اورا
تبعەسندن و فرانسەدە فرانسه تبعەسندن عداولنور . بونک کبی
انکلتزەدە برفرانسزدن میدانە کلن چوجق انکلیز قانونلری
نظرندە انکلیز و فرانسه قانونلری نظرندە فرانسزدر . آنحقوق
افکلتزە حکومتی بومشکللی حل ایچون برچارە یە توسل ایتشدرد .
انکلتزە خارجیه نظارتنک ۱۸۵۸ سنە سنندە پارسەدە کی انکلتزە
سفیرینە کوندردیکی ، بالادە کوردیکمز ، بر تحریراتدە [۱]
انکلتزەدە تولد ایدن چوجق قارک پدیرلرینک منسوب اولدینی
مملکتیندە انکلیز مأمورلری طرفندن حمایە اولنە جانی اشعار
اولنشدرد ، یعنی برفرانسزدن انکلتزەدە حاصل اولان چوجق
انکلتزە تبعەسندن عد اولنەرق هر یردە انکلیز مأمورلرینک
حمایە سنی کورە جکسەدە فرانسه دە انکلیز مأمورلری بوچوجق
اوزرنندە حمایە ادعاسنە قالدشمیە جقلردر . بوندن بشقە انکلتزەدە
۱۸۷۰ تاریخندە نشر اولسان قانون جدید موجبینجە اجنبی
پدردن انکلتزەدە حاصل اولان چوجق قار سن رشده وصوللری
سنە سنندە پدیرلرینک منسوب اولدینی مملکت تابعیتی ترجیح
واختیار ایدە ییله جکلری کبی ، انکلیزلردن انکلتزە خارجندە
تولد ایلیان چوجق قارده ینە رشید اولدقلری سنەدە تولد ایتدکلری
مملکت تابعیتی ترجیدە مختار اوله جقلردر .

بونک کبی اسپانیا حکومتی ده محل ولادت اساسی قبول ایلمش اولان جنوبی آمریکا حکومتلری ایله مقاولات مخصوصه عقد ایلمشدره. بونلره نظراً او مملکتلرده اسپانیوللردن وجوده کلن چوچقار مولدلی اولان مملکت تبعه سندن وبالمقابله اسپانیا ممالکی داخلنده تولد ایدن چوچقار اسپانیا تبعه سندن عد اولنه جقلدر. اسپانیا ایله آرژانتین جمهوریتی آره سنده ۱۸۶۳ تاریخنده عقد اولنان مقاوله سیاسیه آریجه شایان تذکاردر. بو مقاوله به نظراً ، اسپانیوللر ایله آرژانتین تبعه سئک صفقاری تعیین ایچون اختلافک ظهوره کلدیکی مملکت قانونلری احکامنه رعایت اولنور . بناءً علیه اسپانیالی بر پدردن آرژانتین مملکتنده تولد ایدن چوچقار تابعیتجه اسپانیاده مسئله ظهور ایدرسه ، اسپانیا قانونلرینه توفیقاً ، چوچق اسپانیول عد اولنور ؛ اکر اختلاف آرژانتینده ظهور ایدرسه چوچق ، اورا قانونلری موجبجه ، آرژانتین تبعه سندن عد ایدیلیر .

۳. — بری نسل اساسی قبول ودیکری نسل ومولد اساسلرینی مزج ایتش اولان ایکی حکومت بیننده اختلاف قوانین اوله بیلیر . مثلاً آلمانیا تبعه سندن برکیمسه نک فرانسه ده برچوچنی تولد ایدوبده ، چوچقده ، پدینک مثلاً فرانسه ده متولد اولسندن دولای ، فرانسه عد اولنسه ویاخود تلسیق ایدلسه ، بوچوچق ، اکر آلمانیا حکومتدن ترک تابعیته مأذون دکلسه (آلمانیا نک ۱ حزیران سنه ۱۸۷۰ تاریخلی قانوننک ۱۳ نجی ماده سنک ۲ نجی فقره سی) ، یاخود آلمانیا حکومتدن هجرت رخصتنامه سی آلامش ایسه (۱۸۷۰ قانوننک ۱۳ نجی

ماده سنک برنجی فقره سی) ، و با خود آلمانیا اراضیسی خارجنده
 علی التوالی اون سنه اقامت ایتماش ایسه (۱۸۷۰ قانون سنک
 ۱۳ نجی ماده سنک ۳ نجی فقره سی) ، آلمانیا تابعیتندن چیقماش
 اوله جغندن ، عهده سنده ایکی تابعیت اجتماع ایدر . بونک ایچون
 یا آلمانیا حکومتی فرانسه ده اجنبیلردن متولد چوجقلرک حق
 اختیارلرینی تصدیق ایتک لازم کلیر ، که بو تصدیق هجرت
 رخصتنامه سنه معادل اولور ؛ یا خود فرانسه حکومتی کدی
 ملکنده آلمانلردن حاصل اولان چوجقلره آلمانیادن هجرت
 رخصتنامه سی استحصال ایتدکجه احکام قانونی سنی تطبیق
 ایلمامک اقتضا ایدر .

آوستریا و صربستان حکومتلری بیننده ۱۸۸۲ سنه سنده
 عقد اولنان مقاوله بوکی اختلافاتی حل ایچون پک ابی دوشو -
 نیله رک میدان کتبرلمشدر ، که بو مقاوله حکمنجه طرفیندن
 بر بونک تبعه سی دولت متبوعه سی تابعیتندن اصولاً چیقمدقجه
 دیگر بونک تابعیتنه قبول اولمز .

بوکی اختلافاتک حلی ایچون مهمما امکن چاره بولنور سده ده ،
 متلا روسیه کی ، تبعیت دائمه اصولی قبول ایدن بر دولت ایله
 فرانسه بیننده بوکی اختلافاتک حله چاره بولمق اوقدر آسان
 دکلدر . فرانسه ده فرانسر عد اولنه بیله جک بر روسیه لی ایچون
 بو خصوصده روسیه دولتمندن مأذون اولسنی طلب ایتک ،
 روسیه حکومتی قانونلرنده مندرج قواعد اساسیه یی فرانسه نک
 خاطری ایچون الغا ویا تعدیله اصلاً راضی اولیه جنی ایچون ،
 عبتله اشتغال اولور ؛ بونک کی فرانسه ده بو بابده فداکارلق

اختیار اتمیه جکندن بر شخص عهده سنده بو صورته اجتماع ایدن ایکی صفتدن برینک ازاله سی ممکن اولمز .

۴ . — نسل ایله مولد اساسلرینی مزج ایلان ایکی حکومت آره سنده ده بویولده اختلافات اکسیک اولمز . مولد اساسنه تابع اولان مملکتلرک اکثرنده تبعه محلیه نک ممالک اجنیه ده حاصل اولان چوجقلری نسل اساسنه توفیقاً پدرلری کبی تبعه محلیه دن عد اولندقلری حالده ، اجنبیلرک داخل مملکتده تولد ایدن چوجقلری مولد اساسنه توفیقاً تولد ایتدقلری محل تبعه سندن عد اولنورلر . ایشه بو مسله که تابع ایکی مملکت بیننده ظهور ایدن بو کبی اختلافاتک حلی ده قولای دکدر .

ایکی مملکت بیننده تابعیت مسائلندن دولایی تحدت ایدن بوقیلدن اختلافاتک اوچنجی بر مملکتده حلی لازم کلدیکی حالده اورا محاکمک نه صورته حرکت اتمسی لازم کله جکی بحثه کلنجه : وه نه زونه لاده ایتالیایی بر پدردن حاصل اولان بر چوجفک فرانسه ده تعیین تابعیتی ایجاب ایتسه عجبا بو چوجق مولد اساسنه تابع اولان وه نه زونه لا قانوننه توفیقاً ونه زونه لا تبعه سندنمی یوقسه نسل اساسنه رعایت ایدن ایتالیا قانونی موجبنجه ایتالیا تبعه سندنمی عد اولنه حق ؟ طرفیندن برینک قانونتی دیکرینه ترجیحه سبب اولدینی کبی ، مسئله نک انضباط عمومی وولی یه ده تعلقی اولدیغندن ، فرانسه قانوننک ده بو باده تطبیقنه محل یوقدر . بو کیمسه نک طرفین ممالککندن برنده اقامتگاه ی وارسه ، اقامتگاه اتخاذ ایتکله اورا تابعیتی ترجیح اتمش اولدینی آکلاشیله جغندن ، اقامتگاه اتخاذ

ایتدیکی محل تابعیتند اولدیغنه حکم ایتمک ممکن اولور .
اگر وه نه زوئه لاده ایتالیالی برپدردن حاصل اولوبده تابعیت
اصلیه سنی تعیین خصوصی طرفین بیننده منتج اختلاف اولدیغنی
فرض ایتدیکمز شو کی مسه نك طرفین مملکتلرینك هیچ
برنده اقامتکاهی اولمزسه ، رأینه مراجعت اولنان فرانسز
محکمه سی طرفین قانونلرندن احکامی فرانسه قانوننه اکیقین
بولاننی ترجیح ایتمک لازم کلیر؛ مثلزده ایتالیا قانوننك احکامی
دیکرندن زیاده فرانسه قانوننه یقین بولندیغندن ، فرانسه
محکمه سی اوکی مسه نك ، نسل اساسنه توفیقاً ، ایتالیان اولدیغنه
حکم ایلر .

اشته شوتفصیلاتدن تعیین تابعیت خصوصنك بین الدول نه قدر
کثرقلی اختلافاته بادی اولدیغنی ومع مافییه حل اختلاف
چاره لرینك هنوز بولنه مدینی آکلاشیلور . دولتلرک بوخصده کی
احکام قانونیه سی بیننده کی فرقلر ازاله اولنمدقجه بو اختلافاتکده
حلنه قولایلقله امکان بولنه مز . بناء علیه حقوق ادبیه ، حقوق
صناعیه ، وسائر خصوصاتسده بین الدول هیأت اتحادیه ایله
رفع اختلافاته همت اولندیغنی کبی ، تابعیت مسائلنده ده بوکبی
اتحاد وجوده کتیره رک شوپروزیلی اختلافاتی رفع وازالیه ارباب
سیاستک صرف غیرت ایلملری شایان تمئیدر .



اوچنجی فصل

تابعیت مسکوبه

— ۱ —

تبعیت

صورت تعیینی بوندن اولسکی فصاده ذکر وتفصیل اولنان
تابعیت اصلیه غیر قابل انحلال دکادر ، تبدل ایدر . تابعیت
اصلیه نك دکشمسنه تبدل تابعیت *changement de nationalité*
و بوتبدل اوزرینه یکیدن ظهور ایدن تابعیته تابعیت مسکوبه و یا
مکتسبه *nationalité acquise* دینلیر .

تابعیت اصلیه نك تبدلی ایله یرینه بر صفت جدیده قائم
اولسی ایچون ، اولاً بوامله بولنان کیمسه نك بونی اجرایه
صالح ، و ثانیاً راضی اولسی اقتضا ایدر .

تبدیل تابعیت اتمک استیان کیمسه نك صلاحیتی هنوز
تابعیتی حائز اولدینی دولتک قانونلری ایله تعین ایدر . بر
شخصک رضاسی اولمدقجه ده صفتنه تغیر عارض اولمز ؛ بناء علیه
بر دولت افراد تبعه سندن هیچ کیمسه بی جزاء تابعیتندن اسقاط
ایده مز و هیچ کیمسه به جبراً تابعیتی تحمیل ایله مز .

تابعیت اصلیه تلسیق ایله ، تبعه اجنبیه دن بری ایله ازدواج
ایتمکله ، بر دولت اجنبیه نك خدمت ملکیه و یا عسکریه سینه

کیرمکله ، ترك اراضی حالنده اختیار تابعیتله تبدل ایدر .
تبدل تابعیتہ رضانک تأثیری بوکا راضی اولان کیمسه نك شخصنه
منحصردر ، بشقہ سنہ تجاوز ایتمز .

تبدل تابعیتک شو صور عدیدہ سندن تلمسیور مؤلفلرجه
مختلف طرز لرده تعریف اولمشدر . موسیو قالوونک تعریفنه
کوره « تلمسیق بر اجنیدینک بر دولتک اهالی اصلیه سی میانہ
کیردیکی و داخل مملکتده تولد ایتمش کبی حقوق و امتیازات
احراز ایلدیکی بر کیفیتدر . » [۱]

موسیو وایس ایسه « تلمسیق قوہ عمومیه نك بر فعل حاکمانه
و انحصار کارانه سیدر که اونکله بر شخص او قوہ عمومیه ده متجلی
اولان دولتک اهالی اصلیه سی صفتی احراز ایدر . » [۲] دییور .
شو تعریفلردن استنباط اولندیغنه کور ، تلمسیق ایله بر کیمسه
اولجه منسوب اولندیغنی بر قومه ، بر جمعیت بشره ، بر هیئت
سیاسیه انتساب پیدا ایدرک ، او قومک ، او جمعیتک ، او
هیئتک افراد اصلیه سندن اولور و او افرادک حائز اولدیغنی بالجمله
حقوق و امتیازات و وظائفی احراز ایلر . معنای لغویسی ده بو
فکری افاده ایدر ، چونکه لغتاً بر قومه صکره دن ملحق
اولان کیمسه یه تلمسیور تعبیر اولنور . » [۳]

Calvo, Droit Interntional théorique et pratique [۱]

جلد ۲ ، صحیفه ۷۳

Weiss, Sraité théorique et pratique de droit [۲]

International privé جلد ۱ ، صحیفه ۲۸۱

[۳] قاموس ، جلد ۳ ، صحیفه ۵۰

موسیو وایسک تعریفنده کوسترلیدیکی اوزره ، تسلیق قوه
عمومیه نك بر فعل ماكانه و انحصار لارنه سیدر؛ یعنی تسلیق طلبنی
ترویج ایدن قوت بوطلبی رد دخی ایده بیلیر . بو قوتك هانکی
قوت اولدینی بین العلما مباحثات عدیده بی موجب اولمشدر .
مؤلفیندن بعضیلرینك قولنججه تسلیق معامله سنك اجراسی قوه
اجرائیه نك واسطه تنفیذی اولان رئیس دولته دكل قوه
تشریعیه عاندر . چونكه کیفیت تسلیق دولتك حیاتبه تعلق
ایتدیکنندن ، وطنه خدمته لایق اولیان کیمسه لری اهل وطن
میانته قبول ایچون نه قدر تأمینات آرانسه چوق کورلمز .
رئیس دولت بر شخص اولدیغندن ، اوکا بو قدر آغیر بروظیفه
تحمیلی جائز اولمز ؛ قوه تشریعیه ، یعنی مجلس ملی بر هیئت
اولدیغندن ، نفوذ خارجی به متابعتدن مصون قالیر . برده ملتیر
بر شرکته تشبیه اولنه بیلیر ؛ شرکترلره ایسه خارجدن داخل
اولق ایستیانلرك قبول و یار دی ایچون بالعموم اعضاء شرکتك
رأینه مراجعت اولنور ؛ ملتیرده ده بتون افراد امتك وکالتنی
بناء علیه اونك نامنه اعطای رأی صلاحیتنی حائز اولان
مجلس عمومیدر . اونك ایچون بو خصوصده مجلس عمومی
صلاحیتدار اولق لازم کلیر .

بو رأی پكده منطقه موافق اولدیغندن ، دیگر بر قسم
مؤلفلرك بحق اعتراضی دعوت ایتمشدر . کیفیت تسلیق لایقیله
تدقیق اولنورسه کوریلیركه بو ایش قانونه تنظیم ایتك دکلدر .
مجلس عمومی ، یعنی قوه تشریعیه طرفندن میدان کتیریلن قانون
منافع عمومیه به تعلق ایدر و حکمی زیر تابعیتده اولانلرك جمله سنه

شامل اولور . حالبوکه تلسیق بر شخصه بر طاقم حقوق تأمینندن عبارت اولدیغندن ، صرف شخصیدر . بونکله قوه تشریعه اشتغال ایتسه ، مسئله یه فضله بر اهمیت ویرلمش اولدقدن بشقه ، قوه مذکورده نك موجود اولان بونجه مشاغل مهمه و متنوعه سی آرہ سنده برده بوکا صرف ایدہ جك زمانلری قالمز . بوندن ماعدا ، تلسیق تدقیقاتی ایله مشغول اولدیغی ائساده جریان ایدہ جك مباحثاتك دول اجنیه ایله اولان مناسبات سیاسیہ یه سؤ تأثیری اولمق ممکندر .

ماتلر شرکتلره تشبیه اولندیغی حالده شو جهت ده واردر ، که شرکتلرده هر خصوص ایچون بالعموم اعضا نك رأینہ مراجعت ممکن وحقی آسان ایکن ، ملتدره ، افرادك کثرتنه مبنی ، بوضورت پك مشکل وبلکه ده عديم الامکان اولدیغندن ، افراد ملت نامنه حرکت ایدہ بیله جك اولان بروکیله بو خصوصده اعطای رأی صلاحیتنی ویرمك ضروریدر . مادامکه بوضورته مبنی وکلای ملت دیمك اولان مجلس عمومی یه بوضلاحتك اعطاسی دوشونیلیور ، حسب البیعه ملتك وکیلی دیمك اولان حکمدار — که قواء عمومیہ عهده سنده اجتماع ایتشدیر — بو خصوصده صلاحیتدار اوله بیلیر .

معلومات تاریخیه

زمانمژده هرکسك حائز اولدیغی تابعیتی تبدیل ایله بشقه برصفت احرازینہ اولان حق هان عمومیتله قبول اولنش سه ده ،

ازمنه قدیمه ده بویله دکلدی . یونانستان قدیم حکومتندن
اسپارطه ده ، لیکورگك وضع ایتمدیکی قانونلر حکمنه نظراً ،
اجنبی داخل مملکته قبول اولنمز و بر اسپارطه لینکده ترك
تابعیت ایتمسسه موافقت ایدلمزدی . آئینه ده ، صولون قانونی
حکمنجه ، آئینه یه خدمات مهمه ایضا ایتمش اولان بر اجنبی
اگر یکدیگرندن طقوز کون فاصله ایله ایکی دفعه آرای عمومیه یه
مراجعت اولندقدن صکره خفیاً ویریلن رأیده آلتی بیک کشینک
رأینی قازانیرسه آئینه تابعیتنه قبول اولنوردی . بر اجنبینک
آئینه تبعیتی استحصا ایده بیلمسی ایچون اقامتگاهنی آئینه یه
نقل ایتمش و یا خود مملکتندن مؤبدأ طرد اولنش اولسی لازم
ایدی . آئینه تابعیتنه داخل اولان بر اجنبی عن اصل یرلیدن
اولان آئینه لیلرک حائز اولدقلری حقوقك جمله سنی احراز
ایده میوب ، اصل یرلیلر کبی اولسی ایچون آرهدن اوچ بطن
کچمسی و بو ائنده علی التوالی آئینه ده ساکن اولسی لازم
کلردی . مع مافیه مناسبات تجاریه نك تکثری طبایعه ده موجود
اولان شدتی تعدیل ایتمدیکنندن ، اجنبیلرک صکره لری آئینه
تابعیتنه قبولی زیاده کسب سهولت ایتمشدر .

روماده اجنبیلرک تلسیقی پك اوقدر قولای دکلدی . فقط

اوتوز یاشنه کلوب آزاد ایدیلن اسرا ایله پیاجمی Peregrini
دینیلن لاتینلر روما همشهرینکی احراز ایده بیلیلرلردی . بو
لاتینلردن Junianii تسمیه اولنانلر روما همشهریسی عدا اولندقلری
حالده وفاتلرنده متروکانی کندیلرینی اعتاق ایدن اقدیلرینه
عائد اولوردی ؛ حالبوکه Coloniarii دینیلن لاتینلر حقوق

همشهری بی تماماً استحصال ایدرلردی . یونیانی فی تسمیه اولنان
لاتینلر رومالیلردن ویا لاتینلردن برقادین تزوج ایدوب بوندن
بر چوجق تولد ایتدیکنی وچوجغک اوزمان بر یاشنی اکمال
ایتمش بولندیغنی بر روما حاکمی حضورنده اثبات ایدرلرسه
همشهریلك حقوقندن تماماً مستفید اولورلردی . بوندن بشقه ،
رومانک کیجه عسا کر محافظه سی میانده آلتی سنه ایفای
خدمت ایدن ، اون بیک اولچی وسعتنده بر سفینه ایله رومایه
آلتی سنه بغدادی نقل ایدن ، روماده اوچ سنه دکرمنجیلک
ایدن ، روما ویا جوارنده خانه انشا ایلیان ، مملکتکته حاکمک
ایتمش اولان لاتینلر ایله اوچ چوجق والده سی اولان لاتین
قادینلر روما همشهری سی اوله ییلرلردی .

کذا بر رومالی لاتین ویا اجنبی اولان بر قادینه حین
ازدواجده زوجه سی [رومالی] ظن ایتدیکنی [چوجق] میدانه
کلدکن صکره حضور حاکمه اثبات ایدرسه کرک [زوجه سی]
کرک چوجقلری رومالی اولورلردی .

اجنبیلرک روما تابعیتنه دخولی بتون رومالیلره متعلق
اولدیغندن ، بوکیفیت عمومک معلومی اولمق ایچون برنج لوحه لر
اوزرینه حک ایله عمومی میدانلرده شهر واعلان اولنوردی .
هر اجنبی روما تابعیتنه قبول اولنور ایدی ایسه ده غول مملکتی
اهالیسنک قبولی ایچون بونلرک تبدیل مذهب ایله روما مذهبنی
قبول ایتملری لازم ایدی .

بر اجنبی روما تابعیتنه داخل اولدینی حالد بوندن

زوجہ سی ایله چوجقلى استفاده ایتزلردی ؛ بونلرکده روما تابعیتده کیره بیللملری ایچون آریجه معامله اجرایی لازم ایدی . جرماملرده بر اجنبی آره لرنده برسنه مدتله اقامت ایتدیکی وافراده قیبله نك رضا و موافقتده انضمام ایلدیکی حالده جرمان اولوردی . آنجق سلاح قوللانق ، محاربلك اجتماعات سیاسیه - سنه و انتخابات عمومیه یه اشتراك ایلکم حققرینی احراز ایتکم ایچون اجنینه نك حین قبولنده قیود صریحه بولنق اقتضا ایدردی .

ممالك عثمانیه ده تسلیق

ممالك دولت علیه ده اجنیلرک تسلیقنی تعین ایدن ماده نظامیه شودر : « سن رشده واصل اولان بر اجنبی ممالك عثمانیه ده علی التوالی بش سنه اقامت ایلدیکی حالده بالذات ویا بالواسطه خارجیہ نظارت جلیله سنه بر استدعا تقدیمله تابعیت دولت علیه یی استحصال ایده بیلور . » [۱]

شوماده قانونیه یه نظراً ، ممالك عثمانیه ده بر اجنینه نك تسلیق ایچون شرط اساسی سن رشده وصولندن اعتباراً ممالك دولت علیه ده بلا فاصله بش سنه اقامت ایتمکدر . بوقدر مدت ممالك محروسه ده مقیم اولمش اولان هر اجنبی حکومت سنیه یه تسلیق ایچون مراجعت ایده بیلیر . بوماده صراحت لازمه دن عاریدر : چونکه شریطه اقامتک مبدائی عند اولنه جق اولان سن رشدک کیفیت تعینی مسکوت عنه بر اقلمشدر ، یعنی تسلیق استد - عاسنده بولنان اجنینه نك سن رشدی هانکی قانونه توفیقاً تعین

[۱] تابعیت عثمانیه قانوننامه هایونی : اوچنجی ماده .

اوله جنی تصریح اولنما مشدر . عجبا بوا ملاده بولنان اجنبی قوانین عثمانیه نظر نده می رشید اولمق یوقسه دولت متبوعه سی قانونه کوره می سن ر شده واصل اولمش عد اولنمق اقتضا ایدر ؟ نظریاته باقیلیرسه ، هر کسک سن رشدی کبی اهلیت شخصییه سنی تعیین ایدن قانون منسوب اولدینی دولت قانونیدر . بر کیمسه تابعیت اصلیه سندن چیقنجه یه قدر بو خصوص ملرده دولت متبوعه قانونلرینه تابعدر . او حانده ممالک عثمانیه ده تابعیت دولت علیه یه قبول اولنمق آرزو سنده بولنان بر اجنیدنک سن رشدی ، مادامکه هنوز تابعیت اصلیه سنی ضایع ایتمام مشدر ، دولت متبوعه سی قانونلری احکامنه توفیقاً تعیین اولنمق اقتضا ایدر . بناء علیه او قانونلره کوره سن ر شده واصل اولان بر اجنبی ، قانون عثمانی یه نظراً ، او زماندن اعتباراً بش سنه صکره تابعیت عثمانیه قبولی ایچون مراجعت ایده بیلیر .

دولت لک موضوعات قانونیه سی یکدیگره بکزه مرز ، متبایندر . بوا اهلیت شخصییه مسئله سنده کی احکام قانونیه ده او یله در . بعض دولت لک بو خصوصه منحصراً کندی قانونلری احکامنی کوزه تیر ، قوانین اجنبیه احکامنه التفات ایتمزلر ؛ کندی ملیکارنده ساکن هر شخصک ، ولو اجنبی اولسون ، اهلیت شخصییه سنی کندی قانونلری ایله تعیین ایدر لر . اثبات رشد مسائلمده ممالک دولت علیه ده قوانین عثمانیه احکامی حائز رجحان عد اولنور ، فقط بونک ایچون اختلاف ظهوری ممکن اولدیغندن مطرد بر حرکت تعقیب اولنه مامقده در .

ذکر اولسان ماده قانونیه موجبجه سن ر شده واصل

اولدقن بالاعتبار بش سنه متهادیا ممالك عثمانیه ده اقامت ایدن هر اجنبی مراجعت ایتدیکی حالده تلسیق اولنمق لازم کلیر .
 حالبوکه امر تلسیقدهده بونیتده بولنان بر کیمسه نك بو فعلی اجرایه صلاحیتی بولنمسی لازم کلدیکی حالده قانون بو جهتی مسکوت عنه بر اقمشدر ، که اک مهم فقائضنددر . بر فعلی اجرایه صالح اولیان بر شخص او فعلی اجرا ایده مز ؛ تابعیت اصلیه سنی تبدیله صالح اولیان بر کیمسه تبدیل تابعیت ایدوب بر صفت جدیده کسب ایلیمز . ممالك عثمانیه ده تلسیق اولنمق ایچونده اول امرده تابعیت اصلیه دن فارغ اولمق لازمدر . قانونده ایسه بوجهندن هیچ بحث اولنماشدر . اگر مقن قانون حرفیاً تطبیق اولنسه ، چونکه تلسیق استدعاسنده بولنان اجنیلرک دولت متبوعه لرئ ایله اولان ارتباطلری قطع اولنوب اولمدیغنه باقلمیه جغندن ، تلسیق اولنان شخص عهده سنده علی الاکثر ایکی تابعیت اجتماع ایتک ایجاب ایدر . ایشته قانون عثمانیه کی نقصانک انتاج ایده جکی شو یولسزلغه میدان ویرمامک ایچون تلسیق اولنمق استیان هر اجنیدن دولت متبوعه سیله اولان علاقه سنی کسه رک بر ایلیشیکی قالمدیغنه وکندیسنک بر صفت جدیده اکتسابنه حلاحتی اولدیغنه دائر اداره بر وثیقه طلب اولنقدهدر .

ممالك عثمانیه ده تلسیقک دیکر بر طرزی دها واردر که اوده بوراده تولد ایتمش اولان اجنیلره متعلقدر . بوکادائر اولان ماده قانونیه ده دینلیورکه : « والدینی اجنبی اولدیغنی حالده ممالك شاهانه ده متولد اولان شخص سن رشد وصولی تاریخندن

بدأ ایله اوج سنه ظرفنده تابعیت دولت علیه یی بحق طلب
ایده بیلور .» [۱]

بوماده یه نظراً ممالک عثمانیه داخلنده تولد ایدن اجنیلر
سن رشنده وصوللرنده اقامت شریطه سنه رعایتدن معافدرلر ،
رشید اولدقلری آنده تابعیت عثمانیه یی احرازه حق قازانیرلر .
بالکمز بو حقدن استفاده لری اوج سنه یه منحصردر . او مدت
ظرفنده مراجعت ایتزده وقتی کچیررلرسه ، صلاحیت قانونیه
اولماسنه نظراً حق معافیتلری اوله میه جفندن ، دیگر اجنیلردن
فرقلری قالمز . بناءً علیه تلسیق اولنق ایچون زمان
رشدلرندن اعتباراً بش سنه داخل ممالک عثمانیه ده اقامت
ایتملری لازم کلیر .

« قوه عمومیه نک بر فعل حاکمانه وانحصار کارانه سی » دیه
تعریف وتوصیف اولنان تلسیق اجراده دولتک اقتدار ی مطلق
اولدیغندن ، ماده قانونیه ده کی « بحق » تعیرینک جهت توجیه ی
مفقود وبناءً علیه تعیر مذکور زاندر .

ممالک عثمانیه ده اجانبک تلسیق ایچون موضوع بولنان
شریطه اقامته رعایت تلسیق اولنق آرزوسنده بولنان افراد
اجانبه هاندر ، یوقسه دولت بوقید ایله مقید اوله مز . نته کیم
قانونک دیگر بر ماده سنده « سلطنت سنیه بند سابقده محرر
شرائطی ایفا ایتماش اولان اجنیلری دخی مساعدۀ استثناییه

شایسته کوردیکی صورتده فوق العاده اوله رق تابعیتنه قبول ایدر . [۱] دینلمشدر .

مواد سالفه خلاصه اولدینی حالدہ شو احکام استنتاج اولنور : ممالک شاهانہ دہ تلسیق اولنقی ایچون سن رشده وصولدن اعتباراً داخل ممالک عثمانیہ دہ علی التوالی بش سنہ اقامت ایتمک ویاخرد ممالک عثمانیہ دہ تولد ایتمش ایسه سن رشده وصولده تلسیق ایچون مراجعت ایلمک لازمدر . بوشرطلری ایفا ایتمیان اجنبیلره ، حکومت سنیه تابعیتہ قبوله لایق کوردیکی حالدہ ، تابعیتنی تفویض ایدہ بیلیر .

تلسیقک تأثیراتنه کلنجہ ، تلسیق ، قانون عثمانی یه نظراً ، اجنبینک یرلی کبی اولمسی دیمک اولدیغندن ، تبعه اصلیه عثمانیه نک حائز اولدینی بالجمله حقوق و امتیازات تلسیق اولنان کیمسه لره دہ تماماً شامل اولور . بناءً علیه کرک مقروق مخصوصه و مقروق مرنیه ، کرک مقروق سیاسه جه عن اصل یرلیدن اولان عثمانیلیر ایلہ بالآخره تابعیت عثمانیه یه قبول اولنان اشخاص بیننده هیچ برفرق یوقدر . وظائف عمومیه جه دہ تبعه اصلیه ایلہ ملسق عثمانیلیر تماماً مساوی اولوب ، جمله سی ، مثلاً ، مدافعه مملکتہ و تکالیف دولته اشتراک مجبوردر .

تلسیقک ماقبلنه شمولی یوقدر . تابعیت عثمانیه یه داخل اولان بر کیمسه نک تلسیقندن اول عقد ایتمش اولدینی بالجمله تعهدات ، انضباط عمومی و ملی یی اخلاص ایتمکجه ، محاکم

عثمانیه نظر نده مقبولدر. تلسیقدن اول برکیمسه نك عقد ایتمش اولدینی ازدواج اوشخصك تابعیت عثمانیه یه قبولندن صکره ده مشروع عد اولنور. بو حکم احکام فقهمیه ده موافقدر : قبول دین ایدن برکیمسه نك قبل الاهتدا عقد ایتمش اولدینی نکاح کندیسنك اهتداسندن صکره ده مقبول اولوب ، بعد الاهتدا تجدید نکاحه لزوم اولمز . [۱]

بالتسلیق تابعیت عثمانیه یه داخل اولمش اولان برکیمسه اجنبی بولندیغی زمان بر جنایت ایقاع ایتمش اولورده فعلک واقع اولدینی مملکت حکومتی اعاده سنی طلب ایدرسه مسئله شایان تدقیق بر حال کسب ایدر. اعاده مجرمینه متعلق قواعد اساسیه دندرکه تبعه محلیه اعاده اولمز . اگر تلسیقك ماقبلنه شمولی اولورسه مؤخرأ تابعیت عثمانیه یی احراز ایدن برکیمسه جرمك زمان وقوعنده عثمانلی اولمش عد ایدمك و بناء علیه طلب ایدن حکومته تسلیم اولنمیوب محاکم عثمانیه طرفندن دوچار مجازاة اولنق لازم کلیر . بالعکس کیفیت تلسیق ماقبلنه اجرای تأثیر ایتمزسه جرمك حین ایقاعنده اوشخص اجنبی بولندیغندن محاکم عثمانیه ایشنده صلاحیتدار اولمز ؛ حالبوکه حین طلبده شخص مرقوم عثمانلی بولندیغندن طلب ایدن حکومته تسلیم اولنمز . هر ایکی حالده ده ارباب جرائم تلسیق ستایه سنده تعقیب و مجازاتدن قورتلمش اولور . بوکا چاره اولق اوزره ، استرداد مجرمین حقنده انکلاتره ایله فرانسه بیننده ۱۸۷۶ سنه سنده منعقد معاهده یه جرمك ایقاعندن صکره تلسیق اولنان

اشخاصك تابعیت جدیدہ سی نظر اعتبارہ آلفمقصرین دیگر طرفہ تسلیم اولنہ جغنه دائر بر ماده علاوه اولنمشدر . ایشته بوده تلسیقك مابقلنہ شمولی مناسبات دولیہ ده قطعياً رد اولندیغنه دلالت ایدر .

رئیس عائله نك تبدل صفی زوجہ و چوجقلرینك صفتی تبدیل و تغییر ایدہ مز . بر شخصك بردولت تابعیتہ کیرمی حقنہ کی آرزوسی شخصیدر ؛ زوجہ سی ایله چوجقلری بو آرزویہ اشتراك ایتدجکہ ، تابعیتك اختیاری اولسی قاعدہ اساسیہ سنہ توفیقاً ، رئیس عائله ایله برابر تابعیت جدیدہ احرار ایتمش اولزلر . بناء علیہ تابعیت عثمانیہ یی احرار ایدن بر اجنیک یا لکزر شخصی عثمانلی اولور ، زوجہ سی و چوجقلری اجنبی قالیر . بوکا دائر اولان مادہ قانونیہ ده دینلمشدر کہ « دولت علیہ تابعیتہ کیرمش اولان اجنینك اولادی صبی بیله اولسه پدرینك صفت تابعیتہ تابع اولیوب اجنبی عد اولنور . » [۱] اشبو حکم قانونی تلسیق اولنان اجنیلرک چوجقلری حقنہ صریحدر . صبی اولوب ، هنوز رشید اولمیان چوجقلره بیله پدرلرینك احرار ایتدیکی صفت جدیدہ اجرای تاثیر ایتزسه ، سن رشده واصل اولان چوجقلره بونك هیچ بر تاثیر اوله مامق طبعیدر . بومادہ قانونیہ زوجہ لری مسکوت عنه براقش اولدیغندن جای مطالعه اوله بیلیرسده ، مادامکہ تابعیت رضای طرفینہ معلقدر ، مادامکہ زوجك رضاسی

[۱] تابعیت عائله قانوننامہ هایونی : سکزنجی ماده نك فقرہ

اخیرہ سی .

زوجہ نك ده حصول رضاسی معناسی اضمن ایتمز ، ومادامكه قانوندهده بوخصوصده صراحت اولمامقاله برابر عبارۀ قانونیه دن مسلك قانونك تلسیقك تأثیری شخصی اولمی اولدینی آكلا- شیلیور ، تابعیت عثمانیه به داخل اولان بر اجنینك زوجہ سی ، چوجققری کبی ، اجنبی قالیر ، عثمانلی اولمز .

- ۲ -

تابعیت عثمانیه نك ضیاعی

تابعیت اساساً طرفین بیننده منعهده بر مقاوله حکمنده اولدیغندن ، رضاء طرفین ایله تبدل ایدر ، تابعیت اصلیه یرینه تابعیت مکسوبه قائم اولور . [۱] بناءً علیه بردوات صفت تابعیتی جبراً کیمسه به تحمیل ایده مدیکی کبی ، تحت تابعیتنده ایکن تبدیل تابعیت ایتمك استیان اشخاصی ده کذا جبراً تحت تابعیتنده طومتق حقنی حائر دکادر . ازمنه سالفه مؤسساتنك تأثیر اتندن هنوز وارسته قاله میان بعض قوانین اجنبیه زمانمزرده حالا تبعیت وائمه اصولی محافظه ای دیور لر سدهده ، بو صورت تبدیل تابعیت ایتمك استیانلرك رضاسی ایله تضاد تشکیل ایتمکده اولدیغندن ، نظریات جدیدیه موافق دکادر . بوکا مقابل دوات تبعه سندن هیچ کیمسه نی رضاسی خلافه اوله رق تابعیتدن طرد و اخراج ایده مز . تابعیتدن بالاسقاط حدود ملکیه خارجه چیقاریلان شخصی

سائر دولتر تابعيته قبوله مجبور اولدقلرندن ، بويله بر معامله اوشخصك حايما تلوز اولمسي انتاج ايدر ؛ بوايسه جائزدكدر .
~~اشته بوايسا بدن ناشي زمانمزد هركس حائز اولديني تابعيت~~
 اصله ي ترك ايله بر صفت جديده اكتساب ايدم بيلير . افرادك
 بو حقوق بوكون پك آز استتبا ايله عموماً قبول اولنمشدر .

آ محق بر شخصك دولت متبوعه سي تابعيتندن چي قمسي
 يالكز كنديك بيان ارزو اتمسييله جائز اوله من ؛ اوشخص
 ارتق دولت متبوعه سنه ارزو اولنديني وجهله خدمت ايفاسيله
 منفعت تأمين ايدميه جك بر حالده بولنق لازم كليز .
 عثمانى بونقطه لري نظر اعتباره آلهرق « سلطنت سنيه طرفندن
 مأذون اولمقسرين ديار اجنبيه ده تبديل تابعيت ايدن ويا خود
 بر اجنبي دولتك خدمت عسكريه سنه كيرن شخصي دولت عليه
 استرسه تابعيتندن اسقاط ايدم بيلير و بو مقوله تابعيتي اسقاط
 اولنان اشخاصك ممالك شاهانه يه عودتي ممنوع اولور ، [۱]
 حكمنى وضع اتمشدر . بوماده قانونيه يه نظراً ، بر شخصك
 تابعيت عثمانيه دن چي قمسي كنديسك اختيارينه تابع ديمكدر ؛
 چونكه ممالك اجنبيه ده تبديل تابعيت ايتك ويا خود اجنبي
 دولتك خدمت عسكريه سنه كيرمك بر شخص ايچون هيچ بر
 وقت مجبوري اوله ميوب اختياريدر . ينه بوماده قانونيه حكمنجه
 تبديل تابعيت خصوصى سلطنت سنيه دن مأذون اولمغه متوقف
 اولوب ، بلا مأذونيت ايديلن تبديل تابعيتك دولته معتبر عد
 اولنمسي سلطنت سنيه نك رايته تابعدر . بز حكمنى متضمن ديكر

بر ماده قانونیه ده « تبعه سلطنت سنیهدن مأذوناً تابعیت اجنبیه به کیرن اشخاص تبدیل تابعیت ایتدکری تاریخن اعتباراً اجنبی صفتده طوتیلوب حقلرنده اولوجهله معامله اولنور. فقط دولت علیه دن مأذون اولقسزین تابعیت اجنبیه به کیررسه اشبو تابعیت جدیده کائن لم یکن وکندیسی کما کان تبعه دولت علیه دن عدد اولنوب کافه خصوصاته تبعه دولت علیه حقنده اولنان معامله نک عینی اجرا قلمه جقدر. هر حالده تبعه دولت علیه دن بر شخصک ترک تابعیت ایتسی مطلقاً اراده سفیه اوزرینه ویریله جک برسندہ معلق اوله جقدر » [۱] عباره سی مندر جدر. بواییکی ماده قانونیه مزج ایدلدیکی حالده شو احکام چیقار : بر عثمانلیک تابعیت عثمانیه سنی ترک ایتسی مطلقاً اراده سفیه پادشاهی استحصاله متوققدر ؛ سلطنت سنیهدن بلا مأذونیت ترک تابعیت ایدن اشخاص ینه کافی السابق عثمانلی عداولنور، مؤخرأ اکتساب ایتش اولدیغی صفت جدیده اصلاً نظر اعتباره المنز و ممالک شاهانه به عودتنده حقنده تبعه عثمانیه معامله سی ایفا ایدیلیر، تابعیتی اکتساب ایتش اولدیغی دوات مأمورلرینک ممالک شاهانه به بوکی اشخاصی حمایه ایتسکه حقلری یوقدر ؛ کرک بویولده ممالک اجنبیه ده دیگر بر تابعیت اکتساب ایدن کرک سلطنت سنیهدن مأذونیت استحصال ایتسکسزین خدمت عسکر به به کیرن اشخاصی دولت ایسترسه تابعیتدن اسقاط ایدر. فقط بو اسقاط معامله سی سلطنت سفیه نک ید اختیارنده در ؛ بوکی اشخاص مطلقاً تابعیت عثمانیه دن طرد اولنمز. بووجهله صفت عثمانیه سی نزع اولنان

کمه لرك او حالده تكرر ممالك شاهانه به عودت لرینه مساعدده ایدلمز .

بومحمد نظر اعتباره آله حق بر جهت دها واردر :
 بر شخصك تبدیل تابعیت ایتسی اول امرده کنديسنگ بوفعلی
 صالح بولمسنه توقف ایدر ؛ چونکه تبدیل تابعیت صلاحیتی
 اولیان کمه لرك اجرا ایدم جکری افعالک حکمی اوله مز .
 دیمک اولیور که بر شخص تبدیل تابعیت ایتک استدیکی حالده
 بوارزوسنگ حصولی زمانده کنديسند بونی اجرایه صلاحیت
 بولمق لازمدر . بوسالاحتی تعیین ایدم جک قانون ایسه اوشخصك
 اصلاً منسوب اولدینی دولت قانونلریدر ، مؤخرأ تابعیت کیرمک
 استدیکی دولتک قانونلری بوضصوصده بیان رأی ایدم مز .
 بناءً علیه مثلاً بر عثمانلینک بر دولت اجنیه تابعیت کیرمی ایچون
 کنديسنگ بوفعلی اجرا ایدم بیلوب ایدمیه جکنی تعیین ایدن
 شی قانون عثمانیدر ؛ بلکه تابعیت کیرمک استدیکی دولت
 قانونلری قوانین عثمانیه نك بوضصوصده کی احکامنه منافی حکمی
 حاوی اولور ؛ فقط اصل اولان قانون عثمانی اولدینی ایچون
 بهمه حال اول امرده اونک حکمی معتبردر . قانون عثمانی احکامنی
 انفاذ ایدم رک صفت عثمانیه سنی ضایع ایتدکن صکره ایسه
 دولت اجنیه قانونی حکمنه تابع اولور ، صفت اجنیه بی اجرایه
 ایچون او قانون حکمنجه نه کی شرائط ایفا ایتسی لازم کلیرسه
 اونلری ایفا ایتک اقتضا ایدر . بوحکم فلورانس محکمه تمیزی
 طرفندن ۲۵ نیسان سنه ۱۸۸۱ تاریخده اعطا اولنان برقرار ایله
 موقع اجرایه وضع اولمشدر که بوقرارده یکی بر تابعیت اکتسابیله

اسکی بر تابعیتک ترکی یکدیگرندن آیری شیر اولوب ، یکیمی
 حقدده اونک اکتساب اولنه جفی مملکت قانونلری احکامی
 واسکیسنک ترکی حقددهده اواسکی صفت ایله مربوط بولینلان
 مملکت قانونلری احکامی جاری اوله جفی تصریح ایدلمشدر .
 متأهل اولان قادینلرک ممالک اجنبیهده تبذیل تابعیت
 ایتلمی هیچ جائز اوله مز . چونکه قادینلر تأهللری ایله
 برابر زوجلرینک بولندقلری تابعیته کیررلر و زوجلرینک داخل
 اولندقلری بر تابعیتی کندیلکرنندن استحصال ایتلمی قواعد
 اساسیهیه منافی اولور . قادینلرک زوجلرینک بولندقلری تابعیته
 داخل اوله جقلری قانون عثمانینک آتی الذکر ماده سندن استنباط
 اولنور: ماده مذکوردهده « تبعه دولت علیه دن ایکن اجنبی ایله
 تزوج ایدن قادین زوجنک وفاتی تاریخندن اعتباراً اوچ سنه
 ظرفنده استدعا ایدرسه تابعیت اصلیه سنه رجعت ایده بیلیر » [۱]
 دیمشدر ؛ یعنی بر عثمانلی قادین بر اجنبی ایله ازدواج ایتدیکی
 حالده صفت عثمانیه سنی ضایع ایدر و بو صفتی زوجنک وفاتندن
 صکوره استرسه تکرار استحصال ایده بیلیر . شو حالده ، مادام که
 بر اجنبی ایله تزوج ایتمی بر قادینک تابعیت اصلیه سنی ضایع
 ایلیمسنه — محضاً زوجی ایله هم صفت بولمق ایچون — کفایت
 ایدیور ، اوقادینک زوجنک داخل اولدینی دیگر بر صفت
 جدیدینی مؤخرأ اکتساب ایتمی هیچ تجویز اولنه مز .
 تابعیت اصلیه بر مملکت اجنبیهده وطن اصلیه سنه عودت
 ایتماک نیتیه یرلشمک صورتیهده ضایع اولور . بر مملکت

[۱] تابعیت عثمانیه قانوننامه ۱۲۸۵ فی ، بدنجی ماده

اجنبیه ده وطن اصلیه نه عودت ایتماک نیتیه تأسس ایلماک بو
حرکتده بولسان شخصک امور ومصالحه و خصوصیات
سارنه سنجه کندیهی ایچون نفع وخیر بولندیغه دلالت ایدر.
هر شخص حقنده خیرلی اولان شیرلی ، یالکیز ذاتنه منحصر
اولق اوزره ، اجرا ایتکده حردر. یوندن دولای برکسه نک
بویولده بشقه برمالکیتده یرلشمسینه اعتراض اولنمیه جنی کی بو
وجهله یرلشمش اولان بر شخصی وطن اصلیه نه عودته اجبار
ایتکده حقی اولمهز. بو حکمته مبنی حق مهاجرت بوکون عالم
مدنیتده قبول وتصدیق اولنمشدر. قانون عثمانیده بوکا دایر
ماده مخصوصه یوقسه ده ، سلطنت سنیه ایله شمالی آمریکا حکومت
متحده سی آره سنده ۱۲۹۱ سنه سی جمادی الآ خره سنده بر مقاوله
مخصوصه عقد اولنهرق مهاجرین حقارنده طرفین مالککنده
اجرا اولنه حق معاملات تعیین ایدلشددر. بو مقاوله نک ایکنجی
ماده سنده « تبعه دولت علیه دن ممالک مجتمعه آمریکا ده تبدیل
تابعیت ایتش اولان کسه لر آمریکایه عودت ایتماک نیتیه
ممالک محروسه شاهانه ده اتخاذ مسکن وماوی ایدرلرسه آمریکا
تابعیتی غائب ایده جکلردر. ممالک محروسه یه عودت ایتماک
نیتیه کیدوب آمریکاده اقامت ایده جک آدمز دخی دولت علیه
تابعیتدن محروم اوله جکلردر. طرفین مالککنک برنده تبدیل
تابعیت ایتش اولان برکیمسه دیگرینک مالککنده علی الدوام
ایکی سنه اقامت ایدرسه عودت ایتماک نیتیه اولدینی ثابت
اوله جقدر « دیه ذکر اولنش ، ومؤخرأ بوماده نک فقره
اخیره سی تعدیل و « تبدیل تابعیت ایتش اولان کیمسه مارالذکر

ایک سنہ تک انقضاسندن اول تابعیتی ترک ایتمش اولدینی مملکتدن موقتاً مفارقت ایتسه بیلہ عودت ایتماک نیتندہ بولندینی ینہ ثابت اولہ جقدر ، دنیلہ رک تصحیح وایضاح ایدلمشدر .
اشبومقاولہ ، طرفین بینندہ قرارلاشدیرلمش وحتی بالآخرہ متن وعبارہ سنده و ترتیباتندہ تعدیلہ بیلہ اوغرامش سہدہ ، تصدیقنامہ لری تعاطی اولمدیغندن موقع اجرا یہ وضع اولنہ مامشدر .

— ۳ —

ازواجک قادینک صفتہ ثانیری

هر نه قدر هر شخصک بر صفت تابعیت احراز ی ایلہ عن اصل حائز اولدینی صفتی تبدیلہ صلاحیتی وارسہدہ ، بوضلاحتیک سؤاستعمالی ایلہ برعائلہ ایچندہ بوصفتلرک تعدد ایتماسی اززو اولنور ؛ زیرا زوجین مختلف تابعیتلرده بولنور سہ منافع عائلہ رخنہ دار اولور . بونک ایچون ایکی کیمسہ تاهل ایدہ رک برعائلہ میدانہ کتیر دکلی زمان صفتلری اتحاد ایتک ، ایکسی دہ بر تابعیتی حائز اولق لازم کلیر . زوجہ بر جوق خصوصاتدہ زوجہ تابع اولدیغندن ، بوندهدہ زوجک صفتی غلبہ ایدر ؛ قادین تابعیت اصلیه سنی ضایع ایدہ رک زوجک صفت تابعیتی اکتساب ایلر . جنوبی امریکا حکومتلرنده بالاستنا ارککلر زوجہ لرینک صفت تابعیتی احراز ایدر لرسہدہ ، ممالک سائرہدہ ، بالعکس ، قادینلر زوجہ لرینہ تابع اولور لر . تابعیت عثمانیه قانوننامہ هایوننده تبعہ عثمانیه دن بر ارککلک بر اجنبی قادین ایلہ ازدواجی

حائده قادینک، عثمانلی بولنان زوجنه تبعاً، صفت عثمانیه اکتساب ابدوب ایتیه جکی حقنده صراحت یوقدر. آنجق ممالک شاهانده قادینلرک زوجلرینه تابع عد اولندقلرینه دلالت ایدن، بالاده کوردیکمز، یدنجی مادهیه نظراً عثمانلی ارککلر ایله ازدواج ایدن اجنبی قادینلر عثمانلی اولورلر.

بونده قادینک صلاحیت شخصیه سیله ازدواجک مشروعیتی نظر اعتنایه آلمق لازم کلیر. صلاحیت شخصیه دولت متبوعه قانونیه تعین ایتدیکندن، منسوب اولدینی دولتک قانونی قادینک ازدواجنه وبو ازدواج حسیله تابعیت اصلیه سنی ضایع ایتسنه مساعد ایسه قادین عثمانلی اولور؛ دکلسه اجنبی قالیر. قانون عثمانینک بو بابده صرحتی حائز اولمامسی ده جمله نقائصنددر؛ هیچ اولمزه برعثمانلی ارکک ایله ازدواج ایدن اجنبی برقادینک، منسوب اولدینی دولت قانونی مساعد اولمق شرطیله، تابعیت عثمانیه، ازدواجی حسیله، داخل اوله جنی صریحاً مندرج اولمق اقتضا ایدردی. او حالده، ایلریده کوریه جکی اوزره، فرانسه ایله تحدت ایدن اختلاف قانونی کی اختلافاته میدان اولمزدی.

فرانسه کی، بعض یرلرده تبعه محلیه دن بر ارکک ایله ازدواج ایدن نساء اجنبیه مطلقاً زوجنک بولندینی تابعیته کیرمش عد اولنیور؛ دولت متبوعه قانونی قادینک صلاحیت شخصیه سنی تعیینده معتبر طوتلمیور و تابعیت اصلیه خلل کلوب کلیه جکی مسئله سنده او قانونه هیچ اهمیت عطف اولنمیور. حالوکه تبعه سندن بولنان قادینلرک صفتیه ازدواجک تاثیرینی قبول ایتیان بر دولتک تبعه سندن بولنان برقادین احکام قانونیه سی

فرانسه اصولنه مشابه بردولت تبءه سندن اولان برارکک ایله ازدواج ایدرسه، او قادینک ایکی تابعیتی اولوق لازم کله جکندن فرانسه اصولنده محذوردن سالمدر دینیله مز .

نکاحک مشروعیتنه کلنجه ، قادینک بالازدواج صفت تابعیتی تغیرایتمک ایچون عقد اولنسان نکاحک مشروع اولسی لازم کایر. عقدده فساد اولورسه، نکاح منعقد اولماش اوله جقندن قادینکده تابعیت اصلیه سنه خلل کلز . آنجق نکاحک فسادی زمان عقدده معلوم دکل ایکن بالآخره ظاهر اولورسه ، اکثر مؤلفین قادینک صفت اصلیه سی تغیر ایده جکنه قائل اولمشلردور . [۱] . چونکه حین ازدواجنده قادین نکاحده فساد اولدیغندن بختیر ایدی .

ازدواجله تابعیت نکاحک عقدی زماننده تبدل ایدر واکتساب اولنان تابعیت جدیده آرتق دوام ایلر . زوجک وفاتی و یاخود طرفین آره سنده طلاق وقوعی شوصفت جدیده بی تغیرایله قادینه تابعیت اصلیه سی اعاده ایتمز . بو صورتله بر صفت جدیده کسب ایدن قادین تابعیت اصلیه سی تکرار احراز ایتمک استرسه بونی اصولاً استحصال ایتمک لازم کایر . فقط نکاح فاسداولورسه قادین، اراده ازدواج منعقد اولماش حکمنده اولسنه مبنی، ذاتاً بر صفت جدیده احراز ایتماش اولدیغنه . الطاع تابعیت اصلیه سنه رجوع

Weiss, Traité théorique et pratique de droit international privé

[۱] جلد ۱ صفحه ۵۱۰

فرانسه محکمه تمیزینک قراری

ایدر. تأهلدن صکره نکاحک دوام ایتدیکی مدت ظرفنده حاصل اولان چوجقار ایسه طبعی اوله رق پدر و والدله لرینک بولندقلری تابعیتیه داخل اولورلر. فقط قادینک قبل الازدواج تولید ایتمش اولدینی چوجقار حقیقده بونک تأثیری اوله مابق طبعیدره بناء علیه اولر والدله لرینک ازدواج نندن اول حائر اولدقلری تابعیت اصلیه بی محافظه ایدرلر.

برقادینک بر اجنبی ایله ازدواجی اوزرینه منسوب اولدینی دولت تابعیتدن چیه رق زوجنک داخل بولدینی تابعیتیه کیرمسی ایچون یوقاریده ذکر اولنان شرائطک وجودی لازمدر، یعنی منسوب اولدینی دولت قانونلری حکمنجه عقد نکاحه و بومناسبتله تبدیل تابعیتیه صالح بولمق مقتضیدر. بوندن بشقه، برده ازدواج ایتدیکی کسه نک منسوب اولدینی دولت قانونلری بوکامساعد اولمق اقتضا ایدر، یعنی بر دولت قانونی تبعه سندن برینک بالازدواج آلدینی بر اجنبی قادینی محضا بوازدواج سببه کندی تابعیتی تحتیه قبول ایتسی لازمدر؛ اکر بر قادین ازدواج ایتدیکی حالده زوجنک منسوب اولدینی دولت اجنبی بولنان قادینک کندی تابعیتی تحتیه کیرمش اولمسی تسلیم ایتزسه بو حالده بالطبع قادینک تابعیت اصلیه سنه خلل کلمز. اشته قانون عثمانی بوجهتلی نظر اعتباره آله رق «تابعیت دولت علیه ده ایکن اجنبی ایله ازدواج ایدن قادین تابعیت اصلیه سنه رجوع ایده بیلیر» ماده سیله اکتفا ایتمش و عثمانی قادینلرک بهمه حال تبعیت عثمانیه دن چیقمش اوله جقارینی تصریح ایلامشدر. اکر بر اجنبی ایله تأمل

ایدن قادینک منسوب اولدینی دولت قادینک بواز دواج محصولی
اولان اولادی حقنده والدینک تابعیتلرینی نظر اعتباره آلمه رق
یالکیز والدینک تابعیت اصایه سنه بالا اعتبار چوجققلری اجنبی
عد اتمیوب گندی تبعه سندن معدود بیلیرسه او حالده اودولت
بوننی نظر اعتبارده طوتمیان دولتر ایله عقد مقاوله ایده رک
موافقتلرینی استحصال اتمک لازم کلیر. دولت عثمانیه یرلیدن
بولسان قادینلرک اجنبی ایله ازدواجلرندن دولایی صفتلرینک
تبدلی و بوندن حاصل اولان چوجققلرک اجنبیلک صفتلرینی تصدیق
ایدرسه ده، بوباید ممالک شاهانه ده بولنان تبعه ایرانیه حقنده کی
احکام بشقه در. بوکا داتر موجود اولان نظامنامه حکمنجه
اساساً «تبعه دولت علیه ایله تبعه ایرانیه نک ازدواجی کافی السابق
قطعیاً ممنوع در» [۱]. بونک ایچون عثمانلی قادینلرک تبعه
ایرانیه دن اولان چوجققلری حقنده بمشتمل یوقسه ده، بعضاینه
عثمانلیلر ایله ایرانیلرک ازدواج ایتلمی احتمالی وارد خاطر در.
اشته نظامده بو احتمال نظر مطالعه آله رق خلاف
ممنوعیت اوله رق تبعه دولت علیه دن بر قادین تبعه ایرانیه دن
برینسه و ارمش ایسه کرک قادین و کرک اولادی هر حالده
تبعه دولت علیه دن معدود اولوب قرعیه و بدلات
عسکریه و سائر هر نوع تکالیف میری به داخل
اوله جقه لر در» [۲] دینلمه شد. بو حکم موجب تبعه

[۱] ۲۴ ایلول سنه ۱۲۹۰ تاریخی نظامنامه نک یدنجی ماده سی.

[۲] مذکور نظامنامه نک اوچنجی ماده سی.

ایرانیه ایله عثمانلی قادینلری شاید ازدواج ایدرلرسه بونک
محصولی اولان چوجقاریدرلر بیک تابعیتلرینه کیرمیوب عثمانلی
عد اولندقلری کبی ، قادینلرده زوجلرینک تابعیتی اکتساب
ایتمه رک عثمانلی قالیلر . انجق بوخصوصده بعضاً ایران سفارتی
ایله مشکلات اکسیک اولدیغندن ، ازدواجلره دائر اولان
ممنوعیت حکمنک تأمین محافظه سی ایچون نظامه شوماده درج
اولمشدر : د عقدنکاحه مأذون اولانلر خلاف ممنوعیت حال
وحر کتده بولنور ایسه مسؤل طوتیله جققدردر ، [۱] .

بونظامنامه نک ایرانیلر ایله ازدواجدن منع ایتدیکی قادینلر
تبعه مسلمه دن اولانلر در ؛ غیرمسلم اولان عثمانلی قادینلر
بوممنوعیتک شمولی یوقدر . چونکه ممنوعیت ایرانیلر آره سنده
شیعیلکک تعمم ایتمش اولمسنندن واهل سنتدن اولان نسوان
عثمانیه نک شیعی ارککلر ایله ازدواجنه جواز کوسترلماسنندن
ناشیدر .

[۱] مذکور نظامنامه نک ایکنجی ماده سی .



— ۴ —

الحاق و ترك اراضيك تابعیتہ تأثیری

الحاق و ترك اراضی annexion خصوصاتی مختلف نقاط نظر دن تتبع اوله بیلیر . بونلرك مستند بولندینی اسبابده کی مشروعت ایله نتایج اساسیه سی تدقیق ایتک ایجاب ایتدیکی حالده بونكله مشغول اولان مقور و عمریه و ولر . تدقیقات ایله اشتغال ایتک هانکی هیئته عائد اولدیغنی و الحاق و ترك اراضی خصوصاتی معتبر عد اولمق ایچون نه طرزده اجرا اولمق لازم کلدیکنی تعیین ایتک مقور اساسیه عاندر . اهلینک صفت تابعیتینه درجه تأثیراتی مطالعه ایتک ده مقور و عمریه و ولر حله و ظاهندنر .

عمومیتله افاده اولندینی حالده ، ترك و الحاق اراضی خصوصاتی هر حالده تابعیتک کسب و ضیاعی ایچون بر سبب مستقندر [۱] . آنجق ، یوقاریده ایضاح اولندینی اوزره [۲] ، تابعیت دولت ایله افراد اهالی بیننده بالاختیار منعقد بر نوع عقاوله مستند اولدیغندن ، ممالکک تغیر حالیه بوکا تغیر عارض اولماق اقتضایده جکی و هله اولاده خاطره کلیر . واقعاترك اراضی کیفیق ارزو ایتیمانلره جبراً یکی بر تابعیت تحمیل ایتمز ؛ اراضی و قروکه

[1] Weiss, Traité théorique et pratique de droit international privé 1892

[۲] ۳۴ نجی صحیفه و ده اشاعیده مراجعت.

اهالیسی دولت متبوعه اصلیه یله اولان ارتباطلری محافظه ده
سربست قالیر [۱] .

فقط اراضینک صاحب جدیدی اولان دولت ده بونلری احوال
جدیده ایچون موجب خطر اوله بیله جک اولان تمادی اقامتدن
منع و اراضی ایله اولان مناسبتلری محافظه ایتک آرزوسنده
بولندقلری حالد ، تحت تابعیتنه کیرمکه اجبار ایلک حقنه
مالکدر . بویله اولسه اراضی ملحقه اوزرنده کی حکومتی
اهمیتسز قاله رق مقصد حاصل اولمز . بونک ایچون ، برطرفدن
افرادک دیله دیکی تبعیتی ترجیحده کی اختیاری و دیگر طرفدن
متصرف جدید اولان دولتک منافی تقابل ایدر ، بوتضادک
حلنه چاره ایسه ، افرادک دولت جدیدیه عرض مطاوعت ایلک
استمداکلری زمان صریحاً بیان حسیات ایللری حالی مستنا
اولق اوزره ، هر برترک و الحاق اراضی کیفیتک اوراده ساکن
اهالینک تابعیتجه حائر تاثیر اولسیدر .

برقطعه اراضینک دیگر بر دولت اداره سنه التحاق اوراده
مسکن و یا اقامتگاه ی بولسان ارمینجی بر دولت تبعه سنک صفت
تابعیتنه تاثیر ایتمز . بوندن متأثر اولانلر ترک اولنان اراضیه
بر رابطه ایله ارتباطلری بولنان ، متصرف سانی اولده دولتک
تبعه سیدر . بونلرک کیفیت ارتباطی یا اقامتگاهلری ، یا منشألری
نظر اعتباره آلمق و یا خود هر ایکسی ده مزج اولمق صورتیه
تدقیق ایدلک اقتضا ایدر .

بو خصوصده اقامتکاهی اساس اتخاذ ایدلرک فکرنبجه،
متصرف جدید اولان دولتک ضمیمه ممالک ایلدیکی محللرده
بولان کسهلرک کندینه اجنبی قالمیوب تبعیتی قبول ایتلمی
اودولتک حقوق و منافعی ایجابندن اولسه مبنی، صفت
تابعیتی کیملره تشمیل ایده جکئی تعینده افرادک اقامتکاهی
اساس اتخاذ اولمق مناسبدر، چونکه اراضی متروکده
برلشهرک اقامتکاه اتخاذ ایدلرک اورا ایله اولان ارتباطی
بو اراضی داخلنده تولد ایتمکه برابر بشقه محللره کیدوب
برلشمش اولانلره نسبتله ده قویدر.

منشی نظر اعتبارده طوتانلر متصرف جدید تبعیتی،
اقامتگاهلری زرده بولنورسه بولنسون، اراضی ملحقه
داخلنده تولد ایتمش اولانلره اسناد ایدرلر. بولرک رأیجه،
بو خصوصده اقامتکاهی اساس اتخاذ ایتک شخصی طیراغه
ربط ایتک دیمک اولوب، حالبوکه زمانمزد بو ادعا مقبول
اولدیغندن، و برقطعه اراضی بی ضمیمه ممالک ایلیان
دولت طیراقدن زیاده نفوسه اهمیت ووروب التحاق ایدن
اراضی به افرادی الک قوی صورتده ربط ایلیان رابط ایسه
تولد اولدیغندن، تبعیت جدید، زرده مقیم اولورسه اولسونلر،
اراضی ملحقه داخلنده تولد ایدنلره شامل اولمق لازم کلیر.
بر قسم مؤلفه لرده متصرف جدیدک تبعیتی هم اراضی
ملحقه داخلنده تولد ایدنلره هم اوراده مقیم بولنانلره شامل
اولمیدر دیرلر. آنجق بو صورتده هم طیراغه زیاده باغلانمق

اعتراضه ، هم ده داخل اراضیده تولد ایتمش سده چوقدن
 بری اورایی ترك ایله هجرت ایتمش اولان برطاقم اشخاص
 اوزرنده متصرف جدیدك ادعای حق حاکمیت ایتمسندن بر
 خفعت حاصل اولیه جفی یولنده کی مطالعه محقهیه هدف اولور لر .
 برده ایجاب حاله کوره اقامتگاه ویا منشأ اساس اتخاذ
 اولنه بیلیر . بونده ایکی حال نظر اعتباره آلملیدر : اکر
 الحاق اولنان اراضینك متصرف سابقی اداره سنده بولنان یرلر ،
 مثلاً فرانسه کی ، تماماً بر اصول ادارهیه تابع ایسه منشك
 اساس اتخاذینه لزوم یوقدر ؛ اوراده اقامتگاهی بولنانلره
 تبعیت جدیده اسناد اولملیدر . بالعکس ، اسویچره کی ،
 هر پارچه سی مختلف اصول ادارهیه تابع بر مملکتدن مفرز
 ایسه ، اوراده بولنان اشخاص هیتت عمومیه دن زیاده اداره نه
 الشمس اولدینی محله مربوط اوله جفندن ، بوراده منشئی
 نظر اعتبارده طوتملیدر [۱] .

نهایت برطاقم مؤلفلرده تبعیت جدیده نك اراضی ماحقه
 داخلنده تولد ایتمکله برابر اقامتگاه دخی اتخاذ ایتمش اولانلره
 حصر اولمنسی تکلیف ایدر لر . بوده تبعیت جدیده نك
 اسناد اولنه جفی کسه لرك مقدارینی پك تنقیص ایدرک متصرف
 جدیدك استفاده سنی زیاده سیله تحدید ایدر .

بولنرك ایچنده اك مناسب وقابل اجرا اولانی اقامتگاهك
 اساس اتخاذ اولنمیدر .

اراضی* متروکه داخلند بولنان که سه لک تابعیت اصلیه -
 یتہ قطعاً خلل کلمک ایچون متصرف سابق اولان دولته
 باطلرندن نکول ایتک نیتلرینی اظهار ایللری لازم کلیر .
 نیت متصرف جدیدہ انقیاد قطعی کوسہ ترملریلہ و یا خود
 نزام سکوت ایللریلہ ظاہر اولور . بالعکس متبوع قدیملریلہ
 لان ارتباطلرینی محافظہ ارزوسنی بیان ایدرلرسہ تابعیت
 سلہلرینہ خلل کلز . اراضی* متروکه داخلند قلان اہالینک
 یتلری اکثریا معاہدہ لرلہ تصریح اولنور ؛ بومعاہدہ لرده
 ہاجرت *émigration* خصوصہ باقیہ رزق بر مدت معینہ
 رفیدہ اقامتگاہنی اراضی* متروکہ دن بالاخراج متصرف
 سابق اقسام سائرہ ملکیتہ نقل ایدنلر تبعیت اصلیه سنی
 فظہ ایتش عداولنور کہ بو ضمناً اختیار تابعیت *option tacite*
 فکدر . فقط صفت تابعیت حقندہ ہیچ بر وجہلہ تردده
 بل قلامق مقتضی اولدیغندن . بعضاً یالکز مہاجرت ایلہ
 کتفا اولنمیوب مہاجرک بردہ قبل المہاجرہ بیاننامہ اعطا -
 لہ ارزوسنی صریحاً بیان ایتشی طلب اولنور ، کہ بو حالده
 نذا اختیار تابعیت *option expresse* ایدلش اولور [۱] .
 نلردن بشقہ بعض احوالده ، ومطلقاً مقدارلری کثرتلی

[۱] یونانستان ایلہ ۱۰ رجب سنہ ۱۳۱۵ (۴ کانون اول
 ۱۸۹۷) تاریخندہ منعقد معاہدہ صاحبہ طرفین تبعہ سندن
 دیگرینک ممالکندہ اختیار قامت و تابعیت ایدہ جک اولانلرک
 مورین عائدہ سنہ بوبابدہ بیاننامہ اعطا ایدہ جکلری مصرح اولوب ،
 نک ایچون اوج سنہ مدت تعیین اولمشدر .

اولماق شرطيله ، متبوع قديمك سائر قطعات ممالكينه هجرة
لزوم اولمقسرين تابعيت اصلينهك محافظه سي ممكن اولور، كه بود
بهمهاجرت اختيار تابعيت option sans émigration اولور
مهاجرته و يا خود بلامهاجرت اختيار تابعيت ايتكم حقي
بالطبع تبديل تابعيت صلاحيتني حائز اولان اشخاصه عائد اولوب
بو صلاحيت ايسه متصرف جديدك قانونلريله تعيين اولور ؛
چونكه اراضى ملحقه متصرف سابقك اداره سندن چيقمقله
اوراده ساكن اهالى ده اختيار تابعيت ايدنجه به قدر متصرف سابقه
نظراً اجنبى اوله رق متصرف جديدك تحت تابعيته كيرمش
ديمكدر .

ترك اراضينك ذات الزوج اولان قادينلرك صفت تابعيتلرينه
صورت تأثيرى ده جاى تدقيقدر . معلومدر كه متأهل قادينلرك
اقامتكاهى زوجلرينك اقامتكاهيدر . اكر زوج اراضى ملحقه
داخلنده اقامتكاه صاحبي اولور و ترك اراضيدن دولايى تبديل
تابعيته معروض قاليرسه زوجهك ده صفتى تبدل ايدر، اوده -
محضاً اقامتكاهنك اراده بولمئسندن ناشى - متصرف جديدك تحت
تابعيته كيرر. اكر قادين تابعيت اصليه -نده قالمق استرسه، بالاده
ايضاح اولنديني وجهله، اصوله توفيقاً اختيار تابعيت ايتكم لازم كلير.
زوج و زوجه دن هر بيريك بشقه بشقه اختيار تابعيت ايتملري
قابل اولمديقندن ، بعضاً بويله اراضى ملحقه داخلنده مختلف
تابعيته زوج و زوجه لر كوروله بيلير .

ترك اراضی ایلہ زوجینك مختلف تابعیتلرده قالملىرى يىنلرنده افتراق وقوعى حائنده دهازياده مشهود اولور؛ چونكه افتراق حسبيله اقامتگاهلرى ده آيرلمش اولديغندن، زوجينك تابعى اقامتگاهنه نظراً تبدل ايدر وشو صورتله زوجينك تابعيتجه كوردكلرى معامله بربرندن فرقى بولنور.

اراضىء ماحقه داخلنده هنوز سن رشده واصل اولميان چوجقلره كلنجه، بونلرك صفت تابعيتلريك صورت تاييرنده آراى مؤلفين متحد دكلدر. بعضيلرى بونلرى پدرلرينه تابع عد ايدر و پدرك اختيار ايده چكى تابعيت چوجقلك تابعيتى اولق لازم كليرديرلر. بعض ارباب تأليفده اختيار تابعيتى تبدل تابعيت ايله مزج ايده. ك وتبدل تابعيتك چوجقلرك صفتيه تأثيرى اولميه جغنى نظره آله رق، پدرك اختيار ايده چكى تابعيتك چوجغه تأثيرينى انكار و چوجقلك ده ايريجه اختيار تابعيت ايتمى لزومنى ادعا ايدرلر. واقعا كرك تعين، كرك تبدل تابعيت خصوصاتنده طرفينك حصول موافقتى شرطك لزوم وجودى بديهى بولنديغنه كوره، بوايكنجي رأى شايان قبولدر؛ آنجق رشيد اولميان چوجقلرك اختيار تابعيت ايتلرى، كنديلرينى تحت وصايتنده بولندقلرى كسسه لرك نفوذينه تابع طوته جغندن، بوجقلرينى سن رشده وصوللرنده استعمال ايتلرى ايچون اوزمانه انتظار ايتك مناسبدر.

بعضه قوانین اعمیه

بالاده کی بخلردن اکلایلمش اولدینی اوزره، جبراًحمیل تابعیت جائز اولمیدینی بوکون عموماً تسایم اولندیغندن، دولترلر تبدیل تابعیت کیفیتنی، یک آراستمنایله، تصدیق ایدیورلرسدهده، بو خصوصدهده احکام قانونیهلری متخالفدر. بعض دولترلر تبدیل تابعیتک تأثیرانی یالکزشخصه حصر، بعضیلری رئیس عائله نیک تبدیل صفتندن رشید اولیان اطغالی ده حصه دار ایدر؛ بعضیلری ده شوایکی صورتی مزجه غیرت ویاخود حل مسئلهینی محاکمک دوش همته تحمیل ایلرلر.

تبدیل تابعیتدن یالکزش شخصی متأثر عیدیدن دولترلرده اطفال، صبی دخی اولسلر، پدرک تبدیل صفتندن هیچ بروجمله متأثر اولزلر وپدرلرینک صفت جدیده سنی اکتساب ایتک استدکاری حالده کندیلرینک ده اصولاً تبدیل تابعیت ایتلری لازم کلیر. بالاده کورلیدیکی اوزره دولتمزک مسلک متخدی بو اولدینی کبی، پورتوغال، روسیه، رومانی و فرانسه دولتلری ده بو اصوله تابعدر.

پورتوغاله سن رشد واصل اولوب وسائط تعیشه مالک اولان و پورتوغال مملکتنده برسنه اقامت ایدن هراجنبی به قرال جابندن پورتوغال تابعیتی تفویض اولنه بیلیر. بو صورتله تلسیق

اولئان كمسه لر تبعه نك بالجمله حقوقى احراز ايدرلر سده ،
 مجالس عموميه و شورای دولته اعضا اوله من و وكلا لاق
 مقامنه كله منزلر . بوندن بشقه يرلیدن بر كمسه ايله تاهل
 ایدن اجنبى قادين پورتوغال تابعيته داخل اولور .
 پورتوغال تابعيتى اولان مالك اجنبیه ده تسليق ايله ، تايه
 پورتوغال حكومتد رخصت رسميه استحصال ايتدكسزين
 بر اجنبى دولتدن مأموريت ، معاش ، نشان قبول ايتمك
 ايله ، ثالثا ملكتدن اخراج اولمق ايله (جزانك مدت دوامجه) ،
 رابعاً ار ككك مذسوب اولدينى دولت قانونلرى مساعد اولمق
 شرطيله ، پورتوغال تبعه سندن بر قادينك اجنبى بر ار كك ايله
 تزوجى ايله ضايع اولور . — تسليق و تاهل ايله اضاعه ايديلن
 تابعيت پورتوغاله عودت ايدوب اوراده اقامتگاه انتخاب ايتمكه
 تكرر استحصال اولنه بيلير ، بر اجنبى دولتدن نشان و مأموريت
 قبول ايدنلر يالكنز حكمدارك مساعده مخصوصه سيله تكرر
 پورتوگيز اوله بيليرلر .

روسيه ده لا اقل بش سندن برى روسيه مالكنده املاك
 صاحبي اولان ، او مدت ظرفنده دائما او املاك داخلنده اقامت
 ايتمش بولئان و حقنده هيچ بر وجهه تعقيبات عدليه اجرا اولئيان
 كمسه تسليق اولئورلر . ذات الزوج اولان بر اجنبى قان
 روسيه تبعه قبول اولئمز . تسليق اولئان اجنبيلرك يرين
 فرق اولمز . زوجى تسليق اولئان اجنبى قادينلر روسيه تابعيته
 داخل اولورلر . تسليقك چوققلره تأثيرى اولمز . روسيه تبعه

سندن برارکک ايله تأهل ایدن اجنبی قادینلر روسیه لی اولورلر. —
روسیه ده تبعیت دائمه اصولی جاری ایهده ، اجنبی ايله تأهل ایدن
روسیه لی قادینلرک تبعیت اصلیه سی صنایع اولور . روسیه ده
تلسیق اولنسان بر اجنبی روسیه مالکی خارجه هجرت ایدر
ویا خود دولت متبوعه سی طرفدن پسایورط استحصال ایلرله ،
کرک خزیه دولتیه کرک افراد اولان دیوتنی تماماً تسویه ایتک
شرطیه ، روسیه تابعیتدن تکرار فارغ اوله بیلر . اصلیرلیدن
اولانلرک تبدیل تابعیتی جائز دکلدر . اجنبی ايله ازدواج ایتدیکی
حاله زوجنک وفاتی اثبات ایدن و روسیه ده اختیار اقامت
ایلیان قادینلر روسیه تابعیتیه عودت ایده بیلرلر .

رومانیاده استدعا تقدیمیه حکومتیه مراجعت ایدن وعرضحالک
اعطاسندن اعتباراً اون سنه رومانیاده اقامت ايله مملکته نافع
اولدیغنی اثبات ایدن کسه لر تلسیق اولورلر . تلسیقک تأثیری
شخصه منحصردر و بوندن مستفید اولانلر تبعه محلیه نک بالجه
حقوقنی بخش ایدر . — حکومتک مآذونیتی اولمق سزین بر دولت
اجنبیه خدمته کیرنلرک تابعیتلری ضایع اولور .

فرانسه ده اقامتگاه اتخاذه ایچون حکومتدن رخصت
استدعا ایدوب اوتاریخندن اعتباراً فرانسه داخلنده اوچ سنه مدته
اقامتگاه صاحبی اولانلر ، فرانسه داخلنده بلافاصله اون سنه
مدته اقامت ایدن و یا خود خارجه اوقدر مدت فرانسه
حکومتیه خدمت ایلیانلر ؛ اقامتگاه اتخاذه ایچون رخصت
استحصالندن صکره ، فرانسه یه خدمات نالعه و مهمه ده بولمق

مرطیله ، برسنه اقامت ایدنلر ؛ رخصت ایله اقامتگاه صاحبی
 ولدقدن برسنه صکره فرانسه لی برقادین ایله ازدواج ایلیانلر تلسیق
 له بیلیرلر. تلسیق اولنان کسه نک زوجہ سی ده تلسیق اولنہ بیلیمک
 عون آریجه مراجعت لازم کلیر. چوجقار، سن رشدہ واصل اولمش
 یسہر، پدرلرینک تلسیقی تارینخندن و ، هنوز رشید دکسہ لر ،
 سن رشدہ وصوللرندن اعتباراً ، برسنہ ظرفندہ مراجعت
 ایتدکلی حالده تلسیق اولنورلر . تلسیق ایله بالجلہ حقوق
 اکتساب اولنورسہ ده ، حقوق سیاسیہ دن تماماً استفادہ
 ایتمک آنہجق تلسیقندن اون سنہ مرورنندن صکرہ ممکن اولور .
 بر فرانسز ایله تأهل ایدن اجنبی قادینلر فرانسه تابعیتہ
 داخل اولورلر . — ممالک اجنبیہ ده تلسیق اولنانلر ؛ بردولت
 اجنبیہ خدمتہ داخل اولوب ده فرانسه طرفندن اخطار
 اولندینی حالده خدمت مذکورہ یی ترک ایتینلر ؛ حکومتدن
 مأذون اولمادینی حالده براجنبی دولتک خدمت عسکرہ سنہ
 گیرنلرہ اسیر تجارتی اجرا ایدنلر فرانسه تابعیتندن چیققدقلی
 کی ، تبعہ سنک اجانبیدن تزوج ایتدیکی قادینلری تحت تابعیتہ
 قبولہ قانونلری مساعد اولان بردولت تبعہ سندن بری ایله
 تأهل ایدن فرانسه لی قادینلرہ اجنبی اولورلر . — عن اصل
 فرانسه لی ایکن اجنبی ایله تأهل ایتمش اولان قادینلر ، زوجلرینک
 وفاتی و یا خود طلاق وقوعی اوزرینہ ، فرانسه یہ عودتلہ

اوراده اختیار اقامت ایتدیکری خالد تابعیت اصلیه لرینی تکرار
استحصال ایدرلر. تابعیت اجنبیه کیرن کسه لر، ساثر اجنبیه
کچی، تلسیق ایله تکرار فرانسه تابعیتنه داخل اوله بیایر لر.
رئیس عائله نك اجرا ایتدیکی تبدیل تابعیتك تاثیر
هنوز سن رشد واصل اولیان اطفاله تشمیل ایدن دولتا
اسویجره، المانیا، شمالی آسریقا حکومت متحده سی، انکلتر
اوستریا، ایتالیا، قولومبیا، لوکسنبورغ، مکسیقا، نورویج
ونه زونه لا در.

اسویجره ده تابعیت حکومت، قضا Canton و ناحیه Commune
تابعیتی اولق اوزره اوچ قسمدن مرکب و جمله سی یکدیگرینك
لازم غیر مفارقیدر؛ بناءً علیه بر اجنبك تلسیق اولمنسی ایچو
اول امرده مجلس عمومینك مساعده سی مقتضی اولوب، بون
اسویجره ده ایکی سندن بری اقامتگاه اتخاذ ایتك و حکومت
متبوعه سیله اسویجره بیتنده کی مناسباتجه بوندن دولایی مشکلات
چیقه مامق ایله استحصال اوله بیایر. تلسیق زوجه ایله رشیه
اولیان چوجققلری ده اسویجره تابعیتنه ادخال ایدر. — هر
اسویجره لی تابعیت اصلیه سی ترك ایدوب اجنبی اوله بیایر
یا لکز اسویجره ده اقامتدن وازکهرک بر مملکت اجنبیه ده اقامتگاه
اتخاذ ایتمش و اورانك تابعیتی استحصال و یا استحصالنی تأمین
ایتمش بولنق لازمدر. ترك تابعیت زوجه ایله سن رشد واصل
اولیان چوجققلرک ده صفتنی تغیر ایله اولنری اجنبی قیلار. —
عن اصل اسویجره لی ایکن اجنبی اولمش اولان بر کسه

تابعیتی کسب ایتیمش اولدینی دولته اسویچره بیننده کی مناسبانجه مشکلات چیقماق شرطیله ، تکرار اسویچره تابعیتی احراز ایده بیایر . متأهل قادینلر، زوجلرینک وفاتندن و یا طلاقدن اعتباراً ورشید اولمیان چوجقلر سن رشده وصولرندن اعتباراً اون سنه ظرفنده مراجعت ایتیمک شرطیله ، اسویچره ده اقامت ایده رک تکرار تابعیت قبول ایچون مجلس عمومیدن مأذونیت آله بیلیرلر .

آلمانیاده تابعیت تلسیق ایله ، بر اجنینک طرف دولتن مأموریت روحانیه و یا خود معارف و یا بلدییه مأموریتلرینه تعینی ایله وبر المانیالینک بر اجنبی قادینی تزوجی ایله اکتساب اولنور . تلسیق ایچون تبدیل تابعیتیه صالح اولمق ، حسن خلق صاحبی بولنمق، تأسس ایده جکی محله مسکنی اولمق، کنبدینک وعائله سنک اسباب معیشتی تدارک مقتدر بولنمق شرطدر . بوندن بشقه ، تبعه عثمانیه دن بری المانیا تابعیتیه کیرمک استرسه اصولاً سلطنت سنیه دن تبدیل تابعیتیه مأذون بولندیغنی اثبات ایتیمی لازمدر . رئیس عائله نك تلسیقی ایله زوجیه سی وهنوز رشید اولمیان اولادی ده المانیا تابعیتیه داخل اولور . تلسیق اولنان کیمسه لر اوآندن اعتباراً تبعه محلیه نك بالجمله حقوق ووظائفه اشتراک ایدرلر . — حکومتدن مهاجرت رخصتنامه سی استحصال ایدنلر، ممالک اجنبیه ده بولئوب طرف دولتن المانیایه عودت ایچون وقوع بولان دعوتیه اجابت ایتماک ، طرف دولتن واقع اولان اخطار خلافتده بر دولت اجنبیه خدمتی ترک ایتماک

المانیاده اصولسز اوله رق خدمت مذهبه ده بولمق سبیلرله تابعیتدن اسقاط اولنانلر، بر مملکت اجنبیه ده علی الدوام اون سنه اقامت ایلدانلر، اجنبی ارککلر ایله تاهل ایدن المانیالی قادینلر تابعیت اصلیه لرینی ضایع ایدرلر. رئیس عائله نك اجنبی اولسه له زوجه سی ورشید اولمیان چوجقلری ده اجنبی اولورلر. — اصولاً تبدیل تابعیت ایدوب فقط بر تابعیت جدید کسب ایتیان کسه لر، المانیا داخلنده اقامته مجبور اولمق سزین، و بر دولت اجنبیه نك تحت تابعیتنه کیرنلر، اقامتگاهلرینی المانیایه نقل ایله، و اصولسز اوله رق خدمت روحانیه ده بولنانلر، بوباده مجلس عموم نك ماذونیتنی احراز ایتمش اولدقلرینی اثبات ایلدکلری حالده، تکرار المانیا تابعیتنه قبول اولنورلر.

شمالی امریکا حکومات متحده سننده اجنبی بر قادین نك یرلیدن برارکک ایله ازدواجی و بر اجنبی کیمسه نك تلسیق ایله امریکا تابعیتی اکتساب اولنور. تلسیق اولنه جق کیمسه لرک اسیر اولماسی و عرق ابیضه منسوب بولمسی، حکومات متحده یه داخل اولان حکومتلردن برینک اراضی سننده بش و مراجعت ایتدیکی حکومتک اراضی سننده بر سنه اقامت ایله حسن خلق صاحبی اولدیغنی اثبات ایتمش اولمسی و یا خود امریکا خدمت عسکریه سننده بولنه رق حسن ایفای خدمت ایتک شرطیله بر سنه اقامت ایلسی و یا اقامت شرطی اولمق سزین امریکا سفان تجاریه سننده اوچ سنه ایفای خدمت ایتسی، امریکا اراضی سننده

اتخاذ مسکن ایتد کدن اوج سنه صکره تابعیت اصلیه سنی ترك
وامریقا تابعیتی قبول نیتنی اظهار ایله صداقت یمینی ایتمی ،
مملکت متده حائر اولدینی بالجمله اصالت و نجات عنوانلرندن
فارغ اولسی شرطدر . بویولده اکتساب اولنان تابعیت مکمل
اولوب زوجه ایله رشید اولیان چوجقلمده اجرای تاثیر ایدر .
ملسق بر اجنبی رئیس حکومت و ، تسلیقدن یدی سنه کچمده ،
سفیر اوله من . — آمریقا حکومتی تبعیت دائمه اصولانی کلیاً
رد ایتمش اولمقله برابر هنوز تبعه محلیه نك تبدیل تابعیتی
حقننده احکامی حاوی بر قانون وضع اولنما مشدر . تطبیقاتده
ترك تابعیت علنی و یا ضمنی اولور و آمریقا خدمت
عسکریه و بحریه سندن فرار ایله عودت ایتیمانلر علناً ترك
تابعیت ایدنلر جمله سندن عد اولنور سده ، ضمناً ترك تابعیت
بعضاً بك نازك مسائل تولید ایدر . اجنبی ایله تاهل ایدن
قادینلر زوجلریله برلکده ممالك اجنبیه کیتمز لر و آمریقا ده
مقیم قالیر لرسه تابعیت اصلیه لرینی محافظه ایدر لر . تبدیل
تابعیت ایدن آمریقا لیلر ك چوجقلمی ، پدرك نیتنه نظراً ،
اجنبی اولور و یا آمریقا لی قالیر .

انکلترده اجنبی بر قادینك بر انکلیز ایله ازدواجی و بر
اجنبی کیمسه نك تسلیقی ایله انکلتزه تابعیتی اکتساب اولنور .
تسلیق اولنان کسه لر وطن اصلیلرینه کیتد کلمی حالده
حکومت محلیه نظر نده انکلتزه تبعه سندن عد اولن بیلیمك ،
یعنی تابعیت اصلیه سندن چیقماق لازمدر . ملسق کیمسه لر

تبعه محایه نك بالجمله حقوق و وظائفی احرار از ایدرلر سده ،
 مجلس عمومی به و مجلس خاصه اعضا اولق ایچون پارلمنتو قرار
 اقتضا ایدر. بوندن بشقه انکلتزده برده ده نیزاسیون denization
 اصولی جاریدر، که بونکله بر اجنبی به بعض حقوق تأمین
 اولنور سده، اوکسه نك تابعیت اصلیه سنه خلل کلز. ده نیزاسیون
 بابرات حکمداری تفویض اولنور. یوکا نائل اولان کیمسه
 صداقت یمینی ایتش حکمنده طوتیلوب بر ائک مدتیجه بو
 حقوقدن استفاده ایدر. ملسق کیمسه لک زوجه و اطفالی
 انکلز اولور. — اجنبی ایله تأهل ایدن بر انکلز قادینك
 تابعیت اصلیه سی ضایع اولور. ممالک اجنبیه ده تبدیل تابعیت
 ایدن انکلز لر، برده عن اصل اجنبی ایکن تلسیق اولنش و
 انکلتزده تابعیت جدیده سی ترکله تابعیت اصلیه سنه عودت
 ایتش اولان کیمسه لر انکلتزده تابعیتدن چیقارلر. — اجنبی ایله
 تأهل ایدن قادینلر زوجلرینك وفاتنده تکرار انکلز اوله بیلر.
 لرسده ترک تابعیت ایدن ارککلرک تکرار انکلز اولملری
 سائر اجنبیلرک تلسیقنه مشاهددر. بونکده زوجه و اطفالک
 صفتنه تأثیری واردر .

اوستریا ایله مجارستان تابعیت بچئنده بربرندن تماماً آیری
 ایکی دولتدر . اوستریاده یرلیدن برارکک ایله تأهل ایدن اجنبی
 برقادین و تلسیق اولنان برکیمسه اوستریالی اولور . اوستریاده
 بلافاصله اون سنه اقامت ایدوب جزایه محکوم اولیان و اوستریا
 نواحیسندن برینه قبول اولندیغنی اثبات ایدن کیمسه لر تلسیق

اوتنه بیلر لر. ملسق کیمسه لر صداقت یمنی ایدر لر سه ده، قادینلر
 بوندن معافدر. رشید اولمیان چو جقلرک تلسیقنی ولی ویا و صیلری
 طلب ایده بیلر. تلسیق ایله تبعه نك بالجمله حقوق ووظائفی بخش
 اولنور. تلسیق زوجه ایله غیر رشید اطفالک صفتلرینی تغیر ایدر.
 براوسترالی ایله ازدواج ایدن اجنبی بر قادینک اولدن اولان
 چو جقلری تابعیت اصلیه لرینی محافظه ایدر لر. اوستریالی
 قادینلرک اجنبی ایله ازدواجی و اوستریالیلرک مهاجرتی ایله
 اوستریا تابعیتی ضایع اولور. بر تابعیت اجنبیه اکتسابی و یا بر خدمت
 مدکیه و یا عسکریه اجنبیه استحصالی ایله، بر اجنبی هیئت
 رهبانیه سنه و یا مملکت اجنبیه ده اقامت مجبور طوته حق وجهله
 بر شرکت اجنبیه ده دخول ایله، عودت ایچون اوستریا طرفندن
 واقع اولان خطاری اصفا ایتمک ایله، بر مملکت اجنبیه ده
 نقل مسکن ایدوب اوراده بش سنه قامت ایتمکله، اوستریا دن
 اون سنه غیوبت ایله براوسترالی مهاجرت ایتمش عد اولنور.
 تابعیتی ضایع اولان اوستریالی ارکک و قادینلر سائر اجنبیلرکی
 تلسیق اولنه بیلر لر.

مجارستانده اجنبی قادینلر ازدواج ایله واجیلر تلسیق
 ایله مجار تابعیتنه کیرر لر. تلسیق ایچون صلاحیت شخصیه یی.
 مجارستان نواحیسندن برینه قبول اولندیغنی، بش سنه بلا
 فاصله اوراده اقامت ایتدیکنی، حسن خلق صاحبی و وسائط
 انتعاشه مالک اولدیغنی، لا اقل بش سنه دئیری مکلفیت دفترینه
 داخل بولندیغنی اثبات ایتمک شرطدر. ملسق کیمسه لر صداقت

یعنی ایدرلر واهالی محلیه کبی اولورلر سده ، تلسیقدن آنجق اون سنه صکره مجلس عمومی یه داخل اوله بیلیرلر . شرائط خارجنده صورت فوق العاده امر حکمداری ایله تلسیق اولانلر در حال مجلس عمومی یه اعضا اوله بیلیرلر . تلسیق زوجه ایله چوجقلمه اجرای تأثیر ایدر . — ترك تابعیت ایچون مراجعت ایدن مجارلر خدمت عسکریه لرینی ایفایتدکلرینی ، صلاحیت شخصیه لرینی . ویرکیدن بورجلری اولمدیغنی ، تعقیبات عدلیه یه تابع بولندقلرینی اثبات ایدرلر سده تابعیتدن اخراج اولورلر . ترك تابعیت ایله زوجه و غیر رشید چوجقلمده اجنبی اولور . بلامآذونیت خدمت اجنبیه کیرنلر و مجارستان خارجنده اون سنه اقامت و اوستریا یه عودت ایچون حکومتک اخطارینه عدم اطاعت ایدنلر تابعیتدن اخراج اولورلر . اجنبی ایله تأهل ایدن مجار قادینلر اجنبی اولورلر . ضایع اولان مجار تابعیتک یکیدن اکتسابی ایچون تلسیق شرائطنه رعایت اولنور .

ایتالیاده بر اجنبی قادینک ایتالیانلرله ازدواجی واجنبیلرک ایتالیاده اتخاذا مسکن ایتک شرطیله تلسیقی ایله ایتلیا تابعیتی اکتساب اولنور . تلسیق ایله ملسق کیمسه لک زوجه ورشید اولمیان چوجقلمده ایتالیاده ساکن ایسه لر ایتالیان اولور . چوجقلمده سن رشده وصولاری سنه سنده تابعیت اصلیه لرینه عودت ایده بیلیرلر . — اجنبی ایله ازدواج ایدن قادینلر ، زوجلرینک دولت متبوعه سی کندیلرینی تحت تابعیتنه قبول ایدیورسه ، ایتالی

تابعیتدن چقارلر . بوندن بشقه ، ترك تبعیتله ایتالیا خارجه نقل مسکن ایدنلر ، ممالک اجنبیه ده تلسیق اولنانلر ، حکومتدن مأذونیت آلمق سزین بردولت اجنبیه خدمت ملکیه وعسکریه سنه داخل اولانلر ایتالیا تابعیتی ضایع ایدرلر . ایتالیا تابعیتدن چیقانلرک زوجه لر یله چوجقلرینک ده تابعیتی تبدل ایدر . — زوجی وفات ایدن قادینلر ایتالیا یه عودتله اوراده قاقمتکاه اتخاذایتد کلری حالدله تکرار ایتالیان اولدقلری کبی ، تابعیتدن چیقمش اولانلر ده . حکومتک مساعده سیله تکرار ایتالیا یه عودتله یرلشدکلری حالدله . ینه ایتالیا تابعیتنه عودت ایدرلر .

قولومبیاده اسپانیول امریقاسی حکومتلرینک اراضیسنده تولد ایدن کیمسه لر قولومبیا مملکتینده تأسس ایده رک تابعیتنه کیرمک استرلر سه تبعه دن اولورلر . ممالک ساثره اهالیسی تلسیق اولنور . تلسیق ایچون تابعیت اصلیه دن فارغ اولمق و حکومته صداقت یعنی ایتمک لازمدر . ملسق کیمسه لرک زوجه لر یله سنی یکر می بردن دون اولان چوجقلری ده قولومبیالی اولور . — ممالک اجنبیه ده تلسیق اولنانلر قولومبیا تابعیتندن چقارلر .

لوکسنبورغ ده یرلیدن برارکک ایله ازدواج ایدن اجنبی قادینلر تبعه دن اولور وبش سنه اقامت ایدن ویکر می بش یاشنی اکمال ایلیان کیمسه لر تلسیق اولنورلر . لوکسنبورغ اراضیسنده تولد ایدن ، ذاتاً لوکسنبورغ تبعه سنندن ایکن اجنبی اولمش اولان ، دولته خدمات مهمه ایفا ایدن کیمسه لر ایله ملسق بر اجنبینک رشید اولان اطفالی اقامت شرطنه رعایتدن مستثادر . تلسیق اولنه حق

کیمسه لرك تابعیت اصلیه لرندن چیقمش اولملری مقتضیدر. تلسیق
زوجه ایله چو چقلره اجرای تاثیر ایدر.

مکسیقاده یرلیدن برارکک ایله ازدواج ایدن قادینلر ،
حتی زوجلرینک و فاتندن صکره یه بیله شامل اولمق اوزره ،
مکسیقالی اولورلر . مکسیقایله محارب اولیان دولتر تبعه سی
مملکتلریده جنایت ایله متهم اولماق شرطیله تلسیق اولنه بیلیرلر .
تلسیق استدعاسنک اعطاسندن اتی آی صکره مکسیقا مملکتنده
لاقل ایکی سنه اقامت ایدره ک حسن حال و حرکتده بولندیغنی
ووسائط تعیشه مالک اولدیغنی اثبات ایدن و تابعیت اصلیه سندن
فاغ اولان کیمسه لر تلسیق اولورلر .

رئیس عائله نک تبدل تابعیتی زوجه سیله اولادینه ده اجرای
تاثیر ایدر . — بلامأذونیت خارج مملکته چیقان و یا خارجه
تمدید اقامت مأذونیتنی استحصال ایتبان ، ممالک اجنبیه ده تبدل
تابعیت ایدن ، بلامأذونیت بردولت اجنبیه دن مأموریت ، رتبه ،
نشان قبول ایلیان کیمسه لر ایله اجنبی ایله تأهل ایدن قادینلر مکسیقا
تابعیتی ضایع ایدرلر . — تابعیتدن چیقان کیمسه لر اجانبک تلسیق
حقنده مرعی اصوله توفیقاً تکرار تابعیته قبول اولورلر . اجنبی ایله
تأهل ایدن قادینلر مکسیقایه عودت و اختیار اقامتله آرزو
ایتدکاری حالمه تکرار مکسیقالی اولورلر .

نوروچده اجنبی بر قادینک بر نوروچلی ایله ازدواجی ، نوروچده
دائمی بر اقامتگاه اتخادی ، نوروچده قرال طرفندن تفویض
اولنمش بر مأموریتک قبولی و تلسیق ایله نوروچ تابعیتی اکتساب

اولنور . تلسیق ایچون نوروج مملکتنده علی التوالی اوج سنه اقامت ایتک و تابعیت اصلیه سندن فارغ اولق و ، اگر ترک تابعیت ایچون دولت متبوعه سنک موافقتی او دولت قانوننجه لازم ایه ، دولت متبوعه سنک موافقتی استحصال ایتدیکنی اثبات ایتک لازمدر . شو تابعیت جدیده زوجه ایله رشید اولیان اولادک صفتده اجرای تأثیر ایدر . — ممالک اجنبیه ده تبدیل تابعیت ایتک و عودت ایتماک فکر یله بر مملکت اجنبیه ده یرلشمک صورت یله نوروج تابعیتی ضایع اولور . نوروج خدمت یله ممالک اجنبیه ده بولنانلر و یا خود مقیم بولندی یی یرده تابعیت اصلیه سنی محافظه ایده جکنی نوروج قونسلوسی حضورنده بیان ایدنلر نوروج تابعیتی محافظه ایدرلر . تابعیتی تبدل ایدنلرک زوجه و چو جققری ده اجنبی اولور .

و نه زونه لایه هجرت ایدن کیمسلر اورایه مواصلت لریله برابر تلسیق براتی آلهرق و نه زونه لا تابعیت نه کیررلر . یانلرنده بولنان غیر رشید چو جققری ده و نه زونه لالی اولور . مهاجرلردن یشقه ، و نه زونه لاده بولنان اجنبیلر ده مراجعت ایتدکری حالده تلسیق اولنورلر بولنلرک زوجه و چو جققری برلکده تلسیق اولنمش اولور . اطفال غیر مشروعه والد لریله برابر و نه زونه لالی اولور . تلسیق اولنان اجنبیلر تابعیت اصلیه لر بنه عودت ایده منزلر . ممالک اجنبیه ده تبدیل تابعیت ایدوب اقامتک . اتخاذا ایلانلر و نه زونه لا تابعیتندن چیقماز ، مملکتلرینه عودت لرنده حق لرنده ینه تبعه اصلیه معامله سی اجرا اولنور .

تبدیل نابعیتك تأثیراتی شخصه منحصر طوتان و مع مافیه
ملسق کیمسه لرك چوجقلری تلسیق ایچون تسهیلات کوسترن
دولتله آرژانتین دولتی ، بره زلیلیا ، باجیقا ، یونانستاندر .

آرژانتین مملکتده ایکی سنه اقامت ایدن هر اجنبی تلسیق
اولنه بیلیر . آرژانتین خدمته کیره رک حسن ایفای وظیفه ایدنله ،
قوه بریه و بحریه ده ومدافعه مملکتده خدمتی سبق ایلینلر ،
اختراعات نافعه ده بولانلر ، داخل مملکتده شمندوفر احداث
ویانشایدنلر ، آرژانتین داخلنده املاک صاحبی اولانلر ، حدود
اوزرنده تأسس ، آرژانتین تبعه سندن بر قادیله تاهل ایدنلر ،
معلملک خو متنده بولانلر مدت اقامت شرطندن مستثادرلر .

ملسق کیمسه لرك مزاج مملکتده تولد ابرمه [۱] چوجقلری آرژانتینلی
اولنر سده ، عساکر ملیه ده داخل اولور لر سه بشقه شرائط رعایت
حاجت قالمقسنزین تلسیق اولور لر . — آرژانتین نابعیتك ضیاعی
ایچون صراحت قانونیه یوقسه ده ، ممالک اجنبیه ده تلسیق اولنانلر ،
قونفره نك مساعده سی اولمقسنزین خدمت اجنبیه ده کیرنلر ،
حیله لی مفلسلر ، اعدامه وآ غیر جزالره محکوم اولانلر حقوق
سیاسیه دن محروم اولور لر .

بره زلیلیاده ایمپراطورلک الغریاسیله شمیدیکی حکومت
جمهوریه نك تاریخ تشکیلی اولان ۱۸۸۹ سنه سی تشرین ثانینسك
اون بشنده اوراده مقیم بولنوب اوتاریخندن اعتباراً الی آی ظرفنده

[۱] داخل مملکتده تولد ایدن چوجقلر ، مولد اساسنه توفیاء ،

آرژانتین تبعه سندنلر لر .

تابعیت اصلیه سنی محافظه نیتی اظهار ایتیانلر ، بره زلیلیاده املاک صاحبی اولوب بره زلیلیالی قادینلر ایله متأهل اولان ویاخود بره زلیلیالی اولاد پدری بولنانلر ، اصولاً تلسیق اولنانلر بره زلیلیا تبعه سندندر . یرلیدن برارکک ایله ازدواج ایدن اجنبی قادینلر بره زلیلیالی اولورلر سه ده ، بر اجنبی ارکک ایله تأهل ایدن بره زلیلیالی قادینلرک تابعیت اصلیه سنه خلل کلمز . بره زلیلیا تابعیتی اکتساب ایدن کیمسه لرک منور اجنبی اولدقلری زمان بره زلیلیا خارجنده تولد ایدن چوجقلری صفت اصلیه لرینی محافظه ایدرلر سه ده ، بره زلیلیا به کلدکلی حائده درحال تحت تابعیت قبول اولنه بیلیرلر . — ممالک اجنبیه ده تلسیق اولنانلر ، حکومت اجنبیه دن مأموریت ، رتبه ، نشان قبول ایدنلر ، طرد و تبعیده محکوم اولانلر بره زلیلیا تابعیتی ضایع ایدرلر .

بلچیقاده یرلیدن برارکک ایله تأهل ایدن اجنبی قادینلر بلچیقالی اولورلر . تلسیق بیوک و عادی اولق اوزره ایکی نوع اولوب ، بیوک تلسیق استحصال ایچون یکرمی بش یاشی ا کمال ایتک ، متأهل ویا خود اولاد صاحبی طول اولق ، بلچیقاده اون سنه اقامت ایتک شرطدر . صورت عادی ده تلسیق ایچون یکرمی بر یاشنده اولق و بلچیقاده بش سنه اقامت ایتک لازمدر . بیوک تلسیق ایله تبعه اصلیه نک بالجه له حقوقی استحصال اولنور ، تلسیق عادی ایله ملسق کیمسه لر وکلایق ایله مجالس عمومیه به

حق انتخابدن محرومدر. ملسق کیمسه لرك كوچك چوجقلى
سن رشده وصوللرنده ورشيد اولان اولادى پدرلرينك حين
تلسيقنده ارزو ايتدكلى حالمده تابعيته قبول اولورلر . —
ممالك اجنيه ده تلسيق اولنان ، باچقايله عودت ايتماك نييله
خارجده تأسس ايدن کیمسه لر واجبى ايله تأهل ايدن قادينلر
تابعيتدن چيقارلر . بلا ماذونيت حكومات اجنيه نك خدمات
ملكيه و عسكريه سنده دخول ايله تابعيت ضايع اولمز ، —
تابعيتدن چيقان کیمسه لر امر حكمدارى ايله واجبى ايله تأهل
ايدن قادينلر نكاحك اندفاعى اوزرينه باچقادا اقامت و
اوراده تأسس ايتك ايله تكرر باچقا تابعيته داخل اولورلر .
يونانستانده تابعيت تلسيق ايله و بر اجبى قادينك يرلیدن
بر اركك ايله ازدواجى ايله اکتساب اولور . سن رشده
واصل اولوب ، روم جنسندن ايسه ، يونانستانده ايكي و ،
اجناس سائرده دن ايسه ، اوچ سنه اقامت ايدن و بو اساسده
محكوميته دوچار اوليوب بعده صداقت يمى ايليان کیمسه لر
يونان تابعيته داخل اولورلر . تلسيقك تأثيرى شخصه منحصر
ايسه ده ، چوجقلى سن رشده واصل اولدقلى زمان يونانستانده
نده تأسس ايله يمين ايدرلر سه يونانلى اولدقلى كي ، بر
اجنيتينك اكمله محبور اولدينى مدت اقامت ظرفنده يونانستانده
تولد ايدن اطفال ده پدرلريله برابر تبعه يونانيه دن اولورلر . —
ممالك اجنيه ده تلسيق اولنانلر ، بلا اذن حكمدارى اجبى خدمات
ملكيه و عسكريه سنى قبول ايدن کیمسه لر ايله اجبى ايله تأهل

ایدن قادیئلر تابعیتدن چیقارلر . تابعیتدن چیقانلرک صفت جدیده سی اولاده تأثیر ایتمز . — تابعیتی ضایع اولان کیمسه لر یونانستانده تأسس ایتک شرطیله تکرار یونانی اوله بیلیرلر . تابعیتدن چیقمش اولان کیمسه لرک اولادی هر حالده یونان تابعیتده کیره بیلیر .

تبدیل تابعیتک تأثیراتی صورت صریحه دن تعیین ایتیمان دولتلر ایسه اسپانیا ، اسوچ ، دانیمارقه ، فلمنکدر .

اسپانیاده تابعیت تلسیق ایله وحقوق همشهری استحصالی ایله اکتساب اولنور . تلسیق ایچون نفوس دفترلرینه قید اولنق و حکمداره صداقت یمنی ایتک مقتضیدر . اسپانیاده تولدایدن ، اقامتگاه انخاز ایلیان ، قانونیق مذهبه کیرن ، اسپانیالی برقادین' ایله تأهل ایدوب برلکده اوراده ساکن اولان ، املاک صاحبی اولان ، اجرای صنعت ایلیان کیمسه لر حقوق همشهری استحصال ایده بیلیرلر . بو حقوقک استحصالندن صکره تبعیت اصلیه دن چیقارق اسپانیا تابعیتنه کیرمک ممکندر . ممالک اجنبیه ده تلسیق اولنان ، بلامأذونیت اجنبی بر دولتک خدمات عمومیه سنه داخل اولان کیمسه لر ایله اجنبی ایله تأهل ایدن اسپانیول قادیئلرک تابعیت اصلیه سی ضایع اولور . — اسپانیا تابعیتدن چیقمش اولان ارککلر سائر اجنبیلر کبی ، وقادیئلر زوجلرینک وفاتندن صکره اسپانیایه عودتله اوراده تأسس ایتدکلری حالده تابعیت اصلیه لرینه عودت ایدرلر .

اسوچده اجنبی برقادینک براسوچلی ایله ازدواجی
 واجانبک تلسیق ایله تابعیت اکتساب اولنور. تلسیق ایچون
 یکریمی بریاشنی اکمال ایتمش اولمق، حسن خلق صاحبی بولمق،
 اوچ سنه اسوچده اقامت ایتک، اسباب تعیشه مالک اولمق شرطدر.
 بوندن بشقه صداقت یمینی ایتک وتابعیت اصلیه سندن چیققد یغنی
 اثبات ایلک لازمدر. وجودی مملکتجه نافع اوله حق اولان
 کیمسه لر حقنده تلسیق ایچون مدت اقامت شرطنه رعایت اولنماق
 جائزدر. — عودت ایتماک نیتیه هجرت ایدنلر، ممالک اجنبیه ده
 تلسیق اولنائلر ایله تبعه اجنبیه دن بریله تأهل ایدن قادینلر
 اسوچ تابعیتدن چیقارلر.

دانیمارقه ده رعیت sujétion، بالاده کورلیدیکی اوزره (۱)
 دانیمارقه ده اختیار اقامتله استحصال اولنوب شخصی قوانین
 عسکریه یه تابع وحق تجارت ایله انتخابات بلدییه حقنه نائل ایدر.
 خدمات عمومیه ایله حقوق انتخابیه یه نائلیت ایچون بریلک؟
 indigénat لازم کلوب، بوده قانون مخصوص ایله تفویض اولنور.
 — اشبو ایکی نوع تابعیت ممالک اجنبیه ده دائمی صورتله اختیار
 اقامت ایدرک ضایع اولورسه ده، دانیمارقه یه عودت حالنده
 ینه تماماً اجنبی معامله سی اولمز.

فلمنکده اذن حکمداری ایله اختیار اقامت ایدنلر، فلمنک
 نواچیسندن برنده اقامتگاه انتخاب ایله الی سنه مقیم اولانلر
 حقوق مدنیة نقطه نظرندن یرلی کبی اولورلر سده، تلسیق ایچون
 یکرمی اوچ یائی اکیال ایتک و فلمنکده تأسس ایتک نیتیه فلمنک
 اراضیسنده بلافاصله الی سنه اقامت ایتک شرطدر . احوال
 استثنایه ده بوشرائطه رعایت اولتماق جائزدر . — ممالک
 اجنبیه ده تلسیق ایله ، بلا اذن حکمداری اجنبی بر دولتک
 خدمات عسکریه و ملکیه سنه دخول ایله ، عودت ایتماک نیتیه
 ممالک اجنبیه ده بش سنه اقامت ایله فلمنک تابعیتی ضایع اولور .
 اجنبی برارکک ایله تأهل ایدن فلمنکلی قادینلرک تابعیت اصلیه
 سنه خلل کلز .



- ۶ -

تابعیت مکسربیه متعلق اخترفوق قوانین

تابعیت اصلیه تعیینده برچوق مشکلات ظهوره کلدیکی کبی،
 تابعیت مکسوبه خصوصنده بومشکلات ده- اکثر الوقوعدر .
 تابعیت اصلیه تعیینی ایچون دولتلك اتخاذا ایتدکری مسالك
 محدوددر [۱]. حالوکه تبدیل تابعیت خصوصاتی، احتیاجات
 حال و محله کوره تعین اولندیغندن ، دولتلك قانونلرنده
 متخالف ومتنوع برچوق احکامه تابع اولور و بناء علیه بوندن
 برچوق اختلاف تحدث ایدر . بو اختلافاتك حلنجه محاکمک
 وظائفی ساده اولوب [۲] ، بونلرنامه اعطای حکم ایتدکری
 قانون احکامنه توفیقاً حل مسئله ایدر و یاخود، اختلاف حدوتنه
 سبب اولان کیمسه لرك ایکیسی ده اجنبی دولتلر تبعه سندن
 بولنورسه اود دولتلردن هانکی سینک احکام قانونیه بی محکمه نك
 تابع اولدینی قانون احکامنه یقین ایسه اونى موقع تطبیقه وضع
 ایلرلر . آنجق ، ابحات آیه دن نمایان اوله جنی اوزره ، هیأت
 سیاسه ایچون مسئله غایت مشکل ورقیقدر .

۱ . تبعیت دائمه اصولنه تابع اولان، روسیه کبی، بر دولت

[۱] ۴۲ نجی صحیفه به مراجعت .

[۲] ۶۹ نجی صحیفه ایله اشاغیسته مراجعت .

تبعه‌سندن بری فرانسه‌ده تلسیق اولنسه، بونک صفت جدیده‌سی دولت متبوعه‌سی نظرنده غیر معتبر طوتلدیغندن، مملکتینه عودتنده فرانسه‌لانی نظر اعتباره التمه‌رق حقنده‌یریلی معامله‌سی اجرا اولنور؛ فرانسه مأمورلرینک حمایه‌سنه مساعده اولنمز. بواختلافه میدان ویرمامک ایچون، بعض دولنرده اولدیخی کی، تلسیق اولنه‌حق کیمسه‌لرک اول امرده دولت متبوعه‌لریله اولان علاقهرینک کسلمه‌سی طلب ایتمک مقتضیدر.

۲. مثلاً المانیا تبعه‌سندن بری دولت متبوعه‌سندن مآذونیت استحصال ایتمیزین فرانسه‌ده تلسیق اولنسه، المانیا الکاننده‌ک المان عد اولمق طبیعی اولدیغندن، ایکی تابعیت صاحبی اولور. بواختلافک منع ظهوری ایچون ده یوقاریده ذکر اولنان چاره تطبیق اولنه‌بیلیر. بعض دولتر بو خصوصده معاهده عقد ایتشلردر. بوجله‌دن اولمق اوزره، شمالی امریقا حکومت متحده‌سی ایله شمالی المانیا حکومت متفقه‌سی و سائر بعض دولتر بینه‌نده منعقد معاهدات ذکر ایدیله‌بیلیر. بومعاهدانده طرفین تبعه‌سندن بری دیگرینک مملکتنده تلسیق اولن‌دیغنی حالده صفت جدیده‌سی دولت متبوعه‌ اصلیه‌سی نظرنده معتبر طوتیلهرق، حتی وطن اصلیه‌سنه کندیکی زمان بیلله، حقنده‌اجنبی معامله‌سی اجرا اوانه‌جغنی فقط یرلشمک نیتله‌وطن اصلیه‌سنه عودت ایدرده اوراده معین برمدت اقامت ایلر سه صفت جدیده‌سندن نکول ایتمش عد اولنهرق حقنده صفت اصلیه‌سی اعتباریله تبعه معامله‌سی ایدیله‌جکی مندر جدر.

كذلك تبعه دوات عليه دن برى سلطنت سنيه دن مأذون اولوقسزین دیار اجنیه ده تبدیل تابعیت ایدرک اجنبی دولتک تحت تبعیتنه کیرسه، تابعیت عثمانیه دن اسقاط اولندیغی حالده، ممالک شاهانه یه عودتنده صفت جدیده سی کان لم یکن اولوب حقنده تماماً عثمانلی معامله سی اولنور . انجق تابعیتی استحصال ایتدیکی دولتک مأمورلری بو کبی کیمنه لری حمایه ادعاسنه قالدشملیر . ملحوظ اولدیغدن مشکلات ظهور ایتک وارد خاطر دز . نته کیم ۱۸۸۶ سنه سننده، سلانیک انکلتزه قونسلوسخانه سی بووجهله انکلتزه ده تلسیق اولنمش بر عثمانلی بی حمایه ایتک استمشدر . حالبوکه مؤلف موسیو وایسک بحق درمیان ایتدیکی وجهله [۱]، ممالک شاهانه ده کی قونسلوسخانه محکمه لرینک تبعه لری اوزرنده کی حق قضاسی اساساً قواعد حقوق دول خلافتده ودول متمدنه بیتنده جاری اصول و معامله مغایر اوله رق نصلسه وقتله طرف سلطنت سنيه دن تأمین اولنمش بر مساعده دن عبارت اولدیغدن ، حق مذکورک دائره شمولنی تحدید ضروری اولدیغی کبی، ممالک عثمانیه ده هر کسک یرلی ویا اجنبی اولدیغنی تعیین ایتک صرف قانون محلی به عائد اولدیغی و قونسلوسخانه محکمه لرینک حق قضاسی یالکز کندی تبعه لری اوزرنده جاری بولندیغی جهتله ، بویله بر اختلاف حدوشنده قانوننامه عثمانی احکامنه رعایت اولنمق طبعیدر . بو خصوصده المانیایا حکومتی طرفندن ممالک شاهانه ده بولنان

مأمور لرینہ ۱۸۸۳ سنہ سندہ ویریلن تعلیماتدہ شویله دیلمشدرہ :
 « المانیا تابعیتی اکتساب ایدن تبعہ (عثمانیہ) ، تابعیت اصلیه لرندن
 چقمقدیچہ ، مأمورین عثمانیہ یه قارشی المانیا قونسولس لرینک
 حمایه سنی طلب ایدہ منزلر . »

۳ . یکر می بریاشنده بر فلمنکلی اورانک قانونیجه سن رشد
 اعتبار اولان یکر می اوچ باشنه هنوز واصل اولمقسزین ، تسلیق
 ایچون یکر می بریاشنی کافی عدایدن ، برملتکده تسلیق اولنسه ،
 یونی فلمنک کان لم یکن طوته جغندن ، اوکی مسه نک ایکی تابعیتی
 اولور . اکر دولتر تسلیق ایدہ جککری اجابی عن اصل منسوب
 اولدقلری دولت قانونیجه تبدیل تابعیتہ صالح بولندقلری
 اثباته مجبور طوتسلر بو اختلاف تحدت ایتمز . بو خصوصده المانیا
 وپورتوغال قانونلری احکام مخصوصه یی محتویدر .

۴ . داخل مملکتده اقامتگاه اتخاذ ایدن ویاخود ازچوق مدت
 ساکن اولان کی مسه لری تسلیق ایدن ، بر مزلیلا ، دانیمارقه ،
 ونه زوئلاکی دولتر ایله داخل مملکده املاک صاحبی اولانلری
 تبعه سندن عدایلان ، مکسیقاکی ، دولترک احکام قانونیه سی ده
 صفت تابعیتک تعددینی انتاج ایدر . واقعا بودولترک احکام
 اساسیه قانونیه لرینی تغیر ایتلری تکلیف اولنه مزسه ده ، هیچ
 اولنزه بو صورتله تبعه دن عدایتدکاری کی مسه لر اورزنده متبوع
 قدیملری اولان دولتره قارشی ادعای متبوعیتدن فارغ اولسلر
 مناسب اولور .

۵. فلمنك ايله سالواتور حكومتى تبعه سندن بولنان قادينلرك
ازدواجله تابعيتلرینه خلل كلمديكى معلومدر . بويله برقادين
بر فرانسزله تأهل ايدرسه فرانسه تابعيته كيره جكندن ، ينه
تابعيت تعدد ايدر . بناءً عليه فرانسه قانونى براز تعديل ايدرك ،
بو كى اجنبى قادينلرك حسب الازدواج تابعيته دخوللرينى دولت
متبوعه لرى قانوننك مساعد بولنمسنه تعليق ايتك موافق
اولور .

۶ . اجنبى برار كك ايله ازدواج ايدن قادينلرى تابعيتدن
اخراج ايدن بر دولت تبعه سندن بولنان قادينلر ، زوجلرينك
منسوب بولندقلرى دولت كنديلرينى تحت تابعيته قبول ايتمسه ،
بستون صفتسيز قاله رق حايما تلو زاولور . فرانسه نك اصول قديمه سى
بويله ايكن ، بو محدود نظره چاريدىغندن ، مؤخرآ تعديل اولمشدر .
بوكون اچانب ايله تأهل ايدن فرانسه لى قادينلرك تابعيت
اصليه لرینه خلل كلك زوجلرينك منسوب اولدينى دولت
كنديلرينى تابعيته قبول ايتمكه مشروطدر .

۷ . تلسيقى شخسه حصر ايدن دولتلر ايله بوندن رشيد
اولميان اطفالى ده حصه دار ايليان دولتلر آره سنده ده اختلاف
كثير الوقوعدر . بوبابده فرانسه و اسويچره حكومتلرى ۱۸۷۹
سنه سنده بر معاهده عقد ايدرك مشكلاتى بر طرف ايتمكه
چالشمشلردر . بومعاهده حكمنجه ، اسويچره ده تلسيقى اولنان
فرانسزلرك غير رشيد اولان چوجقلرى يكرمى ايكي ياشنه
وصوللرنده فرانسه ويا اسويچره تابعيتلرندن برينى اختيار حقنى

حائز اولوب ، او زمانه قدر فرانسز عد اولته جقلردر . ایشه سائر دولترلرده بوزمینده معاهده لر عقد ایتسه لر بونوع اختلاقلرده بر طرف ایدلش اولور .

دردنجی فصل

تابعیت متلو دغاری مختلطه

ابحاث سابقه دن اکلاشلدینی اوزره ، تابعیت اصلیه نك تعیین و تابعیت مکسوبه نك استحصالی خصوصاتنده بر چوق اختلافات تحدث ایدر . بونلرک حلقه تطبیق اولته بیله جکی متعلق متعلق اولدقلری بخنلرده درمیان اولنان قواعدک تطبیق واجراسی وظیفه سنی هانکی قسم مأمورینه عائد اولدینی جهتی ده آیریجه شایان تدقیق دن و دولتلرک بوخصوصده ده معاملاتی مطرد دکلدر .

فرانسه ده تابعیتنده شبهه ایدیلن اشخاصک تعیین صفتی محاکم عادییه عائددر . فرانسه قانون مدنیسی صفت تابعیتی افراده عائد حقوق جمله سندن عد ایتش و ، حقوق افرادک محافظه سی محاکمه عائد بروظیفه مهمه اولدیغندن ، بونکده دؤبئی محاکمک اشتغالات عمومیه سی صره سینه قویمشدز .

اوستریا کی ، بعض مملکتلر ایسه ، بونده رؤیت وحلی قوه عدلیه عائد برجهت کوره مدکلرندن ، بوکی خصوصاتی اداره رؤیت ایتکده بولمشلردر .

برمکسته بولانن کیمسه لرك تعین صفی اومملکتک وضع ایتمش اولدینی تابعیت قانوننه نظراً ممکن اولور ؛ تابعیت قانونی ایسه قوانین عدلیه دن اولیوب قوانین اداره جمله سندندر ، حتی احکامی شخصی ممالک اجنبیه ده بیله تعقیب ایدر؛ شوالده اونک تطبیقی مأمورین عدلیه یه احاله ایتک مناسب اولمز . واقعا برکیمسه بولندینی مملکته نظراً کنسینک یرلیدن ویا اجنبی اولدینی ادعا ایده بیلیر؛ ایشک ایچنده بردعوی بولندیغنه کوره بونک حل وفصلی محاکمه عائد اولمق لازم کله چکی وارد خاطر اولور . انجق هر دعوی محاکم عادیه ده رؤیت اولانه مزه ؛ حتی بو حکمه مبذیرکه محاکم اداره تشکیل اولمشدر . اکر بومسائلک تدقیق ورؤیتنه مأمور اولان دائره نک قراری قناعت بخش اولمزسه او قراری تکرار نظر مطالعه دن کچیره رک صوک حکمی اعطا ایتک وظیفه سی شورای دولته ترتب ایدر .

سلطنت سنیه تابعیت مسائلنه بونقطه نظر دن باقش و بونلرک اداره رؤیتنی قبول ایتمشدر . مسائل مذکوره نک رؤیتی خارجییه نظارتنده تابعیت قلمنه عائد اولوب ، تعین صفتنده تردد اولنان کیمسه لرك صفت تابعیتلرندن متحدث اختلافات قلم مذکوره تدقیق اولنور و کنسینک عثمانلی ویا اجنبی اولدینی اولقلم افاده

ایدر. فلمک مطالعه سی شایان اعتراض کورولور ، علاقه دارانجه قناعت بخش اولمزه اختلافی تدقیق ایله صوک قراری ویرمک شورای دولته عائددر .



ایکنجی باب

اجنبیلر

جناب حق انسانی معمر اولمق ایچون خلق بیوردیغندن کندینه برطاقم حقوق ووظائف ویرمشدر . بوجمله دن اولمق اوزره ، یشامق و حیانتک مدافعه و محافظه سی ایچون لازم اولان بالمله افعالی اجرا ایتک حقنه مالکدر . انسان ذکی وحریت شخصییه سنه مالکدر : حریت شخصییه سنی استعمال ایتک حق و بونک حسن استعمالنی تأمین ایچون متصف اولدینی قوای مغنویه نک تکملنه خدمت ایتک وظیفه سیدر . جمعیتک وظیفه سی ده فردی محافظه ، قوای مغنویه سنک تکملنه ، احتیاجات طبیعیه سنی تأمینه معاونت ایتکدر . بونک ایچون یشامق ، جمعیتک معاونته مظهر اولمق حقوقنه مالک بولنان افراد ، هانکی ملکده بولنورسه بولنسون ، جنسی ، سنی ، مذهبی ، تابعیتی نه اولورسه اولسون جمعیتک حمایه سنه مظهر اولمق اقتضا ایدر .

مع مافیه بردولته کمال صداقت و اطاعتله تابع اوله رق
عهده سنه تحمیل اولنان وظائفی تمامیه ایفایه غیرت ایدن تبعه ایله،
حکمنه تابع اولیان و بلکه ده نفوذنی و قدرت و شوکتی
استرقاب ایلان، اجنبیلر بپننده هیچ بر جهتله فرق اولیه رق
جمله سی حقنده دولتك کاملاً معامله متساویه اجرا ایتسی لازم
کمز. ازدواج و حق تصرف کی، شخصیت بشریه نك نتایج
عمومیه و لازمه سندن اولان حقوق طبیعی *droits naturels*
هر برده اجنبیلر ایچون معتبر اولمق لازم کملکله برابر، دولترك
قوة تشریعیه سی محافظه حیاته مطلقاً لزومی اولیان واحوال
اجتماعیه ایله اخلاق و عادات محلیه نك ثمراتی اولان بعض
حقوقی، و ده دوغریسی امتیازاتی، اهالی اصلیه حصر ایدر.
واقعا بومقوقه مدنییه *droits civils* دن اجانب دائماً محروم
قالماز حتی کندیلرینی اکثر احوالده محروم بر اقامق دولتك
منافعیه جمله سندنر. فقط اجنبیلره مملکتی کشاده بولندیرن
دولت بولترك، تابع اولدقلری دولتلر ایله اولان مناسباتنك
درجه سته واحوال سائریه نظراً، حقوق مدنیه دن تماماً و یا قسماً
استفاده ایتلمینه مساعده ایدر.

اجانب حقنده کوستریلن بومساعده بعضاً شرط مقابله
تابع اولمز؛ بعضاً ده کندی تبعه سی حقنده اجنبینك تابع
اولدینی دولتك کوستردیکی معاملهیه مشابه بولنورکه بوحالده
معامله متقابله *Réciprocité* اولمش اولور: اگر اجنبینك
مظهر مساعده اولسی تبعه اصلیه نك اونك تابع اولدینی مملکتده

عین معامله یه مظهریته کافی ایسه معامله متقابله قانونی Legislative در. اگر بونک ایچون بین الدولتین مقاوله مخصوصه یه امتیاج وارسه سیاسی diplomatique در.

بواصول مختلفه نك صور تطبیقه سی مباحث آتیته ده کوریله. جکدر. شمیدین شوراسنك ایضاحی لازمدرکه مقوریه مریه دن تبعه محلیه یه حصر اولنان مقدار، حادثات اقتصادیه نك تهاجمی حسینیه، برطرفدن ازالقده و حقوق مذکوره دن اجنبیلرک دخی مستفید اولدقلری مقدار کتبدکجه تزايد ایتکده در. تبعه اجنبیه یی زیاده مظهر مساعده ایدن قانونلر جمله سنندن اولوق اوزره ۱۸۳۸ سنه سنندن بری مرعی اولان فلمنك و ۱۸۸۵ ده وضع اولنان ایتالیا قانون مدنیلری ذکراولنه بیلیر. بوکون دولتلر اداره ایتدکلری مملکتک منفعت حقیقیه سی اجنبیلری، برطاقم تدابیر زجریه ایله مملکتیدن اوزاق بولندیر. مق دکل، بالعکس معلومات و سرمایه و فعالیت صنایعه لرندن استاده ایچون داخل ملکه جلب ایتک جهتمده اولدیغنی تقدیر ایدیورلر.



برنجی فصل

اجنبیله متعلقه ماده اولك تاريخی

— ۱ —

ازمنه سالفهده بر فکر مذهبی حولنده مجتمع ، بر هیئت
 قویه روحانیه نك تحکمنه تابع اولان جمعیتلرک جمله سنده اجنبی
 نظر حقارتله کورولوردی . یرلیر جناب بارینك انتخاب
 کرده سی ، اجانب مذهبدن مطرود و بناء علیه هر نوع حقوقدن
 محروم بر شخص ملوث عد اولندیغندن ، قانون بونلری حمایه
 ایتمز ، طائیز و حتی محکوم جزا ایدردی . بونك ایچون ازمنه
 قدیمده افکار مذهبییه تابعی اولان اقوامك جمله سنده قانون یرلی
 ایله اجنبی بیننده غایت بیوک بر فرق کوزه تیر و بوفرکک ، جنس
 و مذهبك اختلافنه مستند اولدیغندن ، ازاله سی ممکن اوله مزیدی .

هندستانده مانو Manou قانونی اهایلی ، براهمان brahmans
 و سودرا Coudra نامیله ، ایکی یه تقسیم ایتمشدی . براهمان غالبلر ،
 اقدیلر ؛ سودرا لرحال اسارته القا اولمش مغلوبلر ، سفیل
 مخلوقلر ایدی ، که بونلرک عائله و حقوقه براهمان صنفیتله

مناسباتده بولملری قطعاً ممنوع ایدی؛ بر درجه ده که بونلره حتی نصیحت و ماکولات ویرمک براهانلر ایچون جائز دکلدی. براهانلرک جنازه مراسمنه سودرالر اشتراک ایده مزیدی. تناخ ارواحده سودرالر فیملردن و آنلردن صکره کلیردی. سودرالرک دوننده پاریا Paria لر واردی. بونلر، حال اسارته بیله قبول اولنمیان، اقوام مغلوبه یه منسوب اولدقلردن جمعیت مدنیه دن خارج و هر نوع حمایه دن محروم ایدیلر؛ حقلرنده وقوعه کتیر یله جک تجاوزاتک هیچ بری ایچون جزا تعین اولنماشیدی. حالبوکه اجنبیلر، اوروپالیلر بوضوفاک جمله سندن اشاغی عداولنوب، پاریالرک بری براجنبی بی طعامنه تشریک ایتسه کندینی پک بیوک برآتم عدایدردی. بونلرک جمله سنک بودرجه محقر کورولملرینه سبب ایسه کفدیلرینک براهانلرک جمعیت مذهبییه سی خارچنده بولملری ایدی.

مصر قدیمده ابتدالری اهالی اصلیه دن اولمیان بالجمله اجانبه نظر نقرت و حقارتله باقیلیر، و اجنبیلر حقنده هر نوع اذا و جفاروا کورولوردی. مصرلی اولمیلر طعامه تشریک ایدلمز، اونلرک آلات و ادواتی استعمال اولنمز و کسدکلری ینزدی؛ حتی قراغه قدیمه مصریه دن بوزیرسک زماننده مصر طوبراغنه ایاق باصان اجنبیلر اعدام اولنوردی. اهرام مصریه دن برینک اوزرنده منقوش بولنان شوعبارده مصر لیلرک علی العموم مصرلی اولمیانلر حقنده کی حسلرینی تصویر ایدر: بوراده هیچ بربری

استخراج اولنمیری . آنجق صکره لری ، ثجارتك توسعیله
مصر لیلر خارج ایله مناسباته کیردکلرندن ، اجانب حقنده کی بو
حسن نفرت پیدری زواله یوز طوتدی ؛ حتی صوئک سلاله لر
فرعونلرندن پساتمیش یونانلیلرک اراضی مصریه اوزرنده یرلشمه
لرینه مساعده و کندیلرینه بر طاقم امتیارات اعطایتدیکی کبی ،
اخلاقدن آمازیس یونانی بر قیزی زوج ایدهرک ، مصرده
یونانلیلرک سربستانه اجرای آیین ایتلرینه مساعده و خدمات
عمومیه ایله مراتب روحانیه استحصانده یرلیلر ایله اجنبیلر
ییننده موجود فرقی ازاله ایلدی .

عبرانیلرده اجانبه قارشی نفرت و عداوتده هندلیلرله
مصرلیلردن اشاغی قالمزلردی . محاربانده عبرانیلرک اقوام
مغلوبه حقنده اجرا ایتدکلی مظالم جداً دهشت انکیزدر .
وقت آسایشده بیله اسرئیلیلردن برینک بر اجنبی قادنیله ازدواجی
منوع اولدیفی کبی ، اجنبیدن فائض اخذی جائز و بونلر محاکم
حضورنده شهادتی غیر مقبول و اجانب حق توارندن محروم
ایدی . واقعا کتب سماویده مسافره حسن معامله اولنمسی امر
اولنمشدی ؛ فقط نظرلرنده کندیلرله اجنبیلر ارسنده اوילה
بر حد فاصل واردی ، که اونی نظر اعتباره آلامق فیکرلرنده
یرلشمش اولان حسن عدوان ایله قطعاً قابل توفیق دکلدی .
بنی اسرائیل ایله اجنبیلر ارسنده کی شومسواتسزلق اجنبینک
قبول دین ایتسیله زائل اوله رق اجنبی بالجمله حقوقی احراز

ایدر ایدیه ده، مراتب عسکریه به نائل اوله مزدی. قبول دین ایتیمکسزین داخل مملکتده تأسس ایتیمک مساعده سنی استخصال ایلیانلرک موقعی دیگرلرینک دوشنده اولوب، بوکیملر قواعد سیده اساسیه به رعایت ایتیمک شرطیه یالکیز اقامت و اجرای صنعت حقنی احراز ایدرلردی.

۲

شوکور دیکمز احوال حسیات مذهبییه نک میدان کتیردیکی نتایجدن اولسنه مقابل، تجارت و حرب ایله مألوف اولان اقوامده اجانب حقنده کی حس بشقه شکل و صورتده ظاهر در. فی الواقع تجارت، انسانلری بربریه مناسبتده بولندیره رق، بینلرنده موجود اولان حسیات عداوت کارانه بی ازاله به خدمت ایدر؛ حرب، محاربه میدانلرنده، معاهده مذاکره. لرنده اقوامی یکدیگره مساوی کوستره رک، مناسیات دولیه نک تکملنه و بونک نتیجه سی اوله رق اجنبیلر حقنده اولنه جق معامله نک کسب صلاح ایلمسنه یازدم ایلر. تجارتله الفت ایتیم اولان، یونانستان قدیم ایله، فتوحات میدانلری اردولرینه جولانگاه ایلمش اولان، روما بومدعایه ایکی قوی دایلدیر.

یونانستانده هانوسلق عالمك خارجنده بولانلرك كافه سی
بار بار اولونوردی . اسپارطده اجنبیلر تمکن ایدمه، تجارت
وصنعت اجرا ایلیه مزلردی ؛ بلامقصد شهره کیرنلر و یا خود
حرکتلری اسپارطه لیلرجه زینت و سفاهته میلی انتاج ایدمه جك
اولانلر طرد اولونوردی . مسافره داخل اولانلره مساعدده اولنمقله
برابر بوکیلر نظارت متمادیه التده طوتیلردی . یرلیدن برقادین
ایله تأهل ایدمه، املاک صاحبی اوله من حضور حاکمه چیقمه مزدی .
حتی ابدالی یونان هیئت اتفاقیه سی تشکیل ایدن کوچك حكومتلر
بیله بینلرنده یكدیكره قارشی تمامیه ییابنجی معامله می ایدرلوردی
فقط آئینه ده اجانب حقنده کی معامله دهها مساعدده کارانه ایدی،
مع مافیه اوراده ده تماماً یرلیلر درجه سننده حائر حقوق دکل ایدیلر .
آئینه ده اجنبیلر صنوف مختلفه یه منقسم اولوب، بونلردن حق تأهل
حق تملك، سائر اجانبك و یردیکی و یرکودن معافیت، سائر بر آئینه لینك
و کالنه مراجعت حاجت قالمق سزین حضور محاکمه مدعی و یامدعی
علیه صفتیله بولنه بیلیمك کی حقوق خصوصیه مالک اولانلره .

ایسوتیس Isotèles دینلیردی . مته فوس Météques نامی و یریلان
اجنبیلر آئینه ده اقامت حقنه مالک اولانلر ایدی که بونلر حق تصرف،
توارث حق، یرلی قادینلر ایله حق تأهلدن محروم ایدیلر حضور حاکمه
یا لکسز آئینه لی بر وکیل دلالتیله چیقمه بیلیر و محکومیتلری حالنده
حقارنده کی جزا آئینه لیلره نسبتله دهها اغرا اولوردی . بوکا مقابل

قوانینك حمایه‌سینه مظهر اوئوب ، صنعت و تجارت اجرا ایدیه‌بیلیرلردی . بونلردن بشقه آتینه‌ده حق اقامته مالک اولمیان اجنبیلرده واردی ، که محاکمه‌ده حق مدافعه‌دن محروم اولدقلری ایچون یرلیلردن بعضیلری کندیلرینی حمایه و مدافعه ایتمک و نظارت ائتمه طوتمه-ق وظیفه‌سنی درعه‌ده ، ایتمشلردی ؛ بو مدافعه‌لره پروقره‌ن proxènes دینلیردی . پروقره‌نلک بعضاً بر عائله ایچنده ارتی اولوردی ؛ نته کیم الکییاد عائله‌سی اسپارطه لیلرک پروقره‌نی ایدی . باربار عداولتان اجنبیلر ایسه اساساً بالجمله حقوقدن و هر نوع حمایه‌دن محروم ایدیلر ، یرلیلربونلری هر صورتله تحقیر و تزییفدن چکنمزلردی . معاملات تجاریه‌نك ده‌ا زیاده توسعیهلر اجنبیلر حقنده‌کی بونقیدات یواش یواش ازالقه باشلامش وده‌ا صوکرلری ، و قتیله استحصالی زیاده‌سیله مشکل اولان ، آتینه تبعیتی پک سهولته الیه ایدیلرک اجنبیلره قارشى موجود اولان هر نوع موانع اورته‌دن قالمیشدر .

روما قوانینی نظرنده انسانلر باشلیجه ایکی صنفدن متشکل اولوب ، بری رومالیلق عالمی داخلمده و دیگرى بونك خارجنده ایدی ؛ روما عالمی خارجنده بول-انلر روما حقوقندن Jus civile محروم ایدیلر . اسکی زمانلرده روماده اجنبیلر ایچون موجود اولان شدت معامله Hospitium و Patronatus نامنده‌کی صور حمایه‌نك تأسیسی ایله برابر بر از تعدیل اولمشدر . حوسپسیوم ایله ، روما اراضیسنده بولتان ، بر اجنبی بر

رومالینک حمایه سنه کیر و رومالی ده اجنبی یی حمایه سنه قبول ایله خسته اغنده تداوی ، منافعی وقایه و کندینی حضور محاکمه مدافعه ایدر فقط بومقاوله شرط مقابله به تابع بولنوردی. طرفین بیننده ورثه انتقال ایده جک صورتده حقوق ووظائف تعاون تولید ایدن حتی طرفینک منسوب اولدقلری حکومتلر آره سنده حرب ظهوره کلدیکی حالده بيله حکم و قوتی محافظه ایدن، حوسپسیورم اوللری خصوصی ایکن صکرملری عمومی اولمش و بر اجنبی یالکیز بررومالینک حمیسی ایکن تکمیل روما اهالیسنک تحت حمایه سنه کیرمش و بوکا مقابل رومایلرده او اجنینک منسوب اولدینی دولتک ممالکنده مظهر حمایه اولشلردر . پاتروناتوس ایله بر اجنبی حامیسی اولان رومالینک حین ازدواجده قیزینک جهازینی اکماله عائله سی افرادینک اسارتدن تحلیصی ضمانتده ویره جک یاره یی تدارک، محکومیتی حالنده جزای تقدیسی تسویه به معاونت ایدردی ؛ رومالی ده حمیسنه علم حقوقی ، تعلیم کندیسینی حضور محاکمه مدافعه وهر خصوصده واجنبی به معاونت ایلردی ؛ انجق پاتروناتوسده دیکری کبی شرط مقابله یوق ایدی. علی الاکثر بر رومالی بتون قوم حتمده Patronatus صورتنده اجرای حمایه ایلردی ؛ مثلاً قانون قبریسلیلرک ؛ قلاودیوسلر اسپارطیلرک ، غراقخوسلر اسپانیوللرک حامیسی ایدیلر. بو حامیلک ، بالاده کوردلیکی اوزره ، یونانستان قدیمده کی پروفنزله که مشابه ایدی. رومانک جوارنده

بولنان اقوام سائر ايله حال تساویده بولمادیغی مدتیجه بوحال دوام ایتدیسه ده ، مفتوحات متوالیه ايله حدودی توسع ایدهرک مملکتی اقوام مختلفیه منسوب اجانب ايله دولتیجهدها اساسلی طرز اداره تأسیسی لازم کلدی . ممالک مفتوحه دن رومایه جوار اولانلرک اهالیسی روماده ممالک بعیده اهالیسنه نسبتله دهها زیاده مظهر مساعد اولدیله . ایشته آتیده ذکر اولنان تخالف معامله بوندن نشئت الیمشدر .

روماده اهالی ، رومالیردن بشقه ، اجنیلر ، لاتینلر و باربارلر اولق اوزره ، صنوف مختلفیه آیرلمشدی . اجنیلر Peregrini روما ایمپراطورلغنه الحاق اولنان ایالات اهالیسی اولوب حقوق خصوصیه و حقوق سیاسیه دن مرکب بولنان روما حقوقندن Jus civile نصیبلی اولمق سزین ، استفاده سنه روما طرفندن ممانعت اولنمان ، حقوق ملیه لرندن استفاده ایدرلردی . مؤخرأ بالعموم اجنیلرک ادامه حیاته لازم اولان بعض حقوقدن مستفید اوللرینه مساعد اولندی ، که بونک هیئت عمومیه سی **مقوقه اقوام Jus gentium** ی میدان کتیردی . بناءً علیه Jus gentium روما حقوق خصوصیه سنک الک واسع و حقوق بلدیسی بولنمیانلره بیله شامل بر قسمی ایدی ، Jus civile ایسه اخص اولوب رومالیره مخصوص ایدی .

Jus civile حقوق سیاسیه ده شامل و بوندن اجنیلر

محروم ایدی . بوندن بشقه بوقسم حقوقده **موقه تاهل jus connubii**

و من تملك jus commercii واردی، که بولردن ده اجنبیلر محروم ایدی. بناءً علیه بر اجنبی اصولاً تأهل ایده من و، اگر تأهل ایدرسه، زوجه سنک جهازینه مداخله و چوجقلری اوزرنده حقوق ابوت و وصایت و متروکات ایچون حقوق ارثیه استحصال ایلیه مزدی. روماده ملک صاحبی اوله مزدی؛ فقط مذکور اولدینی ایاتده حق تملکی واردی. مع مافیه بو اجنبیلر محروم اولدقلری شو حقوقک جمه سندن، مساعدۀ مخصوصه ایله، بدرجه یه قدر مستفید اولورلر و آنجق استفاده لری هر حالده مقید بولنوردی.

لاتینلر و تهرسی Latini veteres، قولونیاری فی Latini Coloniarii یونانی Latini juniani نامیله اوچ قسم ایدی. و تهرس دنیلر لاتینلر رومانک ۲۶۰ تاریخنده رومالیلرک تجدید اتفاق ایتدکلی لاجئوم اهالیسی اولوب، خدمات عمومیه یه داخل اوله ماقبله برابر روما اردولرینه داخل اولورلر و حق تأهل ایله حق تملکدن و بونک نتیجه سی اولان حقوق ارثیه دن تماماً استفاده ایدرلردی. — قولونیالی ری فی تسمیه اولنان لاتینلر حقوق سیاسیه دن و حق تأهلدن و بناءً علیه حقوق ابوت و وصایتدن محروم و حق تملک ایله حقوق ارثیه یه مانک ایدیلر. بونلر رومادن هجرت ایدن، جزای نقدی یه محکوم اولوب تأدیه سندن قورتلحق ایچون روما خارجه نقل مکان ایدنلر ایله پدرلری طرفندن بو قسمه ادخال اولنان چوجقلر ایدی. —

یونانی قسمندہ بولنان لاتینلر اساساً روما حقوقی موجبہ حق تملک مالک بولنمیان افندیلری طرفدن و یا خود اصولہ غیر موافق اولہرق اعتاق اولنان اسرا ایدی . بولنردہ حقوق سیاسیہ ایلہ حق تاهل هیچ یوق ایدی ؛ حق تملک مالک اولدقلرندن ، موصی لہ و وارث اولہ بیلیرلرسہدہ ، ماللری افندیلرینہ عائد اولدیغندن ، موصی اولہ مازلردی . بوفرقلر بر جوق زمان دوام ایتدی ایسہدہ ، ایمپراطور قاراقاللا زمانندہ روما شهزیریلکی Cive romanus بتون ایمپراطورلق اہا . لیسنہ تعمیم اولندیغندن ، او زمانہ قدر موجود اولان شو تحالف اداره اورتہ دن قالمشدر . — باربارلرہ کلنجه ، بولنرہر نوع حقوقدن و حتی jus gentium دن بیالہ محروم اولوب ، ماللری عمومہ عائد عد اولنہرق ضبط ایدیلر ، کندیلری اسیر و یا اعدام وقبرلرینہ تجاوز اولنہ بیلردی . ایمپراطور والانتیان زمانندہ اصدار اولنان بر امر موجبہ باربارلرہ روما لیلرک ازدواجی جزای اعدامی مستلزم ایدی .

شو یوقاریدن بری کوردیکمز تفصیلات ازمنہ قدیمہدہ اجانبک جمعیت محلہ میانندہ موقع و اہمیتی اولدیغنی مع زیادہ کوستریور . قرون وسطادہ جرمان اقوامی نزدندہدہ اجنیلرک ،

موقع قانونی برای اولمديغندن ، حقوقه رعایت اولمزدي؛ الحق برکیمسه نك اوج کیجه بر جرمانیالینک خانه سنده قالمسی کند- یسنک اوجرمانیالینک تحت حمایه سنه کیرمسنه کافی عد اولنوردی و بوصورتله بر جرمانک حمایه سنده بولنانلر هر نوع حقوقدن مستفید اولورلردی .

غول مملکتته مستولی اولان فرانقلرده ده حال بویله ایدی . یعنی بر اجنبینک مظهر حقوق اولمق ایچون بر فرائقک حمایه سنی استحصال ایتسی لازم ایدی . قرائک حمایه سنک حکم و قوتی زیاده ایدی . برده فرانقلر هنوز لایقيله تمدن ایتدکلرندن ، احکامی جمله یه شامل بر نوع قانون تنظیمنه موفق اوله مامشلردی ؛ بناءً علیه فرانقلرک زمان استیلا سنده اوراده قالمش اولان غالباً اهالیسی ایله سائر اقوام مغلوبه کندی قوانین قدیمه ملیه لرینی محافظه ایتدیلر . بوجهله قوانین شخصیه نك مرعیتی اصولی اونجی عصر میلادی به قدر دوام ایتدی . دره بککک اصولنک تأسیسده مملکت برچوق دره بکلری بیننده تقسیم اولنهرق ، هر قسم اوزرنده حقون ارثیه ایله حاکی اولان دره بکنکک حاکیتی صورت مطلقه ده جریان به شلادیغندن ، اوزمانه قدر مرعی اولان شخصیت قوانین اورته دن قالفه رق پرینه ملکیت قوانین قائم اولدی ، و بوصورتله هر دره بکنکک ملکنده بولنانلر منحصر آ اورانک احکام قانونیه سنه تابع قالدیلر . اجنبیلر کلنجه ، بولنلر داخلنده تولد ایتدیکی بر دره بکی مالکانه سندن

ویا خود کلیسا مربوطانندن اولان بردارۀ روحانیه دن چیقوب
 بشقه یره کیدن کیمسه لر ایدی اوبه [۱] aubain نامی ویریلن
 بو اجنبیلر مختلف طرز معامله یه دوچار اولورلردی : بعض
 یرلرده تحت اسارتہ آلینلر، بعض محللرده اغیر ویرکیلره تابع
 بولنورلردی. اجنبیلر وراثت و وصیت حق لرندن محروم اولد-
 یقنندن ، وفاتلرنده زمان حیاتلرنده استحصال ایتیش اولدقلری
 اموال و املاک دوغریجه ملکک صاحبی اولان دره بکنه انتقال
 ایدردی. اون اوچنچی عصره دوغری تدریجاً اجنبیلرک حقوق توسیع
 اولانه رق، ورثه مشروعه نك متوفانك متروکانی توارث ایتسنه
 وبرکسه نك قبل الوفاة اموالندن برجزؤ صغیری کلیسایه وصیت
 ایلیمه یلمسنه مساعده اولنمشدر .

دره بکک اصولنک الغاسنده اجنبیلر اوزرنده جازی اولان
 حقوق قراللره انتقال ایتدی ، کندیلرندن استیفا اولن-ان
 ویرکیلر خزان دولت کیرمکه باشلادی. حقوق عمومیه وشخصیه
 دن درجه محرومیتلرنده بر فرق حاصل اولمدی. حتی تسلیق

[۱] بولکه نك مشتق منهی حقنده اراء مؤلفین متخالفدر. بعضیلری
 (بشقه برده متولد) معناسنه لاتینجه natus alibi دن مخرف 'ولدیفنی'
 برطاقی شارلمان زماننده اجنبیلرک قیدینه مخصوص دفتر album
 اسناد ایدلدیکنی ادعا ایدرلر ، بعض مؤلفلرده albanus دن مأخوذ
 اولدیفنی و اونکده لاتینجه albarenus صورتنده کچن البرنسا کلمه
 صریبه سندن مخرف بولندیفنی روایت ایدرلر. البرنسا (بانک و نونک
 قنچی و رانک سکونیه) ناس معنا نهدر [قاموس].

اولنسه بیله براجنی مناصب روحانیه یه نائل اوله مزدی. فرانسه ده براجنی تأهل ایده بیلیرسه ده ، زوجہ سی یرلیدن اوله مزدی. حق ابوت و حق وصایتدن محروم ایدی ، واقعا حق تملک مالک ایسه ده اوده زمان حیاتنه منحصر اولوب ، بعدالوفاة حقوق ارنیه سی یوق ایدی. اجنبیلرک تابع بولندقلری شو مسوا و اتسزلق دها بوندن برعصر اوله کلنجه یه قدر اوروپانک ممالک مختلفه سنده دوام ایتیش و آنجق اوزمان لغو اوله بیلمشدر .

— ۴ —

اساسنده منہج اولان قاعده عدل و حقانیت ایله افکار بشرک حسیات علویہ یه بالاقتران تکملنه بادی اولان دین اسلام بدایت ظهورنده انسانلرک حضور باریده مساوی اولدیفنی اعلان ایتسیله ، اجانب حقنده ممالک مختلفه ده اسکیدن بری موجود اولان بنض و عداوت و مساوا و اتسزلق ممالک اسلامیه ده قطعاً رواج بولمادی . لسان شریعتده مقامه نامیله معروف اولان اجنبیلر قانون شریعتک حایه مخصوصه سی آلتنه آلتدیلر . بناء علیه هر نه وقت ممالک اسلامیه یه اجانبیدن کلن اولدی ایسه حقنده عنف و شدت دکل ، حسن و رافقه معامله اولندی . ذاتاً من القديم ملوک اسلامیه نک مسافرین و غربا حقلرندہ انواع نوازش و اکرام کو ستردکلری حقایق تاریخیه دندره .

دولتمز دخی اجانب حقنده کی معاملاتی احکام شرعیه به تطبیق ایتدیکنندن اجنبیلر دها پک اسکی زمانلرده نائل حمایه اولدیلر ، حتی تبعه عثمانیه دن زیاده برطاقم حقوق ومساعدات استحصال ایتدیلر . بو مساعدات اصل جنتهمکان سلطان سایمان قانونی دورنده ابتدا ایدر . واقعا فاتحان اسلام قدس شریفی قبضه تصرفه کچیردکلی زمان حضرت عمر رضی الله عنه اوراده بولنان مؤسسات مذهبیہ نک تعرضدن مصونیتنی وکلوب کیده جک زوارک محفوظیت وسلامتنی تأمین یولنده برطاقم مساعداتده بولنملر وصورکه بومساعداته بالجمله حکومات اسلامیہ طرفندن رعایتده قصورایدلمدیکی ایچون دولت علیه ده اجانب حقنده تمامیله تطبیق واجرائتمش ایسه ده ، بوکون بمالک شاهانه ده تبعه اجنبیه حقنده مرعی اولان معاملات مساعدده کارانه نک اساس رسمیمی ، بالاده ذکر اولندیغی اوزره حضرت قانونی طرفندن اعطا بیوریلان خط شریفدر .

« سلطان مشار الیه - حضرتلرینک عهد سلطنتلرنده رایت اقبال عثمانی ویانه قبولرندن عمان وهند دکنز لرینه ، ایران مملکتی ایله خزر دکنزندن بلاد مغربه قدر هر طرفده تموج نمای مهلبت اوله رق ، عثمانلی نامنی - ایشیدنلرک قلبنده ناقابل اجتناب برحس حاصل ایتک اوزره - عالمه اعلان ایدیوردی . اوروپاده ایسه بوکوردیکمز هیئات سیاسیہ معظمیه بدل برطاقم اتحادسنز حکومتلر بولنوب ، یالکنز فرانسه ایله برده ، اسکی روماللیق حالتی نو عما توارث ایدن و (مقدس روما ایمپراطورانی) نامیله

معروف بولنان ، اوستریا حکومنی الك زیاده نفوذ واقتدار صاحبی
ایدی . مع مافیه بونلرده قدرت و اهمیتجه بردرجهده دکلیدیلر :
وقتیله متعدد و مختلف فاصله لرله یوزسنه امتداد ایلیان محاربات
نهایتنده شاهد موفقیتی کندی طرفه تأمینیه موفق اولان ، فرانسه
بشنجی شارل کبی متانت و غیرت مجسمه اطلاقه سزا بر حکمدارک
یداداره سنه انتقال ایدن اوستریا به قارشی عاجز ایدی . فرانسه
قرالی برنجی فرانسوا ملککک کاملاً اوستریا ممالکی ایله احاطه
اولندیغنی وریوردی ؛ اوستریانک قوه بجزیه سی ایسه فرانسه
دوئلنامه قات قاتق ایدی . بناء علیه اوستریا به برآر بحر اوجوب
خوف و هراس اوله حق بر قونله مقابله ایتمک فرانسه ایچون
الزم ایدی . بودرجهده بیوک واهمیتلی بروظیفه یی در عهده
ایله جک بالکنز بردولت واردی ، اوده دولت علیه ایدی . دولت
علیه اوروپا ، آسیا و آفریقا قطعه لرده غایت صاعلام و اندراسدن
مصون اساسلر اوزرینه تأسس ایتشیدی ؛ اردولری هانکی طرفه
توجه ایتسه مطلقاً غلبه محقق اولوب ، مجارستانده اوستریانک
جک رکاهنی تهدید ایدیوردی ، عثمانلی دوئلنامی ایسه قره دکزله
بحر سفیدی جولانکاه اتخاذایدرک ورنلره لرزه رسان اولیوردی .
دیگر طرفدن کرک دولت علیه کرک فرانسه ، اوستریا دولتیله
هم حدود اولدقلری ایچون ، برینک توسعنه و دیگرینک تحفظنه
مانع اولان دشمن بر ایدی ؛ بنابرین ینلرده اشتراک منافع واردی .
اشته بونک ایچون فرانسوا ، سلطنت سنیه نک سایه رأفت و عاطفته

دخالتله ، کندی نیک دشمن مشترک تعرضاتنه قارشى حمايه
ومدافعه سنى استعدا ايتدی [۱]. بواسطه حضرت قانونى طرفدن
نظر اعتباره آلنه رق، فرانسه نك تخليصنه قرار ویريلوب اوستريايه
قارشى فرانسه ايله اتفاق اولندی. آنجق بوانفاق ايجون بر معاهده
مخصوصه عقد اولميوب ، يالكز طرف پادشاهيدن فرانسووايه
برنامه مخصوص کوندر ليکله اکتفا ايدلدى . مؤخرأ حضرت
پادشاه ايران سفيري له مشغول بولند قلى ائاده ، فرانسووا
طرفدن سفير مخصوص کله رك (لافوره La forêt) موجود
اتفاقك بر صورت رسميه ارجاعنى تکليف ايتسى و بوده
مظهر قبول اولسيه ، سال هجرينك ۹۳۸ ينه مصادف اولان
۱۵۲۶ سنه ميلاديه سنده ، عهد قدیمه نك الكاسکيسى اولق اوزره ،
طرف پادشاهيدن بر خط شريف اصدار بيورلدى . بو خط
شريفده ابحار عثمانيه ده فرانسه سفيرينه لرینك سربستى سيرو
سقى تأمین ، قونسولوسلرينك فرانسه تبعه سى اوزرنده حق
قضالرى تصديق ، محاکم عثمانيه ده رؤيت اولنه جق اولان وفرانسولره
تعلق بولان دعوانك حين مرافعه سنده ترجمانك حضورينه
مساعده و فرانسه تبعه سى متروكانك قيديله بوكامتفرع معاملات
سائر قونسولوسخانه محکمه سنه ترك واحاله اولندی و عثمانيلرله

[۱] La vallée , Histoire de la Turquie , Paris

فرانسز لر بښنده ټكون ايدہ جك حقوق دعو الرندہ مطلقاً محرو
 بوسند بولنسی شرط اتخاذ قلندی [۱]



ایکینجی فصل

ممالك شاهانہ تبعہ امتیازیہ مکرون عمومیه در صورت
 امتزازه سی

معلومدر که انسانلر بدایت خلقتلرنده بر طاقم حقوقه
 مالک بولنشلردر، که مکرون عمومیه بو جمله دندر . دولت علیه
 عثمانیه نك تحت تابعیتندہ بولنان بالجمله افراد ايله مالک شاهانہ ده متمکن
 وساکن اولان اجانب بو حقوق عمومیه مالکدر . بوندن بشقه
 برده مکرون سیاسیه وارددر، که بوکایالکر تبعه عثمانیه مالک اولوب

[۱] de Hammer, Histoire de l'Empire Ottoman. 1896

اجنیلر بوندن استفاده ایده من . چونکه ، مجالس و محاکمه اعضا
انتخاب ایتک و اولمق کبی ، بر طاقم صلاحیتلری تفویض ایدن
بو حقوق بوکا اشتراک ایدنلره مدافعه مملکت و اشتراک صرفیات کبی
بر طاقم وظائفده تحمیل ایدر ، که اجانبه بو وظائفدن حصه
اصابت ایتماک طبعیدر .

حقوق عمومیه نك منبعی ایسه حقوق طبعیه اولدیغندن ، اجنیلر ،
هر نرّه بولنسلر ، بو حقوقدن استفاده ایدر لر . «اجنیلر شخصلری ،
عائله لری و ماللری ایچون بولندقلری مملکتک قوانین و عاداتی
طرفندن مظهر حمایه اولمق حقنه مالکدر لر .» [۱] ممالک شاهانه ده
ایسه اجنیلر قوانین موجوده نك مظهر حمایه سی اولدقدن بشقه
تبعه اصلیه یه نسبتله بر طاقم مساعدات و معافیاتده مالکدر .
حریت شخصیه . — ممالک شاهانه ده حریت شخصیه حمایه

قانونیه یه مودودعدر . «حریت شخصیه هر درلو تعرضدن مصوندر .
هیچ کیمسه قانونك تعیین ایتدیکی سبب و صورتدن ماعدا بر بهانه
ایله مجازات اولنه من .» [۲] اشته بوماده قانونیه نك تأمین ایتدیکی
حریت شخصیه دن ممالک شاهانه ده مقیم افرادك جمله سی مستفید
اولوب ، بوراده ساکن بولنان اجنیلرده بوندن حصه داردر .
حق قانونده کی هیچ کیمسه تعیری ایله اجنیلر كده بوندن
استفاده سی تأمین اولمشدر . بناءً علیه بالعموم افراد عثمانیه کبی

Bluntschli , Droit international codifié § ۲۸۶ (۱)

(۲) قانون اساسی : اوننجی ماده

اجنبیلرده قانون خارجنده حبس و توقیف و یا صور سائر ایله
 دوچار مجازاة ایدیله من. آنجق بو خصوصده تبعه عثمانیه ایله تبعه
 اجنبیه بیننده، طرد و تبعیر Expulsion و اعاده مجرمین
 Extradition خصوصاتنجه، فرق وارددر. دولت اسایش داخلی
 و یا امنیت عمومیه ایچون برتهلکه کوردیکی آند هر اجنبی،
 تدابیر اداره جمله سندن اوله رق، حدود خاقانی خارجنه چیقاره
 بیلیر. حالبوکه تبعه محلیه اجنبیلره قیاساً مملکتدن طرد اولنه من.
 بناءً علیه قانون اساسی عثمانیک یوزاون اوچنچی ماده سنک فقره
 اخیرسی اشبو قاعده حقوقیه ایله تضاد تشکیل ایتمکده در. فقره
 مذکوریه نظراً «... حکومتک امنیتی اخلال ایتـ کـری اداره
 ضابطه نـک تحقیقات موثوقه سی اوزرینه ثابت اولانلری ممالک
 محروسه شاهانه دن اخراج و تبعید ایتـ کـ منحصراً ذات حضرت
 پادشاهینک ید اقتدارنده در»، تبعه محلیه یی بو وجهله حدود مملکته
 خارجنه چیقارمق جزاسی که اوستراکیزم ostracisme و طرد
 اخراج نامیله معروفدر، یونانستان قدیمده مرعی ایدی. قانون
 عثمانی به بونک ادخالی شرایع عتیقه نـک تحت تأثیرنده بولمقدن
 نشئت ایتـ شـ اولمق وارد خاطر در. تبعه اجنبیه نـک حدود خارجنه
 چیقارلمسی ایسه عموماً قبول اولنان بر قاعده به مستنددر، که قاعده

مذکورہ یہ نظراً ہیچ بردولت فعل و حرکتی اخلاص آسایشی
 بادی اولہ بیلہ جک ہیچ برفردی حدود ملکیتہ سی داخلہ قبولہ
 مجبور دکلدر ؛ [۱] چونکہ اجنبی بولندینی مملکتہ نسبتہ مسافر
 اولدیفندن ، حق مسافرتہ رعایت ایتیمی لازم کایرہ . « مهماننوازلق
 کوسترن کمسیہ قارشی سوء استعمالہ جرأت ایدن شخص حق
 مسافرتی ضایع ایدر . » [۲] . ۱

اعادہ مجرمینہ کلنجہ ، هر دولت اجانبک ، حق منسوب
 اولدقلری دولتر طرفندن طلب اولنسه لر بیلہ ، ملکي داخلندہ
 اقامت ایتلرینہ مساعدہ ایتک حقنہ مالکدر . بناءً علیہ مملکتہ
 التجا ایدن ارباب جرائمک دولت متبوعہ لرینہ تسایم واعادہ سی
 انجق معاهدات مخصوصہ ایلہ وظیفہ شکنی آلیر . جرائم سیاسیہ
 ایلہ متهم اولانلری مملکتہ قبول ایتک هر دولتك حق اولوب ،
 ہیچ بروقت بونلری اعادہ ویاطردوتبعید مجبوریتی یوقدر ؛ فقط
 یوقیلدن اولان مجرمین سیاسیہ نك سائر دولترك آسایش وامنیت
 عمومیه سنی اخلاص ایچون التجا کاهلرینی سوء استعمال ایتما لرینہ
 دقت اولنور . بر مملکت اجنبیہ دہ ایقاع جرم ایلان تبعہ محلیہ

Weiss, Traité théorique et pratique du droit international privé

Artur Desjardins , Questions sociales et politiques

[۱] جلد ۲ صفحہ ۸۸ [۲] صفحہ ۳۰۱

دولت متبوعه طرفین هیچ بر وقت دولت اجنبیه تسلیم
اولنار [۱]. اشته شو قواعد اساسیه مستند بولنان اعاده
جرمین کیفیتی حقنده دولتمزك يالكز روسیه دولتی و شمالی
آمریقا حكومات متحده سیله معاهدات مخصوصه سی واردی
دول سائریه قارشی ارباب جرائمی اعاده ایلدیکی حالدی
صرف بر معامله جملیه ابراز ایلش اولور. روسیه دولتیله اعاده
جرمین حقنده احکامی شامل اولان معاهده ۱۷۷۴ سنه
میلادیه سنه مصادف ۱۱۸۸ تاریخ هجریسی رمضانده و سلطان
عبدالحمید اول ایله ایمپراطور یحیی ایکنجی قارئینه زمانلرنده
کوچک قنبارجه موقعنده عقد اولنان معاهده در، که ایکنجی
ماده سنک بر فقره سننده « طرفین رعایاسندن اولوب کرک اهل
اسلام و کرک خرستیان زمره سندن بر کسه بر درلو نقصیرات
ایدوب هر نه ملاحظه ایله بر دولتن اول بر دولته التجا ایدرسه
بو مثل اولر طلب اولندقجه بلا تأخیر رد اولنه لر.» دینلمشدر. شمالی
آمریقا حكومات متحده سیله اولان معاهده ده ۱۸۷۴ سنه سنه
مصادف ۱۲۹۱ سنه هجریه سننده عقد اولنشدر. بونک برنجی
ماده سننده « طرفین معاهدیندن برینک ممالکنده ایکنجی ماده ده
تعین اولنان جنایتدن بریله متهم و یا محکوم اولان اشخاص

ديکريٽڪ ممالڪنده بولنه جق وياخود اورايه التجا ايدم جڪ
 اولور ايسه فراري ويا مٿم اولان شخصڪ بولنه جني مملڪتڪ
 قوانيني موجبجه وقوع جنايتي مؤبد اولان دلائل جنايتڪ
 اوراده وقوعبولمشجه سنه اوفراري ويا شخصڪ توقيف ومحاڪمه
 جزائيه سني ايجاب ايتديره جڪ صورتده اولمدجه اومقوله لر رد
 وتسليم اولميه جقلردر. دينلمشدر ۲ نجی ماده سنده « تسليحي
 اقتضا ايدن اشخاص اشبو مقاوله نامه ايله معين شرائطه
 توفيقاً زيرده محرر جنايتڪ بريله محكوم ويا مٿم اولانلردر
 دنيلد کدن صكره جنايات مرقومه نك تعدادينه ابتدار اولنه رق
 ۱ تعداداً قتل ؛ ۲ قتله تصدي ؛ ۳ قيز قاچيرمق، قونداچيلق،
 قورصانلق، برسفينه طائفه سني اغفال ويا قبوداني عليهنده
 معامله جبريه اجراسيله سفينه بي ضبط ؛ ۴ كيجه خرسزلني ؛
 ۵ ساخته كارلق و اوراق رسميه بي تقليد ؛ ۶ مسكوكات
 وعلی العموم اقچهيه متعلق هرنوع اوراقی اعلان ودواثر رسميه
 مهر وسكه وتمغا وعلامتريني تقليد ونشر ؛ ۷ مأمورين طرفندن
 اموال اميريه سرقتي ؛ ۸ اجرتلي اشخاصڪ استخدام ايدنلر
 ضررينه سرقتي ، ديه تصریح اولمش و ۳ نجی ماده سنك فقره
 اولاسنده « اشبو مقاوله نامه احكامنك پولتيقه تهمترينه شمولي
 اوليوب » جمله سيله جرائم سياسيہ اربابنك اعاده اولميه جني
 ذكر ايدلمشدر .

سربستی آمد و شد . — دول اجنبیه تبعه سنک ممالك شاهانه په سربستانه کلوب کیتلری خصوصنه طرف سلطنت سنیه دن من القديم مساعده اولمشدر [۱]. ذاتاً و مملکتی داخلنه اجنیلرک دخولانی صورت قطیعه ده منع و مملکتی تجارت عمومیه په سد ایتکه هیچ بر دولتمک حتی یوقدر ، [۲] بناءً علیه هراجنی دائماً ممالك شاهانه په کیروب چیقار و داخل ملکده اجرای سیاحت ایده بیلیر. آنجق « اسباب سیاسیه ویا عدلیه دن دولای هر دولت بر طاقم اجنیلری مملکتی داخلنه کیرمکدن منع ایده بیلیر. » [۳] بوکا بناءً دولتمز ، تدابیر ضابطه جمله سندن اولق اوزره ، ممالك شاهانه په کلک آرزو سنده بولنان اجنیلرک پسا پورط حاملی بولملرینی شرط اتخاذ ایتش و بونک ایچون برده نظامنامه نشر ایلمشدر .

[۱] ۱۲۹۵ سنه هجریه سنه مصادف ۱۸۷۸ سنه میلادیه سی تموزینک ۱۳ نده سلطنت سنیه ابله المانیاء ، انکلتزه ، اوستریا ، ایتالیا ، روسیه و فرانسه دولتلری بیننده برلینده عقد اولنان معاهده عمومیه نک ۶۲ نجی ماده سنک ، تبعه اجنبیه حقنده اولانه حتی معامله په دائر اولان ، فقره اخیره سنده « هر ملتدن اوروپا و آسیا ممالك عثمانیه سنده سیاحت ایدن رهبان و زوار عینی حقوق و فوائد و امتیاز ایدن مستفید اوله جقلردر . » عباره سی مندر جدر .

[۲] ۳۸۱ Bluntschli , Droit international codifié

[۳] ۳۸۲

بوظایمانامه حکمنجه ، ممالک دولت علیه کله جک اولان
 اجنبیلر منسوب اولدقلری دولندن، کندی شخص و هویتلری
 حقنده معلومات لازمه یی محتوی ، برپسپورط اخذیله اوراده
 بولنان سلطنت سذیه شهیندر مأمورلرینه ویزه ایتدیردکن
 صکره کلکه، وممالک شاهانه یه وصوللرنده حامل اولدقلری پساپورطی
 حکومت محلیه یه ابراز ایله قیدایتدیرمکه مجبوردرلر. پساپورطسز
 کلن اجنیتک، منسوب اولدینی دولت سفارت ویاقونسولانوسی
 هویت و شخصی تصدیق ایتدیکی حالده ، یکدن بر پساپورط
 آلمسینه مساعدده اولنور . پساپورط تدارکنده تردد و امتناع
 کوسترن اجنبیلر حدود خاقانی خارجه چیقاریلیر. تبعه اجنبیه
 حقنده موضوع اولان شو اصول تقیدیه ، آسایش مملکتک
 محافظه سی املی ایله وضع اولمشدر . بوبابده دولتر، بواصولک
 سربستی آمد وشدی اخلال ایتمسندن دولای، بر مسلك مطرد
 اتخاذ ایتما مشلر و بعضلری اجنبیلردن قطعاً پساپورط استمیوب
 فقط، فرانسه کی، بر قسمی حالا پساپورط آرا مقده دوام ایتمکه
 بولمشلردر . فرانسه ده، بوکون داخل مملکته کیره جک اولان
 اجنبیلرک پساپورط حاملی اولملری طلب اولنیورسه ده، بوعدم تقید
 پساپورط اصولک رسماً الغاسندن ناشی اولیوب ، اجرا آنده
 یک اوقدر اعتنا اولمدیفندن نشئت ایدیور . یوقسه فرانسه
 حکومتی ده بعضاً اصول مذکوریه یی تطبیق ایدیور، نته کیم
 ۱۸۷۰ سنه سنده کی فرانسه و المانیا محاربه سی ائانسانده یدنده .

پساپورطی بولمیان هیچ ر اجنیهك فرانسه داخله کیرمسنه
مساعده اولئامشدر . اشته بونك ایچون تبعه عثمانیه دن ممالک
اجنیه یه کیده جک اولانرک پساپورط استحصال ایتلمری
شمیدیلک ایجاب ایتمکده در .

سربستی اديان . — دین مبین اسلام سربستی اديان
اساسی وضع ایتمش اولمسیله ، دولت علیه ده بواساسی قبول
ایلمشدر . « آسایش خلقی و اداب عمومیه بی اخلاص ایتامک
شرطیله ممالک عثمانیه ده معروف اولان بالجمله اديانك سربستی
اجراسی وجاعات مختلفه یه ویرلمش اولان امتیازات مذهبيه نك
کماکان جریانی دولتک تحت حمایتده در . » [۱] یالکیز اجرای
آیین ایچون مذهب دولتجه معروف اولمق ویاخود حکومت
سزیه دن رخصت رسمیه آلمق اقتضا ایدر . بوحق یالکیز تبعه
عثمانیه یه منحصر اولمیوب ، اجانب دخی بوندن استفاده ایلر .
سلطان سلیمان قانونی حضرتلری دورنده و ۹۳۸ تاریخ
هجریسنده فرانسه یه اعطا بیوریلوب بالمناصبه یوقاریده ذکر
اولنان خط شریفده فرانسزلرک ممالک شاهانه نك هرجهتده
اجرای آیین خصوصنده سربستی تامه مالک اولوب فلسطین
قطعه سنده کی اما کن مقدسه نك فرانسز رهبانی ویاخود —
هانکی تبعه دن اولورسه اولسون — فرانسه نك مذهبه سالک

اولان مأمورین روحایه معرفتیه محافظه اوله جنی ذکر اولمشدر [۱].

[۱] ممالک شاهانده اجانبک بوبابده حائز اولدینی حقوق حوالی مبارکه Lieux saints مشه سنده اجنبی رهبانه ویریلان امتیازات ایله باغلار . بو امتیازات قوس شریفک ایادی اسلامه نقلدن اول موجود اولدینی کبی مؤخرآ ، اورانک فاتحان اسلام جانبندن ضبطی اوزریشه ، طرف حضرت فاروقدن ینه کندیلرینه بخش و عنایت بیورلمش ، و صکره لری سلاطین عثمانیه جانبندن ده تصدیق ایدیلوب حتی اورویا دولترلیله عقد اولان معاهداته درج ایدلمشدر . بوحوالی مبارکه امتیازاتی مؤیداً طرف عثمانیاندن اعطا قلنان والیوم الدله بولنان هجج و او اسرک اک اسکیمی سلطان سلیمان قانونی حضرتلری طرفندن ، ۹۶۶ سنه هجریه سنه مصادف ۱۵۵۸ سنه میلادیه سنده ، اصدار بیوریلان خرمان عالیدرکه بونده فرانسه رهباننک قدس شریفده calvaire یعنی غولفوطه تیه سی دنیان محله اجرای آیین ایتمکه اولان حق لری تأیید اولمشدر . بونی متعاقب ، ینه سنه مرقومه محرمنده ، اصدار بیوریلان دیگر بر فرمان عالیله حوالی مرقومه بی زیارت کیده جک فرانسه تبعه سنه کرک عزیمت و عودت لرنده و انشای راهده هیچ بر طرفندن تعرض اولنماسی کرک امر زیارت لری دوچار مانعت و صعوبت اولماسی امر اولمشدر .

بونلردن بشقه تاریخ مذکوردن صکره بو خصوصه دائر برچوق فرامین عالیله هجج و اعلامات شرعیه صادر اولمش ، و فرانسه ایله عهدنامه ۱۷۴۰ عهدنامه هایوننده بو بابده مواد مخصوصه درج اولمشدرکه عهدنامه مذکورک بوکا دائر اولان ماده لری شونلردر : « فرایچه لولردن قدس شریف زیارت کلوب کیدنلره وقامه نام کنیسه ده اولان رهبانلره دخل و تعرض اولنیه ؛ » « فرایچه به تابع اولان پستقوسلر و سائر فرنک

عرفحال ویرمک حق . — حکومت عر ضحال ویرمک
هریرده و هر وقت حقوق طبعه دن عد اولندی ایچون، قادیلر
و چوققلر حتی حقوق مدنیه و سیاسیه دن محروم اولان
محکوملر بیله بو حقه مالکدر. بناءً علیه بر مملکتده ساکن
اولان اجنبیلر ده بو حق دن استفاده ایدر لر. آنجق، ماده مستدعانک
ماهیت و کیفیتی اعتباریله و بونک اجنبینک حائر اولدینی حقوق
شخصیه یه و یا خود محروم بولندی حقوق سیاسیه یه تعلقی حیثیتیه
بوابده اهای محلیه ایله تبعه اجنبیه بیننده فرق واردر؛ ویردکری

مذهبنده اولان رهبان طائفه سی، هر نه جنس دن اولور ایسه اولسون،
ممالک پادشاهیله قدیم دن اولدقلری یرلرده کندو حاللرنده اولوب
آینلرک اجرا ایلدکلرنده کمنه مانع اولمایه؛ و قدس شریفک داخلنده
و خارجنده و قمامه نام کلیساده قدیم دن اوله کلدیکی ارزده تمکن ایلیان
فرنک راهبلیرنک حالا ساکن اولوب اللرنده اولان زیارتگاهلرینه کماکان
فرنک راهبلیرنک اللرنده اولوب کمنه دخل ایلیه و تکالیف طلبیه رنجیده
ایلمیه لر؛ « و قدس شریفه واران و آنلره تابع اولان هر نه جنس دن
اولور ایسه وارنده کلمه کمنه دخل ایلیه . حال غلطده اولان
یزویت و قیوچین نام ایکی فرانجه رهبان طائفه لر قدیم دن اللرنده اولان
ایکی کلیسالری یه اللرنده ضبط و تصرفلرنده اولوب اول کلیسالرک بری
احراق اولمغله اذن شرعه تعمیر اولوب کالاول قیوچین اللرنده
اولوب رنجیده اولمیه؛ کذلک از میرده و صیداده و اسکندریه ده و سائر
اسکله لرده اولان فرانسه طائفه سنک کلیسالرینه دخل و رنجیده اولمیه
و بو بهانه ایله آقچه لرک آلمیه لر و غلطده اولان بیمار خانه لرنده کندو
حاللرنده انجیل تلاوت ایلدکلرنده رنجیده اولمیه .

عرضحال حائز اولدقلری حقوق طبیعییه متعلق اولدینی حالدہ قبول اولمق و کندیلرینک بو حق تسلیم ایدملک طبیعیدر ، یا لکزرؤقی تابع اولدقلری قونسلوسخانه محکمہ لرینہ عائد بولنان مواد ایچون ممالک شاهانه ده ساکن اولان تبعه اجنبیه حکومت سنیهیه عرضحال ویرمز . مواد سیاسیہ ده ایسه اجنبیلرک عرضحال اعطاسی حققلری هیچ بریرده طانما مشدر .

سربستی تعلیم و تعلم . — برملک داخلندہ بولنان مکتبلرده اجرا اولنان تدریساتدن صاحب ملک اولان دولت مسئولدر چونکہ وطنک استقبالی اوکئیلرده تحصیل ایدوب یتشان کنج لرہ عائددر . شاگردان مکتبده کوره جکلری تربیه و حاصل ایدہ جکلری فکرایله ایلریدہ وطنہ خدمت ایدہ جکلردر ؛ بناءً علیہ فکرلرینک سلامتی ، احتیاجات محلیہ بی کوزه تهرک ، تأمین اولمق وظیفہ سی دولته تراب ایدر . اونک ایچون دولت ملکی داخلندہ بولنان مکاتب اوزرنده نظارت عمومیه وشاملہ اجرا ایتمک و تدریساتک منافع دولت ومملکت نقطه نظرندن جریانہ دقت ایلک لازم کلیر . ایشتہ بولزومه بی مکتبلر هیچ بریرده اجنبی مدیرلرہ تودیع اولمز و حتی اجنبی معلملرک بیله استخدامی بیله برطاقم قیود و شروطہ تابعدر . بواساہ بناءً دولت علیہ نک مکاتب رسمیه سندہ اجنبی مدیرلر بولنہ مز و معلم احوال استثنائیہ ده ، حکومت سنیه استرسہ ، تبعه اجنبیه دن اوله بیلیر . فقط سلطنت سنیه ممالک شاهانه داخلندہ اجانبک خصوصی مکتب کشاد ایتلمرینہ ، محضاً برمساعده مخصوصه اولمق اوزره ، موافقت

ایتمشدر . بوباید دولته تحیل وظیفه ایدمك بر حکم عهدی
یوق ایسهده ، ساطنت سنییه ، تبعه شاهانه دن بولنان جماعات
مختلفه نك چوققلریخی کندی لسان و آینه لری اوزره تعلیم
ایتملرینه مساعده ایتمش اولدیغندن ، تبعه اجنیه نك ده کندی لری
ایچون خصوصی مکتبلر تأسیس و کشاد ایتملری ایچون جواز
مساعده یه قائل اولمش فقط بونی بر ماده نظامیه یه ربط ایتمشدر .
ماده مذکوره ده ، اولا بوکې خصوصی مکتبلرک « بعض محملارده
جماعتلر طرفندن ویا کرک تبعه دولت علیه و کرک تبعه اجنیه دن
اولان افراد و اشخاصدن بری جانبندن اجرتلی ویا اجرتسز
اوله رق احداث ، و تأسیس اولنان مکتبلر » اولدینی تصریح ایدلرکن
صکره . « ممالك شاهانه دن بونوع مکتبلرک تأسیسینه اولا
معلملرینک یدنده معارف نظارتی جانبندن ویا خود محلی معارف
اداره سنندن مصدق شهادتنامه بولمق و ثانیاً مکتبلرده آداب
و پوائتیه مغایر درس اوقوتدیرلماق ایچون تعلیم اولنه حق
درسلرک جدولی و کتابلر معارف نظارتندن ویا خود محلی
معارف اداره سنندن تصدیق ایدمك اوزره طشرهده ولایت
معارف اداره سیله ولایت والیسی طرفندن و در سعادتده ایسه
معارف نظارتی جانبندن رخصت رسمیه ویریلور ، [۱] دینلمشدر
مؤخرأ شرفصادر اولوب دوائر عانده سنه تبلغ اولنان اراده
سنیه حکمنه نظراً ، بعد ممالك شاهانه داخلنده اجانب طرفندن
مکتب کشادی ارزو اولندیغنی حالده ، محلنجه تحقیقات لازمه

بالاجرا ، هیچ بر صورتله محذوری تبین ایتمزسه لدی الاستیذان
 شرفسایح اوله جق اراده سنییه توفیقاً ، آجدریله جق و ، بلا
 اراده نیه ممالک عثمانیه نك هیچ بر طرفنده اجنبی مکتبی تأسیس وانشا
 و کشادی ممنوع اولوب ، خلاف ممنوعیت حر کتده بولنه رق مساحه
 ایدن مأمور لر مسئول اوله جقدر . [۱] سربستی تعلیمه کلتیجه ، معارف
 عمومیه نك درجات ابتدائیه و تالییه سنده بولسان مکاتب محلیه ده
 اطفال اجنبیه نك دخی تحصیل علوم ایتلرینه قاعده برشی دینله مز ؛
 انجق ، مکاتب عسکریه کبی ، شهادتنامه لیلرینه خدمات دولت
 استحصالجه برحق ویرن مکاتب عالییه تبعه اجنبیه اطفالی ،
 یا لکیز حکومتک رخصت مخصوص وسیله و نائل شهادتنامه اولدقدن
 صکره او شهادتنامه نك بخش ایتدیکی حقوقدن استفاده ایده مامک
 شرطیله ، قبول اولنه بیلیر . ممالک شاهانه ده تبعه اجنبیه اطفالی ،
 مراجعت ایتدکری حالده رشديه واعدادیه مکتبلرینه قبول
 اولنور [۲] . مکاتب عالییه دوام ایچون حکومت سنییه نك
 مساعده مخصوصه سی لازمدر .

سربستی مطبوعات . — مطبوعات مرآت انعکاس افکار
 وحشیات اولدیغنه کوره ، هر کسک محصولات فکریه سنی اورتیه
 قویمقدمه کی حق هر برده تسلیم اولنور سه ده ، بو نشریاتک منافع

[۱] تذکره سامیه فی ۲۸ جمادی الاولی سنه ۳۰۹ و فی ۱۸

کانون اول سنه ۳۰۷

[۲] بیورلدی سامی فی ۱۸ ربیع الاول سنه ۳۰۵ و فی ۲۲

تشرین ثانی سنه ۳۰۳

مملکت و آداب و اخلاق محلیه به منافی و مضر اولیامسنه دقت اولتور .
 ممالك شاهانه ده ساکن اجنیلر بو حقدن استفاده ایدرلر و مؤلف ،
 غزته مدیر مسئولی و محرری اوله بیلیرلر . بو خصوصده غزته
 و رسائل موقوته ایله کتب و رسائل سائر نک تفریقی لازمدر .
 غزته به متعلق احکام نظامیه به نظراً « غزته احداث ایدم جک
 آدم تبعه اجنیه دن بولور ایسه اشبو نظامنامه احکامندن
 اولان وظائف و تکلیفاته تبعه دولت علیه مثللو تابع اولمق
 و مطبوعاتجه بزکونا قباح و جنجه سی و قوغنده حقنده کړک
 حکومتجه و کړک محکمه جه اجرا اولنه جق معامله سلطنت سنیه
 تبعه سی حقنده جاری اولان اصوله تطبیقاً اجرا اولمق شرطیله
 کذلک نائل رخصت اوله جقدر . » [۱] ممالك اجنیه ده طبع
 اولنان غزته و رسائل موقوته نک ممالك شاهانه به دخوللری سر بست
 اولدینی کی ، ممالك عثمانیه ده طبع اولنان کتب و رسائل ده تماماً
 سر بستدر و ممالك اجنیه ده باصلمش اولان هر نوع کتاب و رساله
 و سائر نک داخل ممالك شاهانه به ادخاله قطعاً مداخله و ممانعت اولنمز .

سربستی تجارت — بر مملکتده ساکن اولان تبعه اجنیه نک
 اجرای تجارت خصوصنده کی حققرینه اصلا اعتراض اولنه من .
 بواساس دولتمز جه ده پیش نظر اعتباره آلتهرق دول اجنیه
 ایله عقد اولان معاهداته درج اولنمشدر . ۱۸۶۱ سنه میلادی سنه
 مصادف ۱۲۷۷ تاریخ هجریسنده فرانسه ایله منعقد معاهده نک
 ۳۰ نجی ماده سنده « حشمتلو فرانسه ایمپراطوری حضر تلی

تبعه سی و یا خود وکیللری ممالک محروسه شاهانه نك هر بر طرفه
 كرك داخلأ بیع و شرا ایتك و كرك طشره به اخراج ایتك
 مراد یله ممالك دولت علیه محصولات ارضیه و صنایعیه سندن
 اولان هر در لو اشیایی بلا استثنا مبايعه و اشترا ایدیه بيله جكلردر .
 دنیلر ك ممالك محروسه ده ساكن بولن ان فرانسلرك — و بر
 دولت تبعه سنه اعطا اولنان حقوق سائر دولتلر تبعه سنه ده تشمیل
 قانددینی جهتله ، سائر بالمله اجنیلرك — ممالك شاهانه ده اجرای
 تجارت خصوصنده سربست اولدقلری تأیید اولنمشدر . بومعا
 مده نك ۳ نجی ماده سنده « فرانسه تجاری یا خود وکیللری
 ممالك دولت علیه محصولات ارضیه و صنایعیه سندن اولوب درون
 ممالك عثمانیه ده صرف و استهلاك ایچون ینه ممالك عثمانیه ده بیع
 و فروخت ایتك نیتبله اشیا و امتعه مبايعه ایلدكلری حالد اشیا
 و امتعه مذكوره نك حین اشترا و فروخته تجارت داخلیه ایله
 مألوف اولان تبعه دولت علیه دن اك زیاده مظهر مساعدده اولان
 تجارك قضابای ممالله ده تأدییه ایتدكلری رسوماتی تأدییه ایدیه جكلر .
 در . . دنیلمش و بوضورتله تبعه اجنیه نك تجارت خصوصنده
 تبعه شاهانه دن فرقی اولمدینی و بوباده حقلرنده هیچ بر كونه
 ممنوعیت بولنمدینی ارائه اولنمشدر . ممالك شاهانه ده متمكن تبعه
 اجنیه شو صورتله سربستی تجارت حقنی حائز اولوب معاملات
 تجاریه لرندن دلایی هیچ بر مانعه دوچار اولزلر و شخص
 و ماللرندن دولایی عهود قدیمه نك بخش ایتدیكی حقوق و معافیتدن
 مستفید اولورلر . یالکز ممالك سلطنت سنیه ده اجرای حرفت

وصناعات ایلد'ان یونان و ایران تبعه سی اصنافلق معاملاتندن دولای
دوغریدن دوغری یه قوانین دولت علیه یه تابع اولوب حقلرند
تماماً تبعه عثمانیه معامله سی اجرا اولنور .

اقامتگاهک مصونیتی . — ممالک عثمانیه ده ساکن اولانلرک
مسکنلری قانونک حمایه مخصوصه سی آلتنده اولوب شرائط
قانونیه ایفا اولنور قجه هیچ کیمسه نك مسکنته تعرض اولنه من
وجبراً کیریله من [۱] تبعه اجنبیه دخی بو حقدن مستفیددر . چونکه
عباره قانونیه ده هر کسک «مسکن و منزلی ..» دینلمشدر . ۱۷۴۰
سنه میلادی سنه مصادف ۱۱۵۹ سنه هجریه سنه فرانسه دولتیه عقد
اولنان معاهده نك برقره سنه « طرف محاکدن و دولت علیه
ضابطانی جانبلرندن و اهل عرف طائفه سندن فرانجه اولانلرک
ساکن اولدقلری خانه یه بلا موجب جبراً دخول اولنمیوب خانه سنه
دخوله حاجت مس ایلدیکی حالده ایاجی و قونسلوس بولنان یرلرده
انلره اخبار و طرفلرندن تعین اولنان آدملا یله اولدینی محله واریلوب
بو خصوصه خلافه حرکت ایدر بولنورسه بعد التحقیق تأدیپ
اولنملر « دینلرک تبعه اجنبیه مساکنتک مصونیتی ضمان عهده
الیه آلمشدر . بوندن ناشی الیوم ممالک شاهانه ده متمکن تبعه
اجنبیه نك مسکنته ضابطه مأمورلرینک دخولی برطاقم قیوده تابعدر .

[۱] ممالک عثمانیه ده هر کسک مسکن و منزلی تعرض ن مصوندر . قانونک تعین
ایلدیکی احوال دن ماعدا برسیله حکومت طرفندن جبراً هیچ کسه نك
مسکن و منزله کیریله من (قانون اساسی : یکرمی ایکنجی ماده) .

اجنبی قونسولوسک بولندیفی محلدن طقوز ساعت ویا دهاز یاده مسافهده مقم ایسه، احتیاج مبرم حالنده وقتل، قتلہ تصدی، حریق، مسکون خانده الده سلاح اوله رق و قپو وسائرہ قیرہ رق ویا کیجه این سرقت و مسلحاً عصیان وقوعنده وقاب مسکوکات اعمالی حالنده، جنایتک تحری واثباتی ایچون، حکومت محلیه نك طابى اوزرینه قری اختیار مجلسه لرینك اوچ نفر اعضاسیله برابر، ضابطه مأمورلری، قونسولوس ویا طرفندن مأمور بولمقسرین، اجنبینك خانه سنه کیره بیلرلر. اجنبینك مسکونی دولت متبوعه سی قونسولوسنك بولندیفی محله طقوز ساعتدن اکیسک مسافهده ایسه قونسولوس ویا مأموری حاضر اولدیجه مأمورین ضابطه اورایه کیره مز، بوکا مقابل قونسولوس ده حکومته اجرای معاونته مجبور در؛ بوتک ایچون کندیسنه اخبار اولندیغندن اعتباراً نهایت التی ساعت ظرفنده بالذات کندی کیدر ویا مأمور کوندرر. [۱]

[۱] مالک شاهانه ده متمکن اجنبیلرک استملاک املاک ایده بیلرلری - حقنده کی نظامنامه مه مربوط پروتوقول — بونظامنامه بی تصدیق ایدن دولترلله تاریخ تصدیق لری بوراده ذکر اولنور: فرانسه ۹ حزیران سنه ۱۸۶۸، اسوچ ۱۳ حزیران سنه ۱۸۶۸، بلجیقا، ۴ تموز ۱۸۶۸، انکلیتره ۸ تموز سنه ۱۸۶۸، اوستریا ۵ تشرین ثانی سنه ۱۸۶۸. دانیمارقه ۱۰ مایس سنه ۱۸۶۹، پروسیا ۷ حزیران سنه ۱۸۶۹، اسپانیا ۵ تشرین اول سنه ۱۸۷۰، یونان ۱۳/۲۴ شباط سنه ۱۸۷۳، روسیه ۸/۴ مارت سنه ۱۸۷۳، ایتالیا

سربستی اجتماع. — ممالك شاهانه ده سربستی اجتماع متعلق
 هنوز بر قانون یا پلامش اولدینی کبی قانون اساسیده ده بوجه تدن
 بحث اولنم امشدر. قانون مذکورک اون اوچنجی ماده سنک
 موضوع بحث ایتدیکی شی شرکتلردر. حالوکه شرکتلر ایله
 اجتماعلر بشقه بشقه شیلردر. سربستی اجتماع هر کسک بر خصوصه
 دائر افکار و ملاحظاتی عمومیه اشاءه ایچون ایتدیکی دعوتیه
 ینه هر کسک اجابت ایتک و یا بر خصوصک مذاکره سی ایچون
 بر طاقم کیمسه لک بر یرده طو پلانق خصوصند، سربست
 اولملری دیمکدرکه حقوق عمومیه جمله نندن اولدیغنده شبهه
 ایدیه من. اداره مشروطیه تابع اولان ممالك عثمانیه ده
 تبعه محلیه نك حقوق عمومیه دن امنیت استفاده سی ضمان قانونی
 تحتنده بولندیغنه بناء عثمانیلرک بوحقندن ده استفاده، ایده بیلملری
 طبیعی ایسه ده، بو خصوصه ده بر قانون مخصوص اولسه بیله،
 بر قانونده بعض احکام مخصوصه بولنق، تأمین انتظام و انضباط
 و محافظه منافع عامه ایچون، الزمدر.

۲۳ مارت ۱۸۷۳، فلمنک ۶ اغستوس سنه ۱۸۷۳، آمریکا
 حکومت متحده سی ۱۱ اغستوس سنه ۱۸۷۴، پورتوغال ۲۹
 کانون ثانی سنه ۱۸۸۳، ایران ۳۰ حزیران سنه ۱۸۸۳

اوچنچی فصل

ممالك شاهانه تبعه امپيريك مقرر مخصوصيه ده
صورت استفاده سی

مقرر مخصوصيه droits privés افراد هم جنس لریله
اولان مناسباننده حائر اولدقلری بالجه حقوقدر . عقد ازدواج
ایتمک حق ایله حق تصرف ، حق توارث و ، بوحقوقک
موقع اجرا واستفاده سی اولق اوزره ، اقامتگاه صاحبی اولق
حق حقوق خصوصیه جمله سندر . ممالك شاهانه ده تبعه نک
کافه سی بو حقوق خصوصیه مالکدر . بونلره مالکیتجه تبعه
محلله ایله اجانب بیننده بولنان فرق مباحث آتیده کورولور .
حقوق عائله Droits de famille . — همان بتون عائله
حقوقی ازدواج ایله حصوله کلیر . عائله تشکیلی بتون انسانلرک
غایه مقصودیدر ؛ بناء علیه بتون دولتلرک قانونلری امر مذکور
تشویق ایلر . بوکامبیدرکه حق ازدواج بر ملک داخلنه منحصر
اوله من ، عمومیدر . بوکون علی العموم مصدقدرکه هراجنبی
بولندیغی محله تاهل ایتمک حقنه مالکدر . ممالك شاهانه ده

تبعه اجنبیه ده ازدواج ایدر. آتیده بحث مخصوصنده کوريله چکی
اوزره ، بوراده مقیم اجنبیلرک ازدواجلری یا قوئسلوسلری
ویامنسوب اولدقلری مذهبک مأمورین روحانیه سی معرفتیه
اجرا اولور . بوندن متحصل مولودات باطباع اولاد مشروعه دن
اولدیغندن اوزرلرنده پدرلرینک حق ابوتی جاری اولور . بوحقه
بناء اولاد صغار اوزرنده اجرای وصایت ایدر وچو ققلرینک
وفاتنده متروکاتی توارث ایلرلر .

وفات ایدن اولادک اموال متروکه سی توارثده پدرلرینک
کیفیت ودرجه اشتراکنی تعیین ایدن قانون دولت متبوعه سی
قانونی اولدیغندن ، بویولده اولادینه وارث اولان تبعه اجنبیه نک
صورت توارثی ده منسوب اولدقلری دولت قانونیه تعیین ایدر .
الحق ممالک شاهانه ده اموال غیر منقوله دوغریدن دوغریه
قوانین عثمانیه یه تابع اولوب ، متصرفلرینک صفت تابعیتلری بو
بابده هیچ بروجمله اجرای تأثیر ایتدیکنندن ، اشبو متروکات
ایچنده غیر منقول اولان اموالک کیفیت توارثی ده قوانین عثمانیه یه
تابع قایلر . هر حالده ممالک عثمانیه ده بولنان تبعه اجنبیه نک صفت
تابعیتی بونلرک ازدواجلریله تولداتک میدانه کتیردیکی حقوق
عائله دن استفاده دن کنیدیلرینی اصلا منع ایتمز .

حقوق تصرفیه استخلافیه Droits patrimoniaux - افرا-
دک اشیا ایله اولان مناسباتنه متعلق اولوب ، ماده تقدیر قیمتی
دخی ممکن اولان حقوق خصوصیه بوقسمه داخلدر . بوحقوق
یادوغریدن دوغریه افرادپله اشیا بیننده کی مناسباته بلاواسطه

تعلق ایدر و احوالده حقوق عینیة (Jura in re) droits réels
 دیناییر ، یا بو حقوق ایله برکمیسه دیگرینه قارشی بر منفعت تأمین
 تعهد ایدوب ، اصل وسیله تعهد اولان شیئی ایکنجی مرتبهده
 بر ائیر ، اوزمان حقوق شخصیة (Jura ad rem) droits personnels
 نانی آلیر ؛ بمضاده انسان کندی محصول فکرو سعی
 اوزرنده بر حق اجرا ایدر ، بوکاده مو امدات و امتناع
 droits intellectuels ou d'invention تعیر اولنور ،
 برنجی قسمده مو تصرف
 droits de propriété ایله
 قیود عینیة servitudes réelles و یا اصلیه prédiales ، تیرد شخصیة
 servitudes personnelles و تأمینات عینیة sûretés réelles
 واردر . حقرق طبیعه میاننده عائله حقوقدن صکره کلن حق
 تصرفدر . بو حق شخصیت بشریه نك تکمل مادیس ، دیمك
 اولوب ، انسان بونکله اشیای خارجیة اوزرنده اعمال قدرت
 ایدر . [۱] حق تصرف سعی و عملده مدار تشویق اولوب ،
 بو اولدقجه تجارت و اقتصاد ممکن اوله من ، بناء علیه هر کک
 بوکائیل اولسی اقتضا ایدر . حق تصرف ازمنه قدیمده اجانب
 ایچون معتبر اولمیدنی کبی ، حالازمانمزد بر چوق برلرده بر طاقم
 تحدیداته تابعدر . ممالك شاهانه ده ساکن بولنان و عهد قدیمه دن

[۱] A . Weiss ، Traité élémentaire de droit inter-

national privé ،

صفحه ۶۰

استفاده ایدن تبعه اجنبيه ايسه حق تصرفه مالکدر، و، اراضی حجازیه مستثنا اولق اوزره، ممالك محروسه داخلنده املاك صاحبی اوله بیلرلر [۲]. عن اصل تبعه دولت علیه دن ایکن قانوناً موضوع اولان اصوله توفیقاً تبدیل تابعیت ایدره تک تبعیت اجنبيه به داخل اولانلرده ممالك شاهانه ده حق تصرفه مالک ايسه لرده سلطنت سنیه دن ماذونیت رسمیه استحصال ایتـ که مزین تبدیل تابعیت ایدوب طرف دولت علیه دن تابعیتدن اسقاط اولنان اشخاص ممالك عثمانیه ده استملاك و توارث حقندن محروم اولورلر [۱].

یا لکز ممالك شاهانه ده استملاك املاك ایلان اجانب «املاکه عائد کافه خصوصاته تبعه دولت علیه نک مکلف اولدقلری کافه خصوصاته مجبور» اولوب، املاکه متعلق بالجمله خصوصاته «حالا جاری اولان و استقبالاً جریان ایدره جک اولان قوانین و نظامات ضابطه و بلدییه اتباع» و «تبعه دولت علیه دن اولان اصحاب املاک مکلف بولندیی و بوندن بویله اوله بیله جکی کافه تکالیف و رسوماتی ایفاء ایدرلر. املاکه متعلق دعوی و قوعنده بونک ایچون «کرك کندیلری مدعی و کرك مدعی علیه اولسون و کرك ایکی طرف دخی تبعه اجنبيه دن بولنسون دوغریدن

(۲) ممالك شاهانه ده تبعه اجنبيه نک املاك استملاك ایتلرینه

دائر نظامنامه : ماده ۲

(۲) اجنپیلرک استملاك املاکی نظامنامه سنک برنجی ماده سننده استثنا اولنان

اشخاص حقنده نظامنامه : ماده ۲

دوغری یه دولت علیه محکمه سنه مراجعت اولنور (۱) .

ایکینجی قسم حقوق تصرفیه استخلافیه بحشده ممالک محروسه ده مقیم بولسان تبعه اجنبیه حقوق عینیه دن مستفید اولدینی کبی بلا قید داین ومدیون دخی اوله بیلیر، و شرکت حصه سنداتی مبیاعه ایله بیلیر. بومعاملاتدن دولایی عثمانلی ایله اجنبی ارمه سنده ظهور ایده بیلر چک اختلافاتک محل رؤیت وفصلی محاکم عثمانیه در . بونک کبی اجنبی بردائن تأدیة دیندن عاجز قالان برعثمانلی تاجر علیه محاکم سلطنت سنییه ده افلاس دعواسی اقامه ایده بیلیر و بوجمله افلاس ایشلرنده محاکم عثمانیه یه مراجعت ایدن اجنبی دائلر حقنده عینیه تبعه دولت علیه معامله سی اجرا اولنور . اکر اظهار افلاس ایدن مدیون اجنبی ایسه بواشی منسوب اولدینی قونسولوسخانه محکمه سی رؤیت ایدر . هر حالده ممالک شاهانه ده ساکن تبعه اجنبیه حقوق شخصیه یه مالکدر . حقوق عادیه ایشلرنده اکر مدیون تبعه اجنبیه دن ودائن عثمانلی ایسه ، اوحالده ، ۹۳۸ سنه هجر- یه سنده صادر اولان خط شریف ایله اعطا بیوریلان مساعدات جمله سندن اولمق اوزره « عثمانلور ایله فرانچهلور بیننده حقوق

(۱) اجنیلرک استملاک املاک ایللری حقنده اولان

نظامنامه ماده ۲ .

دعواسی وقوعنده فرانچهلونک یا کنډینک ویاقونسلسونک خط
دستیه بر تمسک ابراز اولدقجه عثمانلونک شکایتی قانوناً غیر
مسموع « اولدیغدن، داتک بویولده برسند ابرازیه اثبات مدعا
ایلمسی لازم کلیر و بوطرز معامله علی العموم تبعه اجنبیه یه
شاملدر .

اوچنجی قسم حقوق تصرفیه استخلافيه یعنی حقوق احداث
واختراع ، علی العموم تألیفات ، موسیقی نوطه لری ، رسم
لوحه لری ، هیکلر و صنایعده مستعمل مودلر کبی، محصولات
فکریه عائد اولان حقوقدر . بونلر السنة اجنبیهده تصرفات
ادبیه - *Propriété Littéraire* و تصرفات صنایع *Propriété industrielle - artistique* دنیلیر سهده ،
اصل حق تصرفدن فرقی اولدقلرندن ، حقوق فکریه
droit intellectuel تسمیه اولنمی بعض ارباب حقوق
طرفندن تکلیف اولنمقده بولمیشدر (۱) . بزه قالیرسه ،
مقوقه امرات و اختراع دیمک اک مناسبدر .

ممالک شاهانهده قانون دائره سنده سربستی مطبوعات جاری
اولوب ، تبعه اجنبیهک بو خصوصده تبعه عثمانیه دن فرقی

(۱) بو تکلیف اک اول ادمون پیقار طرفندن درمیان

اولنمشدر (*Journal du droit international privé* سنه ۱۸۸۳

صحیفه ۵۶۵) انکلتزه و آمریقا ده بونک ایچون من امتنساخ

Copy right و المانیاده من ولف *Urheberrecht, autorrecht*
تعبیرلری مستعملدر .

یوقدر . مادامک هر کسک محصول فکر و عرفانی اولان آثار ادبییه یی طبع و نشره صلاحیتی واردر . بونلردن ماده حق استفاده سی ده اولمق و بوحق منحصرأ آثار مذکوره اصحابنه عائد بولمق ایجاب ایدر . بونک ایچون علی العموم تألیفات ایله موسیقی نوطه لرینه و رسم لوحه لرینه متعلق حقوق یعنی حق تألیف و تصنیف droit littéraire et artistique ممالک شاهانه ده نظاماتک تحت حمایه سنده در . ممالک محروسه ده کتاب طبعی حقنده اولان نظامنامه حکمنه نظراً « مؤلفه برنوع مکافاة و تا زیانه شوق اولمق اوزره هر مؤلف حقنده قید حیات شرطیه لیه امتیاز و یریلهرک مدت حیاتنده کند و نندن بشقه سی تألیف ایلدیکی کتابی باصدیره - حامسی » (۱)

مقرر ايسه ده ، مؤخرأ بومدت کتابک طبع و نشرندن اعتبارأ قرق سنه دن عبارت اولمق اوزره تعیین و امتیاز « مؤلف کتاب طلب ایدر ايسه » السنه سائریه نقل و ترجمه سی حالنده توسیع اولنمشدر .

بو حقدن تبعه اجنیه نك دخی مستفید اوله جنی « هر کس ايسه تديکی کتابی طبع ایتدیره جکدر » (۲) فقره سنک دلالت صریحه سندن مستباندر .

شو ایضاحاته نظراً تیاترو رساله لرینک ده سائر کتابلر کی اصحابنه حق تألیف بخش ایتدیکی و بناءً علیه بونلر اوزرنده ده اصحابنک حقوقی قانوناً محفوظ بولندیغی شبهه سز ايسه ده ، بونلرک

(۱) کتاب طبعی حقنده نظامنامه ماده ۱

(۲) کتاب طبعی حقنده نظامنامه ماده ۲

اوینادلمسی ایچون اصحابنک رضا و موافقتلرینی استحصال مجبوریتی
اولدینجه دائر نظامات موجودده هیچ بر حکم یوقدر : بوکا
مقابل رساملرک یابدقلمری لوحه لر ایله معمارلرک تنظیم ایتدکلمری
ابنیه رسم و پلانلری ده دوغریدن دوغری یه اصحابنک مالی
اولوب ، بونلر اوزرنده ده ، عادتاً سائر آثار ادبیه کی ، حقوق
ادبیه و صناعیه موجوددر . بونده احکام سائرده اولدینی کی
تبعه عثمانیه ایله تبعه اجنبیه بیننده فرق یوقدر . شو تفصیل
اولسان احکام نظامیه ممالک محروسه ده طبع اولنان مؤلفات
ادبیه ، علمیه و صناعیه یه متعلق و منحصردر . حالوکه ممالک
اجنبیه ده طبع اولنان آثارک ممالک شاهانه ده کرک عیناً کرک
ترجمه طبعنده اصحابنک حق امتیازی اصلاً نظر اعتباره النمز ،
ونظامات موجودده بوجهتدن بحث دخی اولنماشدر . بناءً
علیه ممالک شاهانه خارجنده طبع ونشر اولنان بالجمله مؤلفات
ایله هر نوع آثار ادبیه و صناعیه اصحابنک رضالرینی استحصاله
لزوم اولمقسزین داخل ممالک عثمانیه ده طبع ونشر اولنه بیلیر
وبونی یایانلر مقلد عد ایله مؤاخذه اولنزلر . اوروپاده ایسه
برمملکتده بر اثر ادبی و یا صناعی میدان کتیرن کیمسه نک او اثر
اوزرنده کی حق احداث و اختراعی ممالک سائرده دخی ، او
مملکتلر تبعه سنک بو خصوصده حائز اولدقلمری حق درجه سند
اولمق اوزره ، نظر اعتبارده طوتولور . حتی بوکی اصحاب
آثارک حقوقنک هر یرده محافظه سنی تمین ایچون ، مرکز اداره سی
اسویچرده برن شهرنده اوله رق ، (آثار ادبیه و صناعیه نک

حمایه سی مقصدیله متشکل بین الملل اتحاد - union inter nationale pour la protection des œuvres littéraires (et artistiques) نامیله بین الملل پوسته لرا اتحادینه مشابه بر هیئت اتحادیه تشکل ایتش و بوکا اکثر اوروپا و امریکا دولتری داخل اولمشلردر (۱) .

مقوقه صنایع و تجاریه droit commercial et industriel اختراع براتلر بله علامات فارقه یه و صنایع و تجارت رده مستعمل رسم و مودلاره و تجارت کاه اسملرینه متعلقدر . ملک شاهانه ده یکیدن برشی کشف و اختراع ایدن هر کس قانوناً بر مدت معینه ظرفنده اوشیدن یا لکز باشنه استفاده ایدر ؛ بو حق استفاده اختراع براتی brevet d'invention دینیلن بر سند رسمی ایله تأمین ایدیایر . بو وجهله برات ایله استحصال اولنان حق استفاده ممالک شاهانه داخلنه منحصردر ، بونی حائر اولانلر ممالک سائرده ده کندی اختراع کرده لرندن حاصل اوله جق منفعتی کندیلرینه حصر ایتمک استدکلی حالده اورا لرده ده آیرجه اختراع براتلری الملری لازم کلیر . بو اصول ممالک سائره نك همان جمله سندده بویولده جاریدر . آنجق براتلرک تأثیری هر یرده بر اولیوب ، اهالی به بدرجه ده تأییدات عرض ایتمز : بعض یرلرده حکومت اختراع اولنان شیئک صحت .

(۱) بو هیئت droit d'auteur نامیله بر رساله موقوته تأسیس ایله ۱۵ کانون ثانی سنه ۱۸۸۸ دن بری نشره باشلامشدر .

اهمیت وجدیتی اول امرده تدقیق و بناءً علیه بوندن دولایی هیچ بر مسئولیت در عهده اتمکسزین مراجعت ایدنلره برات ویرر ، حالبوکه بعض مملکتلرده برات اعطاسی ایچون بویولده تدقیقات اجرایی الزمدر . هر حالده قانونک حمایه ایتدیکی لاعلی التعمین اختراع اولنان شی دکل ، براته مظهر اولان شیدر . دولتلك بوباده کی احکام قانونیه سی ده متخالف اولدیغندن ، بر دولتلك ویردیکی اختراع براتلك حکمی داخل مالکانه منحصر اولوب حدود خارجه تجاوز ایدمه مامک ضروریدر . بوحق حقوق طبعیه دن اولدیغندن اجانب دخی مستفید اولمق اقتضا ایدر . بو خصوص ایچون موجود اولان قانون حکمنجه ، مالک محروسه ده تبعه اجنبیه دخی اختراع براتی استحصال ایتمک حقنه مالک اولدیغی کی [۱] مالک اجنبیه ده اختراع براتی آلنان برشی ایچون ده مالک عثمانیه ده تکرار اوهال براتی Brevet d'introduction آلمق جائزدر ، انجق بوصورتله ایکنجی درجه ده آلنان ادخال براتلرینک مالک شاهانه ده کی مدتی مالک اجنبیه ده اولان مدتلرینک انقضاسیله ختام بولمق شرطدر [۲] . مالک عثمانیه ده اختراع براتی آلان اجنبی موجدلر بو خصوصده تماماً تبعه عثمانیه کی معامله کوررلر . بوبخنده اجنبی موجدلرک تبعه عثمانیه دن فرقی یوقسه ده ، عثمانلی کاشف و

(۱) اختراع براتی قانونی ماده ۳۳

(۲) « ماده ۳۵ »

مختار علی ایچون بش ، اون ، اون بش ، یکر می و یکر می
بش سنه اوله رق حق استفاده تعیین اولندی حالد، اجنبی
موجودلرک ممالک اجنبیه ده حائر اولدقلری اختراع براتلری
ایچون ممالک شاهانده ده استیصال اید، جکری براتک مدتی
دیکرینک انقضایله برابر ختام بولور .

علامت فارقیه کلنجه ، بوباده موضوع اولان نظامنامه
حکمنجه، ممالک عثمانیه ده اجرای صنعتله مشغول اولان کیمسه لر،
فابریقه لرینک معمولاتی تقلیددن وقایه ، حکومت سنییه
مراجعتله اتخاذ ایتدکری علامتی ارائه و قید ایتدیرر و او
اشیاک اعمالنده انحصاری مشعر اولق اوزره برر سند آلیرلر.
ممالک شاهانده ده اجرای صنعت و تجارتله مشغول اولان تبعه

اجنبیه دخی اتخاذ ایتدکری علامات فارقیه *Marque de fabrique*
حکومت سنییه تصدیق ایتدیره رک حق انحصاره نائل
اوله بیلیرلر سده ، بوندن متولد دعوالرده حق لرنده تبعه عثمانیه
معامله سی اجرا اولمق و حتی طرفین تبعه اجنبیه دن بولندی
حالد بیلله ینه دعوانک رؤیتی محاکم عثمانیه عائد اولق
احکام نظامیه جمله سندندر (۱) .

معاهدات موجوده نک تفسیرنده تصادف اولنان مشکلات
ایله ممالک مختلفه قانونلرینک اختلافاندن تحدت ایدن صعوبات
تبعه لرینک حقوق صناعیه و تجاریه سنک محافظه و حمایه سی ایچون
دول مختلفه یی بیلرلرند بر صورت تسویه قرارلشدیرمغه سوق

ایتمشیدی . بونک ایچون ۱۸۸۰ سنه سنده پارسده انعقاد
 ایدن بر قونفرانسه دول مختلفه مرخصلرینک انضمام
 رأیی ایله بر (تصرفات صناعیه نک حمایه سی ایچون
 متشکل بین الملل اتحاد pour union internationale
 la protection de la propriété industrielle) لایحه سی قلمه آلتدی
 ۱۸۸۴ سنه سی حزیرانسه قدر دول متمدنه نک اکثری بواحداده داخل
 اولدی (۱) . لایحه ایله تنظیم اولنان بین الدول مقاوله نامه احکامنه
 نظراً ، دول عاقده دن برینک تبعه سی داخل اتحاد اولان دول
 سائر نک ممالک کنده بوخصوصده تماماً مساوات حقوقه مالک
 (ماده ۲) اولدینی کبی ، داخل اتحاد اولیان دولتلردن برینک
 اتحادده داخل اولان بر دولت ملک کنده قامتکاهی ویا خود تأسیسات
 صناعیه ویا تجاریه سی بولنان شعبه سی حقننده تبعه محلیه کبی
 معامله اولنور (ماده ۳) . کندی ممالک کنده اصولاً تصدیق
 ایتدیرلش اولان علامات فارقه اتحاد داخلنده بولنان سائر
 مملکتلرده ده مقبول اولوب مظهر حمایه اولور (ماده ۶) .
 داخل اتحاد اولان دولتلرک برنده حمایه قانونیه مظهر اولان
 برعلامت فارقه بی حقسز اوله رق حائز اولان هر نوع معمولات
 (۱) اتحادده داخل اولان دولتلر شونلردر : سلطنت سنیه ،
 اسپانیا ، اسوچ ، اسوچیره ، امریکا حکومتات متحده سی ،
 انکلتره ، ایتالیا ، بلجیقا ، برهزیلیا ، پورتوغال ، خط استوا ،
 ساوادر ، صربستان ، غواتمالا ، فرانسه ، فلنمک ، قولومبیا ،
 نوروج .

او دولت ملڪنه حين ادخالده ضبط اولنور (ماده ۹) .
 بوهيئت اتحاديه صناعيه ك مركز اداره سي برن شهري اولوب
 اوراده ، مصارفي داخل اتحاد اولان دولتله مشـترڪاً عائد
 اولق واسويچره حكومتى مأمورلرينك تحت نظارتنده بولنق
 اوزره ، هيئت اتحاديه ادبيه وصناعيه مشابه ، براداره مركزـ
 يه سي واردر ، و ، ديكرى كبي ، فرانسزجه برسالة موقوته
 نشر ايدر .

شويوقايدن برى ايضاح اولنان حقوق تصرفيه استخلاـ
 فيه نك اقسام ثلثه سندن ملك شاهانده متمكن تبعه اجنبيه ،
 بيان اولنان شروطه توفيقاً ، مستفيد اولدقلى كبي ، بونلك
 وفاتلى وقوعنده بوراده بولنان وارثلى ده حقوق مذكورهـ
 لرينه توارثاً نائل اولورلر . نظامات موجوده تبعه سلطنت
 سنيه ايله تبعه اجنبيه بيتنده بوبابده فرق بولنديغنه دائر هيچ
 برحكم يوقدر .



دردنجی فصل

ممالك شاهانده مظهر مساعدات اولانده امپير

بر مملکتده ساکن اولان تبعه اجنبیه ، حقوق دول نقطه نظرنده ، حقوق سیاسیه دن ماعدا حقوق طبیعیه ومدنیهدن مستفید وبوندن دولای قوانین محلیه نك حمایه سنه مظهر اولمق لازم کلیر. بوجه تله ممالك شاهانده ممتکن بولنان تبعه اجنبیه ده حمایه قانونیه مظهر درلر . آنجق بالاده کوسترلدیکی اوزره (۱) . ممالك عثمانیه ده بولنان تبعه اجنبیه نك بر قسمی طرف سلطنت سنیهدن دولت متبوعه لر بنه بر طاقم خطوط واوامر شریفه وعهود ومقاولات قدیمه ایله تأمین اولنان مساعدات ومعافیادن مستفیددر، که بواسطه لر ی حقوق عمومیه وحقوق خصوصیه جه حقلرنده تبعه شاهانیه نسله بر طاقم استثنال تشکیل ایلر . ممالك شاهانده امتیازات اجنبیه یاد اولنان ، بوا حکام عهدیه نك تفصیلاتی اشاعیده فصل مخصوصنده ذکر اولنه جفندن ، بوراده بونك ماعداسی اولان خصوصاتدن بحث اولنه جقدر .

حاکمیت دولتک وسائط رسمیه سی اولان ذوات اجنبی بر دولتک تحت تابعیتته کیره من و اشخاص و املاکلرندن دولای محاکم وقوانین اجنبیه تابع اوله من. « حقوق دول حکمدارلرک یکدیگرلری نزدینه سفرا اعزام ایتلرینه احتیاج کورمش و ماهیت اشیادن استنباط اولنان ، حکمت حقوق بوسفیرلرک نزدینه کوندردلرکری حکمدارلره و یاخود اولنرک محکمه لرینه تابع اولملرینی تجویز ایتما مشدر. سفیرلر کندیلرینی تعیین ایدن حکمدارک کلامی مثابه سنددر، او کلامده سربست اولق مقتضیدر . حر- کتترلنده هیچ بر مانعه بولنماق ایجاب ایدر . » (۱) بوکا مبنی حکمدارلر ایله تعیین ایتدکری سفیرلر کندی مملکتلری خارجنده ، کرک کندی تبعه لرینه کرک ملککنده بولندقلری و یا سیاحت ایتدکری دولت تبعه سنه نسبتله ، بر طاقم حقوق و امتیازاته ، ظهردرلر .

بو حقوق و امتیازات مزاج از مملکت امتیازی *Exterritorialité* نامیله معروفدر . بوکا نظراً حکمدارلر ، سفیرلر کندی مملکتلری اراضیسی ترک ایتما مش عد اولنورلر : بناءً علیه حققرنده یا لکیز اورانک قوانینی احکامی جاریدر (۲) . مع مافیسه بو امتیاز و معافیت بسبتون غیر محدود دکلدور ، بعض مرتبه تحدیداتی وار در . امتیازات مرقومه ، بالاده کورلدیکی اوزره ، علی العموم اجانبک استفاده ایده جکی بر طاقم حقوقدن ماعدا ، حکمدار و سفیرلر ایله معتبلرنده بولنان کمسه لرک مصونیت شخصیه لری ،

(۱) باب ۲۶ ، فصل ۲۱ Montesquieu Esprit des lois

Grotius, De Jure Belliac (۲)

Pacis lib , II , cap 18 , 4 .

اقامتگاهلرینک مصونیتی ، بمض تکالیفدن مفاہیت ، محاکمہ
عدم تابعیت کبی خصوصلردن عبارتدر .

مصونیت شخصیہ سیاحتده بولنان حکمداران اجنبیہ ایله
اصولا اعزام ایتدکلری سفیرلردن ماعدا ، بولنرک زوجهلرینه ،
چو جقلرینه ومعتلرنده بولنان مأمورین رسمیہ شاملدر (۱) .
مع مفاہیہ بردولت اجنبیہ سفیری محل مأموریتنه عزیمت ویا اورادن
عودت اثناسنده دیگر بر مملکتدن حین مرورنده او مملکتده
بوامتیازدن استفادہ ایدہ من (۲) . بونک کبی متکرراً سیاحت
ایدن اجنبی حکمدارلرینه بوامتیازک شمولی اوله مزسده ، هو-
یتلری اکلا شلمسیله برابر مصونیت شخصیہ دن مستفید اولورلر .
مصونیت شخصیہ یه نائل اولان ذوات ایقاع ایدہ بیله جکلری
جنایت و جنحه دن دولایی توقیف ویا بمملکتلرینه
اعادہ اولنه منلر . حدوده سوق ایله مملکتلرینه اعادہ
ایچون ، دولتک امنیت عمومیہ سنی تهدید ایدن خصوصانده
اشتراکلری بولنق کبی ، احوال استثنائیہ لازمدر . حقارنده
مطبوعات واسطه سیله تعرض وقوعی حالنده مجرملر حقنده
ترتیب اولنان جزا دها اغیر اولور . ممالک شاهانده مطبوعات
واسطه سیله بر کیسه طرفدن « دولت علیہ نک دوست
ومتفق بولنان حکمداران طوقور الفاظ وتعبیرات استعمال

(۱) 4 , 23 de Martene , Précis de droit des gens

(۲) جلد ۱ صحیفه ۵۵۴ Calvo droit international

اولنور ایسه اوچ ماهدن اوچ سنهیه قدر حبس ویا اون بش آلتوندن یوز التونه قدر جزای نقدی اخذ اولنور (۱) .

« دول اجنبیه نك نزد سلطنت سفیده مقیم بیوك ایاجی و مرخص واورته ایلچیلری و مصلحت کذارلری و سائر مأمورلری عاھنده غزته لر واسطه سیله ذم و قوعبولدینی تقدیرده متجاسری سکیز کوندن سکیز ماهه قدر حبس ویا خود بر آلتوندن اوتوز التونه قدر جزای نقدی اخذ اولنور (۲) .»

ممالك شاهانده اجنبی حکمدار و سفیرلرینك اقامتگاهي تعرضدن مصوندر ، کندی موافقتلری اولمقدجه مأمورین محلیه اورایه کیره مز . مع مافیه بومصونیتدن استفاده و بونی سوء استعمال ایله ضابطه عدلیه نك آرا مقده بولندیغی اشخاصك اورالرہ النجاسنه قطعياً مساعده اولنماق لازم کلیر . خارج از ممالک امتیازینه نائل اولان ذات « اقامتگاهنه هر نوع فراریلرک دخولنی منع ایتمکه و کیردکلری حالده ، مأمورین عانده سنه تسایم ایلمکه مجبوردر . (۳) » اقامتگاهك بالجمله اشیاسی و مظهر امتیاز اولان ذواتك رسماً استعماللرینه مخصوص شیلرو ، علی الخصوص ، ارايه و حیوانلر مصونیت قاعده سنه تابعدر ، ضبط اولنه مز . اجنبی حکمدار و سفیرلری هر نوع تکالیف شخیصیه دن

(۱) مطبوعات نظامنامه سی ماده ۱۷ و ۲۱

(۲) مطبوعات نظامنامه سی ماده ۱۷ و ۲۱ .

(۳) صحیفه ۱۵۱ Bluntschli , Droit international codifié

و كرك كندیلرینك كرك معیتلرینك اقامتیه مخصوص اولان
محللردن دولای ، املاك ویركوسندن معافدرلر . بالواسطه
تكالیفدن داخل مملكتده صاتون الدقلری اشیانك رسمنی او
اشیانك بدن اشتراسیله برابر بالطبع تأدیه ایدرلر سده ، خارجدن
كندی ناملرینه جلب ایتدكاری اشیا ایچون كرك رسمی ویرمنلر .
۱۰۸۴ عهد نامه سنده مصرح اولدینی اوزره « هدایا و لباسلری
وما كولات و مشروباتلری مهمی ایچون اقچه لر یله كتوردكاری
نسینه لردن كرك و باج طلب اولنمیه . » برده خارج از مملكت
امتیازینه نائل اولان ذوات بولندقلری مملكت محاكمه تابع
اولیوب ، حتی حقوق دعوالرنده بیله ، حق لرنده محاكمه محلیه ده
اقامه دعوی اولنه من .



بشنجی فصل

ممالك شاهارده اشخاص معنویه اجنبیه

— ۱ —

موجودیت مادیه دن محروم اولقله برابر ، نظر قانونده
برشخصیتی بولوب ، برطاقم منافع وحقه وق ووظائفی حائز
هیئتار واردر . که بونلره شخص معنوی *Personne morale*
اطلاق اولنور . اشبو اشخاص معنویه نك کیفیت تشکیل و
احداثی منافع عامه اساسنه مستنددر . بو اشخاص معنویه یا ،
دولت کبی ، برمنفعت ملیه نك رکن و اساسی اولور ؛ یا جمعیات
خیریه کبی ، اجراآت حسنه یه واسطه اولور ؛ یا خود ، تجارت
شرکتلری کبی ، منافع شخصییه یی برمرکزه جمع ایلر و ،
اهمیتلری وزراعت و ثروت عمومیه نك تعالی و ترقیسنه خدمتلری
حسیبله ، حمایه مخصوصه یه شایان بولنورلر . بناءً علیه هر بر
شخص معنوی برمنفعت عمومیه ایچون وجوده کلیر .

دولت شخصیتی حائزدر . مملکتک بالمله منافی وجوددو-
لته مجتمع اولدیغندن ، ملکنده ساکن اولانلرک حقوق و
وظائفی تأمین و تعین ایدر . بووظیفه یی حسن ایفا ایچون

کنندینک ده حائر حقوق اولسی مقتضیدر ، که بو کیفیت شخصیتنه دالر .

بتون اشخاص مغویه نك مهد وجودی دولت اولوب ، بونلر قوانین دولتك تصدیقنه مقارن اولمقدجه وجود بوله - مزلر . اشته بولزوم بونلر ایله اشخاص عادیه بیزی تفریق ایدر و اشخاص عادیه نك موجود یعنی بر حیات بولنسی قانونك تصدیقنه متوقف دکلدر .

اشخاص مغویه وجودلرینی تصدیق ایدن دولتك تابعیتی احراز ایدرلر . بناءً علیه قوانین سلطنت سنییه توفیقاً وجود بولان اشخاص مغویه عثمانی ، قوانین اجنبیهیه توفیقاً تشکل ایدنلر اجنبی در .

اشخاص مغویه بذاتها قائم اولیوب قانوناً احداث اولندقلرندن ، اشخاص عادیه کی حقوق طبعیه دن مستفید اولزلر و حائر اوله جقلری حقوق و صلاحیت مقدارینی قانون تعیین ایدر . اشخاص مغویهیه بخش اولنان حقوق علی الاکثر حقوق تصرفیه استخلافیه دن عبارتدر ؛ بوجهتله حق تصرفه مالک و دائن و مدیون اولورلر و بوندن دولایی محاکم حضورنده مدعی و مدعی علیه صفتی احراز ایدرلر .

بر مملتکده احکام قانونیهیه توفیقاً وجود بولان بر شخص مغوینک کندینسه وجود ویرن قانون نظرنده حائر اولدینی

حقوقدن مالک سائردهده مستفید اولوب اولماسی مسئلهسندده ارباب تألیف مختلف رأیلره تابع اولمشلر و بونلرک بهضلری بر مملکتده وتشکل بر شخص معنوینک مالک سائردهده حائر حقوق اولسی لازم کلدیکی مطاعهسندده بولنمشلردر . بونلرک قولنجده ، اشخاص معنویه منافع عامه ایچون تشکل ایتدکلرندن وغایه مقصود عد ایتدکلری بر منفعتی تشکل ایتدکلری مملکت خارجندهده تعقیب ایتکه بعضاً مجبور اولدکلرندن ، مالک سائردهده ، اورالرک قانونی طرفندن وجودلری تصدیقه محتاج اولقسزین ، حین تشکلرنده احراز ایتدکلری حقوقدن مستفید اولملری ایجاب ایدر .

بعض مؤلفلرده اشخاص معنوینک وجود بولدکلری مملکت خارجنده مظهر حقوق اوله بیلملری مطلقاً سائر مملکتلرک قانونی جانبندنده تصدیق اولملرینه متوقف بولندیغنی درمیان ایتمشلردر . بونلرک رأینجه ، بر شخص معنوییه وجود ویرن قانئون جاری اولدیغنی مملکتک منافعنی نظر اعتبارده طوتوب ، جهانک منافع عمومیه سی ایچون بر شخص معنوی احداث ایدمهز .

شو افاداندن اکلایشاییرکه اشخاص عادیه ایله اشخاص معنویه بیننده فرق واردر . اشخاص عادیه هر زرده بولنسلر حقیقتاً موجود اولدکلرندن فطرت انسانیه لرینک لزوم کوستر . دیکی بر طاقم حقوقی حائردرلر ؛ اشخاص معنوینک وجودلری ایسه خیالی محلی اولدیغندن یا لکن تصدیق قانونی ایله تعین ایدر بعض حقوقدن استفاده ایدرلر .

اشخاص معنویه، یوقاریده ذکر اولندینی اوزره، استحصا-
 لنه چالشدقلى منافعك ماهيته كوره، سياسى، اجتماعى، علمى،
 تجارى اولق اوزره، انواع عديديه تقسيم اولنور. اشخاص
 معنويه سياسيات ياننده اك اول نظره چارپانلر دولتلردر. نظا-
 منامه داخليلرى تشكىل ايتدكلرى مملكهت حكومتجه تصديق
 اولنان و سياسيات ايله مشغول اولان، قلوبلركي، جمعيات
 سياسيه ده برر شخص معنويدر. قانون اساسيده، سربستى
 اجتماع حقندن بحث بيله اولنماش اولدینی ایچون، سياسى
 اشخاص معنويه حقنده برحکم یوقدر. قانون اساسی احکامك
 معطل قالدینی زمانده ایسه حكومت اساساً هر نوع اجتماعاتك
 منعنى مملك اتخاذا ايتمش اولديغندن، سائر قوانین و نظاماتمزده
 جمعيات سياسيه دن قطعياً موضوع بحث اولماشدر. آنجىق
 مادامكه سربستى اجتماع حقوق عموميه دندر و مادامكه ملت
 حائز حق حاكميتدر، امور سياسيه ايله ده توغل ايتك و بونك
 ایچون جمعيتلر تشكىل ايتك افراد ماتك جمله حقونقدر .
 ياكز، بر مملكتك سياست داخيه و خارجيه سنه متعلق مباحثه
 اشتراك ايتك حقوق سياسيه دن مستفيد اولمغه منوط بولنديغندن،
 صرف تشكىل ايتديكي مملكتك احوال سياسيه سی ايله توغلى مابه
 الاشتغال عد ايدجك اولان بوكي جمعيتلره بولندقلى مملكتده
 حقوق سياسيه یی حائز اوليان اجنيلرك داخيل اوله مامسى
 طبيعيدر .

على الاكثر امور خيريه ايله اشتغال ايدن جمعيتلر بر مقصد

اجتماعی تعقیبی ایچون تشکل ایدن اشخاص معنویه دندر .
بولره برمالکته بولسان تبعه اجنیه نك اشتراکی
جائردر .

جمعیات علمیه ده ، اشخاص معنویه جمله سندندر . بولر
ترقی معارفك محتاج اولدینی تدابیر و وسائطه مراجعتله تعمیم
علوم وفنونه خدمت ایدرلر . علمی جمعیتلرک خدماتی هر وقت
یالکیز وجود بولدقلری مملکتک ترقیانه معطوف اولمز ؛
بالعکس علوم وفنون بتون بشریتک مالی اولدیغندن بوکا خدمت
ایتمک مقصدیله تشکیل اولنان جمعیتلرک همماتی علی الاکثر بتون
عالم مدنیته شامل اولور . اکثریتله بوکی جمعیتلره داخل اولان
اعضایانک تابعیتی نظره آلمز ؛ بواعضا مختلف تابعیتده
بولنه بیلیر .

مقاصد مالیه و تجاریه ایچون تشکیل اولنان جمعیتلر ،
باققلر ، تجارت شرکتلری کی مؤسسات اقتصادی در .
نجات شرکتلری اشخاص معنویه دن اولوب ، معاملات
تجاریه اجراسی مقصدیله بر طاقم کیمسلر بیننده عقد اولنور .
تجارت بریه قانوننامه سی حکمنجه ممالک شاهانده تجارت شر-
کتلری اوچ نوع اولوب . برنجیسی قولفقیف شرکتلردر ، که
« ایکی ویا زیاده کیمسلر بیننده عقد اولنوب اول شرکتیه بر
اسم مخصوص وضع » (۱) اولنور و شرکت مرقومه ده امضا-
یه مازون اولان شریککلرک امضا ایلدیکی سندانک متضمن اولد-

یعنی جمیع تعهدات و مقاولات ایچون شرکته داخل بولنان بالجمله شرکا کفیل و ضامندرلر . « (۱) ایکنجیسی قومانیت تعبیر اولنان سپارش طریقله شرکترلدر، که « بر طرفدن بر برینه متکفل و مسئول اولان برو متعدد شریکلو دیگر طرفدن یا لکنز سرمایه لری قویوب قوماندیتر یعنی سرمایه صاحبی ... برو متعدد شریکلردن عبارتدر . « (۲) و « قوماندیتر اولان شریک یا لکنزجه شرکت سرمایه سنه وضع ایلدیکی و یا خود وضع ایلک اوزره متعهد اولدینی مبالغدن زیاده ضرر و زیانی متحمل دکلدرد . « (۳) اوچنجیسی آنونیم تعبیر اولنان شرکترلدر که بونده « حصه دارلر شرکت سرمایه سنه قویدقلری حصه لردن زیاده ضرر و زیانی ضامن دکلدرد . « (۴) بونلردن بشقه ینه معاملات تجاریه اجرایی مقصدیله تشکیل اولنان خصوصی شرکترلرده « حسب القانون معتبر و مقبولدر » و بونلر « بر و یا خود متعدد و متنوع افعال تجارتیه دائر اولوب مبنی علیها اولان اشیا و اموال و کرک صورت ترکیملری و بهر شریکک حصه دارلر بیننده منعقد شروط و مقاولات مخصوصه لرینه موقوفدر . « (۵) ایسته بو قواعد توفیقاً تشکیل ایدن تجارت شرکتلری مالک شاهانه ده

[۱] ۱۳ نجی ماده

[۲] ۱۴ نجی ماده [۵] ۳۶ و ۳۷ نجی ماده لر

[۳] ۱۷ نجی ماده

[۴] ۲۴ نجی ماده

اجرای معاملات حقنی حائز اولور. انجق امر تجارت حد ذاتنده عمومی اولوب یالکز بر ملک داخل منحصر اوله مدیغندن ، ممالک اجنیه ده متشکل بوکی شرکتملرک ده ممالک محروسه داخلنده اجرای معامله ایتملرینه احتیاج حاصل اوله بیلیر . شو حالده بونلرک داخل ممالک محروسه ده معاملات تجاریه ده بولنه بیلملری ایچون نه کی شرائطه اتباع اولنق لازم کلدیکنی بیلیمک اقتضا ایدر .

بردولت اجنیه نك موافقت علنیه ویا ضمنیه - یله تشکل ایدن هر شرکت تجاریه اودولتک تابعیتی احرار ایده رک امینبی اولور . بناءً علیه بردولت اجنیه نك مساعده مخصوصه - یله میدانه کلن بر شرکتمک صفت تابعیتی تعیین غایتله قولایدر . فقط زمانم زده تجارت شرکتملری پک زیاده تکثر ایتدیکی کی ، هر یرده ده بونلرک تشکله سهولتله مساعده اولندیغندن هر شرکتمک شخصیت مدنییه سی هانکی قانونه نظر آ تحصیل ایتدیکنی تعیین ایلک مشکله در . شرکتمک یالکز محل تشکلی نظره آنسه ، قوانین محلیه احکامندن قورتلق ایچون شرکانک شرکتمی میدانه کتیره جک اولان وثیقہ یی ممالک اجنیه ده تنظیم ایتملری احتمالندن قورقولور . حصه دارلردن اکثرینک تابعیتی ویا خود تبعه محایه ایله اجنیلرک وضع ایتدکلی سرمایه نك مقداری نظر اعتباره آنسه ، آنونیم شرکتملرده بومکن اوله منز . چونکه بونوع شرکتملرده حصه دارلرک امور شرکتمجه اوقدر اهمیتلری اولیوب اصل مهم اولان سرمایه در ؛ سرمایه ایه

ثابت بر حالده قاله میوب الدن اله کچر وبوكون تبعه محلیه النده
بولننان اکثریت سرمایہ یازین اجانبه انتقال ایتش اولور ؛
حالبوکه شرکته صفت تابعیتک بوکا توفیقاً تعیین وتحویلی
جائز اولمز . قوللقیتف وقوماندیت صورتنده . متشکل شرکتلرده
حصه داران مسئولون وبربرلری حقننده متکفل وضامن اولدقلرندن
اکثریت شرکاک صفت تابعیتی شرکته صفتی عد اولنسی
اقتضا ایده جکفی ادعا ایدنلر وارسهده ، شرکت شیخص معنوی
اولوب ، بوجهتله کندینک بر شخصیت مخصوصه سی واقامتگاهی
اولدینی کی ، آریجه برده تابعیتی اولمق لازم کلیر ؛ بوندن
یشقه شرکاک تابعیتلری مختلف اوله بیله جکندن بونلردن
اکثریتک می ، مدیرلرکی تابعیتی بالتزجیح شرکته اسناد
ایلمک یوقسه وضع ایتدکلری سرمایہ نک مقداریمی نظر
اعتبارده طومتق لازم کله جکفی تعیین ایتک پک مشکلدز .
بوخصوصده اسلم طریق شرکته باشلیجه معاملاتنه مرکز
اتخاذ ایتدیکی وحیات تجاریه وصناعیه سندن استفاده ایلدیکی
محلی نظرده طوتهرق اورانک تابعیتی شرکته اسناد ایتدکلر .
برشرکت ، مثلاً روسیهده شمندوفر انشاسی مقصدیله تشکل
ایدرسه ، محل تشکلی فرضا فرانسه وشرکا هان کافه فرانسر
اولسهلر ومركز اداره سی پارسده بولنسه بیله ، اوشرکته
تابعیتی روسیهلی اولمق اقتضا ایدر . پارس وروما محکمه تمیزلری
بومرکزده اعطای حکم ایتشلردر .
ممالک اجنبیهده تشکل ایدن آنونیم شرکتلری ممالک

شاهانه ده شعبه تأسیس ویا اجنته تعیین ایتمک ایچون حکومت سینه دن مساعده استحصال لازمدر؛ « رخصت لازمه استحصال ایتمکسزین ممالک عثمانیه ده هیچ بر اجنبی آنونیم شرکتی شعبه ویا اجنته سی اجرای معامله ایده مزه. » (۱) حکومت سینه دن رخصت رسمیه استحصال یله داخل ممالک شاهانه ده اجرای معامله یه مآذون اولمش اولان اجنبی آنونیم شرکتلری « معاملات عدلیه وسائره ایچون ممالک عثمانیه ده مخصوصاً اقامتگاه نظامی اراٹه سنه مجبوردرلر . (۲) بو شرکتلر طرفندن ممالک شاهانه ده بالارخصت « شعبه لر تأیس ویاخود اجنته لر تعیین اولنور ایسه بونلر درحال اجرای معامله دن منع اولنور . » (۳) آنجق « اوتهدن برو حکومتجه طانمش اولان آنونیم شرکتلری رخصت رسمیه استحصالدن معفو « ایسه لرده « تجارت نظارتنده طوتیله حق دفتره بونلرک وتعیین ایده جککری وکیللرک اوصاف و اسامیسی ایله اقامتگاه نظامی لری قید « (۴) اولمق مقتضیدر. شرکت هر نرهدر تشکیل ایتمش وهانکی قانونه متابعت ایلش اولورسه اولسون ، اساس و مقصد تشکی « قوانین دواته ومنافع واداب عمومیه یه مخالف اولورسه رخصت مطلوب « اعطا اولنمز. (۵) شرکتک شعبه ویا اجنته سی و شرکتک نظامات

[۱] اجنبی آنونیم شرکتلری حقه ده کی نظامنامه ، ۵ . نجی ماده .

[۵] ۸ نجی ماده

[۲] ۶ نجی ماده

[۳] ۱۰ نجی ماده

[۴] ۷ نجی ماده

اساسیه سنده محرر معاملاتندن بشقه معاملات اجرا ایدہ جک
اولدینی ویاخود نظامات اساسیه سنجہ تعدیلات اجرا ایدہ جک
بولدینی صورتده تجارت نظارتہ تبلیغ اتمکہ مجبوردرہ
اشبو تعدیلاتده قوانین دولته و منافع و اداب عمومیه مخلف
احکام وار ایسہ نظارت مشارالہا رخصت اعطاسنی
دریغ ایدہ بیلور . (۱)

[۱] ۹ نجی ماده



آلتنجی فصل

بعضی ممالک اچنبیره جاری اصول

— ۱ —

انگلتره و شمالی آمریکا اصولی . — یقین وقتلرده انگلتره و شمالی آمریکا حکومتات متحده سی قانونلری اجانب حقننده یك شدتلی احکامی جامع ایدی . بوده دره بکک زماندن قالمه بر طاقم فکرلرک تأثیراتی هنوز کایاً زائل اولمامسندن نشأت ایدردی . عرف وعادته مستند بولندان مقور و مرمیه Common law نظراً ، اراضی بی حکمداردن آلمق لازم کلوب اجنبی ایسه ، تابع اولمدیغی ایچون حکمداره دره بکک روابطک هیچ بریله مربوط اولمدیغندن ، اراضی صاحبی اوله مز و حتی خانه استیجار ایده مزدی ؛ و کندیسنده انگلیز قالدون شناسلرینک inheritable blood یاد ایتدکلری حق توارث اولمدیغندن ، توارث ایتک و متروکاتی ارناً ترک ایلک حقنه مالک دکلدی . فقط مناسبات تجاریه نك توسعيله بین الملل زیاده اختلاط حصولی اوزرینه ، یکیدن بر طاقم قانونلر وضع اولنهرق ، قوانین عتیقه نك تأثیراتی قسماً ویا بسبتون حکمسز قالمشدر .

بو کون انکلتزده جاری اصول موجبجه . هیچ بر
 اجنبی حقوق سیاسیه مالک دکلدر ، بناءً علیه پارلمنتویه اعضا
 ویا منتخب ، مجلس خصوصیه اعضا و حکومت مأموری ویا
 مأمورین روحانیه دن اوله مز ؛ فقط اون سنه انکلتزده اقامت
 ایتش اولان اجنبیلر ژوری هیئته داخل اولورلر . اطباء
 اجنبیه ، اسمیرینی دفتر مخصوصنه قید ایتدیردکاری حالده ،
 انکلتزده اجرای طبابت ایده بیایر ؛ آنجق منسوب اولدقلری
 مملکتزده انکلتزلی اطبانک بوکا مشابیه مساعدیه مظهرتی
 شرطدر . اجنبیلر هر حالده قوانین عمومیه نك حمایه سنه مظهر
 واکا اطاعتله مکلفدرلر ؛ بو وجهله تأدیة تکالیفه مجبوردرلر ؛
 دیگر طرفدن هیچ بر اجنبی ، پارلمنتو قرار یله Habeas corpus
 قانوننك موقتاً تعطیلی ایچون حکومت صلاحیت و برلمدکجه ،
 طرد و تبعید اولنه مز . اجنبیلر حقوق عائله ایله حقوق تصرفیه
 استخلافیه نك قسم اعظمندن استفاده ایدرلر . فقط وصی او-
 له مزلر ، مکرکه کندی چو جقلری حقنده اوله ؛ او حالده ده
 چو جقلر انکلتزده تبعه سندن بر قادین ایله ازدواجلرندن حاصل
 اولمق و وصینك بونلر حقنده ، ماللرینی تخریب ، صحتلرینی
 اخلال ، کندیلرینی انکلتزده خارجنه اعزام کبی ، سوء نیتی
 بولنماق شرطدر . هر حالده تابعیتی نه اولورسه اولسون ،
 انکلتزده سن رشنه واصل اولمیان چو جقلرک شخص و ماللرینك
 محافظه سی خصوصنه محکمه عالییه طرفندن نظارت اولور .
 حقوق عینیه جه انکلیز تبعه دن فرقلی اولوب ، اموال منقوله

وغیر منقولہ فی تصرف ، تفرغ ، توارث ، وصیت ، استیجاز
ایده بیلیرلر ، یالکیز تابعی انکلیز اولمق اوزره مقید بولن-ان
سفائنک صاحب اوله مزلر . حقوق شخصییه ده انکلیزلردن
فرقلری اولیوب ، دائن و مدیون اولور و مقاوله عقد
ایلیه بیلیرلر . واقعا قوانین جدیده اجانب ایچون
نظامات عتیقہنک شدائدینی همان محو درجه سنده تخفیف
ایتمش ایسه ده ، بومساعده دولت امة بنی لره مخصوصدر . انکلتره
دولتک محرب بولاندی بردوات تبعه سی حمایه توانیدن محروم
اولوب ، املاک و اموالی قانوناً صادره اولنه بیلیر . بوصلاحیت
قانونیه تطبیق قانده یالکیز اعلان حربدن صکره و انکلتره حکومتک
مساعده سی اولقمسزین خارجدن ادخال اولنان اموال حقنده
اجرا اولنمقده ایسه ده ، محاربه نک دوامی مدتجه دولت محاربه
تبعه سندن اولان اجنبی انکلتره ده عقد مقاوله ایده مز واسکیدن
عقد ایتمدیکی مقاولات احکامی محاربه نک ختامنه قدر حکمدن
ساقط اولور . حق تألیف Copyright اجنبی به تأمین اولنه
بیلمک ایچون اثرک ، اسکی قانون حکمنجه ، اولان انکلتره ده نشر
اولمنسی وصاحبنک اوراده مقیم بولمنسی لازمه دن ایسه ده ،
دیگریکی برقانونه نظراً ، حکمدار ممالک اجنیه ده نشر اولنان
آثار ادیه ایچون ده اصحابنه امتیاز ویره بیلیر . مع مافیه انکلتره
حکومتی برن مقاوله سنه اشتراک ایتمدیکندن ، اتحاده داخل اولان
دولتلر تبعه سی حقنده قوانینک بوبابده کی تطبیقاتی معطلدر .
حقوق صناعیه و تجاریه خصوصنده ، انکلتره دولتی بونک ایچون

متشکل اتحاد دولی به داخل اولدیغندن ، اجنیلر ایللر لرلیر
 بیتنده فرق یوقدر . ممالک اجنیه ده اصولنه توفیقاً تشکل ایدن
 اشخاص معنویه انکلترده موجود عد اولنه رق کنیدیارینه وجود
 ویرن قانونک بخش ایتدیکی حقوقدن استفاده ایدرلر . یا لکنز
 انکلتزه قانونلرینک مساعده ایتدیکی شیلره بالطبع نائل اوله مز لر .
 آمریقایه کانهجه ، حکومتات متحده وقتیلله انکلتزه مستعمره سی
 اولدیغندن ، اوراده common - law تأسس ایتشد . مؤخرآ ،
 مملکت مذکورده نك خارجدن مهاجرلر کله رك ملکي اعمار ایللرینه
 احتیاجی اولمسندن دولای ، اجانب حقنده کی شدائدک تخفیفه
 مجبوریت حاصل اولدی . انجق اداره داخلیه لرنده مستقل بر
 چوق حکومتان متشکل اولدیغندن ، حکومتات متحده
 اراضیسنک هر طرفده تبعه اجنیه به عائد احکام قوانینجه اجرا
 اولنان تعدیلات بالطبع بر اولدی . بوکون اجانبک حق تصرفجه
 جاری اولان اصول درتدر : برنجی قسمه داخل اولان
 حکومتلرده اجنبی املاک صاحبی اوله مز . ایکنجی قسمده بولنان
 حکومتلرده اجنبی بلا شرط و قید تصرف املاک ایلله بیلیر .
 اوچنجی قسمده اولان حکومتلر اجانبک استملاک ایده بیلملرینی
 او حکومت و یا حکومتات متحده اراضیسی داخلنده مقیم اولمغه تعلیق
 ایدرلر . دردنجی قسمه داخل بولنان حکومتلرده املاک صاحبی
 اولمق ، قانوناً معین شرائط داخلنده ، آمریقا تابعیتنه کیرمک
 نیتنک اظهار اولمسنه متوقفدر . آثار ادبیه وصناعیه مؤلفلری
 آمریقا تبعه سندن و یا متمکنلرندن اولمدقجه اثرلری اوزرنده کی

حقلربنی محافظه خصوصنده قانونك حمایه سندن محرومدرلر .
ایجادات و اختراعات صناعیه یه کلهجه، بونلرك موجدلری اجنبی
دخی اولسه، آمریکا تبعه سی کی، اختراع براتی استحصال
ایده بیلیرلر. آنجق برایدن اولان موجدلر ایجادایتدکلی شی ایچون،
بونى دها اعلان ایتك ایستمدکلی حالد، حکومته مراجعتله،
برسنه صکره اختراع براتی آلمق شرطیله، اوزمانه قدر ایجادکرده لری
حکومتك ضمان و کفالتی آلتنه وضع ایده بیلیرلر؛ اجنبیلر ایسه
لااقل برسنه آمریقاده اقامت ایتدکجه و آمریقا تابعیتی قبول ایده جکلر-
ینه یمین ایلمدکجه بوصلاحتیدن محرومدرلر. علامت فارقلرك
آمریقاده حمایه سی ایچون اوراده اقامت ایتك ویا اجنبینك
منسوب اولدیغی دولت ایله معااهده بولمق لازم دکلر؛
علامتی تقلید اولنان اجنبیلر کوردکلی ضرر نسبتنده تضمینات
استحصال ایده بیلیرلر. بوندن بشقه آمریقا حکومتات متحده-
سی برنده منعقد آثار صناعیه و تجاریه اتحاد دولیسنه داخل
اولمشدر. مالک سائرده متشکل اشخاص مغویه هر نه قدر
شمدی یه قدر آمریقا حکومتدن استحصال مساعده ایتدکجه
معاملات تجاریه اجرا ایده من ایدیلر سده، بوکون هر نوع
موانع رفع اولندیغندن، سربستانه اجرای معامله
ایدرلر .

— ۲ —

اوروپا دولتلری اصولی . — اوروپا دولتلری قوانینی
تبعه اجنبیه به حقوق سیاسیه ویرمامکده متفق ایسه ده . بونرک
حقوق مدنی دن استفاده لرنبجه هر ممالکته جاری اصول بر
دکدر

بعض ممالکده اجانبک حقوق مدنی دن استفاده سی
سیاسی معامله متقابله منوطدر ؛ بعض یرلرده بونک ایچون
قانونی معامله متقابله لازمدر ؛ بعض حکومتلرده ، حقوق مد-
نیه بحثنده ، یرلی ایله اجنبی بیننی تفریق ایتزو ، بعض
مستثیاندن ماعدا ، اجنبی بی حقوق عائله ایله حقوق تصرفیه
استخلافیه نک جمله سندن مستفید ایلرلر .

برنجی قسمده بلچیکا ، فرانسه ، لوکسنبورغ و یونانستان
وارددر . بلچیقاده املاکک تصرفنده وهبه و یانوارث طریقیله
انتقالنده یرلی ایله اجنبی اره سنده فرق یوقدر . تألیف و
ایجاد و اختراع خصوصیاتنده ده ، خصوصیه بلچیکا برنده
منعقد تصرفات ادبیه و صناعیه و تصرفات تجاریه بی حمایه
اتحاد دولیرینه داخل اولدیغندن ، اجانب حقمنده اولنان معا-
مله تبعه حقمنده کی معامله به مشاهددر . علامات فارقه خصوص-
صنده بلچیقاده کی مؤسسات اجنبیه معمولانته عائد اولانلری
اصحابنک اجنبی کی نظره آلتقسمنن قانونک تحت حمایه سنده در ؛

ممالك اجنبیه ده بولنان بو کبی مؤسسات معمولانسه عائد اولار.
فلرک بلجبقاده حمایه قانونیه دن مستفید اولسی بلجبقاده اتخاذا
اولنمش اولان علامات فارقه نك اورالرده حمایه اولنه جغه داتر
میاسی مقارله موجود اولسنه متوققدر. ممالك اجنبیه ده وجود
بولمش اولان اشخاص معنویه نك بلجبقاده حائز حقوق اولسی
ایچون معامله متقابله ره رعایت اولنور.

فرانسه ده اجنبی املاک صاحبی اولوب حقنده بو خصوصده
تماماً یرلی معامله سی اجرا اولنور، املاک فراغ وانتقالی
معاملاتنده یرلی ایله اجنبی بیننده فرق اولدیغی کبی، اجنبینک
حقوق شخصیه سی ده قانوناً محفوظدر، وبو خصوصانده معا-
مله متقابله ره احتیاج یوقدر. فرانسه تصرفات ادبیه و صناعیه
ایله تصرفات تجاریه نك حمایه سی ایچون برنده منعقد اتحاد
دولیلر ده داخل اولدیغندن، تألیفات ایله ایجاد واختراع اصحاب-
بنک محافظه حقوقی امرنده فرانسزلر ایله اجنبیلر بیننده فرق
یوقدر. یالکیز ممالك اجنبیه ده متخذ علامات فارقه نك فرانسه ده
تأمین محفوظیتی ایچون او مللکیتلر ایله فرانسه آره سنده معامله
متقابله ره متعلق مقاولات سیاسیه بولمق لازمدر. ممالك اجنبیه-
ده تشکل ایدن اشخاص معنویه فرانسه ده اجرای معامله ایده.
بیلمک ایچون فرانسه حکومتیجه رسماً طانتمش اولمق مقتضیدر.
لوکسنبورغده اجنبیلرک حقوق طبییه دن نشئت ایدن حقوق
شخصیه نك غیری حقوقدن استفاده ایده بیلملری معامله متقابله
ایله ممکن اولور. لوکسنبورغ غراندوقه لنی تصرفات ادبیه اتحاد

دولتینه داخل اولدیغندن اجنیلرک حق تأینی محفوظدر .
اشخاص مغویه اجنیه حکومتجه رسماً طائمدجه اجرای
معامله ایدمز .

یونانستانده حق استفاده سی تبعه محلیه حصر اولناندن
ماعد اولان حقوق مدنیهدن اجانب حصه دار اولدینی کی ،
اجنیلرک منسوب اولدینی دولت ایله منعقد بر مقاوله ایله کندیسنه
بو حقوق ده تأمین اولنه بیلیر . حق تألیف معامله متقابله شرطیله
اجنیلر ده شامل اولوب ، مقاوله مخصوصیه احتیج یوقدر .
ممالک اجنیه ده اتخاذ اولسان علامات فارقه ، مقابله یی تأمین
ایده جک بر مقاوله اولق شرطیله ، اتخاذ اولدق لری محللر ده
حائز اولدق لری درجه ده حق حمایه یی حائز درلر . اجنیه قو-
ماندیت وتوللقتیف شرکت لری ایچون رسماً طائمدجه احتیاج
یوق ایسه ده ، آنونیم شرکت لری طائمدجه یونانستانده اجرای
معامله ایدمز .

آلمانیا ، اسوچ ، اسویچره ، اوستریه ، صربستان ، موناکو ، نوروچ
ایکینجی قسمة داخلدرلر . آلمانیا ده مقوق عمومی سی
gemeine deutsches privatrecht حکمنجه ، یرایلرک حائز
اولدینی بالمله حقوق عمومی ده اجانبه ده شاملدر . آنجق تبعه سنک
یرایلر قدر مساعده کورمدیکی مملکت لری تبعه سی حقنده آلمانیا
حکمه لری معامله متقابله اجرا ایدرلر . اجنیه ارباب تألیفک
آناری آلمانیا ده مؤسسه تجاریه صاحبی بر طابع طرفدن با-
صلمدجه حمایه اولمز سه ده ، اسکی آلمانیا هیئت متفق ه سنه داخل

اولمیش اولان دولترلر ایله برده الیوم المانیایا ایله بوبابده
معاهده سی بولنان دولترلر تبعه سی حقننده بو محرومیت
جاری دکلدرد . بوندن بشقه المانیایا بون هیئت اتحادیه
سنده داخلدر . آلمانیاالی آرباب حرفت ایله تجارک
استعمال ایتدکلی رسملر ایله اتخاذایلدکلی علامت فارقی
حمایه قانونیه سی البته آلان دولترلر تبعه سنک استعمال ایلدکلی
رسملر ایله علامت فارقه المانیاده قانوناً حمایه اولنور . المانیایا
تصرفات صناییه اتحاد دوایسنه داخل دکلدرد . اجنپی شرکتلری
حقننده المانیایا ایمپراطورلغنه داخل اولان حکومانه جاری اولان
معامله بربرینه مشابه دکلدرد .

اسوچده یقین وقنه قدر اجانب حقننده پک شدتله معامله
اولنور وحق اجرای تجارت و تصرف املاک ایلری ایچون
حکومتک مساعده مخصوصه سی حائر اولملری شرط اتخاذا
ایدیایردی . بوکون براسوچاینک بیابجی مملکتلرده کوردیکی
معاملاته تطبیقاً او مملکتلر اهالیسی حقننده تصرف املاک وحق
تالیف خصوصاتنده و علامت فارقه مسئله لرنده معامله اولنور ،
یالکز اختراع براتلری ایچون تابعیت نظر اعتباره
المنز .

اسوچبرده نشر اولان ویاخود اصحابنک اوراده اقامتک
هی بولنان تالیفات قانوناً حمایه اولنور . بونک خارجنده قالان
آثار حقننده معامله متقابله اجرا ایدیلیر . اختراع براتی
استحصالی ایچون موجودک اسوچبرده وکیلی بولمنسی اقتضا

ایدر . علامات فارقہ ایچونده بوصورتله حرکت اولنور .
اشخاص مغویه اجنبیه معاملات تجاریه اجرایی ایچون
اسویچرده اتخاذ مرکز ایتک ویا خوداسویچره حکومتی جانبندن
تصدیق اولنمق لازم کلیر . بوندن بشقه اسویچره حکومتی اثار
ادبیه ایله تصرفات صنایعه و تجاریه اتحاد دولیلرینه
داخلدر .

اوستریاده تبعه اجنبیه حقنده جاری اولان اصول معامله
مقابلله قاعده سنه مستنددر . براوستریالی حقنده مملکت اجنبیهده
تبعه معامله سی اولنورسه اومملکته منسوب کیمسهده اوستریاده
تبعه معامله سی کورر . حق تألیف ایله حقوق صنایعهده ده
تمامیله مقابلله اصولی جاری اولوب ، بونک ایچون اجنبینک
منسوب اولدینی مملکتهده اوستریالیلر حقنده تبعه معامله سی
اجرا اولندیغنی اثبات ایتک ایجاب ایلر . اجنبی شرکتلری
اوستریاده اجرای معاملات ایده بیلیمک ایچون حکومتک
رخصت رسمیه سی بولمق ، یکیدن تأسیس اولنان هر شعبه
ایچون وطرز معاملاتک هر تعدیلنده آیریجه رخصت استحصال
ایتک وشرکتلر طرفندن اوستریا مملکتی داخلنده اقامتگاه صا
حبی و قانوناً مسئولیت شخصیه یی حائر وکیللر ارائه اولنمق
مقتضیدر . مجارستانده جاری اصولده بوکا مشابه اولوب ، ممالک
اجنبیهده بیلله نشر اولنان مجار مؤلفلرک آثاریلله ، مؤلفنک تابعیتی
نه اولورسه اولسون ، مجارستانده نشر اولنان بالجه آثاروایکی

سنه مجارستانده مقيم اولوب ويركو اعطا ايدن هر ر اجنينك
آناري حمايه قانونيه مظهردر .

صربستانده هراجنبي اواجنينك منسوب اولديني مملكتده
صربايلره اعطا اولنان حقوق مدنيه دن استفاده ايدرسه ده يالكز
صربايلره منحصر بولنان حقوق بوندن مستنادر . صربستان
يرنده متشكل اتحاد دولي هيئتيرينه داخلدر . اجنبيلر صربستانده
دعوى وكيلى ، طيب ، اجزاجى اوله مزلر شده ، اوچ سنه لك
وقابل تجديد مقاوله لرله وامر حكمدارى ايله خدمات دولته
قبول اولنه بيليرلر .

موناقوده اجنبيلر ممالك سائرده دن زياده مظهر مساعده
اولوب خدمات ملكيه وعدايه كيرمك ، مأموريت روحانيه
غائل اولق كبي حقوق سياسيدن استفاده ايدر ودعوى وكالتى
وطايت اجرا ايدرلر . حقوق عموميه جه تبعه حمايه دن فرقلرى
اوليوب ، يالكز طرد وتبعيدلى جائر و داخل امارتده اجراى
صنعت ايچون حكومتدن مأذونيت استحصال ايتلىرى لازمدر .
حقوق مدنيه جه اجنبيلر حقنده معامله متقابله تطبيق اولنور .
موناقو پرنسلى آثار ادبيه هيئت اتحاديه دوله سنه داخل
اولشدر . اشخاص مغويه اجنيه اشخاص عاديّه درجه سنده
جائز حقوقدر .

نوروجه حقوق خصوصيه جه يرلير ايله اجنبيلر آرد .
سنده فرق يوق ايسه ده ، اجنينك املاك صاحبي اولسى قرال
طرفدن مأذون بولمسنه متوقفدر . بويولده مأذون اوليان بر

کیمسیه ارثاً بر ملک انتقال ایتدیکی حالدہ صاتمسی لازم کایر ؛
کندی صاتمزه ملک مذکور معرفت حکومتله بالمزایده فرو-
خت ایتدیریلیر . آثار ادبیه وصناعیه اربابنک محافظه حقوق
ایچون قانونی معامله متقابله رعایت اولنور .

اوجنچی قسمه داخل اولان دولتلر اسپانیا، ایتالیا، پورتو-
غال، دایمارقه، روسیه، رومانی و فلنمکدر .

اسپانیاده اجنبیلر حقوق سیاسیه بی حاز، اولیوب فقط
براجنبی دارالفنونندن شهادتنامه لی اولمق شرطله اسپانیا
داخلنده اجرای طبابت ایده بیلیرلر . حقوق مدنیجه تبعه
اصایه ایله اجنبیلر بیننده فرق یوقدر . تبعه اجنبیه املاک
صاحبی دخی اولورلر ؛ آنجق املاکلرندن واجرا ایتدکلری
صنعت و تجارتدن دولای تبعه کی ویرکی اعطاسیله مکلفدرلر . اسپانیا
خارجنده نشر اولان آثار ادبیه اوزرنده اجابک حق بونلرک
منسوب اولدقلری مملکتلرده اسپانیا تبعه سندن بولنان مؤلفلرک
حمایه قانونیه مظهر اولملریله مشروطدر . اسپانیاده اقامتگاه
بولنان اجنبیلر اختراع براتی آلیر و علامت فارقه اتخاذ ایدرلر
وبو خصوصاتده مظهر حمایه اولورلر . اقامتگاه صاحبی اولمیانلر
حقنده معامله متقابله اجرا اولنور . ممالک سازه ده متشکل
شرکتلر اسپانیاده اجرای معاملات ایده بیلیرلر سده، شعبه
تأسیس اتمک ایستیان شرکتلرک تشکل ایتدکلری محللر قوانینه
توفیق معامله ایتدکلری اسپانیا قونسولوسلری طرفندن تصدیق
اولمق لازم کایر .

یرلی ایله اجنبینک نظر قانونده حقوق مدنیجه ائک زیاده
 حساباته مظهر اولدی بول محل ایتالیا در (۱). ایتالیا قانون مدنیسی
 حکمنجه ، اجنبیلر یرلیلر و یریلن حقوق مدنی دن استفاده
 ایدر لر . یالکیز بر اجنبی مؤلفک ممالک اجنبیه ده نشر اولنان
 بر اثری قانوناً حمایه اولنمق ایچون معامله متقابله اجرا اولنور .
 برده بر سفینه ایتالیا پیراغنی کشاد اید بیلیمک ایچون صاحبی
 ایتالیا ن اولمق و یا خود اجنبی ایسه یا ایتالیا ده اقامتگاه ی بولنمق
 و یا خود بش سنه مدت اوراده اقامت ایتمش اولمق لازمه ده ،
 سفینه نك مجموع قیمتک ثلثی بوشرطی حائر اولیان اجنبیلر ده
 عائد اوله بیلیر . اجنبی شرکتلری ایتالیا ده اجرای معامله ایچون
 جانب حکومت دن تصدیق اولنمغه محتاج در لر .

پورتوغالده ، قانون و یا خود معاهدات موجوده ایله موضوع
 مستثنی ایدن ماعدا احوالده ، یرلی ایله اجنبی حقوق مدنیجه
 مساویدر . انجق اصحابی اجنبی اولوب پورتوغال ممالکی خارجنده
 نشر اولنان آثار ادبییه حقنده معامله متقابله صورتیله معامله
 اولندیغی کبی ، خارجده اجرای معامله ایدن اجنبی تاجر و یا
 عامللرک محافظه حقوقی ایچون ده قانونی معامله متقابله اجرا
 ایدیلیر . اجنبی شرکتلری عادتاً پورتوغال تابعیتنده عد اولنورق
 معامله کوردر لر .

دانیارقده تبعه اجنبیه ایله یرلیر بیننده هیچ بر فرق
 یو قدر و شرط مقابله کوزه دلز؛ یالکیز دانیارقده داخلنده
 تجارت ویا بر صنعت اجرایی ایچون اوراده ، اگر یرللیک
 indigénat استحصال ایتمه مشسه ، اجنینه بش سنه اقامت
 ایتسی لازمدر . ممالک اجنبیهده نشر اولتان آثار ادبیه ،
 معامله متقابله قاعده سنه تطبیقاً ، با امر حکمداری دانیارقده
 قانونلرینک حمایه سنندن مستفید اولور . دانیارقده داخلنده
 اجرای معامله ایدن اجنبی تاجر و صنعتکارلرینک علامات فار-
 قه سی قانوناً حمایه اولنور . معاملاتی خارجه جاری اولانلر
 حقنده معامله متقابله قاعده سنه توفیقاً امر حکمداری ایله
 حمایه قانونیه بخش ایدیلیر . اجنبی شرکتلری حقنده کی معامله
 اشخاص عادیه اجنبیه حقنده جاری معامله یه مشاهددر .

معامله متقابله اصولی جاری اولان فنلاندیا ایالتلری مستنه
 اولوق اوزره ، روسیهده عن اصل تبعه محلیه ایله اجنبی بیننده
 حقوق خصوصیه جه فرق یوق ایسهده ، شو صوک زمانلرده یو
 اساسه کلی خلل کلمشدر (۱) ۱۸۸۷ سنه سی قانونی موجبجه
 معدن تحری ایده جک اولان اجنبیلر بعدما یالکیز کندی
 ملکلری داخلنده اجرای حقریات ایده بیلیرلر . لهستان ایله
 سائر بعض ولایتلرده اجنبیلر بعدما شهر واسکله لر خارجهده
 املاک صاحبی اوله مز . و حقوق تصرفیه دن استفاده ایده مزلر .

(۱) صحیفه ۳۹۸ ، ۴۴۷

دوغری بدن دوغری به اولان ورثه، قوانین جدیده نك نشرندن
مقدم روسیه ده تأسیس ایتمش اولدقلری حالد شهر و
اسکله لر خارجنده کی املاکی توارث اید بیلیرلر . احوال سائر
ده ورثه اجنبیه املاکی موروثة کندیلر انتقال ایتدیکی آندن
اعتباراً اوچ سنه ظرفده روسیه تبعه سندن برینه صائمه مجبور
درلر ؛ ورثه صائمه املاک موروثة معرفت حکومتله بالمزاید
صایلوب انمانی ورثه به تسلیم ایدیلیر . اجنیلرک حق تألیفنه
رعایت اولمز . علامات فارقه نك حمایه کورمسی صاحبی اولان
اجنیلرک منسوب اولدقلری مملکتده روسیه لیلرک عینی حقوقدن
استفاده لری عهداً تأمین اولمش اولقله مشروطدر . اشخاص
معنویه اجنبیه دن قوماندیت و قول کتیف شرکتلر روسیه ده
اجرای معامله خصوصنده سربست ایسه لرده ، حصه سند اتیله
متشکل شرکتلر یا قانوناً تصدیق اولمق و یا خود بولنرک تشکل
ایتدکلری مملکت ایله روسیه آراسنده معاهده بولمق اقتضاید .
هر حالده بولنرک روسیه داخلنده اجرای معامله اید بیلملری
ایمپراطورک مساعدت مخصوصه سنه متوقفدر . روسیه ده منحصر
معمولات اجنبیه فروخت ایدن شرکتلر و روسیه ایله مناسباتده
بولنان اجنبی سیرسفان شرکتلری بو یولده بر مساعده دن
وارسته درلر .

رومانیا قانون مدنیسی موجبجه ، رومانیا
طیراغنده بولنان بالمله اجنیلر قوانینک علی العموم اشخاص
واشیایه بخش ایتدیکی حمایه دن استفاده ایدرلر . آنجق اخیراً

(۱) نشر اولنان بر قانون حکمنجه، « یالکز عن اصل رومانیالی اولانلر و یا خود استحصال تبیت ایلش بولنلر رومانیاده اراضی صاحبی اوله بیلیرلر (۲) . » ممالک اجنبیهده نشر اولنان آثار، اورالده رومانیالیر مظهر حمایه اولمق شرطیله، رومانیاده حمایه قانونیه دن استفاده ایدر . علامات فارقه اصحابی ، بلا تفریق تابعیت ، داخل مملکتنده مقیم بولندقلری حالده قانوناً حمایه اولنورسدهده . ممالک اجنبیهده اقامت ایدنلرک علامات فارقه ننگ رومانیاده محفوظیت حقوقی امرنده سیاسی معامه متقابله اجرا اولنور . اجنبی شرکتلری رومانیاده اجرای معامله ایده بیلیمک ایچون بونلرک تشکل ایتدکلری محللرده رومانیایا شرکتلری حقنده معامه متقابله اجرا اولندیغی ثابت اولمق ، رومانیایا محاکمندن صادر اولان حکملره قضیه محکمه نظریله باقلمسی معاهده ایله تأمین اولنمق ، رومانیاده آچیله حق شعبه ننگ بیلانچوسیه وکیلک اسمنک اعلانی خصوصنده رومانیایا قانونلری احکامنه اتباع ایدلمک لازمدر . حصه داراق وجهله متشکل شرکتلر ایچونده حکومتک رخصت مخصوصه سی اقتضا ایدر .

فلمنکده حقوق مدنیه اجنبیلر ایله فلمنکلیر بیتده مسایدر .

Djuvara , Journal du droit international (۱)

صحفه ۱۱۲۲ و اشاغیسی privé , Paris , 1892

(۲) تشرین اول سنه ۱۸۷۹ قانونی .

فلمنك مملكتی ایله هند شرقی مستعمراتنده مبيع اولنان آثارادیه
وعلمیه ، نشر اولمغه حاجت قالمقسنزین ، تقلیده قارشى محافظه
اولنورسدهده ، اثرى تقلید اولنان اجنبینك دعواسى بالرؤیه مقلد
ده چار جزا اولق ایچون صاحب اثرک فلمنك ویا هند شرقیده
مقیم اولسی اقتضا ایدر . علامات فارقه احجابی . فلمنك ایله
هند شرقیده مقیم اولق شرطی اولمقسنزین ، بلا تفریق تابعیت ،
قانوناً حمایه ایدیلیر . ذاتاً فلمنك حکومتی آثارصناعیه وتجاریه
هیئت اتحادیه دولیه سنهده داخلدر . اجنبی شرکتلری فلمنكده
اجرای معامله خصوصنده سربستدرلر .

— ۳ —

جنوبی آمریکا اصولی . — جنوبی آمریکا حکومتلری
مهاجرین اجنبیه حقنده پک زیاده مساعدلی طاورانیق وقاعدۀ
عمومیه اولق اوزره کندیلرینی حائز حقوق عد ایدرلر .

آرژانتین حکومتده حقوق عمومی و حقوق خصوصیهجه
اجنبی ایله یرلی بیننده هیچ برفرق یوقدر . اجنبیلر املاک
صاحبی اولور ، مجالس بلدییه ، حکومت بانقه لرینه داخل اولور ،
اووقاللق ایدر ، نفر ویا ضابط صفتیه خدمت عسکریه ایفا
ایلرلر ، مجالس عمومییه اعضا انتخاب ایده مزلر .

بره زلیلیا حکومتات متحده سنهده صورت مخصوصده بر
قانون ایله نزع اولمقدجه اجانب بالجمله حقوق خصوصیه دن

مستفيد در . بره زيلیاده سا کن اجنيلر حق تصرفه مالک اولوب ، يالکيز بره زيليا سفائنک تصرفه اشتراك ايده منزلر . حقوق تأليفه لری محفوظدر . بره زيليا حکومات متحده سی تصرفات صناعيه و تجاريه نك حمایه سی اتحاد دوليسنه داخل اولديغندن ، اتحادده بولنان ساثر دولتر تبعه نك حقوق صناعيه و تجاريه سی بره زيلیاده محفوظدر . دول ساثره تبعه نك ده حقوق مذکوره سی ، اورالرده بره زيليا ليلرک حقوقی تأمین ايدر معاهدات بولنق ، اتحاد اولنان علامات فارقه بره زيلیاده قيد ايتديرلک ورسمی غزته ايله اعلان اولنق شرطيله ، محفوظدر . به روده قانون مدنی حکمنجه اجنيلر مال و جانلرينک امنیتی و ماللرينک سربستانه اداره سی خصوصنده بالمله حقوقدن استفاده ايدرلر . انجق حق تصرف لری خصوصنده قانوناً معامله متقابله اجرا ايديليرسه ده ، تطبيقده بوبابده کی حق لرينه رعایت اولنور .

شيلي مملکتنده حقوق مدنيه جه يرایلر ايله اجنيلر بيننده فرق یوقدر . آنجق شيلي صولرنده صید بحری يالکيز تبعه محليه ايله شيلیده اقامتگاهي بولنان اجنيلره منحصردر . بره شيلیده متمکن اوليان اجنيلر اوراده وصی اوله منزلر .

مکسيقاده اجنيلر حقوق سياسيه نك ماعداسندن استفاده ايدرلر . انجق سوا حلدلر سیر و سفائن Cabotage مکسيقا سفينه لرينه منحصردر . بره آووقاتلق مستثنا اولق اوزره اجنيلر بالمله صنایعی اجرا ايده بيليرلر . اجنيلر املاک صاحبی

ومكسيقا سفينه لرینه مالک اوله بیلیرلر. مالک ساثرده مکسیقالیلر
تبعه محلیه معامله سی کورمک شرطیله ، او محللر تبعه سنکده
حق تالیفی مکسیقاده محفوظدر . اجنیلرک حقوق صنایه و
تجاریه سی ده محفوظ ایسه ده ، مکسیقاده ساکن اولیان بر اجنیلرک
علامت فارقه سی اصل او علامتک اتخاذا اولندیفی مملکتده
قید اولنر قجه مکسیقاده قید اوله مز .

اوچنجی باب

Conflit des lois قوانین اختلاف

مباحث سالفه دن اکلاشلدیفی اوزره بر مملکتده بولان
اجنیلر او مملکتده بر طاقم حقوقه مالکدرلر . آنجق حائر
اولدقلری بو حقوقی هانکی قانونه توفیقاً اجرا ایده بیله جکلری ،
یعنی منسوب اولدقلری مملکت قانونه می یوقسه مقیم بولندقلری
محل قوانینه می توفیقاً حقوق مذکوره دن استفاده ایده جکلری
مسئله سی جای مطالعه در . بومسئله نک حلی مراکیت قوانینک
مستند بولنه جفی اساسلره تابعدر . بواساسلر بر طرفدن دولتک
حقوق حکمرانیسنک جاری اولدیفی اراضی ، دیگر یاندن بر طاقم
اشخاصک دولتک زیر اداره سنده طویلا نمنی انتاج ایدن بعض

مناسبات شخصیه در. بناءً عليه قانونك، ملكى territoriale و شخصى
 personelle اولق اوزره ، ايكى نوع حاكميتى واردركه برى
 اراضيه و ديكرى اشخاصه متعلقدر. اشته برمايكنده مصالح
 افراددن دولايى بوايكى حاكميت يكديكركه تقابل ايتديكى حالده
 مختلف قرانىي *conflict des lois* حصوله كليد. و بر مملكتنده بو
 ايكى حاكميتك هانگيسى مرجع طوتيايرسه قانونه ، اوكا توقيقاً
 ملكى وياشونى دينير



برنجی فصل

قواعد نظریه

— ۱ —

امتانو نظریه سی

۱. امتانو statut نظریه سی ، شخصی مقیم اولدینی طبراغه ربط ایله هر یرده و دائماً حاکمیت محلیه نك وضع ایتدیکی قانونلره تابع طوتان ، دره بکلك اصواندن نشئت ایتشدور .
 بونك اساسنه کلنجه : بر طرفدن بردولت ، مادامکه مستقندر ، بتون حدود ملکیه سی داخلنده و بناء علیه اوراده دواملی و یاخود مسافرت صورتیه مقیم بولنان بالجمله اشخاص اوزرنده منحصرأ اجرای حکومت ایتمکدن فارغ اوله مز . دیگر یاندن ، دولترك قوه عدلیه سی حدود ایله مقیددر ؛ هیچ بر دولت اوحدود خارجنده بولنان اشخاص و اشیا اوزرنده ادعای حکومت ایده مز . اشته بوکا مبنی ، قوانین منحصرأ بونلری وضع ایدن دولتك ملکي داخلنده جاری اولق لازم کلیرظنیله قانونلرك ملکیت صرفه سی ادعاسی میداننه چیقارامشدر .
 واقعا بوخصوص مطلق اولسه ایدی قانونلرك حاکمیت ملکیه سی ایله حاکمیت شخصییه سی آرہ سنده تضاد حصوایله بونك نتیجه سی اوله رق اختلاف قوانین میداننه کلمسهنه امکان قالمز ، و حقوق خصوصیه دولی تشکل ایدن مسائل مهمه نك بری اورته دن

قالقاردی. چونکه هر شخص نرمه کیدرسه کندینک عن اصل تابع اولدینی مملکت قانونلری نظر اعتباره الخیوب ، یالکیز بولندینی مملکت قوانینه تابع قالیردی . آنجق بونده بیوک برمحذور واردرکه ، بالجه حقوق ، شخصک برسیاحته معلق اولهرق ، معطل و غیر معین قالیر .

اشته بومحذور علماء حقوقک نظر دقتنه چارپمسیله ، اون اوچنچی عصر میلادیدن اعتباراً ، افرادک حائز اولدینی حقوقه ثبوت اسناد ایدرک ملکیت قوانینک تعدیلنه بچاره لر تحریرسینه باشلانمش . وبوتحریرات نتیجه سی اولهرق *statuts réels* و *statuts personnels* قاعده لری میدانه چیقمشدر .

قرون وسطاده استاتو *statut* کلمه سی ایتالیاده بعض شهر ویایاتلره مخصوص بولان قوانین خصوصیه ایله اورالرك عرف وعادته اطلاق اولتوب ، منافع عمومیه یه عائد وبتون ایتالیاه شامل احکامی جامع بولان و مطابقاً قانونه معناسنه کلن لور *Loi* مرادفی اولهرق استعمال اولنوردی . بناءً علیه استاتو نظریه سنک مقصد اصلیمی قوانین محلیه بیننده کی فرقلردن متحصل اختلافاتک حلی ایدی . فقط یواش یواش اقوام آره . سنده کی مناسباتک نزایدی حسیله اجنبیلر حقنده جاری اولان شدائدقانونیه تحفیف ایدیلرک بونلرك دولت متبوعه لری قانون لربنه توفیقاً حائز اولدقلری - حقوق نظر اعتباره آلمغه وبونک نتیجه سی اولهرق برمملکته قوانین محلیه ایله قوانین اجنبیه

یئنده اختلافات تحدث ایتمه باشلادیغندن ، بو اختلافاتك چاره حلنی استاتو نظریه سنده آرامق طبیعی عد اولندی . بوصو-رتله بو نظریه نك دائره شمولی توسع ایتدی . بو نظریه موجبنجه اشخاصه تعلق ایدن قانونلر شخصی هر کیتدیکی یرده تعقیب ایدوب اشیا به متعلق بولان قانونلرک حکمی یالکیز داخل ملکده منحصر اولدیغندن ، حدود ملکیه خارجنده احکامی جاری اولان قانونلر *statuts personnels* و داخل ملکده ، حتی اجانب حقنده دخی ، اجرای احکام ایدن قانونلر *statuts réels* تعبیر اولمشدر .

شو حالده *statuts personnels* عدادینه داخل اولان قوانین شخصی هر کیتدیکی یرده تعقیب ایتك لازم کلوب ، حالبو که دولتلر حدود ملکیه خارجنده کندی قانونلری احکامنی تنفیذ ایتدیرمک صلاحیتی حائز اولدقلرندن ، بوکی قوانینك ممالك اجنبیه ده جریان احکامی بین الدول جمیه *Comitas gentium* جمله سندن عد اولمش و اشیا به تعلق ایدوب *statuts réels* جمله سندن بولان قوانینك تأثیراتی داخل حدوده حصر ایدلمشدر .

— ۲ —

شخصیت قوانینی

بر شخصك حائز اولدیغی حقوقدن هر نرده اولورسه اولسون استفاده ایتمی ، حقوق طبیعیه سی جمله سنده بولندیغنه نظر آ ، بونك حقوقنی تأمین ایدن قانونلرک حدود ملکیه خا-

رجنده جریان احكامنى بين الدول مجمله ده عد ايتك جائز اوله
من ، بونى صرف منافع دوليه صرسته كچيرمك ده لايق دكلدر .
بر شخص بر حق يا حائر در يادكلدر ؛ حائر اولدينى حاله
او حق تأمين ايدر قوانين احكامندن ، كندى زرده بولنورسه
بولنسون ، استفاده ايتمى لازم كلير ؛ بناء عليه بو قانونلرك
هر يرده جريان حكمى بر حقه مستنددر . اونك ايچون بوادعا
واهى اولدينى كى ، شو Statut قاعده سنده بونلرك هانكىسى
personnels و هانكىسى réels عداولنه جنى ده لايقيه كسديريله .
مامشدر .

بناءً على ذلك Statut قاعده سى بر اساس علميدن و معين
اولق خاصه سندن محروم اولدينى ايچون مردوددر ؛ دره بلكك
زمانك اصول تشريعيه سى نظر اعتباره آلهرق وضع اولتمش
اولدينى ايچون زمانزه غير قابل تطبيقدر . ازمنه حاضره ده
مناسبات دوليه تكثير و افراد جمعيت ملكدن زياده اهميت كسب
ابتديكندن ، ظهوره كله بيله جك اختلافات دوليه نك جميله دن
زياده هر يرده و هر زمان قابل تطبيق اوله جق برط . اقم قواعد
مستقره و صحيحه مستند اولمى اقتضا ايدر .

اشخاصك ممالك اجنبيه ده بيله حائر اولدينى حقوق ايله
بوانه قلى محل صاحبي اولان دولتك حقوقى ، يعنى قوانينك
مالكيت شخصيه سى ايله مالكيت ملكيه سى نه درجهيه قدر قابل
تأليف اولدينى تتبع ايتك حقوق خصوصيه دولك اك منهم

مشاغلندند. استاتو نظریه سی بو نقطه مهمه بی حله پک کفایت ایده منر .

قانون منفعت خصوصیه متعلق بواند قجه شخصک منافعی دایما نظر اعتبارده طوتوب تأثیراتی شخصه منحصر اولق و ، فقط ، انضباط عمومی دولی ordre public international ایله عقودده محل عقد قانوننک مرعیتی وعاقیدنک ترجیح قوانین صلاحیتی مستثنا اولق اوزره ، هر برده وبالجمله مناسبات قانونیه ده شخصه اجرای تأثیر ایتک اقتضا ایدر .

دولت دینان شخص معنوی تبعیت مشترکه روابطیه بامقاوله ضمنیه بربرینه مربوط اشخاصک بر یرده اجتماعندن عبارت برهیندر (۱) . فقط بوتبعیت مقاوله نه داخل اولان افرادی حمایه ایده بیلمسی ایچون دولتک اراضیسی territoire اولق لازمدر . بناء علیه دولتک نفوذ حکومتی هم اراضی وهم اشخاص اوزرنده جاری اولورسده ، اراضی ایله اشخاصک هر برینک اهمیت بشقه مرتبه لرده در . تبعه سز بر دولت تصوری محالدر ؛ حالبوکه اراضیسی اولدینی حالدیه برچوق خلقه ، بر جمعیت افرادینه حاکم دولتر کورلمشدر . مثلاً آمریکا وحشیلری ، اراضی صاحبی اولما مقوله برابر ، تشکیلات مستقله وسائر لری بولندینی ایچون ، دولت حکمنده درلر . فرانسه ارباب علم حقوقندن برینک دیدیکی کی ، دولت ایچون اراضی شخص ایچون اقامتگاه

Weiss, Traité élémentaire de droit international privé

مثابه سنده در ؛ اقامتگاه شخص دیمک اولمدینی کبی ، اراضی ده دولت دیمک دکلدر . حاصلی تبعه سر حکومت ودولت اوله میه . جغندن اراضی درجه ثانیه ده قالیر ، ودولت لرك باشایجه اعتنالی افراد و بوندن ناشی ده حق حاکمیت شخصیه معطوف اولمق لازم کلیر . دولته افراد تبعه سی حقنده قوانین وضع ایتمک صلاحیتنی بخش ایدن حاکمیت شخصیه حقوق ملکیه ایله محدود دکلدر . فی الواقع دول سائره کندی ملکری داخلنده قوانین اجنبیه احکامک جریاننه مساعدده ایتمکه اجبار اولنه . مزسده ، ممالك اجنبیه کیتمش اولان افراد تبعه اوزرنده اجرای حاکمیت ایتمک ادعای هر دولت ایچون حق حاکمیتک نتیجه طبییه سیدر .

قوانین ملکیه شخصک بر ملک داخلنده متصرف اولدینی املاک و اشیا سنه عائد اولان احکامی جامع قوانین اولوب اشخاصه تعلق ایدن قانونلر قوانین شخصیه در ؛ حالبوکه قوانین ملکیه تنفیذ احکامجه ینه اشخاصه تعلق ایدر ، بوجمله قوانینی مایکی و شخصی دیه تقسیمه محل یوقدر ، برده نظامات موضوعه دولیه دن برطاقنک احکامی یالکز ملکه منحصر قالیوب ، خارج مملکته دخی تجاوز ایدر . بناء علیه قانونلری ملکی و غیر ملکی و یاخود داخلی و خارجی دیه تقسیم ایتمک دهها موافق اولور . چونکه بونقسیمله هانکی قانونلر ملک داخلنه حصر حاکمیت ایتمش ، هانکیلری خارجه تجاوز ایدر . بیلمش اولدینی یک نظرده تعین ایدر . حالبوکه ملکی و شخصی

اوله رق تقسیمده قانونک . ملکه تعلق ایتمهکله برابر ، اشخا-
صهده تعلق و تأثیری اولدیغندن ، بونک قطعی بر صورتله دأره-
سنی تحدید ایتمک ممکن اوله مز . مع مافیه غیر ملکی Exterritorial
دینیلن قوانینک خارج ملکده جریان احکامی انضباط عمومی' درلی به
Ordre public international موفق اولغه وابسته در .

یوقاریده کچن تفصیلاتدن اکلایم دینی اوزره ، دولت
ملکی داخلنده قوانین اجنبیه نک جریان احکامنه مساعد
ایدرسده ، حق بقا و مدافعه به مالک اولدیغندن ، قوانین
موجوده نک احکام اساسیه سی اخلال ایدن اجنبی قانونلرینک
تنفیذ احکامنه مساعد ایتماک جمله' حقوقنددر . اشخاصک
تابع بولندینی قانون ایله قوانین محلیه بیننده اختلاف Conflit
ظهوری حالتده دولتک منافع عمومی سی منحصرأ قوانین محلیه-
نک تطبیقی مستلزم ایسه بونلر اجرا اولور . شو حالده منافع
خصوصیه به تعلق ایدن قانونلر قارشی وضع اولندینی محله
بهمه حال تطبیقی لازم کلن منافع عمومی به عائد قانونلر بولور ،
که بونلر رعایت انضباط عمومی' درلی بی Ordre public
international تشکیل ایدر .

بر دولت تبعه نک رعایته مجبور اولدینی انضباط عمومی
انضباط عمومی' داخلیه Ordre public interne که بر ملک
داخلنده و متبوع ایله تبعه بیننده کی مناسبانده تأثیری جاری اولور .
انضباط عمومی' درلی ایسه بر شخص ایله متبوعی اولیان دولت

آره-سندہ کی مناسباتہ ظاہر اولور . بر اجنبینک بولندی ملک
قانونلرینہ متابعت ایتمی کندیسنه و برلمش اولان حق مسا-
فرتك صاحب ملك اولان دولتک حقوقنی اخلاص ایتما سی ایلہ
مقیددر .

اجنبیلر بولندقلری مملکتک حقوق عمومیه سنی تشکیل ایدن
قانونلری احکامنہ مطاوعتہ مجبوردرلر . بر مملکتہ حق حاکمیتک
کیفیت اجراسنی ، اداره عدلیہ تشکیلانی ، محاکمک صلاحیتنی ،
تبعہ نک حقوق شخصیه سنی تعیین ایدن حقوق عمومیه-در . بو
حقوق عمومیه دولتک حق بقاسنه متعلق اولدیغندن ، بر
اجنبینک ، کندی قوانین شخصیه سنی اورتیه-سوره رک ، حقوق
مذکورہ بی اخلاص ایتمی جائز اولمز . حقوق عمومیه-یه تعلق
ایدن قانونلر می-انندہ اک مهم اولان املاک و اراضی-یه تعلق
بولنان قانونلردر . دولتک اراضیسی اورادہ بولنان املاکک
هیئت عمومیه سندن متشکل اولدیغندن ، اصحابی هانکی تبعہ دن
اولورسه اولسون ، بونلرک صورت اداره-نک دولتجه اهمیت
فوق العاده سی واردر ؛ بویادہ تنظیم ایتمش اولدیغنی قوانینی
اخلاص و یا حکمدن اسقاط ایدہ بیلہ جک اولان قوانین اجنبیه نک
کندی ملکی داخلندہ جریان احکامنہ بالطبع موافقت ایدہ مز .
بناء علیہ قوانین اجنبیه بر ملک داخلندہ جاری اولمق ایچون صاحب
ملك اولان دولتک موضوعات قانونیه-سنه مخالف اولماق ،
انضباط عمومی دولتی خللدار ایتماک اقتضا ایدر .
بر مملکت اجنبیه ده بولنان کیمسہ لر وصیتنامہ تنظیم و یا مقاولہ

عقد ایتماک ایستدکلری حالده بونی بواندقلری محل قانوننه توفیقاً
ایلملری لازم کلیرکه بوفکر عقودده نافع اولانه محل عقد قانونیرر
دیمک اولان لاتنجه Locus regit actum جمله سیله افاده اولنور.
بالجمله عقود اصلی *intrinsèque* و فرعی ویا مزاجی
extrinsèque اولمق اوزره ایکی قسمدن مرکب اولوب، قسم
اصلی عاقلدک اهلایت شخصیه لرینی، رضالرینی، و عقدک اسباب
وماهیتنی تضمن ایدر؛ قسم فرعی ایسه، مقاوله نامه تحریری،
ینه اقامه سی، کیفیت عقدک اعلانی کی، اسباب ثبوتیه یی
احتوا ایلر. بونلردن قسم اصلی محل عقد قانونیه تعین ایده مز؛
مثلا اهلایت شخصیه دولت متبوعه قانونیه میدان چیقار.
او حالده عقودده محل عقد قانوننک اجرای نفوذ ایتسی لازم
کان قسم قسم فرعیدر. بناء علیه بر مملکتده بولنان اجنبیلرک
عقد ایتدکلری مقاولانده، شرائط عقد و تنظیم خصوصنده،
اورانک قانونلری احکامنه توفیق معامله ایتلری، یعنی مقاوله یی
قوانین محلیه نک تعین ایتدیکی شکل و صورتده تنظیم ایللری
اقتضا ایدر.

بر مملکتده اجنبیلر بیننده تنظیم اولنان عقودک شکل
خارجیسنجه قوانین محلیه یه موافق اولمسی بعض مؤلفلرک ادعاسی
کی، اجنبیلرک بولندقلری محله موقه تبعه محلیه دن معدود
وبناء علیه قوانین محلیه یه تابع اولملرندن نشئت ایتمز؛ زیرا او یله
اولسه، حاکمیت دول حدود مملکیه ایله محدود اولوب قانون

محلینک خارج حدودده حکمی جاری اولیه جغندن، اوکا توفیقاً
تنظیم اولنان عقودك خارجده حکمی اولماق لازم کثیر؛ حالبوکه
قانون محلی یه موافق اولان عقود هر یرده معتبردر . عقودده
شکل خارجی آرامق حیلله میدان و برما مک مقصدینه مستنددر .
واشکال خارجیۀ عقودك نصل اولسی لازم کله جکفی تعیین ایدن
قانون محلیدر . بوندن بشقه عقود عافدک منسوب اولدینی مملکت
قانوننه موافق اوله رق تنظیم اولنق لازم کلسه، او قانون موجبجه
بعض مأمورلرک حضوری لازم کلدیکی حالده مأمورین محلیه
بو وظیفه یی ایفا ایتزلر ؛ عقد تنظیم اوله مرز ؛ بوندن تجارت
عمومیه متأثر و متضرر اولور . بوله اولسه بيله ، مملکتندن بر
چوق زمان اول تباعد ایتدش اولان بر کیمسه نک مملکتنک
احکام قانونیه سنده وقوعه کله جک تغیراته واتف اولماسی وارد
خاطر اوله جغندن، دوات متبوعه احکام قانونیه سنه توفیقاً تنظیم
عقود ممکن اولمز . انجق عقودك محل عقد قانوننه موافق انضباط
عمومی دولی یه تعلق ایتدیکندن دولتلر تبعه لریخ خارج مملکتده
تنظیم ایده جکلری عقودده کندی احکام قانونیه لرینه رعایته
اجبار ایده بیلیرلر .

بر مملکتده اجنبیلر یئتمده تنظیم اولنان عقودك قوانین محلیه
یه توفیق ایدلسی خصوصنده عاقدلر مختاردرلر ؛ استرلر سه شکل
خارجی عقود دولت متبوعه لری احکام قانونیه سنه توفیق
ایده بیلیرلر . فقط طرفین مخلف دولتلر تبعه سندن اولور سه ،
منسوب اولدقلری دولتلردن برینک قانونی ترجیح ایتکه محل

اولمديغندن ، عقدك قوانین محلیه كوره تنظيمی لازم كلديكي
كبي ، انضباط عمومی دولی عقدك قوانین محلیه احكامنه توافقنی
مستلزم اولدینی حالدہ قوانین مذكوره احكامنه رعایت مجبوری
اولور . — هر حالده شكل خارجیی احكام قانونیه محلیه
توفیق اولنان عقود هر یرده معتبردر .

شخصیت قوانین قاعده سی علاقہ دارانك استدكاری قانونی
ترجیحده کی حق اختیار لر یلده تعدیل کورر . بر طاقم قانونلر
واردر که احكامنه تبعه محلیه نك رعایتی الزمدر ؛ اهلیت شخصیه یی ،
حقوق عائله یی تعیین ایدن قانونلر بوقیلنددر ؛ فقط عقودك
شكل خارجیسنده اجرای تاثیر ایدن قوانین بوقیلدن اولمديغندن ،
بونلره رعایت بر لزومه مستند دکلدر ، مادامکه هر کسك بونلره
رعایتی مطلقا لازم دکلدر ، او حالده هر کس بوکی خصوصاتده
استدیکی قانونی ترجیح ایدر . وصیتنامه لر ایله مقاوله نامه لر
بو بایده مثال اوله رق ذکر اولنه بیلیر . موصی کندی آرزوسنه
توفیقاً اموالنك توزیع و تقسیمنی وصیت خصوصنده سربستدر ،
بو بایده یا لکز انضباط عمومی دولی ایله محل عقد قانوننك لزوم
جریان قواءدینك مختل اولماسی کافیدر ؛ بو شرطه رعایت
ایتمک اوزره موصی مطلقا دولت متبوعه سی احكام قانونیه سنه
تطبیق حرکت مجبور اولمز . مقاولاته کلهجه ، اگر عاقدین
بر دولت تبعه سندن ایسه لر ، عقدلرنده دولت متبوعه قانونی
کوزه دیرلر ، یعنی شخصیت قوانین بونلر حقنده جاری اولور .
سهده ، مختلف تابعیتده بولندقلری حالده ، بحث مخصوصنده

کوريله جکی اوزره، استدکاری قانونی ترجیحده حق اختیارلری
واردر . عقد استدکاری مقاوله نك محل عقدینه ویا تنفید
اولنه جنی محله نظراً، محل عقد ویا محل اجرا قانونی ترجیح
استدکاری استدلال اولنور .

حاصلی، قانون، كرك يالکیز شخصه عائد اولسوز، كرك
عائله ايله و اموال منقوله ویا غیر منقوله ايله اولان مناسباته
متعلق بولانسون، شخصی *personnelle* اولق وهر کیتدیکی
یرده شخصی تعقیب ایتك لازم کایر؛ آنجق بوقاعده، بر
طرفدن، اجنینك بولندینی مملکت صاحبی اولان دولتک
منافعنك مستند اولدینی انضباط عمومی دولتی، دیگر یاندن
اجنینك منفعت شخصیه سنی تأمین ایدن محل عقد قانونک مرعیفنی
وترجیح قوانین خصوصنده کی حق اختیاری اخلال ایتماک
شرطیله مقیددر .

- ۲ -

معلوم اولدینی اوزره حقوق خصوصیه دول قانونلرک حاکمیت
 شخصیه سی ایله حاکمیت ملکیه سی بیننده کی تضادی ازاله چاره لرینی
 تحری ایله اشتغال ایدر. قدیم رومالیر ایله غول مملکتنه مستولی اولان
 باربارلرده اولدینی کبی، قانون منحصرأ حاکمیت شخصیه یه مستند
 اولور و یا خود حاکمیت مذکوره، دره بکلك زماننده اولدینی کبی،
 یالکیز ملکی اولورسه آرده تضاد وقوعنه بالطبع امکان اولیه.
 جفتندن حل اختلافانه مدار اوله حق چاره لر تحریسنه لزوم قالمز.
 دیمک اولورکه حقوق خصوصیه دول اک اول استاتو نظریه سی
 میدان چیقیدینی زمان وجود بولمغه باشلامشدر.

بوکون قانونلرک حاکمیت شخصیه سی ایله حاکمیت ملکیه.
 سنک تقابلندن متحصل اختلافانک حلی ایچون چاره لر تحری
 ایدن بالجمله شرایع اقوام اجنبیلری نظامات ضبطیه محلیه یه
 رعایته مجبور طوتیور و اموال غیر منقوله نك اصحابی تبعه
 اجنبیه دن اولانلرینه بیله منحصرأ قوانین محلیه یی تطبیق ایدیور.
 فقط اشخاصک اهلیت شخصیه سنه متعلق خصوصاتده زیاده
 اختلاف حصوله کلیور. بوبابده بعض مملکتلر اجانبی قوانین
 محلیه یه تابع عدایدیور؛ بعضلری، منفعت عمومیه یه مستند
 بعض مستثنیاندن ماعدا احوالده، دولت متبوعه قانونی کوزتیور؛

بر قسمی ده اجنیلرک بولندقلری محللرده منسوب اولدقلری دولت قانونندن حق استفاده لرینی تسایم ایدیورسده ، بونی کندی تبعه لرینک منفعت خصوصیه یله تحدید ایلور .

سلطنت سنیه ممالک اجنبیه ده بولنان تبعه شاهانه نک ، اموال غیر منقوله یی تصرف ، آسایش داخلی به متعلق احکام نظامیه به رعایت کی خصوصاً ، بولندقلری محللر قانونلرینه متابعتی تسایم ایدر ؛ بوکا مقابل کندیلرینک اهلیت شخصیله لرینک تعینی ، حقوق عائله دن استفاده ایتک وتنظیم عقود ایلک کی معاملات مدنیه نک اجرایی ایچون قوانین عثمانیه به توفیق حرکت ایتلری لازمدور .

ممالک شاهانه ده متمکن تبعه اجنبیه طرف حکومت سنیه دن موضوع قوانین ونظامات ضابطه وبلدییه تابع اولدقلری کی ، تصرف املاک ایلدکلری حالده ده ، یوقاریده کورلیدی اوزره ، تماماً قوانین سلطنت سنییه تابع اولوب ، حقلرنده عینله تبعه عثمانیه معامله سی اجرا اولنور . محاکم عثمانیه حضورنده اهلیت شخصیه لری قوانین دولت علیه احکامنه کوره تعین ایدیلیر . طرفین بر دولت تبعه سندن ایسه دولت متبوعه لری احکام قانونیه سنه ، مختلف تابعیتده ایسه ترجیح ایتدکلری قانونه توفیقاً عقد ایلدکلری مقاولات ، قوانین سلطنت سنییه مخالف اولماق شرطیه ، مقبولدر . معاملات مدنیه ایله بعضی حقوق عمومیه جه ده تبعه عثمانیه ایله اجنیلر بیتنده فرق یوقدر ،

بوخصوصا صلرده جاری معامله جمله سی حقنده سیاندر . آنجق
 عهد قدیمه نائل اولمش اولان اجنبدلر حقنده عهد مذکوره
 احکامی کوزه دیلهرک اجرای معامله اولنور .
 حاصلی حکومت سذیه قوانینک حاکمیت شخصییه سنه التفتات
 ایتمز . مقاولانده محل عقد قانونه رعایت اولنمق ، طرفین حین
 عقدده حق اختیارینی استعمال ایتمک اوزره . نظر حکومت
 سذیه ده قوانینک حاکمیت ماکیمه سی معتبردر .



— ۴ —

بعضی قوانین اهنیه

قوانینك حاكيت ملكيه سنه حصر اعتبار ايتك ويا خود منفعت
عموميه ويا خصوصيه يي نظره آلمق شرطيله حاكيت شخصيه
قوانيني كوزتمك خصوصاً تنجه دولتر اوج قسمه آريله بيلير.
برنجي قسمده انكلتره ايله شمالي آمريقا حكومات متحده سي
واردر .

انكلتره ده هر كس قوانين محاييه تابعدر ؛ حتى سن رشدك
واهليت شخصيه نك تعينده بيله انكلتره قانونلري اجراي حكم
ايدر . بونك كبي شمالي آمريقا حكومات متحده سنده ده يالكر
قوانين محليه احكامي جاريدير . دولتين مشاراليهمانك ايكيسنك
ممالكنده بولنان اجنيلر هر خصوصده قوانين محايه احكامنه
تابعدرلر . دره بلكلك اصول تشريعيه سنك دوامي ديمك اولان بو
صورت مقتضاسنجه قانونلرك حاكيت شخصيه سنه اصلاً اعتبار
اولميوب ، ملكيت صرفه سي قبول اولمشدر . بونك مستند بولنديغي
انكليز حقوق عموميه سي Common - law استاتو نظريه سي
ميدانه چيقيمازدن اقدم تاسس ايتديكي ايچون بونك تأثيراتنه
دوچار اولمامشدر . آنچق بو اصولك حكمي يواش يواش آزاله رق
تطبيقانده ، اهليت شخصيه نك تعيني ، نكاح ، طلاق اجرامي ،
اموال غير منقوله نك بين الورثه تقسيمي كي خصوصاتده ، قوانينك
حاكيت شخصيه سنه رعايت اولمغه باشلامشدر .

ایکینچی قسمه داخل اولان دولتلر اجنینه منسوب اولدینی دولت قانونه تابع اولدیغنی تسایم ایدر لر سه ده ، بونک تطبیقنی صاحب ملک اولان دولتک منفعت عمومیه سیله تحدید ایدر لر . بوقسمده بولان دولتلر اسپانیا ، ایتالیا ، پورتوغال ، فرانسه ، فلنمک ، روسیه ، رومانیا در .

اسپانیاده قانونلرک حاکمیت شخصییه سنک حاکمیت ملکییه فوقه دلالت ایدر هیچ بر قانون یوقسه ده ، مادرید محکمه تمیزینک اجتہادینه نظراً [۱] تبعه اجنیه نک شخصییه متعلق معا ملاتده استاتو پرسونلی اجرای حکم ایتدیکی کبی اهلیت شخصییه لرینک تعیننده ، وصیت و عقد نکاح کبی خصوصاتده ده دولت متبوعه لری احکام قانونیه سی کوزده دیلیر .

ایتالیا قانون مدنیسی حکمنجه . اشخاصک اهلیت شخصییه سی وعائله ایله اولان مناسباتی دولت متبوعه قانونیه تعین ایدر . کندیلری احکام جزائییه و ضابطه جه قوانین محلییه به تابع اولدقلری کبی ، قوانین و اعلامات اجنیه ده انضباط عمومی بی اخلاص ایدر سه ایتالیاده موقع اجرای وضع اولنه من . اموال غیر منقولیه به متعلق خصوصات ایتالیا قانونلرینه تابعدر . عقودده محل عقد قانونی معتبر ایسه ده طرفین بر دولت تبعه سندن ایسه دولت متبوعه قانونتی اختیار ایده بیلیر .

باجیقاده قانونلرک حاکمیت شخصییه سی اصولی جاری اولوب ،

آنحق بلجیقا تبعه سندن برینک مفت خص وصیه سی بوندن
خللدار اولدیغی حالده ، انضباط عمومی دولی به قیاساً ، باجیقا
قانونلرینک رجحانی تسلیم اولنور .

پورتوغالده اجنیلرک معاملات مدنیجه اهلیت شخصیه لری ،
انضباط عمومی به خلل ویرمیه جک مرتبه ده ، دولت متبوعه لری
قانونیه تعیین ایدر .

فرانسه ده ساکن اولان بالجمله اشخاص حقنده . قانون
مدنی به نظراً ، نظامات ضابطه محلیه احکامی جاری اولدیغی کبی ،
اموال غیر منقولده فرانسه قانونلری احکامنه تابعدر و فرانسز-
لرک اهلیت شخصیه سی ، ممالک اجنبیه ده بولنسه لر بیله . فرانسه
قانونلرینه نظراً تعیین اولنور . فرانسه ده بولنان تبعه اجنبیه نک
اهلیت شخصیه لرینی تعیین ایچون قانونده صراحت یوقسه ده ،
تطبیقاتده بوبابده دولت متبوعه قانوننه رعایت اولنور ؛ آنحق
دولت متبوعه لری کندیلمی مقیم اولدقلری محل قانوننه lex
domicili تابع طوتیورسه بوکیملر بوخصوصده فرانسه قانوننه
تابع قالدقلری کبی ، تابعیتی غیرمعین اولانلر و یا خودایکی تابعیتی
بولنانلر حقنده طبیعی فرانسه قانونی احکامی جاری اولور .
فلمنسکده ، قانون مدنی حکمنجه ، حقوق مدنیه خصوصه
یرلیر ایله اجنیلر ییتنده فرق اولدیغندن ، اجانبک اهلیت
شخصیه سی ده فامنک قانوننه نظراً تعیین اولنق لازم کلیرسه ده ،
تطبیقاتده دولت متبوعه قانونلری احکامنه رعایت اولنور .
روسیه ده اجنیلرک اهلیت شخصیه سی منسوب اولدقلری

دولت قانونیه تعیین ایدر. لهستانده فرانسه قانون مدنیسی حکمی جاری اولدیغندن، هر اجنیتک منسوب اولدینی دولت قانونک حاکمیت شخصیه سی معتبر اولدینی کبی، روسیه قوانین عمومیه سنک مرعی اولدینی بالجمله محللرده و فنلاندیا قضاہ سنده هر اجنبی استاتو پرسونلنه عائد اولان خصوصاتده دولت متبوعه قانوننه تطبیق معاملاتده سربست اولوب احوال سائرده روسیه قانونلرینه تابعدر. آنجق بالطق ایالاتنده قانونلرک حاکمیت ملکیه سنه رعایت اولنور [۱].

رومانیاده اجنبیلر اهلیت شخصیه لرینه متعلق خصوصاتده، اخلاق و انضباط عمومی به مخالف اولماق شرطیه، منسوب اولدقلری دولت قانوننه تابعدرلر. اموال غیر منقوله حقنده، اصحابی اجنبی دخی اولسه، بولندقلری محل قانونی حکمی جاریدر. رومانیه قانونی صورت صریحهده اموالک یالکیز غیر منقول قسمندن بحث ایتدیکندن بعض مؤلفلر قانونک بو سکوتی منقولاتهده شامل عد ایدرلر؛ بناء علیه بولرک رایججه، رومانیاده وفات ایدن شخصک، صفت تابعیتی نه اولور اولسون، متروکانی حقنده بولندقلری محل قانونی احکامی جاریدر.

اوپنچی قسمده بولان دولتر اجنینک اهلیت شخصییه سی
منسوب اولدقلری دولت قانونیه تعیین ایدرلر سده ، تبعه
محمیه دن و یا خود داخل ماکده ساکن ، شخاصدن برینک منفعتی
بوندن متضرر اولدینی حالدده قوانین محلییه ترجیح ایدرلر .
بوقسمه ، اسویچره ، المانیا ، اوستریا دولترلی داخلدر .

اسویچره ده هر شخصک اهلیت اشخصیه سی منسوب اولدینی
دولت قانونیه تعیین ایدر . مع مافیه ، قانون عمومی حکمنجه ،
اسویچره قانونی نظرنده اهلیت شخصییه یی حازر بولان برانچی ،
دولت متبوعه سی قانونی حکمنجه اهلیت شخصییه صاحبی اولسه
بیله ، تمهداتی ایفایه مجبوردر .

آلمانیا ده ایمپراطورلغه داخل اولان حکوماتک قوانین
داخلیه سی بربرینه بکزه مدیکندن بوراده یالکیز پروسیا قانونندن
بحث ایتک مناسبدر . پروسیا قانون مدنیسی حکمنجه هر
شخصک صفت و اهلیت شخصییه سی دولت متبوعه سی قانونیه
تعیین اولنور ، بوندن بشقه اقامتگاهنک بولندینی محل قانونی ده
شخصی هر کیتدیکی یرده تعقیب ایدر . پروسیا ده اوراده بولان
اشیایه متعلق مقاوله عقد ایدن اجنینک اهلیت شخصییه سی
مقاوله نك مرعیتته اے زیاد مساعد اولان قانون موجبجه تعیین
ایدیلر . اموال غیر منقوله بولندقلری محل و اموال منقوله
صاحبنک مقیم اولدینی محل قانونیه تابعدر . صاحبنک اقامتگاهی
متعدد و یا غیر معین اولورسه اموال منقوله ده بولندقلری محل
قانونیه تابع قالیر . مقاولاتده عقد قانونی معتبر ایسه ده ، بونلر

اموان غیر منقوله به متعلق بر حقك تعیننه تعلق ایستد کبری حالده
شکلاً اموالک بولندینی محل قانوننه موافق اولمق لازم کلیر .
اوستریاده هر کسک اهلیت شخصی سی منسوب اولدینی
دولت قانونیه تعیین اولنور . آنجق اوستریاده بولنان بر شخصی
قارشی بر اجنبی طرفندن اولنان تمهد ، مقاوله نك مرعیتنه اک
زیاده مساعد اولسنه کوره ، اوستریا ویا اجنبی قانوننه نظراً
معتبر طوتولور . فقط اوستریاده تبعه دن بری ایله بر اجنبی
بیننده عقد اولنان مقاولانده بلا استثنای اوستریا قانونلری
احکامی جاریدر . اموال منقوله ده استاتو پرسونله و اموال
غیر منقوله ده بولندقلری محل قانونلری احکامنه رعایت اولنور .



ایکنجی فصل

افرادک شخصه برینه متعلقه افرانوف قوانین

— ۱ —

نفوس و قوعاتی

نفوس و قوعتی Etat civil افرادک جمعیت میاننده مظهر اولدینی بالجمله احوالی اختوا ایدر . بواحوال زمان ولادتدن هذکام وفاته قدر تحولات عدیده و مهمه یه تابع اولدیغندن ، اراضیسینده ساکن اولان بتون اشخاص حقننده حق نظارتی حائز بولنان دولت ایله ، برچوق احوالده اثبات هویت ایتسی لازم کلن ، افراد ایچون یک زیاده شایان اعتدادر : اشته بوکا بناء بوکون نفوس و قوعاتنه هر پرده فوق العاده دقت او-
لتمقدردر .

نفوس و قوعاتی تولدات ، مناکحات ، وفیات و تبدیل مکان و قوعاتی شامل اولوب ، مأمورین ملکیه و یار و ساری روحانیه معرفتلیله یوریدیلیر .

ممالک شاهانه ده هر صنف اهالی کندیلرینی سبجل نفوسه قید ایتدیرمکه مجبور ، [۱] و کړک قید ایچون کړک نفوس و قوعاتی یوروتمک ایچون معاملات لازمه سنی ایفایه نفوس

[۱] سبجل نفوس نظامنامه سی ۲۹ مایس سنه ۱۳۱۸ برنجی ماده .

اداره عمومی سی مأمورد . فقط محلات وقراده تولدات ،
مناکحات ، وفیات و تبدیل مکادن عبارت بولان نفوس وقوعا-
تی معاملاتنی امام ، پاپاس ویا خاخام ایله میخترلر و طلاق وقوعاتی-
معاملاتی یا لکیز اماملر ایله رؤساء روحانیه طرفدن اجرا
ویو وقعاته متعلق علم و خبرلر بعده نفوس اداره عمومی سه-
اسرا اولنور .

ممالك شاهانده بولنان تبعه اجنبیهك نفوس وقوعاتی
حسوب اولدقلری دولت قونسلوسخانه سنده قید و ضبط اولنور-
سده . بونلر ایچون نفوس اداره عمومی سنده بشقه جه سجل
دنتلری [۱] طوتولور . شو حکم نظامی به نظراً ، اجنیلرکده
سجل عمومی به قیدلرنده برپاس اولوب ، کنیدیلرینک شو
صورتله قیدلری صفت تابعه تیرینه خلل کتیرمز .

« ممالك عثمانیه ده مقید اولوب ممالك اجنبیه ده موقتاً اقامت
ایدنلرک » نفوس وقوعاتی « سفارت ویا مهنپندرلر طرفدن ...
خارجیه نظارتی معرفتیه داخلیه نظارتیه تبایغ اولنور » [۲]
واورادن اصولی دائره سنده سجل نفوسه قید ایتدیریلیر .

تولدادن اثنای راهده سفینه دروننده وقوعبولان وقوعات
ایچون سفینهك سمت مقصودی نظر اعتباره آلییر ؛ وقوعات
حقنده قبودان طرفدن ایکی شاهد حضورنده تنظیم اولنان

[۱] نفوس نظامنامه سی : ایکنجی ماده .

[۲] نفوس نظامنامه سی : ۲۸ نجی ماده .

علم و خبر، وقوعاتك تعلق اولان كيمسه لر ممالك شاهانه ا-كله
لرندن برينه چيق-قلری حالد، اوراك ليمان اداره سنه، وبر
اجنبی لیماننه چيقارلرسه، اوراده بولنان سلطنت سنيه شهيدر-
خانه سنه اعطا اولنور .

طرف دولت عليه دن، شهيدر مثللو، نفوس وقوعاتى
طوتمغه مأمور كيمسه بولنمیان بربلده اجنيه ده بولنه حق عثمانيلر
متعلق نفوس وقوعاتى حقنده نه يولده معامله اولنه جغنه دائر
نظامنامه مجوث عنیده صراحت يوقسه ده، محل عقد قانونك
معتبر اولسی قاعده كليسه سنه توفيقاً، بوكی وقوعات ظم، و
ايتديكى يرده مأمورين محليه طرفندن قوانين محليه توفيقاً
يوريدليكى حالد حائر اعتبار اولسی ضرورى فقط بالاخره،
شهيدر كی، صلاحيتدار برعثمانلى مأمورينك وقوعات مذکور
يه متعلق اوراق رسميه يی تنظيم ايدن مأمورين اجنيه ك ما-
موريت وصفت رسميه لرني تصديق ايتسی ظنمز جه مقتضيدره



— ۲ —

املام مفقود

مفقود على الاطلاق بر محل معلوم ومعينه بولنمیان شخص
ايسه ده، اصطلاح شرعيده « شول غائب اولان كسه دركه
بولندينى مكاني وحيات ومانى معلوم اوليه . » [۱]

[۱] على حيدر افندی، رساله مفقود ۱۳۰۹ مسئله ۱ .

انتقال و هبه صورتیله حاصل اولان حقوقدن مفقودك حق استفاده سی اوله میوب ، چونكه بو حقوقه نائیت بونلردن مستفید اوله جق کیمسنه نك بتون وجودینه وابسته در. مفقود وقت فقدی ایله موتنه حکم اولندیفی زمان آره سنده مرور ایدن مدته وفات ایدن مورثه وارث اوله من ؛ کندیسى ائسای فقدنده وفات ایتش کی عد اولنور . مفقودك وفاتنه ایسه حین ولادتندن اعتباراً طقسان یاشی اکمال ایتدکن صکره حکم اولنور . وفاتنه حکم لایق اولمیان برمفقودك زوجہ سی زوج آخره وارہ من سده ، حکمك لحوقدن صکره زوجة مفقود عدتی بالاکمال زوج آخرله ازدواج ایدہ بیلیر [۱] فرانسه قانونی بر شخصك فقدندن اعتباراً کچن زمانی اوج دوره تقسیم ایدیور : برنجیسندہ فقد تخمین ، ایکنجیسندہ اعلان اولنور . اعلان اوزرینه ورثه مفقود اموال متروکده موقداً حق تصرف احراز ایدر . اوچنجی دورده ، حین فقددن اعتباراً اوتوز ویا مفقودك زمان ولادتندن اعتباراً یوز سنه مرور ایتش ایسه ، ورثه نك حق توارثه قطعی دینیلیر . مع مافیه شو حال مفقودك عودتندہ ورثه یدندہ کی اموالک کندینه اعاده وتسلیمنه مانع اولماز . انتقال و هبه دن مفقود استفاده ایدہ من . مفقودك وفاتی ثابت اولدجه زوجہ سی زوج آخرله ازدواج ایلیه من . طرفندن بر وکیل اور براقان کیمسه نك غیوبتندن صکره اون و وکیل براقیان بر شخصك

[۱] علی حیدر افندی ، رساله مفقود ، مسئله ۳۵ .

غیوبتدن صکره درت سینه مرورنده مفقود اولدیغنه حکم اولنور .

ایتالیا قانونی نظرند بر شخص وکیل امور بر اقوب بر اقامه دیغنه کوره کندیسندن آلان صوک خبر تار یخندن اعتباراً اوچ ویا آلتی سینه مرورنده مفقود عد اولنور .
فلمنک قانونی حکمنجه مفقودک حین غیوبتدن اعتباراً بش ویا اون سینه مرورنده محکمه وفات ایتمش عد اولنمسه قرار ویرر . غیوبتدن اون سینه صکره زوجہ سی محکمه جانبندن ایدیلان اوچ دعوت نمره سر قالدینی حالد زوج آخر ایله ازدواجه ماذونیت استحصال ایدر .

پروسیه ده مفقودک غیوبتدن ویا کندیسندن آلان اک صوک خبردن بالاعتبار اون سینه مرورایتدیکی حالد اقرباسی محکمه یه بالمراجعہ موتی حقند برقرار استحصال ایدر لر .
بو قرار اوزرینسه شخص مفقود متوفی عد اولنوب ترکہ سی اجرا اولنور .

اوستریاده شخص مفقودک موتنه حکم اولندقجه اموالی بروسی معرفتیه اداره ایتدیریلیر و کندیبی سائر مورثلرک متروکاتی توارث ایدر . مفقود طقسان یاثنی تجاوز ایدوبده صوک اون سینه ظرفند کندندن خبر آلتمزسه ، اوتوز سینه حیات و مماتی مجهول قایرسه ، میدان حربده مجروح ویا قضا زده برسفینه دروننده بولندینی معلوم ایکن کندندن اوچ سینه مدت خبر ظهور ایتمزسه موتنه حکم اولنور .

روسیه ده بر شخصك غیوبتده علاقه دار اولان کیمسه لر
محکمه یه بالمراجعه مفقود عد اولمنسی طلب ایتملی اوزرینه
محکمه جه اوچ دفعه اعلان اوله رق اموالک اداره نه بروکیل
تعیین اولتور . بوندن بش سنه صکره ینه علاقه دارانک مرا-
جعتی ایله محکمه جه تکرار اوچ دفعه اعلاندن و تحقیقات اجرا-
سندن صکره مفقود اولدیغه حکم اوله رق اموالی ورثه سی
یپینده تقسیم ایدیلیر . و زوجیه سی زوج آخرله ازدواجنه
رخصت استحصال ایلر . اهستان ایله بالمطق ایالاتی بو اصول
خارجنده در .

انکلترده یدی سنه بلا خبر قالمش اولان بر شخص مفقود
وفات ایتمش حکمنده طوتیله رق ورثه سی وارداتی جبات
و صرف ایدر ؛ غیوبتدن اون اوچ سنه صکره اموال منقوله سی
و بوندن التی سنه یعنی غیوبتدن اون طقوز سنه صکره اموال
غیر منقوله سی اوزرنده ورثه سی حق تصرف احراز ایلر . بو
اصول بض مرتبه تعدیلات ایله اسقوجیاده جاریدر .

شوکوریلن تخالف اصول بوبابده بر طاقم اختلاف حصوانی
بادی اولور . مثلاً فرانسه ده مقیم و اوراده املاک و اموال
صاحبی بر فلمنکلی گنندن هیچ برخبر اولمقسزین بش سنه مدت
غیوبت ایتسه بوبابده فلمنک و یا فرانسه قانونلرندن هانکیسنک
معتبر اوله جقنی تعیین ایتمک لازم کلیر . حال مفقودیت شخص
مفقودک احوال مدنیه سندن اولوب کندیسیده میدانده اولدیغندن
حقوقی نوعما معطل قالمش ، ترکه سی میدانده چیقمش دیمکر .

اختلاف قوانین متعلق قواعد نظریه به نظر آ ، فرانسه نك منافعی
 اخلاص ایتمد کجه ، بو خصـوصه فلنك قانونی تطبیق ایتمك
 مقتضیدر . آنجق ، ثروت عمومی مملکت افرادك ثروت شخصی لرینك
 هیئت عمومی سندن متشکل اولدیغی جهتله ، ثروت شخصی نك
 سوء اداره ایله محو و تلف اولماسنه دقت ایتمك دولتك جمله
 وظیفندن اولدیغندن حال فقدك مدت تخمیننده شخص مفقودك
 اقامتگاهنك و یا اموالنك بولندیغی محل یعنی مثالزه کوره فرانسه
 محکمه سی اموالك محافظه سنه متعلق تدابیر اتخاذیله اشتغال
 ایتمك ایجاب ایلر . مع مافیة علاقه دارانك مراجعتی ایله فرانسه
 محکمه سی فقه حکم ایتمکله بو حکمك ورثه نك شخصلرینه تأثیری
 قطعی اولمز . مفقودك زوجہ سی فلنك قانونی حکمنه توفیقاً
 فرانسه ده ازدواج ایدمز ؛ چونکه بو حرکت فرانسه نك احکام
 قانونیه سنه مغایر اولدیغی ایچون انضباط عمومی دولی اخلاص
 ایدلمش اولور .

حاصلی ، حال مفقودیته حکم ایتمك مفقودك اقامتگاهنك و یا
 اموالنك بولندیغی محله عاندایسه ده بونك ورثه حقنده کی تأثیری
 دولت متبوعه قانونی ایله تعین ایدر و انضباط عمومی دولی به موافق
 اولق لازم کلیر . بناء عایه مثالزده کی شخص مفقودك فرانسه ده
 بولنان اموالنك تمتعندن صورت استفاده ایله ورثه نك کیفیت
 توارثلرینی تعیین ایدن فلنك قانونیدر .



افرادك عالمه ايله اولاره مناسبانه متعلقه مختلف قوانین

اوچنچى فصل

— ۱ —

نظام

نكاح احوال حيايه مدنيه نكاح اهميتلي سيدر عالمه ومناسبات عالمه نكاحله حصول بولور. بونك ايچون نكاح هر مملكتده و هر زمانده مساعده تحتنده بولمشدور. ممالك مختلفهده نكاحك اجنيلره شامل بر مساعده اولديني قسديق ايدلمكده برابر، بو باده كي احكام قانونيه نكاحك قبوليتنه، مراسم عقدينه و تاثيرات قانونيه سنه متعلق و يا ابطالاني موجب اولان جهاتده بردكدر. هر مملكتك قانوننده بوسيله بر طاقم مغايرت موجود اولديغندن وزمانزده بين الاقوام نكاحلر كثير الوقوع اولديني كي طرفينك قوانین شخصيه سني و يا خود صاحب ملك اولان دولتك قانونلريني ترجيحاً تطبيق خصوصني تعيين ايلكده مقتضى بولنديغندن، كل يوم اختلاف اكسيك اولمز.

نكاح ديني و مذهبي Mariage religieux و يا خود مدني Mariage civil قسملرينه تقسيم اولنور.

احكام دينيه يه توفيقاً مأمورين روحانيه جانبدنن عقد ايديلنلره نكاح ديني و مذهبي تسميه اولنور؛ مأمورين حكومت طرفندن موقع

لازمند. عقد اولثان نکاحه نکاح مدنی اطلاق اولتور. قتولیک مملکتلرده اکثریا نکاح مذهبی جریان ایدر. نکاح مذهبینک جریان ایتدیکی مملکته طلاق نادرأ جاری اولور. بعض مملکتلرده وعلی الخصوص پروتستان مملکتلرنده نکاح مدنی جاریدر. نظر حکومته نکاح مدنینک معتبر طوتلسی خصوصنده واولا- دک مشروعت و صحت وراثتلی ایچون مأمورین روحانیه نک مداخله سنه احتیاج یوقدر، طرفین نکاح عقدینه مأذون اولان کیمسه نک حضورینه کیده رک بونکاحی عقد ایدر لر. بواصولک جریان ایتدیکی محله طلاق جاریدر. وطلاق ده نکاحی عقد ایدن مأمور حضورنده اجرا ایدیلر. نکاح مذهبی قبول ایدیلن ممالکده طلاق احکام مذهبییه ده معلوم و معین اولان اسباب و شروط مخصوصیه تابعدر.

طلاق مسئله سنده اوروپاده *séparation de corps* دینیلن افتراق مادی و یا خود تفریق احوال و ابدان *séparation de corps et de biens* صورتلری ده واردر.

نکاحک شرائط اساسیه سی — مملک شاهانه ده اهالی اسلامیه نکاح شرعییه و تبعه غیر مسلمه کندی مذهبلیری موجبنجه نکاح مذهبییه تابعدر لر. بین الاسلام نکاح شرعی ملل غیر مسلمه ده جاری اولان نکاح مذهبین بستیون فرقلی و نکاح مدنییه مملک و قریبدر. ذالما دین اسلام رهبانیتی قبوله ایتماش اولدینی جهته عندالاسلام مأمورین مذهبییه اولمديغندن نکاحک عقدی ایچون بشقه سنک مداخله سنه لزوم اولیوب.

طرفینک ایجاب و قبولی ، مهرک تعین و شهود مقتضیه نک وجو-
دی ابله عقد صحیح اولور . جمیعت عقدده محله اماملری یالکاز
امور عقدده حکومتک نظارتنه دلالته مکلف بر مأمور صفتیله
بولورلر . نکاح ایچون طرفین حقنده اذن ولی انجق صغرسن ،
جنت ، رق یعنی مملوکیته حائلرنده لازم [۱] اولوب ، بودن
بشقه احوالده ولینک اذننه احتیاج یوقدر . عقدک انفساخیله
طرفین تکرار نکاحه صالح اولور .

ممالک شاهانهده متمکن تبعه اجنبیهیه کانیجه طرفین بردالت
تبعه سندن بولندیقی حالده بولنرک ازدواجلری دوات متبوعه لری
قوانیننه توفیقاً قونسلوسلری معرفتیله اجرا اولنورسهده ، مخاف
دولت تبعه سندن بولنانلرک ویخود قونسلوسنه عقد نکاح
مأذونیقی ویرمیان بردوات تبعه سندن اولانلرک نکاحلری
منسوب اولدقلری مذهبک تبعه عثمانیه دن بولنان مأمورین
روحانیه سی معرفتیله و ممالک دولت عالیده من القدیم جاری
اولان تعامله توفیقاً عقد اولنور . نکاح برنوع مقاوله دیمک
اولوب ، مقاولانک ایسه عقد اولدقلری محللر قوانیننه مطابق
اولسی لازم کلدیکندن ، بوراده عقد اولنان نکاحلرده . جماعات
غیر مسلمه حقنده نکاح خصوصنده قانون مخصوص اولمدینی حمتله ،
قانون محلی دیمک اولان تعامله موافق اولدینی حالده هربرده
مقبول اولمق طبعیدر .

فرانسه قانون مدنیسی حکمنجه ارکک ۱۸ قز ۱۵

[۱] المجموعه الزاهدیه فی الاحکام الدینیة؛ جزو ثانی، صفحه ۶۰

یاشنی اکمال ایتدیکجه تأهل ایدمز . بوسندن دون اولان ارکک و قزلرک نکاحلری باطل و مناسبتلری غیر مشروع عداولنور . سنی ۲۵ دن دون اولان ارککلرله هنوز یکرمی بر یاشنه کلامش اولان قزلر قبل ازدواج ولی یا اقربالرینک مساعده سنی استحصاله مجبوردرلر . بوسنه وارینان کیمسه لرا کر اذلتلر ازدواج ایدرلر سهینه نکاح باغلدلر . اولجه موجود اولار نکاح فسخ اولندیکجه هیچ کسه بشقه بر نکاح عقد ایدمز . تعدد زوجات جائز دکلدر ؛ حتی ممنوعیت اودرجه ددرکه فر نهدن غیرى بر ملدکه نکاح مکرر صاحبی اولان کیمسه نك برنجی نکاحندن صکره کی نکاحلری باطل و اولادی غیر مشروع فرض ایدیلیر و مکرر نکاح عقد ایدنلر حقنده ترتیب مجازات اولنور . شو قدرکه نکاحک فسخندن صکره تکرار عقد نکاح ممکندر . قادینلر فسخ و وفات صورتیله طلاق و زوال نکاحدن بالاعتبار اون آی استمار ایتدیکجه مجبوردرلر . بعض اقربا بیننده ازدواج ممنوعدر آنجق رئیس حکومت اوچنجی درجهیه قدر قرائی اولانلرک ازدواج ایدمیلرلرینه احوال فوق العادهده مساعده ایدمیلیر .

اوستریاده اون درت یاشندن اول کرک ارکک کرک قز ایچون تأهل ممنوعدر . سنی ۲۴ دن دون اولانلر اقربا و ولیلرینک موافقتی استحصال ایدرلر . اقربا و ولیلر کندیلرندن طلب اولنان موافقتی سبب معقول بیان ایتدیکجه اعطا ایتدیلرسه محکمهیه مراجعت اولنه بیلیر . عسکر رتبهجه مافوق اولان ذاتک مسا-

عده سه محتاجدر . خط م - تقیم اوزره مشروع و غیر مشروع
 بالجمله اقربادن دردنجی درجه قرابته قدر اولانلر بیننده نکاح
 جائز دکلدر . خرسیتیانلر اوسه - تریانه غیر عیسوی ایله تأهل
 ایده مزلر . مأمورین روحایه دن بیوک رتبه ده بولنانلر ایله
 اولنماکی نذرایتش اولان راهب و راهب لر تأهل ایده مزلر .
 مناسبات غیر مشروع و دن صکره بوفعلده بولنانلرک بربرلریله
 ازدواج صلاحیتلری یوقدر . اگر زوج و یا زوجه دن بری
 مناسبات غیر مشروع و ده بولندیفی کیمسه ایله تأهل ایتک ایچون
 یکدیگرینک حیاته قصد ایتش بولنسه مؤخرأ مقصودینه ینه
 نائل اوله من . طلاقله آیرلش بر کیمسه طلاقک وجوده کلشنه
 سبب و یرن بر کیمسه ایله ازدواج ایده من . ایکنجی بر نکاح ایچون
 زوجه طلاقه حامل ایسه وضع حملدن صکره تکرار ازدواج
 ایده بیلیر . بعد الطلاق حامل اولدیفی اهل خبره معرفتیله تعین
 ایدن قادینلر بتکرار نکاح ایچون اوج وحلی مشکوک اولان
 انات آلتی آی انتظار ایدر . موسوی مذهبنده بولنانلر ایچون
 برادر و یا همشیره زاده سی و یا ونلرک اولادی ایله ازدواج ممنوعدر .
 طول قلان زوج زوجه متوفیه سنک همشیره سنی و خط مستقیم
 اوزره اولان اقرباسنی تزوج ایده من ، زوجه ده متوفی زوجنک
 برادری و خط مستقیم اوزره اولان اقرباسی ایله تأهل ایده من .
 اسپانیاده سن تأهل ارکک ایچون ۱۴ ، قز ایچون ۱۲ دره
 ارککلر ایچون ۲۳ و قادینلر ایچون ۲۰ یاشنه قدر اقربا و ولیلر -
 ینک موافقتی لازمدر . موافقت استحسانه مجبور اولدقلری

حاله قصور ایدہ رک تاهل ایدنلر آلتی آیدن بر-نہ یہ قدر حبس
ایله مجازات اولنور . خط مستقیم اوزره ویا خود دردنجی درجہ
قرابتہ اولانلر بیندہ نکاح جائز دکلر . دعی اتخاذا اولنان
برچوجق ایله پدر مغویسی آره سندہ ویا پدر مغویسک سائر
اولاد مشروعه سی آره سندہ نکاحہ مساعدہ اولنہ . مناسبات
غیر مشروعه ن دولای محکوم اولانلر بربرلیله ازدواج
ایدہ منزل .

انکلتزده ارکک ۱۴ ، قر ۱۲ یا شندہ تاهل ایدہ بیلیر . ۲۱
یا شندہ قدر عقد اولنہ جق نکاح ایچون افریاک مساعدہ سی استحصال
اولنق لازمدر . موجود نکاح فسخ اولنمینجه دیگر بر نکاح
عقد اولنہ من خط مستقیم اوزره اولان قرابتلر ایله اوچنجی
درجہ قرابتدہ نکاح جائز اولنہ ماز . اقوجیاده سن ازدواجہ
واصل اولانلر ایچون موافقت افریایہ محل یوقدر .

المانیاده سن تاهل ذ کورده ۲۰ وائاندہ ۱۶ در ؛ ارکک
ایچون ۲۵ وقرایچون ۲۴ یا شندہ قدر موافقت اقریایہ تحت لزیمتدہ در .
پدرک وفاتندہ والدہ مک واکر چوجفک سنی ۲۱ دن دونایسہ
والدہ مک موافقتدن بشقہ وصینک دخی موافقتی شرطدر . یکرمی
بریا شندہ کلنجه تاهل ایدہ جک کینجک لک ازدواجلرینہ پدرلری
موافقت ایتمز و عندم موافقتہ سبب صحیح در میان ایلمز لرسہ
پدرلری علیهنہ محکمدہ اقامہ دعوی ایدیلہ بیلیر . المانیایہ
ایمپراطور لغہ داخل اولان حکومتلرک بعضی سندنہ دعی *Enfant*
adoptif قبول ایدن کیمسہ نک اولاد سیجی متاہ سندہ عدا اولنوب

حق پدرلری اولسه بیله المانیا قانونی اشوبدر مغویلرینی حقیقی پدرکی طانیدیغندن بوکی چوجقار پدر مغویلرینک موافقتی استحصال ایدرلر . بر نکاح موجود ایکن ایکنجی نکاح عقد اولنه من . خط مستقیم اوزره اولان اقربا بیننده و برده دعیلر ایله پدر مغوی آرهنده نکاح جائز دکلسه ده برادر و همشیره دن مانعا اقربا بیننده نکاح جاریدر . غیر مشروع اقربا بیننده ده مشروع اولان قرابتدن متحصل اقربا کی ازدواج ممنوعدر . قادینلر ایچون نکاح سابقدن صکره اون آی مدت انتظار ایتک لازمدر . شو تفصیل اولنسان احکام المانیا حکومتلرینک کافه سنده جاری اولمیوب حکومت مذکورده بو بایده قوانین داخلیه احکامی مرعیدر .

ایتالیاده سن ازدواج ذکور ایچون ۱۸، اناث ایچون ۱۵ در . ۲۵ یاشنده بوانیمیان ارککلر و ۲۱ یاشنده اولیان قزلر موافقت اقربابی استحصاله مجبوردرلر . برنجی نکاحک حین انفساخنده حامل اولان قادینلر وضع حمل ایتدکن صکره حق ازدواجه مالکدرلر . بوراده مدت انتظار یوقدر . چوجقارک ازدواجه بلا سبب موافقتدن امتناع ایدن اقربا عایینه چوجقار ، واکر اولنرسن رشده واصل اولما مشلرسه ، ولی ویا اقربالری ویا مدعی عمومی طرفدن اقامه دعوی اولنه بیلیر .

فلمنکده سن ازدواج ارکک ایچون ۱۸ و قزایچون ۱۶ در . سنی ۲۳ دن دوز اولان هر شخص پدر و والده سنک ویا خود یا لکتر

پدرینک و اگر پدری یوقسه والده سنک و پدری و والده سی اولمدینی
 حالده جد صحیحک و یا خود والده سنک پدرینک و پدرینک والده سنک
 و یا خود والده سنک و بونلر یوقسه و صینک موافقتی استحصال
 ایتک ایجاب ایدر. مناسبات غیر مشروع و محصولی اولان چو جقلر
 پدر و والده لرینک و یا یالکیز پدرلرینک و اگر پدرلری معلوم
 دکل یا جوجق رسماً استلصاق اولنماش ایسه یالکیز والده لرینک
 موافقتی استحصال ایدر لر ۰ مشروع و غیر مشروع بر چوجق
 پدری ، والده سی ، جدی ، جده سی و وصیسی یوق ایسه تأهل
 ایچوق قضا حاکمک موافقتی لازمدر. سنی ۲۳ دن دون اولانلر
 بوجبوریتیه تابع ایسه لرده ۲۳ دن ۴۰ یاشنه قدر بوجبوریت
 باقی و نقط معدلر، یعنی بومدت ظرفنده پدر و ولیلر مساعده دن
 امتناع ایدر لر سه او حالده قضا حاکمی طرفندن محکمه یه جلب
 اولنور و افاده لری ضبط ایدیلر . اقربا بنه عدم مساعده ده
 اصرار ایدر لر سه محکمه ده طرفینک اثبات وجود لری تاریخنندن
 اعتباراً آنتی آی صکره بلا رخصت ازدواج لری جائز اولور .
 یقین اقربا و برده مناسبات غیر مشروع ده بولنلر بیتند . نکاح
 ممنوعدر . طلاقله آیریلان زوجین تکرار بر بر یله ازدواج ایده مزلر
 قادینلر ایچون ایکنجی بر نکاح عقدی برنجی نکاحک زمان
 انفساخنندن اعتباراً اون آی مرورینه متوقفدر .

روسیه ده سن تأهل ارکک ایچون ۱۷ و قز ایچون ۱۶ دره .
 فقط سنلری تعیین اولنان درجه یه وارمغه هنوز ۶ آی قالمش
 اولانلرک بر بر یله تأهل ایتلمرینه اوتوردوقس راهباری طرفندن

مؤخرأً حکومت طرفدن امر مخصوص ایله مستاعده اولمشدره.
والده وولیرک انضمام موافقتلری لازمدیر. سنی سکسانی تجاوز
ایدنلر ایله موجود نکاحی هنوز زائل اولماش اولانلر و
اولجه اوچ دفعه عقد نکاح ایلیانلر آرتق تأهل ایدمزلر. سیاه
راهبلر تأهل ایدمز؛ بیاض راهبلر مرتبه روحانیه لری اولمادیقندن
تأهل ایدمبیلیرلر. دردنجی درجه قرابته قدر تأهل ممنوعدره.
Parrain دینیلان اسم بابا و آنالری ایله اولادیننده نکاح
اولمزم.

اسوچده ارکک ۲۱، قز ۱۵ یاشنی اکمال ایتلیدرکه
تأهل ایدمبیلسون. یالکز قزلر ایچون یکر می بش یاشنه کیرنجیه
قدر پدر ویا وایلرینک موافقتنی استحصال لازمدیر. زوجه
سنک وفاتی نارینخندن اعتباراً آلتی آی مرور ایتمیان ارککلر
وزوجنک ارتحالندن اعتباراً برسنه کچمیان قادینلر تکرار تأهل
ایدمزلر. مناسبات غیر مشروعهده بولنانلر بربرلیله ازدواج
ایدمیه جکلری کچی حبس ویا کورک جزاسی ایله محکوم اولوبده
هنوز اکمال مدت جزائییه ایتمیان مجرملرک تأهللری ممنوعدره.
دوغربدن دوغرییه اولان اقربا پیننده و دیگر اقربادن دخی
اوچنجی درجهیه قدر اولانلر اره سنده نکاح ممنوعدره.

اسویچرده یکر می یاشنه قدر اقربانک موافقتنی استحصال لازمدیر.
پدر ووالده نك فقدانی حالنده و سینک موافقتی لازم اولوب
آنحق وصی موافقتدن امتناع ایلدیکی حالده حقنده ادعا اولته بیلیر.
یکرمی یاشندن صکره موافقت اقربایی استحصاله حاجت یوقدره.

نظامك و اسم فراموشی — عقد نكاحه متعلق اولان
 مراسم حيله و فسادہ میدان و یرمیه جك و حكومتجه افراد
 اهالیك وقوعات مدنیه سنه اطلاع حصولی تأمین ایدہ جك
 تدبیردن عبارتدر .

بوتدیرلر ممالك شاهانه ده اهالی مسلمہ و جماعات غیر مسلمہ
 منا کحاتی ایچون اذنامه اعطاسیله تأمین ایدلمشدر، که بو اذنامه لر
 محاکم شرعیه دن ورؤسای روحانیه جانبلرندن و یریلیر و بونك
 اوزرینه منا کحات اجرا اولنور . عقدك وقوعندن اعتباراً
 نهایت اون بش کون ظرفنده عقدی اجرا ایدن امام و رئیس
 روحانی بو کادائر نفوس اداره سنه بر علم و خبر و یرمکه مجبور [۱] در .
 بو علم و خبره ازدواج ایدنلرک اسم و شهرت و سن و صنعت و محل
 تولد و اقامت لر یله پدر و والده لرینك و کیفیت عقدہ شهادت ایدنلرک
 اسم و شهرت و سن و صنعت لری و منسوب اولدقلری جماعت و محل
 اقامت لری درج ایدیلیر . نكاح و وقوعاتنی محتوی بوانان اشبو علم
 و خبرلره شهودك درجی منا کحاتك خفیاً جریاننه قارشی
 بر تدبیر مؤثر در .

فرانسه ده ازدواج ایدہ جك اولانلرک کرک کندیلرینك کرک
 ازدواج خصوصنده تابع بولندقلری کسه لرک اقامتگاه
 و یامسکنلرینك بولندینی بالجمله نواحیده برهفته فاصله ایله ایکی دفعه
 اعلان اولمق، ایکنجی اعلاندن صکره لا اقل اوچ کون مروریله
 اوسنه ایچنده عقد اجرا ایدلمك و طرفیندن برینك مقیم بولندینی

[۱] نفوس نظامنامه سی . ۳۲ نجی ماده

نواحیدن برینک مدیری معرفتیه مدیریت دائره سنده و درت شاهد حضورنده عقد اولنمق مقتضیات قانونیه دندر. بو عقد نظر حکومتده مقبول اولان نکاح مدنی اولوب، بونک اجرا سندن مکره طرفین، آرزو ایتدکلی حالده، نکاح دینی ده اجرا ایده بیلیرلر.

انکلتیره بوندن مقدم بالمله مناکحات منحصرأ آنغلیقان کلیسالرنده و نکاح مذهبی صورتنده اجرا اولنوردی؛ آنجق ۱۸۳۶-نه سندن بری نکاح مدنی ده قبول اولندیغندن آنغلیقان کلیسالرینه تعلق ایدن شو انحصار اورتدن قالقدی. مذهبی ویا مدنی هر نکاح عقد اولنه جنی محله برر هفته فاصله ایله اعلان اولنمق واشو اعلان حقنده اورانک پایاسی ویا نفوس مأموری طرفندن ویریه جک علم و خبرک زمان اعطاسندن اعتبارأ اوج آی ظرفده اجرا قلمق مقتضیدر. بوندن بشفه انکلتیره ده نکاحلر اوج قسم اولوب، برنجیسی آنغلیقان مذهبنده بولانلره مخصوص نکاح مذهبدرکه بوکا مأمورین حکومت مداخله ایتمز؛ ایکنجیسی نکاح مدنیدرکه نفوس مأمورینک وایکی شاهد حضورنده طرفینک بیان موافقت ایلرله منعقد اولور؛ اوچنجیسی ده مذهب رسمی به تابع اولیانلره مخصوص نکاح مذهبدرکه بو مذهب مجدلرینک برنده و نفوس مأموری ایله ایکی شاهد حضورنده عقد اولنور. اسقوچیا ده نکاح اصولأ اعلان اولندقدن و طرفین اوراده آلتی هفته اقامت ایلدکن سوکره عقد اولنورسده، بعضأ

طرفینک یا لکز بیان موافقت ایلمر یلده منعقد اولوب ، فقط اشو بیلمک بر حاکم ویا رئیس روحانی و یا خود ایکی شاهد حضورنده اولسی مقتضیدر . — ایرلانداده آنغلیقان مذهبنده اولانلر ایچون انکلتزه ده کی نکاح مذهبی و مذاهب سائره اربابی حقنده کندی احکام مذهبی لرینه کوره نکاح مذهبی جاریدر .

آلمانیا ده نکاح مدنی مجبوریدر . یا لکز بردفمه اعلانی کافی اولوب ، بعضاً نفوس مأموری بلا اعلان عقد نکاح ایده بیلیر . طرفیندن : بنک اقامتگاهی ویا مسکنی بولنان محکم نفوس مأموری ایکی شاهد حضورنده و طرفینک اولیا و اقربالرینک موافقتلرینی محتوی اوراقک ابرازی اوزرینه نکاحی عقد ایدوب ، عقد نامه یه طرفینک منسوب بولندی مذهب درج و علاوه ایدر .

اوستریا ده طرفینک منسوب بولندی مذهبک مأمور روحانیسی عقد نکاحدن ، هر نه سیله او اور ایسه اولسون ، امتناع ایتدیکی حالده مأمورین مدیکه نکاحی عقد ایتدکاری کی ، طرفین حکومتجه رسماً معروف مذاهبدن برینه منسوب اولمزه حق لرنده نکاح مدنی مجبوریدر . — مجارستانده ، طرفینک منسوب اولدینی مذهب مأمورین روحانیه نک مداخله سنه لزوم کوستردیکی حالده ، نکاح مطلقاً مذهبی اولمق لازم کلیر .

اسپانیاده طرفین نکاح مذهبی ویا مدنی بی ترجیحده مختار

اولوب یا لکز مذهبی نکاح عقد ایدنلر سکز کون ظرفنده نفوس دفترلرینه وقوعاتلرینی قید ایتدیرمکه مجبوردرلر ؛ بوکا رعایت ایتیملر جزای نقدی به محکوم اولورلر . نکاح مدنی عقدنده جاری اصول فرانسه اصولنه مشابه اولوب ، فقط ایکی شاهد کافیدر ونکاح ورقه سنی مأمور مخصوص ایله برابر طر-
فین وشاهد لر امضا ایدرلر .

شمالی آمریکا حکومت متحده سنده نکاح خقنده قانون مخصوص اولمیدیفندن عرف محلی به رعایت اولتور . نکاح وجود بولمق ایچون طرفینک ، هر نه صورتله اولورسه اولسون ، حصول موافقتی کافی وبونک ایچون هر نوع دلیل واماره مقبولدر ؛ حتی ، عکسی ثابت اولمقدیجه ، برلکده اقامت نکاح ایچون دلیل قویدر .

یونانستانده هر مذهبک مأمورین روحانیه سی عقد نکاحه مأذون ایسه ده ، طرفین مختلف مذهبده بولندقلری حالده ، چوجقلر ابویندن اورتودوقس مذهبده بولنانه تبعاً اورتودوقس اولمق شرطیله ، نکاحک بهمه حال روم کلیسایسنده عقدی مقتضیدر .

ایتالیاده نکاح مدنی فرانسز اصولنه موافق بر صورتده جاریدر ؛ طرفیندن برینک اقامتگاه ویامسکنتک بولندیفی محکم نفوس مأموری بولردن برینک خانه سنده وایکی شاهد حضورنده نکاحی عقد ونکاح ورقه سنی تنظیم ایلر .
فلنکده نکاح معاملاتنه متعلق اصول فرانسه اصولنه

مشابه اولوب ، يالکیز احوال فوق العاده ده حکمدارک مسا-
عه سبله طرفین نامه وکیل بولمق جائزدر .

پورتوغالده قا تولیکلر ایچون نکاح مذهبی و ادیان سائرده
منسوب اولانلر ایچون نفوس مأمورلری معرفتیه نکاح مدنی
عقدی مجبوریدر .

روحیه ده اورتودوقس مذهبده بولنانلر نکاح مذهبی عقد
ایدوب کیفیت کلیسا دفاترینه قید اولور ؛ مذاهب سائرده
اولانلر ده منسوب اولدقلری مذهب احکامنه توفیقاً نکاح مذهبی
عقد ایدرلر سده ، بولنلر ایچون نکاح مدنی ده جائزدر و احوالده
نکاح ایکی شاهد حضوریه شهرلرده پولیس مدیری و قریه لرده
کوی کهیاسی (اختیاری) معرفتیه عقد اولور .

دائیمارقه ده طرفین نکاح مدنی و یا مذهبی بی ترجیحده مختار
اولوب حکمدار طرفیندن برینک اقامتگاهنده عقد نکاحه مساعد
ایده بیلیر . — نور و چده مذهب رسمی اولان لوتریان مذهبده
بولنانلرک نکاحی زوجه نک اقامتگاهی کلیسا سنده پاپاس معرفتیه
عقد اولنوب ، مذاهب سائرده دن اولانلر مقاولات محرری معرفتیه
عقد نکاح ایده بیلیرلر . — اوجده لوتریان مذهبده بولنانلر
ایچون نکاح مذهبی مجبوری و عقد نکاح دن اول اوج بازار
کلیساده اعلان کیفیت مقتضیدر . مذاهب سائرده منسوب
اولانلر کندی مذهبلرینک مأمورین روحانیه سی معرفتیه نکاح
مذهبی و یا مأمورین ملکیه معرفتیه نکاح مدنی عقد ایده بیلیرلر .
طرفیندن هیچ بری مذهب رسمی به تابع اولمزه و یاری موسوی
اولور سه نکاحک مدنی اولسی مجبوریدر .

صربستانده ایکی ویا خود اوچ شاهد حضور یله نکاح مذهبی

جاریدر .

اسویچرده عقد نکاح ایله وقوعانک نفوس دفترلرینه
کچیراسی صلاحیتی مأمورین ملکیمه عائد اولوب ، بویله اولیان
ازدواجلرده مأمورین روحانیه نکاح مذهبی عقد ایتملی
منوعدر .

ازدواجک زوجین ایله اولادک مناسبات شخصیه نه تأثیری .
— هر بر مقاوله بر حق و وظیفه احداث ایتدیکی کبی ،
ازدواجده بر طرفدن زوجیه یکیکرینه و دیگر طرفدن
نکاحک محصولی اولان چوجقلره قارشی بر طاقم حقوق ووظائف
میدانه کتیررکه ماهیت وصور اجراییه سی هر ملکیتک قانونلرینه
کوره تخالف ایدر .

نکاح شرعیده زوجیه سنه حسن معامله و معاشرت ایتک
زوج اوزرینه و زوجک موافق شرع اولان امرینه اطاعت
ایلمک زوج اوزرینه واجبدر . زوج زوجیه سی حمایه و انفاق
ایدر و اوکا مسکن احضار ایلر ؛ زوج اوزنک مالیه مقید
و منزله ملازم اولور [۱] .

چوجقلردن ارککلرک حد کسبه قدر وقیزلرک ازدواجه
قدر انفاقی پدره عاندر . پدر بوکا موفق اوله میه جق درجهده
فقیر ووالده حال یسارده بولنورسه والدهنک چوجقنی انفاق
ایتمسنه حکم اولنور [۲]

[۱] محمد ذهنی افندی ؛ نعت اسلام قسم ناک ۱۳۲۴ صحیفه ۱۱۲

[۲] « ۱۲۰ » « » « »

اولادینی تربیه و تعلیم ایتمک پدره لازم اولوب ، چو جنی
مکاتب ابتدائیه سوق ایتمک پدر ایچون مجبوریّت قانونیه
تحتّمده در [۱] .

فرانسه ده زوجین یکدیگره صداقت و معاونت ایتمکله
مکلفدر . زوج زوجهنی حمایه به ، زوجده زوجنه اطاعت و
بینلرنده افتراق واقع اولماش ایسه برلکده اقامته و زوجی نرده
اقامتگاه انتخاب ایدرسه اورابه کیتیمکه مجبوردر . بوکا مقابل زوج
زوجهنی خانه سنه قبول و لوازم معیشتی تأمین ایلمکه مجبوردر .
زوجهنک حضور محکمه ده اقامه دعوی ، فراغ و هبه و تفرغ
خصوصاتنده زوجنک و یا اداره دلیله نک مساعدت مخصوصه سی
اقتضا ایدوب کندیلکندن بو معاملاتنی اجرا ایده منر . بو بایده
فرانسه قانونی قادینلر حقنده براز شدتلی طاورانش و جمیّت
یشریه افرادندن بولندقلربی تسلیمده تردا ایدره ک ، کندیلربنک
حقوق طبعیه دن اولان تصرف حقنی بعض قیوده تعلیق
ایلمشدر . فرانسه ده واضع قانون قادینلر ضعیف العقلدر ، معاملا
نده صاحب عقل و ادراک بر ارککک نظارتی تحتّمده بولنملری
اقتضا ایدر یولنده ملاحظاته ذاهب اولمشدر .

صداقت و معاونت و زوجیله برلکده اقامت ، حمایت و اطاعت
و چو جقلر حقنده تربیه و نظارت جهتملری هر عیلمک قانوننده
صورت مختلفه ده احکامه تابع ایسه ده ، بونلرک یالکزر درجه سیله
وسائط تأمینیه سی تنوع ایدر ، یوقسه ده اساسده کلی فرق
کورولمز .

قادینلرک حقوق عدایه دن محرومیتلری قواعدی هر مملکتده
 بردکلدرد. بویاده باشلیجه اوج اصول واردرد. روسیه، اوستریا،
 نوروج ایله بر درجهیه قدر المانیسا قانون جدیدینک تابع
 اولدینی برنجی اصولده زوج رئیس عائله اولوب بوصفله زوجہ
 سنه حق تقدیمی حائزایسده زوجہنک صلاحیتی محدود دکلدرد؛
 قادین زوجنک مساعده سنه محتاج اولمق سزین املاک تصرف
 ومقاوله عقد واموالی فراغ وهبه ایدر وحضور محاکمه اقامه
 دعوی ایلر. علم حقوقجه اک محق اولان صورت بودر. چونکه
 زوج وزوجه بینده کی روابط معنویه بونلرک حقوق انسانیه سنه
 اجرای تأثیر ایتماک لازم کلیر. شریعت اسلامیہ احکامی ده
 بو مرکزده در. ایکنجی اصول آمریقا وانگلترده جاریدر.
 لکن شدتی اورالرده اکلاشلدیقندن پی در پی اوشدت تناقص
 ایتکده در. بواحوالده ذات الزوج اولان برقادینک قانون
 نظرندہ اولان شخصیت عدایه سی زوجنک شخصیتله متمیز
 اوله رق کندیسنک صلاحیت شخصیه سی قالماش عدایدیلیر.
 بواحوالده برقر یوم ازدواجنه قدر مالک اولدینی بالجله اموال،
 ازدواجی آندن اعتباراً، زوجنه کچر، یالکیز زوجنک نامه
 ویاخود اونک موافقت مخصوصه سیله اقامه دعوی ایده بیلیر.
 اوجنجی اصول دیگر ایکی اصول بینده متوسط اولوب بونده
 زوجہنک صلاحیت شخصیه سی وارسده زوجنک مساعده سی
 اولمق سزین هیچ بر معامله ده بوانه من. فرانسه، بلجیقا، ایتالیا،
 اسپانیا حکومتلرله اسویچر ده چنوره قضاسی وروسیه ده فنلاندیا

قطعه سی بواسطه تابعدر. ذات الزوج بر قادیك اموال و املاک
وارد و زوجه ازدواج ايله انتقال ایتز. آنجق کندیسنه
عائد اولان شیردن دولایي رأساً محکمه یه مراجعت ایدم من.
مع مافیه بومملکتلرک کافه سنده بواسطه تطبیقاتی بر طرزده
دکدر؛ فرانسه ده زوجه هر معامله ایچون زوجدن آری
آری مساعده آلمغه مجبوردر. حالبوکه ایتالیه ده، اسپانیه ده
زوج طرفدن زوجه سنه بالجمله معاملات شامل اولق اوزره
عمومی برمساعده و یرمک کفایت ایدر.

ابوینک اولاده قارشی وظائفی ده ممالک مختلفه ده احکام
مختلفه قانونیه تابعدر. فرانسه و ایتالیا قانونلری چوجقلره
استقباللرینک تأمین ایچون پدر و والده لرینه قارشی حق اجبار
و یرمن. اوستریاده برقر کندیسنه مخصوص اموال و ثروتی یوقسه
کندیسنه جهاز اعطاسنه پدرینی اجبار ایده بیلیر. پروسیاده
برارکک چوجق باباسندن کندیسنه ایراد تأمیننی طلب ایده بیلیر.
چوجقلرک تحصیلی ایچون المانیا و فرانسه کی بعض مملکتلر ده
ابوینسه عائد اولان وظیفه احکام جزائی ايله تحت تأمین
آلنشددر. یعنی ابوین چوجقلرینی تحصیل ایتدیرمدکلری حالده
قانوناً مجازات کوررلرکه بو مجبوریت ممالک شاهانه ده تحصیل
ابتدائی ایچون موجوددر. ایتالیا و اسپانیا کی حکوماتده احکام
جزائی یوقدر، ابوین بحسب الابوه ساده بر مجبوریت مغنویه
تابع طوتولور.

شرعاً چو جقلمر دین خصوصنده خیر ابوینه نابعدرلر؛ نهام
عایه کتابیه تزوج ایدن بره - لملک صلبندن کلان چو جقلمر هپ مسلم
اولورلر . بونک کی اهل کتاب ایله اهل شرک آره - سنده
تولد ایدن چو جق کتابی اولور [۱] .

فرانسه وایتالیاده ابوین چو جقلمرینی استدکلمری مذهبه
تعلیم و تربیه ایده بیلیرلر . اوستریاده زوجین مذاهب مختلفه ده
اوله رق ، زوج قاتولیک ایسه اولادی ده قاتولیک اولور ویا ایکنز
زوج قاتولیک اولدیغی تقدیرده قزلر والدنه ک وار ککلمر پدرک
مذهبنده قالیر . روسیه ده زوجینک بریسی اورتودوقس اولدیغی
تقدیرده چو جقلمر بهمه حال اورتودوقس اولور .

— ۳ —

طریق ، افتراق ، فسخ نظام — طلاق Divorce ، فسخ
نکاح Annulation de mariage وافتراق Séparation دن
هر بری بشقه بشقه احکامه نابعدر . افتراق نکاحی ابقا
ایله برابر وابط معنویه دن غیری اولان رابطه لری منع ایدر ،
برلکه - یشامزلر . فسخ و طلاق نکاحی بتون بتون
الفا ایدر . طلاق اصوله توفیقاً عقد اولمش اولان بر نکاحک
رفع اولمسیدر . فسخ نکاح فساداً عقد اولنان نکاحک ابطال ایدر .
[۱] حاجی ذهنی افندی : نعمت اسلام ، قسم ثانی صحیفه ۱۰۸ .

افتراق، طلاق و فسخ نکاح ایچون ممالک مختلفه ده جاری اصول متوعدر . اوروپاده جاری اولان طرز افتراق ممالک اسلامیه ده غیر مرعی اولوب ، یالکز فسخ و طلاق صورتلری موجودر . شرعاً نکاحک فسادى شروطى جامع ولما مسيله در . شاهد سز اولان یا خود یا لکز بر شاهد و یا لکز طرفینک وکیللری حضورنده عقد اولسان نکاح فاسددر . بونک کبی مانع ازدواج درجه قرابتده بولنان برینی تزوج ایتک ، زوجینک بری دیگرینه مالک اولمق، زوجه اوزرینه اونک همشیره و یا یقین اقر باسندن برینی آلمق ، مدت عدت ایچنده بولنان بر قادین ایله ازدواج ایتک کبی احوال ده نکاح فاسد جمله سندندر .

نکاحک فسادى اکلا شلدینی حالده ، زوجین کندیا بکلرنندن مفارقت ایتمز لرسه ، یینلری تفریق اولنور ؛ دخول واقع اولماش ایسه بویله بر عقد ایله صهریت ثابت اولمز ؛ بوکبی بر عقد موجب توارث اولمز ، عقد دیگرى منع ایتمز . فقط حمل وقوعنده نسب ثابت اولور [۱] .

فرانسه ده ، رضاء طرفینک فقدانى ، موافقتنى استحصال لازم کلر اقر بانک عدم موافقتى ، طرفینک سنی مساعد اولماسی ، دیگر بر نکاحک وجودى ، طرفینک مانع ازدواج درجه قرابتده بولنملری ، عقدک خفیاً اجراسى و عقدى اجرا ایدن مأمورک بوکا صالح اولماسى نکاحک فسادینه دال و بناء علیه فسخى موجبدر .

فساددن طرفینک معلوماتی اولمیان نکاحک محصولی اولان چوجقلا مشروع عدولتور .

انکلترده کرب شرائط اساسیه نک فقدانی ، کرب امر عقدک اصولنه عدم توافقی فسخ نکاحی موجب اولور . فساد مبنی اولدیغندن ناشی فسخ اولتان نکاح محصولی اولان چوجقلا انکلترده هیچ بروجله مشروع اوله مازلر .

المانیاده عقده طرفین بالذات حاضر بولمز و کیفیت عقد دفتر رسمی به قید اولمز سه نکاح مفسوخ عد اولندیکی کی ، رضاء طرفینک فقدانی ، دیگر بر نکاحک وجودی ، آرده درجه مانع قرابت بولمسی کی احوالده نکاحک فسخنه حکم اولور . فسخ اولتان بر نکاحدن حاصل اولمش اولان چوجقلا ، طرفینک سؤنیقی یوقسه ، مشروعدر .

اوستریاده رضاء طرفینک فقدانی ، نکاح دیگرک وجودی ، صنوف روحانیه دن برینه انتساب ، طرفیندن برینک غیر عیسوی اولمسی ، مانع ازدواج قرابتک بولمسی کی احوالده نکاح فسخ اولور .

بحارستانده رضاء طرفین خصوصنده یا کاشلق بولمسی ، زوجک عنین اولوب زوجه نک اوندن اولجه معلوماتی اولماسی ، قبل الازدواج زوجه نک حامل اولمسی فسخنی موجب اولور .

اسپانیاده شرائط اساسیه سه موافقی اولمیان نکاحلر ایله عقدنده سهوا اولان ، قاجریلان برکیمسه ایله اولان ، حین عقدنده مأمور مخصوص و یا شهود بولنمیان نکاحلر فسخ اولتور .

نکاحك فسخی چوجقارك مشروعتنه خال كتير من .
 ايتا ايله هان فرانسه اصلى وجهله نكاح فسخ اولنور .
 سونيت اولمدينى حالده چوجقار مشروعدر .
 فلم نكده مجنونك عقد ايتديكى نكاحك فسخی ابوينى ايله اقرباسى
 وياولى ويا رصيصى جانندن طلب واستحصال اولنه بيلور . رضانك
 فقدانى حالده ده نكاحك آلتى آي طرفنده فسخی طلب ايديله بيلير .
 پورتوغالده شرط اساسيه سنه غير موافق اولديغندن فسخ
 اولنان نكاحك محصولى اولان چوجقار ، طرفينك حسن
 نيتى وارسه ، مشروعدر .

روسيه ده جبر آييار مجنون طرفندن عقد اولنان ، يقين اقربا آره سنده ،
 متأهل كيمسeler بيننده ، غير رشيد وياسنى سكسانى متجاوز اولان
 ويا اوچدونه متأهل ايتمش بولنان ، بكار ت نذار ايتمش اولان اشخاص
 آره سنده اولان نكاحلار ايله برده بر اور تودوقس ايله بر غير عيسوى
 بيننده عقد اولنان نكاحلر فسخ اولنور . نكاحك فسختندن
 صكره اولجـه حاصل اولمش اولان چوجقارك مشروعتنى ايمراطور
 امر ايله بيلير سنده ، بو چوجقار ايله ابوينك اقرباسى آره سنده
 قيرات حاصل اولمز .

اسويچرده شرائط اساسيه غير موافق اولان نكاحلر
 فسخ اولنور سنده ، بولردن حاصل اولمش اولان چوجقار
 هر حالده مشروع عدا اولنور .

افادات مبسوطه دن نمايان اولدينى اوزره ، نكاحك اسباب
 فسخی حقننده موجود اولان احكام قانونيه هر يرده بر

اولمیدیندن بو خصوصدهده اختلاف تحدی طبعیدر. زوجین
 بینده کی نکاحک فسادہ . یعنی اولہرق شرائط اساسیہ سنہ رعایت
 اولمیدینی بیانیلہ ، بر مملکتده فسخنہ قیام اولمیدینی حالہ
 اول امرده طرفینک منسوب اولدینی دولت قانونلرینک تعیین
 ایتدیکی شرائط اساسیہ رعایتسزلک ایدیلوب ایدلمدیکنک تدقیق
 ایجاب ایدر . چونکہ نکاح مقاولہ سنک قسم اصلینی تشکیل
 ایدن شرائط اساسیہ طرفینک منسوب اولدینی دولت قانوننک
 تعیین ایتدیکی شرائطدر ؛ طرفین اشته بو شرائطہ رعایتلہ
 مکلف اولوب ، بوبادہ کی قصور نکاحک فسخنی موجب اولور .
 بناءً علیہ مثلاً بر روسیہ لی اسویچرہده بر اسپانیول قز ایلہ
 ازدواج ایتدیکی حالہ ارکک روسیہ وقز اسپانیا قانونلرینک
 تعیین ایتدیکی شرائطہ موافق بولنماشلر ایسہ بونکاح ، اسویچرہ
 قانونلرینک کوستردیکی شرائط اساسیہ داخلندہ اولسہ بیلہ ،
 فسخ اولمق لام کلیر . بونک کی طرفیندن برینک منسوب اولدینی
 مملکتده شرائط اساسیہ غدم مطابقدن دولایی فسخ اولنان
 بر نکاح دیگر طرفک منسوب اولدینی مملکتدهده منفسخ عد
 اولمق اقتضا ایدر [۱] . بو خصوصلرده انضباط عمومی دولیہ
 رعایت وجوبیہده خاطر دن چیقما مایدر . بر مملکتده مانع ازدواج
 عداولتمیان بر حال ایلہ بر نکاح عقد اولندقدن صکرہ طرفین او
 حالی اسباب فسخندن عد ایدن بر مملکتہ کیسہلر واورادہ

[۱] حقوق خصوصیه النجمی اسویچرہده لورن شهرندہ وقوعبولان
 اجتماعندہ بوجهلہ اجتہاد ایشدر .

نكاح فسخ ايتديرمكه تشبث ايتسه لر آرتق منسوب بولندقلرى
مملكه قانوننك قبول ايتديكى شرائطه موافقتى هيچ
كوزم دلكمىز نكاح فسخ اولنور .

موجود بر نكاحك طلاق ايله رفعى شرعاً زوجين بيننده تباین
اخلاق سببى ايله وعينيت وعقامت كې عوارض طبيعیه حسيله
تجويز اولنوب فقط نكاحده اولديغى كې ، شهوده و ، ممالك
سائر به قیاساً ، حكم حاكمه احتیاج یوقدر . طلاق رابطه
زوجینی کلیاً رفع ایتدیكندن ، طرفینك هر برى تكرار تاهل
ایده بیلیر .

بو خصوصده اوروپا دولتلری بر قاج قسمه تقسیم اولنه بیلیر :

۱ بر طاقم دولتلر يالکىز افتراقى Séparation decorps

لكىز اسباب معينه ايله قبول ايتشلردر . بوجه دن اسباباده
زوجك زوجهنى تبديل مذهبه اجبار ايتسى ، فحشه سوق
ايتسى و زوجيندن برينك چوجقلىك اخلاقى افساده تشبث
ايتسى حالنده افتراق واقع اولور . پورتوئالده زوجيندن برينك
مؤبدأ محكوميتى ، زوجك زوجهنه غایت آغیر سوء معاملده
بولنسى ، زوجنك على الاطلاق و زوجك صور مقیده ده فحشه
سلوكى حاللارنده و افتراق وقوعه كلیر .

۲ ايتالياده رضاء طرفین ايله هم ده اسباب معينه ايله يالکىز افتراق
جاریدر . آغیر سوء معامله ، زوجهنك على الاطلاق و زوجك
خانه سى داخلنده فحش ايقاعى ، طرفيندن برينك مجازات
ترهيبیه محكوميتى افتراقك اسبابنددر .

۳. یالکز اسباب معینه ایله طهر و اسوج، اسویجره، صربستان و روسیه ده جاریدر. اسوچده فحش، ترك، مؤبدآ کورکه محکومیت، آلتی سنه مفقودیت و عنینیت طلاق موجبدر. اسویجرهده فحش، حیاته سؤ قصد، آغیر سؤ معامله، طرفیندن برینک مجازات ترهیبیه محکومیتی، ایکی سنه ترك، جنت حاللرنده طلاق واقع اولور. صربستانده فحش، آغیر سؤ معامله، طرفیندن برینک سکز سنه دن زیاده کورکه محکومیتی، مذهب عیسوینک ترکی، تعمدآ مفقودیت موجب طلاقدر. روسیهده فحش، طرفیندن برینک حقوق مدنیهدن اقطاعی موجب بر جزایه محکومیتی، لاقول بش سنه مفقودیت و عنینیت طلاق انتاج ایدر.

۴. کرک رضاء طرفین ایله کرک اسباب معینه بئآ یالکز طهر و جاری اولان یرلر دانیمارقه، رومانی و نوروچدر. دانیمارقه ایله نوروچده اسباب طلاق فحش، اوچ سنه بلا سبب ترك، یدی سنه مفقودیت، عنینیت، مؤبدآ کورکه محکومیتدر. رومانیاده زوجیندن برینک بلا فرق فحش ایقاعی، آغیر سؤ معامله، طرفیندن برینک کورکه ویا قلعه بندلکه محکومیتی، حیاته سؤ قصد اسباب طلاقنددر.

۵. آلمانیا، انسکلتره، فرانسه و مجارستانده یالکز اسباب معینه بئآ افتراق و طهر و جاریدر. آلمانیاده زوجیندن برینک فحش ایقاعی، سؤ قصد، تعمدآ ترك طلاق ویا افتراقی واقارب ایله فحش ویا مکرر نکاح ایقاعی، زوجک خلاف طبیعت ویا جبرآ

افعالی طلاق انتاج ایدر. فرانسه ده آغیر سؤ معامله، زوجنهك
على الاطلاق و زوجك خانه سی دروننده فحش ایقاعی، زوجیندن
برینك مجازات ترهیدیه به محکومیتی اسباب افتراقنددر؛ افتراقی
موجب اسباب طلاق ده استلزام ایتدیکی کبی، زوج حتی خانه سی
خارجنده ایقاع فحش ایلدیکی حالده زوجہ سی طلاق دعواسی
اقامه ایدوبیلیر .

مجارستانده فحش، ترك، آغیر سؤ معامله، وظائف زوجیه به
عدم رعایت، محکومیت كرك افتراقه كرك طلاقه سبب اوله بیلیر.
۶ . با حقیقاده اسباب معینه ببناء افتراق و هم اسباب معینه
هم رضاء طرفین ایله طلاق جاریدر. اسباب معینه فرانسه ده مرعی
اولانلر کبیدر .

۷ . فلمنكده دهری یا المنكر اسباب معینه ایله، افتراق هم
اسباب معینه هم رضاء طرفین ایله جاریدر. هرايکی حالده ده اسباب
معینه فحش، آغیر سؤ معامله، زوجیندن برینك مجازات ترهیدیه به
محکومیتی، بش سنه ترك حاللریدر .

۸ . اوستریاده اسباب معینه ببناء و یا رضاء طرفین ایله یا المنكر
افتراق جاریدر. فحش، طرفیندن بری طرفندن جنسایت
ایقاعی، ترك، سؤ قصد، آغیر سؤ معامله، بری طرفندن دیگرینك
ثروتنك اضعه سی، عائله نك اخلاقه تعرض حاللری اسباب
افتراقنددر. بو افتراق قانوا یقلره منحصر در. سائرلری یا رضاء
طرفین ایله یا خود فحش، بش سنه قلمه بندلکه محکومیت،

خانه نك تركى. سو قصد ، آغير سو معامله ، يكديكر نندن شدتلى
 نفرت حاللارنده احكام مذهبيه لرينه توفيقاً طلاق استحصا
 ايد بيلرلر. موسويلر رضاء طرفين ايله طلاق اجرا ايدر لر سه ده ،
 زوج طرفندن فحش ايقاعى هيچ بروقت سبب طلاق اوله مز.
 طلاق ويا افتراق ايچون ده زوجينك منسوب اولدقلى دولت
 قانونه رعايت اولمقله برابر انضباط عمومى دولى ده كوزه دمك
 مقتضيدر .

بىر مملكتده افتراق ويا طلاق ايچون حكم استحصالى امرنده
 اجنبيلر طرفندن محكمه محليه مراجعت اولنديغى حالده اول
 امرده مراجعت واقعه قانون محلى به موافق اولمق ، يعنى قانون
 محلى به توفيقاً رضاء طرفين لازم ايسه بو موجود بولمق ويا
 اسباب معينه مقتضى ايسه ارقانونك تعيين ايتديكى اسباب ميدانده
 اولمق اقتضا ايدر؛ صكره ده مراجعت ايدنلر ك منسوب بولندقلى
 دولت قانوننده موافق اولمق ، يعنى طرفينك بيان رضا ايتمى
 ويا اسباب معينه سرد ايتلى دولت متبوعه قانونلرى احكامنه
 توافق ايتك وافتراق و طلاقن هانكيلى دولت متبوعه قانونى
 ايله تجويز اولتيور سه يالكنز اونك حقنده حكم صادر اولمق
 لازم كليز . آنجق بعض مملكتلرده طلاق وافتراق خصوصاتى
 منحصراً انضباط عمومى دولى جمله سندن عد اولنديغندن دولت
 متبوعه قانونه رعايت اولتيور و بوده بالطبع اختلافى وبونك
 نتيجه سى اوله رق برچوق مشكلاتى دعوت ايدتيور .
 واقعا دولتلر حدود ملكيه لرى داخلنده حق حاكميتى صورت

مطلقه ده حائز اولدقیری و بناءً علیه محاکم محلیه یا لکز صاحب
ملک اولان دولتك قانونلرینی تطبیقه مأمور و مجبور بولندی
ایچون قوانین اجنبیه یه محاکم محلیه جه رعایت اولنمی لزومی
ادعا اولنه مزسه ده ؛ قانونلرك حاکمیت شخصییه سی ده غیر منکر
اولوب، افراد تبعه نر یه کتسه اونی تعقیب ایستدیکندن و نکاح
و طلاقه تعلق ایدن قانونلرده بوجمله دن اولدیغندن، بو خصوصیاتده
بر مملکده بولنان بر اجنبی حقنده اولنه حق معاملانده بوجهتی
نظردن دور طوتمامق اقتضا ایدر . یا لکز مثلاً طلاق جاری
اولان بر مملکت تبعه سندن بری طلاق قبول ایتمیان بر دولت
مملکتنده محکمه یه مراجعتله طلاق استحصال ایده مز ؛ بونک کی
بر مملکتنده اسباب طلاقدن عد اولنمیان بر فعل سردی ایله و او
فعلک دولت متبوعه ملکنده اسباب طلاقدن معدود اولدینی
بیانیله طلاق ایچون محکمه محلیه یه مراجعت اولنورسه منمر
اولمز . هر حاده دولت متبوعه قانونلری حکمی ایله انضباط
عمومی دولتی تألیف ایتمک الزمدر .



- ۳ -

نسب

مناسبات جنسیه بشر تناسلی و بوده ابوت و نسب کبی
 یز رابطه ضروری بی انتاج ایدر. ابوت Paternité والدک مولوده،
 نسب Filiation مولودک والدہ اولان ارتباط نسلیسی دیمکدر.
 بورابطه نسلیه یا مشروع Filiation légitime یا خود غیر مشروع
 Filiation naturelle اولور.

نسب مشروع. - شرعاً فراش محصولی اولان چو جقار
 اولاد مشروع دندر. فراش، بالاده ذکرا و لندی بی وجهله [۱]
 ضعیف، متوسط و قوی اولمق اوزره، اوچ نوعدر فراش ضعیف
 استیلاد نیقی اولمق سزین مناسباته کیریلن جایه مملوکه نك
 فراشیدر بوندن حاصل اولان چو جق آنجق پدری طرفندن
 دعوت اولنورسه پدرندن نسبی ثابت و بناءً علیه مشروع اولور.
 بو وجهله دعوت اولنان چو جق میدانه کتیرن جاریه نك فراشی
 آرتق متوسط قسمه داخل اولور. برده استیلاد نبتیله استفراش
 اولنان جاریه نك فراشی متوسطدر. فراش متوسطدن حاصل
 اولان چو جق، دعوته حاجت اولمق سزین، پدرینک اولور
 و آنجق پدری طرفندن نیقی اولنه بیلور. فراش قوی، که زوجه
 منکوحه نیکدر، محصولی اولان چو جق هر حالده پدرینک اولوب

نفی اولنه من ، بویکی برچو جوق پدرینک ردایتمسی یالکز لغان ایله ممکن اولور .

اشبو اوج نوع فراشک محصولی و بناءً علیه مشروع اولان چوجقلر پدرلربنه نسبت اولنور و حقوق ارثیه صاحبیدرلر . مدت حملک قبی آلتی آی واکبری ایکی سنه در [۱] . بناءً علیه بر زوجه منکوحه نك بعد الطلاق ایکی سنه ظرفنده تولید ایتدیکی چوجق زوج سابقک اولمغله نسبی اوندن ثابت اولور . بومدت ایچنده ویا سکا حک مدت دوامجه حاصل اولان چوججی نفی ایتک ایچون زوجک مطلقا امانه مراجعت ایتسی لازم کلیر . کرک زوجه منکوحه دولایسیله لغان ، کرک استفراش اولنان جاریه حسبیه نفی اولور désaveu یالکز والده نك زوجی ویا جاریه نك مولاسنه عاندر . بونک وفاتنده وارثی لغان ویانقی ایده بیلیر . بونک ایچون معین بر زمان یوقدر .

فراشدن حاصل اولوب حقلرنده لغان ویانقی واقع اولمیان چوجقلر مشروع اولدیغندن ، نسبیری حقنده شبهه حاصل اولدینی حالد نفوس وقوعاتلری و یا شهود اقامه سیله اثبات نسب ایده بیلیرلر .

نسب مشروعک اثباتی امرنده مراجعت اولان قواعدی مملکتک قانوننده بر دکادر . بعض یرلرده نفوس وقوعاتی علم و خبری لازم ایکن ، بعض مملکتلرده تعمید حقنده کی وثیقه کانیدر . برده مدت حمل حقنده ، دولترک قبول

ایتدکری اساس متخالفدر ؛ بعضیسنده دیکرینه نسبتله زیاده و بعضیسنده آزدرد.

فرانسهده مناسبات مشروعه محصولی اولان و نکاحک دوامی اثناده و یاخود بعدالطلاق اوچ یوز کون ظرفنده تولد ایدن چوجقار قانوناً پدرلرینه وارث واونلرک نسلندن معدوددرلر . بوچوجقاری یالکیز بعض اشخاص ، احوال مخصوصهده ومهل معین ظرفنده نفی ایده بیلیرلر .

نفی اولاد اوچ حالده ممکندر : یا ثنای حمده زوجینک برلکده اقامتی غیر ممکن اولمی ، یاخود بونکله برابر زوجیه ایقاع فحش ایلملی ؛ و یاخود زوج و زوجیه بیتنده ماده مناسبات جنسیه حصولنه مانع اولان ، افتراق کبی ، بر سبب موجود ایکن مولود تاریخ ولادتک بالحساب حادثه افتراقک وقوعندن اوچ یوز کون صکره حاصل اولدینی تحقق ایلمیدر .

ثانیاً نفی اولاد صلاحیتی منحصرأ والدته نک زوجیه اعطای اولمشدر . زوجیه منکوحه دن متولد اولوب بروجیه بالا اسباب مشروعهیه مبنی نفی جائز اولان بر چوجقک نفینه زوجدن ماعدا اصول و فروع سائر صلاحیتدار دکلسمده زوجک وفاتنده بوسلاحیت ورثیه عائددر .

ثالثاً : ادعای مذکوره مدت معینه ظرفنده واقع اولور . حق مشروعهک استعمالی ولادت هنکامنده زه ج اکر چوجقک محل ولادتنده ایسه زمان ولادتدن اعتباراً بر آی وخارجده ایسه خبر آلدینی زماندن اعتباراً ایکی آی ظرفنده وقوع بولمق

اقتضا ایدر . نفی اولاد ادعاسنه قیام ایدم جك اولانلر زوج متوفاك ورته سی ایسه بو ادعایه چوجك پدر متوفاك اموالی توارته ویا ورته نك حقوق ارثیه لرینه تجاوزه باشلادی نفی زماندن اعتباراً ایکی آی طرفنده تشبث اولمق اقتضا ایدر .

انكلمترده زوج وزوجه بیننده نكاح باقی ایكن حاصل اولان چوجقلر ، عقددن خلی اول رحمة حاصل اولمش اولسه لر بیله ، اولاد مشروعه دن اولدینی کبی رحمة حصولی وجود بولدینی زمانه تصادف ایتدیكنه حكاچه حاصل اولان چوجقلرده اولاده مشروعه دندر . نكاحك انحلالندن طقوز آی صكره تكرار تأهل ایدن قادینلرك ایکنیجی نكاحك عقدندن بر آز صكره تواید ایتدیکی چوجقلر سن رشده وصوللرنده والدله لرینك برنجی ویا ایکنیجی زوجنی پدر اوله رق اختیار ایدم بیلیرلر .

قدیم جرمانیا قانونلرندن احكام عدلیه سنی اقتباس وتنظیم ایلش اولان ، اوستریا و المانیا کی ، حکوماتله اسویچره قانونلرنده نفی اولاد Désaveu ادعاسی ایچون بر زمان تعیین اولنمشدر . المانیاده چوجق ، زوج وزوجه نك زمان ازدواجندن اوزون بر مدت اول ویا خود نكاحك انحلالندن اوزون بر زمان صكره تولد ایتش ایسه پدری ادعا اولان شخص نفی اولاد ادعاسنه قیام ایدم بیلیر .

اوستریاده نكاحك عقدندن یدی آی کچمدن اول ویا انفسا خندن اون آی صكره حاصل اولان چوجق نفی اولنه بیلیر . اسویچره ده عقددن ۱۸۰ کون مرورندن اول ویا نكاحك ختامندن

۳۰۰ کون صکره تولد ایدن چوجقارک نفی ممکندر .
اسپانیاده نفی اولاد یا نکاحدن ۱۸۰ کون مقدم رحم
مادرده حصولی ثابت و یا فسخ نکاحدن ۳۰۰ کون صکره
متولد اولان اطفال حقنده تطبیق اولنه بیلیر .

ایتالیاده فرانسه کی ایسه ده یالکیز مدت لر فرقلیدر؛ پدر اولان
کیمسه چوجغک محل ولادتنده ایسه ایکی و خارجه ایسه ،
اورایه مـ واصلتندن و یا کیفیت ولادتی خبر الدیغندن اعتباراً
اوج آی ظرفنده چوجغی نفی ایده بیلیر .

روسیه ده نکاح مدت دوامنده و یا خود نکاحک انفسا خندن
اعتباراً ۱۰۶ کون ظرفنده حاصل اون چوجقارک مشروعدر .
آنحقی نکاحک عقدندن ۱۷۰ کون کچمدن حاصل اولان چوجقارک،
زمان ولادت لری ایله اوندن کری یه دوغری ۳۰۶ کون ظرفنده
والده لری ایله برلکده بولنه مدیغنی والده نک زوجی اثبات ایتدیکی
حالده ، نفی اولنه بیلیرلر .

برچوجغک مشروعیتی حقنده بر محله اختلاف حدوشنده
هانکی قانونه توفیقاً حل مسئله اولنه جغی ده محتاج تدقیقدر .
چوجق ایله ابویونک منسوب بولندیغی مملکتنده اختلاف اولورسه
جمله سنک تابع بولندیغی قانون محلی بو خصوصه حائر تاثیر
اولورسه ده ، بر مملکت اجنبیه ده بویله بر مسئله ظهور ایتدیکی
حالده قانون محلی ایله علاقه دارانک تابع اولدق لری قانوندن
هانکی سنک تطبیق اولنه جغی تعیین ایتک مهمدر .

نفی اولاد معامله سنک تاثیراتی دوغری دن دوغری یه شخصی

اولدیغندن ، بومعاملاتده دولت متبوعه قانونی نظر اعتباره
آلمق لازم کلیر . او قانون موجبجه نفی اولاد ممکن اولورسه ،
علاقه داران زرده بولنورسه بولنسون ، انضباط عمومی دولی به
خلک کلمدیکی حالده اولادک نفی معامله سی معتبر و جائز اولمق
اقتضا ایدر .

بو حال چوجق ایله پدری عد اولنان کیمسه نك بر تابعیتده
بولندقلرینه کوره در . حالبوکه بونلرک تابعیتلری مختلف اوله-
بیلیر . مثلاً فرانسه ده برقادین فرانسه ده متولد برشخص
اجنبیدن برچوجق تولید ایدرسه چوجق فرانسز و والده سنک
زوجی اجنبیدر . بوکی احوالده نفی اولاد معامله سنک تأثیری
اک زیاده چوجق حقنده اوله جغندن چوجغک منسوب بولندیفی
دولت قانونی ترجیح ایتک موافق اولور .

اگر چوجغک تابعیتی تبدل ایدوبده یرینه برصفت
جدیده قائم اولسه احوالده چوجغک حین ولادتنده حائر
اولدیفی تابعیتی و بناءً علیه اووقت متبوعی اولان دولتک قانونی
ترجیح ایتک لازم کلیر ؛ چونکه چوجغک نسبی زمان ولادتنده
تعین ایدر .

حاصلی اولان نسب مشروعک طرز اثباتی حقنده قوانین
محلیه *lex fori* ایله طرفینک منسوب اولدیفی قانون بیننده
تعارض وقوعه کلیرسه طرفینک قوانین شخصییه سی ترجیح
اولنور .

ثانیاً چو جغك قانون شـخصیسی ابوینك قانونلرینه
مرجع طوتولور .

ثالثاً چو جق تبدیل تابعیت ایتمش بولنورسه زمان ولادتده
تابع اولدینی قانون حائر جماندر .

نسب غیر مشروع . — بینلرنده نکاح بولمדיنی حالد
یکدیگریله مناسبات جنسیده بولنان کیمسه لردن حاصل اولان
چـوجقـلـرك نسبـی غیر مشروع اولوب ، بوکی چـوجـقـلـره
اولاد غیر مشروع ویا اولاد طبعیه *enfants naturels* دینیر .
اشـبو اولاد طبعیه استلصاق *reconnaissance* ایله اولاد
مشروع اولورلر .

شرعاً زنا ایله نسب ثابت اولمديغدن ممالك دولت علیه ده
استلصاق جاری دکلدر .

فرانسه ده پدرلره اولاد طبعیه نك استلصاقی صلاحیتی
ویرلشدر . استلصاق یا اختیاری *volontaire* ویا اضطراری
forcée در .

ولد طبعینك بالاختیار استلصاقی پدری جانبندن حضور
محکمه ده بیان حقیقت اولنهرق دائره مشروعیته ادخال
ایدلمسیدر . بالاضطرار استلصاق مولودك ، قانونك تعیین ایتدیکی
احوالده ، اثبات نسب ایدرك بو وجهله پدری اعترافه مجبور
ایتمسـیه اولور . شو صورتله طاییلان چوجقـلـره فرانسه ده
enfants reconnus یعنی لصیقه دنیاير . استلصاق اولمش اولان
برولد طبعینك موقع قانونیسی ، اولاد مشروع نك صلاحیت

ووظائف قانونیه سی کی ایسه ده ، برپدرک اولاد طبعیه سی استصاق ایدم بیلیم سی ایچون بو اولادک والده لری ایله پدرلرینک ازدواج لری قابل اوله بیله جک بر خالده اولمق ، حد قراستی ازدواج ه مانع اولان قادینلر ایله واقع اولان مناسبات غیر مشروع ، محصولی اولماق لازمدر .

شو تفصیلانندن آکلاشلدینی وجهله اقربادن اولمیان کیمسه لک مناسبات غیر مشروعه سندن حاصل اولان چوجق لک استصاقی جائز اولوب ، فقط متأهل کیمسه لر بیننده واقع اولوب adultère (آدولتره) دینیلن زنا محصولی اولان چو-

جق لری ایله محرماتدن اولان قادینلر ایله inceste (انست) دینیلن سفاحدن حاصل اولان چوجق لک استصاقی جائز دکلدرد . زنا ایله سفاحک غیرى اولان یعنی مجرد اولوب بربرینه محرم ولمیان کیمسه لر بیننده وقوعه کلن مناسبات غیر مشروعه محصولی چوجق لره والده لرینی تحری ایتک حق ویرلمش ایسه ده ، تحری ابوت بعض مستثنیاتدن ماعدا احوالده ، ممنوعدر . استصاق اولنان چوجق ایله بونک ابوینی بیننده روابط عائله حاصل اولور .

استصاق خصوصه سنده هر مملکتک احکام قانونیه سی بر دکلدرد . ایتالیا ، اسپانیا ، پورتوغال وفلمنک کی بعض ممالکده لصیقه لر ، فرانسه ده اولدینی کی ، استصاق ایدن پدرینک افراد عائله سندن اولور لر . انکلتزه ایله روسیه ده ، یونانستانده ورومانیاده بالعکس اولاد طبعیه نک حتی والده سی طرفدن بیله استصاقی جائز دکلدرد ؛ استصاق اولدنه بیله

بونک نظر قانونده هیچ بر حکمی اولمز ؛ چو جق عائله پدره داخل اولمز . المانیا واسقاندیناویا حکومتری کی بعض ممالکده ایسه استاصاقک تاثیراتی محدود اولوب لصیقه لر عائله پدر افرندن عد اولمز ، پدره دائما بیانجی قالیرلر ویالکیز پدرلرندن معاونت تقدیه مظهر اولورلر .

نسب غیر مشروعک شرائط ثبوتیه سی ده هر یرده بر طرزده اولدینی کی ، سائر بعض تفرعاتده ده فرق واردر . استصاق ایچون پدرینک رشید اولسی فرانسه ده شرط دکل ایکن ، بعض یرلرده غیر رشید کی مسه لک استصاق ایتسی غیر جائزدر . بونک کی زنا ایله سفاح محصولی چو جقلر فرانسه ده استصاق اولنه من ایکن ، المانیا کی بعض محللرده بو کی چو جقلری والده لرینک قبول و تربیه ایتلری جائزدر .

استصاق اختیاری بی تجویز ایدن یرلرده تحریر مادر جائز ایسه ده بونک شرائط ثبوتیه سی هر محله بردکدر .

تحریر ابوته کلنجه ، بو کیفیت فرانسه ، لهستان ورومانیا قانونلری نظرند ممنوع اولوب ، فقط المانیا ، انکلتره ، اسپانیا ، آمریکا حکومت متحده سی ، مجارستان ، پورتوغال ، اسقاندیناویا حکومتلرند ، آنجق شرائط متنوعه ایله جائزدر ؛ بره زلیبا ، غواته مالا ، پيرو ، آرژانتین جمهوریتی ایله ایتالیا ده یالکیز والده نک قاچرلمسی ویا جبر حالنده بو وقعنه زمان محله تصادف ایلدیکی تقدیرده جائز اولور .

استلصاق و تحریء ابوت مباحثی هر حکم متده احکام متنوعیه تابع طو تلدینی جهته اختلاف تحدت ایدر . مثلاً :

فرانسه ده صورت غیر مشروعه بر چوجق تولد ایدوب ابویکندن هیچ ری طرفندن استلصاق اولمسه ، نسل اساسی کوزتمک ممکن اولیه جغندن ، مولد اساسه توفیقاً فرانسه تابعیتنده قالیر ، مؤخر آراجنبی ظهور ایدوب ده چوجنی استلصاق ایتک استه سه بولک ایچون نه یاییلاق و تأثیرانی نه اوله جق ؟ چوجغک تابعیتی حین ولادتنده پدرینک حائر اولدینی تابعیت اولمق لازم کله جکندن پدرینک و بناء علیه چوجغک منسوب اولدینی دولت قانونی استلصاق . مساعد ایسه اوکانوفیقاً امر استلصاقک اجرایی لازم کله جکی وارد خاطر اولور . حالبو که هنوز استلصاق وقوعه کلمدیکندن چوجغک پدری عد اولنه جق کیسه یوقدر ؛ بناءً علیه چوجق استلصاق آرزوسنده بولنان کیسه نک منسوب بولندینی تابعیتده دکلدر ؛ صفتیری متحد اولیوب ، مختلفدر . برده استلصاقده چوجق ایله پدر اوله جق کیسه نک هر ایکینک صلاحیتلری بولمق لازمدر . مثالمزده کی چوجوق فرانسه اولدیغندن استلصاق اولمغه صلاحیتی اولوب اولدینی تعیین ایدن فرانسه قانونیدر ؛ استلصاق ایتک استیان کیسه مک ده بوفعلی اجرایه دولت متبوعه سی قانونی مساعد اولمق اقتضا ایدر .

کیفیت استلصاقده انضباط عمومی دولیه رعای ایتکده مقتضیدر . زنا و یاسفاح صورتیه واقع اولان مناسباتدن متحصل

چو جقلم پروسیا کی قانونی مساعد بردولت تبعه سندن بولنان
بر کیسه طرفندن فرانسه ده استلصاق اولمق استلسه فرانسه
قانوننك عدم مساعده سنه بناءً ممکن اولمز .

پدر اوله جق کیسه ایله چو جق بر تابعیتده بولندقلری
حالده امر استلصاق قوانین محایه به توفیقاً اجرا اولنه جنی کی،
بونك دولت متبوعه قانوننه توفیقاً ده اجرایی جائزدر . فقط
طرفین مختلف تابعیتده اولدینی حالده قانون محلی موجبجه
استلصاق اجرایی اقتضا ایدر .

استلصاق اضطراریده طرفینك قوانین شخصییه سی احکامنه
رعایت مقتضیدر ؛ بناءً علیه فرانسه تابعیتی حائر برولد غیر
مشروع زنا ویا سفاح صورتیله وقوعه کلش بر مناسبه بناءً
والده سنی وهر حالده پدرینی - بونلرک دولت متبوعه لری قانونی
مساعده اولسه بیله - تحریری ایدمز .



— ۴ —

اولاد طبعیه نك مشروعیت اكسابی

اوروپاده اولاد طبعیه مشروعیت اكسابی ایله اولاد مشرو-
عه نك بالجمله حقوقی استحصال ایدر .

فرانسه ده برولد طبیعی ابونینك مؤخرأ ازدواجی
ایله کسب مشروعیت ایدر، آنجق ابون چوجنی یا قبل النكاح
ویا خود نكاح مقاوله نامه سننده تصریح ایده رك استلصاق ایتمش
اولق و بینلرنده قبل النكاح واقع اولمش اولان مناسبت غیر
مشروعه زنا و یا سفاح نوعندن اولماق شرطدر. برولد غیر
مشروعك، متروکاتندن استفاده ایده بیله جك فروعی اولدینی
تقدیرده ، بعد الوفاة مشروعیت کسب ایتسی ممکندر .

بوندن بشقه اولاد غیر مشروعه برده قراء نامه مخصوص
recerit du prince ایله کسب مشروعیت ایدر لر ، که بو صورتده
ابون ، بینلرنده ازدواج اولما مقوله برابر ، حکومتدن قرار استحصالی
ایله چوجقدن غیر مشروعیت صفتی ازاله ایده بیلیر .

انگلتره ده ، مستملکاتك بعضیسی مستثنا اولق اوزره ،
چوجغه مشروعیت اسنادی آنجق پارلمنتو قراری ایله بعض
احوال فوق العاده ممکن اوله بیلیر .

المانیا ، اوستریا ، اسپانیا ، فلمنك ، ایتالیا ایله سویچره نك

بعض قضایاننده، کړك طرفینك مؤخرآ ازدواجی كړك قرارنامه. مخصوص استحصالی ايله، اولادغير مشروعه مشروعت كسب ایدر. لهستان ايله بالطق ایالاتی مستثنا اولمق اوزره، روسیه ده مؤخرآ ازدواج اولاد طبعیه په مشروعت اسناد ایتزسه ده، بعض احوال استثنایه ده قرار نامه مخصوص ايله اولاد طبعیه اکتساب مشروعت ایدر .

مؤخرآ ازدواج ايله ویا قرارنامه مخصوص استحصالی ايله اولاد طبعیه په اسناد اولنان مشروعت هر خصوصه حائر حکم وتأثیر اولوب، بوكی اولادك بالجمله حقوقه اولاد مشروعه دن فرقی اولماز . آنجق پدر ايله چوجق، اشبو مشروعت کسی معامله سنك حین اجرا سنده مختلف تابعیتده بولنور لرسه، بو معامله منحصرآ چوجنك نفعه واونك محافظه حقوقی ایچ-ون وقوع بولدیغدن، چوجنك منسوب بولندیقی دولت قانونی بو خصوصه مابه التطبیق اولمق لازم کلیر؛ قانون محلی اجرای تأثیر ایتز .

— ۵ —

دعی اخازی

Adoption

چوجنی اولیان بر ش-خص آخر بر کیمنه نك چوجنی ویا خود بر اقیطایی کنده اولادلق اولمق اوزره انتخاب و قبول ایدمیلیر. بویولده انتخاب اولنان چوجنقلره کتب فقهیه ده دعی تسمیه اولنور enfant adoptif. شرعاً بوچوجنقلر ايله بولنری

قبول ایدنلر بینه قزابت حاصل اولمز ؛ آره لرندم نکاح جائز اولور ؛ دعیلر کندیلرینی قبول ایدنلره وارث اولمز لر . — ارث بختنده دعیلر ایله سود چوجقلری (ولدرضاعی) بینه فرق اولیوب ، هیچ بری ارثه اشتراک ایتمز ؛ یالکیز حرمت خصوصنده آره لرندم شوفر ق واردر که سود چوجقلر محرماتدن اولدقلری حالد دعیلر دکلدر ، بونلری تزوج جائزدر [۱] . اوروا حکومتلرنده دعی انتخابی بختنده مختلف اصول وقاعده جاریدر . فرانسه ده دعی اتخاذی حتی هیچ اولادی اولیان اشخاصه منحصر اولدینی کی ، قبول و انتخاب ائناسنده پدرک الی باشی متجاوز اولمی ، چوجقک سن ر شده وصولندن اول آلتی سنه قدر تربیه سنه باقش بولنمی و کندیسيله چوجق بینه نهایت اون بش سنه قدر یا شجه برفرق بولنمی شرطدر . فقط بعضاً بوشرائط موجود اولدینی حالد بيله ینه بر کیمسه بر چوجفی اولاد اتخاذ ایده بیلیر . مثلاً بر کیمسه برینک حیاتی تهله کدن قورنار مق کی فوق العاده بر خدمت ایفا ایتمز اولورسه آرتق بوشرائطه رعایتنه لزوم قالمز ؛ یالکیز پدر اوله جق کیمسه نک وشید اولمی و کندیسی چوجقندن بر کونلک اولسون سنأ بیوک بولنمی اقضا ایدر .

دعی اوله جق کیمسه نک یکر می بر یاشنی اکمال ایتمز اولمی لازم اولدینی کی ، هنوز یکر می بش یاشنه واصل اولماش ایسه ابونک موافقتی استحصال ایتمی مجبور بدر . بر کیمسه

ایکی کشینک بردن دعیسی اوله مزسده برزوج ایله زوجه نك
 دعیسی اوله بیلیر. استلصاق اولنان برچوجق دعی ده اوله بیلیر.
 دعی اتخاذهنك تأثیراتی یالاکز دعی ایله قبول ایدنه انحصار
 ایدر. دعی کندینی قبول ایدن کیمسه نك ولد صلیسی کی
 وارثی اولور وینلرنده نکاح جائز اولمز.

انکلترده فرانسه کی دعی اصولی قبول اولنماش ایسه ده،
 برکیمسه وفاتده اسمنی طاشیمق شرطیله اموالی برشخصه
 با وصیت ترك ایده بیلیر.

آلمانیا ده بعض فرق ایله فرانسه کی دعی اصولی وجود
 اولدینی کی، بو بایده ایتالیا ده جاری اصول ده فرانسه اصوله
 قیندر. اسپانیا ده دعی اصولی واردر. لهستان ایله بالطق
 ایالاتنده بو خصوصده فرانسه اصولی جاری ایسه ده، روسیه نك
 اقسام سازه سنده تماماً دعی موجود اولیوب کلی تخالف
 واردر.

بر مملکتده دعی اتخاذهی حالده دعی ایله قبول ایدن
 کیمسه نك صلاحیتلری دولت متبوعلری قانونلری ایله تعیین
 اولمق وهرایکسی ده او قانونلر ایله حائز صلاحیت بولمق اقتضا
 ایدر. آنجق بو خصوصده انضباط عمومی دولی خللدار
 اولماق شرطدر.

دعی اتخاذه ده جاری معامله نك طرز اجراسی، اگر طرفین
 مختلف تابعیتده ایسه، قانون محلی ایله، اگر برتابعیتده ایسه لر
 کندی آرزولرینه کوره یا قانون محلی ویا دولت متبوعه قانونی
 ایله تعیین اولنور.

دعی اتخاذی کیفیتك تأثیراتی، طرفین بردوات تبعه‌سندن اولدینی حالدہ، دولت متبوعه قانونی ایله تعین ایدر. فقط طرفینك تابعیتی مختلف ایسه، بو معامله ایله دعینك تابعیت اصلیه‌سنه خلل کلیه جگمندن و بوندن ال‌زیاده متأثر اولان دعی اولدیغندن، دعینك منسوب بولندینی دولت قانوننه کوره تأثیراتی تعین ایلر.

دعی اتخاذ ایدن برکیمسه‌نك وفاتی حالده دعینك حق وراثی شخص متوفانك de cujus منسوب بولندینی دولت قانونی ایله آکلاسیلیر.



دردنجی فصل

افرادك تصرفات استغرافیة ایلر اولاره مناسبانده
موصول املوف قوانینه

— ۱ —

موقوفه عینیه

حقوق تصرفیه استخلافيه‌نك اقسام نلته‌سنی تشکیل ایدن حقوق عینیه، حقوق شخصیه و حق احداث و اختراع شخصیت انسانیه‌نك اوصاف ممیزه‌سی اولدیغندن بونلردن تحدت ایدن اختلافات قوانینده، افرادك شخصنه ویا عائله‌سی و اموال و املاکی ایله اولان مناسبانده متعلق اختلافات قوانینده کیفیت

تطبیقی بالاده [۱] کوردیکمز، قواعد عمومیه نك تطبیقی اقتضا ایدر .

استانو نظریه سی طرفدارلری حقوق عینیه نك منقول و غیر منقول امواله تعلقنه نظراً بو حقوقه تطبیق اولسناه حق قوانین بیننی تفریق و اموال غیر منقوله بولندقلری محل قانونلرینه *lex rei sitae* تابع اولوب اموال منقوله ایچون ده اصحابنك قوانین شخصی سی احکامی جاری اولدیغنی ادعا ایدر لر . بونلرک رأینجه اموال غیر منقوله برملتک اجزای ممالکندن اولدیغندن حاکمیت ملیه یه، بناء علیه بولندقلری محل قانونلری احکامنه تابع اولمق اقتضا ایدر ؛ اموال منقوله ایسه بر محل معینده بولنیوب اصحابی نروده ایسه اموال مذکورده اوراده اوله جنی و تعبیر آخرله بونلر اصحابنك شخصیتی ایله اتحاد ایله چکی ایچون اصحابنك قوانین شخصیه سنه تابع اولمق لازم کلیر . حالبوکه منقول لات ایله اموال غیر منقوله بینلری هر وقت سهولتله تفریق اولسناه جنی کی، جمله سی اوزرنده اصحابنك حاز اولدیغنی حقوق بر نوع ، یعنی حقوق عینیه اولدیغنی ایچون بونلری بشقه بشقه احکامه تابع طوتمق نظریاته توافق ایدسناه چکی و بعض احوالده بو تفسیمدن محذورلرده تولدایسناه چکی جهتلله، اموال منقوله ایله غیر منقوله یی بو وجهله بالتقسیم هر برینه بشقه احکام قانونیه نك جواز تطبیقنه قائل اولمق مناسب اولمز . بناء علیه ، منقول اولسون غیر منقول اولسون ، برمالک بولندیغنی محل

متصرفی اولان دولتک منافعی اخلال ایدلمدکجه، اومال صاحبی اولان کیمسه نك قوانین شخصیه سی احکامنه تابع اولمق ایجاب ایدر .

من تصرف . — حق تصرفی فرانسه قانون مدنیسی «قوانین و نظاماتک منع ایتدیکی طرزده استعمال اولنماق اوزره، اشیادن صورت مطلقده استفاده و اونلری استعمال ایتمک حقیدر، دیه تعریف ایتمیشدر. اشبو تعریفدن دخی آکلاشلدیغی اوزره حق تصرف droit de propriété برشیک نفعی بر کیمسه نك نفسنه حصر و بو نفعه بشقه لرینی اشتراکدن منع ایلدک اولان حقیدر، که اوزرینه بو حق تعلق ایلان شی او کیمسه نك مالی اولور .

حق تصرفک استحصالی ایله آخره انتقالی بر طاقم احکام قانونیه یه تابمدر . بوندن بشقه بو حق بر طرفدن بر طاقم قیود و تأمینات و دیگر طرفدن منفعت عامه ایله محدوددر . برده بعض اموال وارددر، که بونلره افرادک حق تصرفی تعلق ایتمز . نهرلر، ایرماقلر، کوی اهالیسنه تخصیص اولنان مرعالر ایله بالظه لقلر کی .

ممالك عثمانیه ده اموال بیع ایله، هبه ایله، وصیه آویا بلا وصیت انتقال ایله و اراضی موانک ایشلدلمسی ایله تصرف اولتور . اشبو اسباب تصرف اموالک منقول و غیر منقول قسملرینه شاملدر . ایجاب و قبول ایله بیع منعقد اولور [۱] ، یعنی بیعک انعقادی

رضاء طرفین ایله ممکن اولوب، بو صورتله الده ایدیلان بر مال اوزرنده مشتری حق تصرف احرار ایدر. هبه دخی «یحباب و قبول ایله منعقد» فقط «قبض ایله تمام اولور.» [۱] بناءً علیه موهوب تسلیم اولندقدن صکره اوزرنده موهوب لهک حق تصرفی نقرر ایدر. اموالک وصیت ایله ویا وصیتسز صاحب اصلیبی الندن چیقوب موصی له ویا وارث عهده سنه انتقال ایلسیله او مال اوزرینه موصی له ویا وارثک حق تصرفی تعلق ایدر. وصیت بر کیمسه نك متصرف اولدینی مالی حیاتنده شخص آخره تملیک ایلسی دیمک اولوب، حالبوکه وصیت ایتمکسزین وفات ایدن بر شخصک حیاتده ایکن متصرف اولدینی اموال وصیته لزوم اولمقسزین ورثه سنه انتقال ایدر واشته بو صورتله ورثه او اموال اوزرنده حق تصرف احرار ایدر. اراضی قانوننک اراضی موات تسمیه ایتدیکی یرلرکه بر کیمسه نك تصرفده اولمدینی واهالی به ترک و تخصیص قلمدینی حلاله جهیرا الصوت اولان کیمسه نك اقصای عمراندن صیحه سی استماع اولنمیه حق درجه لرده ... بعیدبولنان یعنی ... تخمیناً بر بحق میل یعنی یازم ساعت مقداری مسافده ... اولان محللردر، [۲] اورالرده ضرورتی اولان کیمسه رقبه سی بیت الماله عائد اولمق اوزره مجانا مأمورینک اذنیله مجدداً بر آجوب ترلا تحاذ ایده یلور.» بو صورتله ترلا تحاذ اولنان بر اوراسنی آچان کیمسه نك متصرفاتی میانسه داخل

[۱] مجله، کتاب الهبه، ماده ۸۲۷

[۲] اراضی قانونی آلتنجی ماده

اولور و سائر اراضی مزبوره حقه مرعی الاجرا اولان احکام قانونیه تمامیه بوقوله یرلرده دخی جاریدر .» [۱]
فرانسه قانونلرنده حق تصرف ایچون برقاچ صورت واردر .
برنجیسی کیسه نك یدتصرفنده اولیان اراضی بی برکیسه نك
قانونك مساعده سی دائره سنده ضبط واشغال ایتمسیه اواراضی
اوزرنده اوشخصك حق تصرف احرارز ایلمسیدر ؛ آرتق بشقه
بر شخص طرفدن اوکا تجاوز اولنه ماز .

ایکنجیسی قانونك مساعده سیله حق تصرف تأمین اولنور ؛
مثلا برکیسه مالک اوالینی اراضینك ائمارندن استفاده ایتک
ودروننده ظهور ایدن معادنن برنسبت معینه حصه دار
اولق خصوصلرنده قانونك تأمینانه مظهر اولور .
اوچنجیسی ، مثلا مایعه کی ، بر مقاوله مخصوصه ایله حق
تصرف ثابت اولور .

دردنجیسی انتقال وصیت ایله حق تصرف اکتساب اولنور .
انکلترده اموال غیر منقوله ایله منقولات اوزرنده حق
تصرف احکام مختلفه یه تابعدر . اموال غیر منقوله نك تصرفی ،
بیع ایله ، اوتوز سنه یه بالغ اولان برمرور زمان ایله تقرر ایدر .
اموال منقوله اشغال ایله ، بیع ایله ، هبه ایله تصرف اولنه بیلیر .
المانیاده منقول اولسون غیر منقول بولنسون صاحبسز
اموالک شغالی حق تصرفی تأمین ایتدیکی کی برکیسه نك
اراضیسنده ظهور ایدن ثروتک نصفی اوزرنده صاحب اراضی

قانوناً حق تصرف احرار ایدر ، برده بیع مقاوله سیله حق تصرف ثابت اولور .

اسپانیاده اموال ، انتقالی ممکن وغیر ممکن اولمق اوزره ، ایکی قسمه آیرلمشدر . انتقالی غیر ممکن اموال کلیسا ، مناستر ، کلیسا عقاراتی کبی املاک مذهبییه ایله عمومه مخصوص اولان اموالدر . انتقالی ممکن اولان اموالدن صاحبی اولمان ویا متروک بولنانلر اشغال ایله تملک اولندیغی کبی ، بیع ایله وبرده یکر می ، اوتوز ، قرق وحی یوز سنه دن عبارت مرور زمان ایله حق تصرف احرار اولور .

باجیقا ایله ایتالیا ده فرانسه اصولی جاریدر .

روسیه ده ضرور Svod دینیلن حقوق عمومیه تابع اولان ایالاتده صاحبسز اموالک اشغالی ، تملک اولنان بر محل محصولاتنک تصرفی امرنده قانونک تامیناتی ، اون سنه دن عبارت بر مرور زمان واصولاً قید اولمق شرطیله بیع مقاوله سی ایله حق تصرف ثابت اولور . لهستانده جاری اصول فرانسه اصولنه قریب وبالطریق ایالاتنده براز ده فرقلیدر .

حق تصرف ثبوت وتقرری امرنده ممالک مختلفه قانونلرینک احکامی بیننده موجود تخالف نظره آلمغه لایق اولوب ، بر مملکتده بولنان اجانبه صورت تطبیقی شایان تبعدر . واقعا بر کیمسه نک حق تصرف صاحبی اوله بیلمسی ایچون اهلیت شخصیه پی حائر اولمسی لازم کلوب ، بونک ایچون ده دولت متبوعه سی قانونی معتبر اولمق لازم کلیرسه ده ، بر مملکتده بولنان اموال اوزرنده

حق تصرفك ثبوت و ضیاعی ، انضباط عمومی دولی به متعلق اولدیغندن قوانین محلیه ایله تمیین اولنمق اقتضایلر. شو حالده بر مملکتده بولنان براجنبی اوراده بر مال اوزرنده ادعای مالکیت ایده بیلمك ایچون اورانك قانونلری موجبجه حق تصرف احراز ایتسی مقتضیدر .

قیود servitudes . — قیود بر ملك اوزرنده متصرفندن غیرى کیمسه لره تعلق ایدن حقوقدر . قیود ایکی قسم اولوب بری اصلیه personelles در که بر ملكك بشقه بر ملك لهنده اوله رق تصرفه اشتراك اولنسنی و دیگرى شخصیه prédiales در که بر مالکك حق تصرفده بشقه لرینك اشتراک کنی متضمندر .

حق مرور و حق مجرا و حق مسبل قیود اصلیه جمله سندندر؛ بونلرده قدمه اعتبار اولنور، یعنی بونلر قدیمدن اوله کلدیکی وجه اوزره ترك وابقا اولنور. و « برینك عرصه سندن دیگر کیمسه نك حق مروری اولدینی حالده عرصه صاحبی اونى مرور و عبور دن منع ایده من . » کذا « برینك عرصه سندن دیگر کیمسه نك خرق یا خود صویولی بحق جاری اوله کایر کن عرصه صاحبی فیابعد اجرا ایتدیرم دیه منع ایده من . » بونك کی « برخانه نك یا غمور صولری از قدیم قومشونك خانه سنه آتقده اولدینی حالده قومشوسی بوندن صکره آقام دیه منع ایده من . » فقط بوحقوقدن استفاده قدیم اولغه منوط اولوب ، حقوق مذکوره محدث اولورسه رفعی نمکندره؛ چونکه « میسحک اباحه سندن رجوعه حق واردر . » [۱]

[۱] مجله . کتاب الشرکه ، ماده ۱۲۲۴ ، ۱۲۲۵ ، ۱۲۲۸

۱۲۲۹ ، ۱۲۲۶

فرانسه‌ده هر شخص کندی ملکی اوزرنده قیود تأسیس ایده بیلیر ؛ بوقیود قید رستی به افترازا ایتکله معتبر اولدینی کی، اوتوز سنه مرور ویاخود ریڈس عائله طرفندن تأسیس اولنسی ایلده تقرر ایدر .

ایکی ملک بر شخص عهده‌نده اجتماعی ، بوقیوددن اوتوز سنه مدته استفاده اولنماسی، وضع قیود ایدن کیسه‌نک بوندن فارغ اولسی ویا موقت ایسه وقتنک مرور ایلسی ایلده اشبو قیود زائل اولور .

انکلترده حق مرور ، حق مجرا ، حق رؤیت ، حق استناد کی قیود اصلیه یا بر ملک صاحبنک تبرعی ایلده، یا بیکرمی سنه‌دن عبادت بر مرور زمان ایلده، یاخود بر کیسه‌نک عرصه‌سندن بر پارچه‌یی بالاقر از آخره ووروبده اوپارچه‌یه وصول ایچون مشترینک عرصه‌نک انسام باقیه‌سندن بشقه ممری اولنماسی کی بر نتیجه طبعیه ایلده حاصل اولور .

آلمانیاده قیود اصلیه ایچون مقابل ایکی ملک بولنقی لازم کلیوب ، بعض اشخاصده بوندن استفاده ایتک ممکندر ؛ مثلاً بردکر منجینک لهنه موجود ارلان برحق مروردن اورایه بغدادی کوتورن هر مشتری استفاده ایدر . تأسیس اولنان هر نوع قیودک رسماً قید اولنسی لازم ایسه‌ده، پروسیا و ساقسونیا کی بعض یرلرده قیده احتیاج یوقدر .

اسپانیاده قیودک معتبر عد اولنسی ایچون رسماً قیدی

لازمدر . ایکی ملک برکیمسه عهدہ سنده اجتماعی ، مؤسسک نکولی ، تعیین اولنان مدتک انقضاسی ، اون ویا یکرمی سنه قیوددن استفادہ اولنماسی حالارنده قیود منفسخ اولور .

ایتالیاده بو خصوصده تماماً فرانسه اصولی جازیدر .

روسیهده قیود یا قانوناً ویا حکماً احداث ویا خود بر ملک صاحبی طرفدن تأسیس اولنور . تأسیس حالنده مطلقاً قید رسمی به اقزان لازمدر . صاحب ملک نکولی ، ایکی ملک بر شخص عهدہ سنده اجتماعی ، اون سنه مروری حالارنده قیود اصلیه منطقی اولور .

قیود اصلیه بمختندہ طرفینک قوانین شخصیه سی ایله برابر انضباط عمومی دولتی و علاقہ دارانک حق اختیارینی نظره آلمق مقتضیدر . منفعت عمومیہ ایچون تأسیس اولنان قیوده متعلق بالجمله احکام بالطبع انضباط عمومی دولتی به تعلق ایدر . بناءً علیه بر اجنبی بولندینی مملکت احکام قانونیه سی خلافده قیود تأسیس ایدہ من . آنجق وضع قیوده صلاحیتی افادہ ایدن اهلیت شخصیه قانون شخصی ایله تعیین اولندینی کبی ، بوبابده تنظیم اولنان بیاننامہ نک طرز ترتیبندہ طرفینک ، انضباط عمومی دولتی اخلال ایتساک شرطیله ، حق اختیارلرینده رعایت اولنق مقتضیدر .

برکیمسہ نک برشی اوزرندہ موقناً ویا مادام الحیوة احراز ایتدیکي حق قیود شخصیه دندر ، حق انتفاع ، حق استعمال ، حق سکنا بوجمله دندر .

من انتفاع usufruit بر ملک نفعتن مالی کی استفاده ایتدکر . فقط بو انتفاع ساده منافع مالکه عائد اولوب رقبه سنه تعلق ایتد . مثلاً باغچه و یا بستانک نمرات و محصولانندن استفاده ترک اولندقدمه حق انتفاع ترک ایدلمش اولور ؛ منتفع اولانلر وفات ایتدکرده ملک ینه صاحب اصلیمسنه رجوع ایدر . آنجق بعض شیر واردرکه استعمال ایله تلف اولدیغندن بونک حق انتفاعی ترک ایتدک ممکن اولمز ؛ اوحالده نیم من انتفاع quasi - usufruit دینیلن طرزه مراجعت اولنور ، که بو حالده ختام مدته تلف اولان شیئت صاحبنه مثلی و یا بدلی ادا اولنور . من استعمال usage ایسه بشقه سنه عائد اولان برشیئی برکیمسنه نک قوللانمی و کندیسيله عائله سنک احتیاجاتنه کفایت ایدمک قدر نمرانندن استفاده ایلمی حقیدر ؛ بونک حق انتفاعدن شوفر قی واردرکه اوزرنده حق استعمال احراز اولنان برمال آخره ایجار اولنه مز . من سکنا habitation خانه اوزرنده احراز اولنان حق استعمالدر .

برمالک رقبه سی متصرفنه عائد اولق اوزره نفعی آخره نفویض اولندیغی حالده ، که ایجار ایدلمش دیمکدر ، اوشخص اوندن انتفاع ایدر . «اجاره دخی ایجاب وقبول ایله منعقد اولور» [۱] . دوامی مدنجه مستأجر حق انتفاعی حازدر . «مستأجر ارث یا هبه کی بوجهله عین مأجوره مالک

اولیاً حق اجاره ملک حکمی قلماز [۱]. برده «موجب عقدك اجراسنه مانع اولور برعذر ظهور ایتدکه» اجاره منفسخ اولور» [۲]. فرانسه ده حق انتفاع یا قانونی و یا خود عقدی اولور. قانونی حق انتفاع سنی اونسکزدن دون اولان چوجقارک اموالندن اقربا ملک حق استفاده سی اولمق کیمدر . عقدی حق انتفاعک مستند اولدیغی مقاوله ملک رسماً قید اولنمی اقتضا ایدر .

انتفاع ایدن کیمسه ملک وفاتی ، اوتوز سنه مالدن استفاده اولنماسی ، مدتک اقتضاسی ، متنفعلک اومالی تملک ایتمی ، مالک کلاً ضایعی کی احوالده حق انتفاع منفسخ اولور .

انکلتره ده حق انتفاع فرانسز اصولندن شو صورتله آریلیر که انکلنز اصولنده برکیمسه برمال اوزرنده حق انتفاع احرار ایتدیکی حالده ، بوحق برمدت مدیده و یا مادام الحیوة اولدیغنه کوره ، اومتد ظرفنده و یا مادام الحیوة اومال اوزرنده حق تصرف احرار ایتمش اولور .

آلمانیا ده استعمال ، انتفاع ، سکنا حقلرندن بشقه منحصرأ بر شخصک منفعتنه اوله رق برمال منقول و یا عقار اوزرنده قید حیات شرطیله تأیس اولنان هر نوع حقوق قیود شخصیه دن معدوددر .

اسپانیا و ایتالیا ده تماماً فرانسه اصولی جاریدر .

روسیه ده برماله متصرف اولیانلرکده اومالدن استفاده سی
جائزدر .

حق انتفاعده اساس طرفینک رضاسی اولدیغندن بو حق
تعیین ایدن شی مقاوله ویا وصیتنامه ایسه ده ، انضباط عمومی
دولی دائما نظردده طوتلق مقتضیدر . اکر طرفین بردولت
تبعه سندن ایسه دولت متبوعه قانونی کوزهدلک لازم اولوب
فقط طرفینک تابعیتی مختلف اولور ومقاوله ده صراحتده
بولنمزه محل عقد قانوننه رعایت ایتدکلی منفهم اولور .
هر حالده حق انتفاع احرازی ایچون اول امرده اهلیت
شخصیه یی حائر بولمق لازم اولوب بوده دولت متبوعه قانونی
ایله تعیین ایدر ؛ بعده بونک طرز اجراسی ایله مدت دوامی
خصوصاننده قانون محلی به رعایت ایدوب انضباط عمومی دولتی
خللدار ایتماک اهمدر .

تأمینات عینیة Sûretés réelles . — تأمینات عینیة برداننک
مدیون ذمتنده اولان مطلوبنک استیفاسی تأمین ایچون بونک
تصرفات استخلافیة عینیة سی اوزرنده سائر ذاتلره نسبتله جائز
اولدینی حق رجحاندر .

بور حجان بیع بالوفا ورهه ایله تأمین اولنور . بیع بالوفا حالنده
مشتري الده ایتدیکی ماله بایع ذمتنده اولان مطلوبی راده سنده مالک
اولور ، وبو حالده بایعک تصرفات استخلافیة سندن وفاء اشترا ایتمش
اولدینی قسم اوزرنده سائر ذاتلره نسبتله بر امتیازور حجان استحصال
ایدر ؛ چونکه النده بولان مال غرامه یه داخل اولمز . رهن حالنده درهنک

حکمی فکنه قدر مرتبه حق حبسی اولمق و راهن فوت اولدقده سائر غرمادن احق اوله رق رهندن استیفای دین ایده بيلمکدر. [۱] بناءً عليه مرتبه مدیونك تصرفات استخلافیه سندن ارتهان ایتیش اولدیغی قسم اوزرنده سائر اصحاب مطاوبه نسبتله امتیاز و رجحان قزانمش اولور. اشته بونلر تأمینات عینیه دندر.

فرانسه ده تأمینات عینیه امتیاز Privilege و رهین املاك Hypothèque قسملرینی حایدیر. بونلردن امتیاز تجارت قارنلرنده مصرح اولان امتیاز و رجحانی افاده ایدر.

ترهین املاك بزده کی بیع بالوفایه برازمشابهدر.

امتیاز علی الخصوص منقولاته متعلقدر؛ ترهین املاك دیه ترجمه ایتیمک استدیگمز hypothèque علی الخصوص اموال غیر منقولیه تطبیق اولنور. ترهین املاك املاك یالکیز بر قسمنه تأثیر ایدر؛ امتیاز ایله اموال منقوله نك کافه سی ارتهان اولنه بیلیر. ترهین املاك ایکی نوع اولوب بریسی ترهین قانونی و یا عدلی judiciaire و دیگرى ترهین عقدی و یا اختیاریدر Conventionnell ترهین عقدی مستقرض حین استقرارده ملکینی رهن صورتیله تسلیمه بالا اختیار موافقت ایدر، مقرض ایله مستقرض ینلرنده او وجهله بره مقاوله نامه عقد اولنور.

ترهین قانونی قرضاً آلتان پاره نك توقیفی امرنده عاقرین رهنه دائر برکونه رأی و مطالعه بیان ایتمزله؛ مؤخرأ و ضرورتیه مبنی دائن محکمه یه مراجعت ایدوب مدیونك املا کندن دینه کافی اولان مقدارینی رسماً تحت ترهین و تأمینه آلیز.

انگلیزده Mortgage مورت گج نامیده جاری اصول بر نوع تأمینات در، که بونکله دائن، وعده سی حلوننده دین تأدیه اولندیغی حالده صاحبته اعاده ایتک شرطیله، مدیونه عائد بر ملکک متصرفی اولور؛ فقط مدیون ملککی داینه انتقال ایتدکن صکره بیله، مناسب بر مدتده تأدیه دین ایدرسه، ملککی استرداد ایدیه بیلیر. بناءً علیه بو اصول فعلاً فرانسهده جاری اصوله مشابه تأمینات مثابه سنده در. آنجق مدیون تأدیه ایتمزسه داین محکمه یه مراجعتله النده بولنان ملککی استرداد حقندن مدیونک سقوطنه دائر بر حکم استحصا ایدر و او ملککی تماماً ویا قسماً صانار.

آلمانیاده مدیون بر ملک معینی داینه ترهین ایدر و بو کیفیت رسماً دفتر مخصوصنه قید اولنور. داینه بررهین نامه ویرایرکه دیگر بر شخصه دوری مکندر. منقولاتک دخی ترهینی جائزدر. بلجیه قاده ترهین عدلی موجود اولمیوب، اوکا بدن وصیته مستند بر طرز ترهین واردر، بونکله موصی بعض املاک متروکه سی اوزرنده بر نوع تأمینات تاسیس ایدر. ترهین عقدی عمومی اوله ماز، معین بعض املاک اوزرینه وضع اولنوب قید ایدلک اقتضا ایدر. منقولاتک ترهینی جائزدر.

اسپانیاده ترهین املاک و امتیاز جاریدر. ترهین املاک اختیاری ویا قانونی اولور: اگر بر مقاوله ویا وصیته مستند ایسه اختیاری، اگر قادینک زوجندن، کوچک چوجقارک

ابوینلرندن، دولتک مدیونلرندن مطلوبلری اولان شیلره قارشى قانوناً موضوع اولورسه قانونیدر. هرابیكى حالده ده ترهین یالکیز بهض املاک معینه یه موضوع اولوب، رسماً قید اولنق لازمدره امتیاز منقولات اوزرینه وضع ارلنور .

ایتالیاده فرانسه اصولی جاری اولوب، یالکیز ترهین قانونینک رسماً مقید اولسی لازمدر .

فلمنکده ده تأمینات عینیه حقنده فرانسه ده جاری احکام قانونیه یه مشابه احکام جاریدر .

رومانیاده قانونی ترهین املاک یوقدر، یالکیز دولتک، ذات الزوج قادینلر، کوچک چوققلرک و محجورلرک حائز اولدقلری حقوقه بناءً اجرا اولسان ترهین قید اولنق و معین املاکه منحصر اولق اقتضا ایدر .

تأمینات عینیه بختنده دولتلرک احکام قانونیه سی بربرینه بکیزه مدیکندن بین الدول اختلافات قوانین اکسیک اولمز . بناءً علیه برملاکتده بولنان براجنبی تأمینات عینیه دن استفاده ایتک ادعا سنده بولندینی حالده قوانین شخصیه سی ایله قوانین محلیه دن هانکیلری هانکی جهتلرده تطبیق اولنه جغنی تعیین ایتک الزمدر . نه کبی اموال ترهین اولنه بیلیر، رسماً قید اولنق اقتضا ایدرمی، ترهینک تأثیرات اساسیه سی نه در بوجهتلرملکتک دوغربدن دوغری یه منافع اقتصادیه سنه تعلق ایتدیکندن مطلقاً قوانین محلیه یه تابع اولق اقتضا ایدر. بناءً علیه بو خصوصانده قوانین محلیه یه رعایت ایتک وانضباط عمومی دولتی محافظه

ایلك شرطدر. تأمینات عینیه یی استحصال ایتک، بوکا موافقت
ایلك ویا بشقه سنه دور ایلك ایچون لازم کلن اهلیت شخصیه
دولت متبوعه قانونی ایله تعین ایتدیکی کی، تأمیناته لزوم کوسترن
اسبابی ده تعین ایدن ینه دولت متبوعه قانونی ایسه ده، بو باده
انضباط عمومی دولی بمضا قانون محلی به رعایتی موجب اولور.
تأمینات عینیه به هانکی قانون وجود ویرمش ایسه ینه اوقانون
موجبجه منطقی اولور.

— ۲ —

مقوق شخصیه

حقوق تصرفیه استخلافیه نك ايكنجی قسمی تشکیل ایدن
مقوق شخصیه یاخود موق تهمرم *Droits d'Obligation* ایله
مدیون تسمیه اولنان بر کیسه دائن دینیلن بر شخصه بعض
حقوق تأمین ایدر. دائن و مدیون اطلاق اولنان طرفین مختلف
نابمیتده اوله بیلدکلی کی کیفیت تعهدك وقوعه کلدیکی محلدن
بشقه یرده ده بولنه بیلیرلر. شو حالده بو خصوصده هانکی قانونلر
احکامك جاری اوله جغنی تدقیق ایتك اقتضا ایدر.

تعهد طرفین بیننده تحصیل ایتمش بر عقددر. بونکله عاقلر
آره لرنده بر مقاوله یا بمش اولورلر، بو مقاوله ایله یا بینلرنده
یکدیگره بر طاقم حقوق تأمین ایدرلر: بیع و شرا کی. یاخود
طرفینک بری دیگرینه بعض حقوق تأمیننی تعهد ایتدیکی حالده

• مقابلنده بر تعهد بولمز : وکالت کې. برنجی حالده مقاوله مقابله
 Contrat synallagmatique ، دیکړنده مقاوله واده
 Contrat unilatéral اولمش اولور .

عقودده طرفینک رضایی، اهلیت شخصیه سی بولمق ووسيله
 عقد اولان شی قانونه موافق اولق شرطدر ؛ بو خصوصاته
 دول مختلفه قانونلری احکامنجه اساسده کلی فرق کورلمز سه ده ،
 عاقدلرک اهلیت شخصیه سی ، عقدک شکل وطرزی ایله تأثیرات
 قانونیه سی بخشنده احکام قوانین هر یرده بر دکدر .

عاقدلرک اهلیت شخصیه سی دولت متبوعه قانونی ایله تعین
 ایدره . بناءً علیه تبعه عثمانیه دن بولان صغیر ، مجنون و مهتوم
 کیسه لر مقاوله عقد ایدمه زلر . چونکه بولر مجبوردرلر [۱] .
 بونک کې ممالک شاهانه ده ساکن بر اجبی دولت متبوعه سی
 قانونی موجبنجه حائز صلاحیت دکسه بوراده عقد مقاوله ایله مز .
 مقاولاتک شکل ظاهر یسنه کلنجه ، اکر عاقدلر بر دولت
 تبعه سندن ایسه لر محل عقد قانوننه ویا دولت متبوعه لری قانوننه
 توفیقاً مقاوله یی عقد ایتمکده مختاردرلر ؛ دولت متبوعه قانوننه
 توفیق حرکت ایتمکری حالده مقاوله نک صحتی قونسلوسلرینک
 تصدیق ایتمی لازم کلیر . اکر طرفین مختلف تابعیتده ایسه
 محل عقد قانوننه رعایت ایتمک اقضا ایدر .

مقاولانده رضاء طرفین مشروط اولدیغنه نظراً ، عاقدلر ،
 انضباط عمومی دولی به خلل کتیر مامک و آداب و اخلاق عمومی به

منافی اولیایمق شرطیله، استدکاری کی عقد مقاوله ایده بیلیرلر .
حتی بر اجنبی قانونی ترجیح ایده رک مقاوله لرنده او قانونک
احکام متعلقه سی تصریح ویا ایما ایلرلر؛ بو حالد آرناق او قانون
اجنبی قانونه دکل، طرفینجه قبول اولنش بر مقارر حکمنده در .
عاقدر مقاوله لرنده ترجیح استدکاری قانونی تصریح
ایتماش بولنورلرسه محاکم بونی بعض امارات ایله تعیین ایتمک
لازم کلیر :

طرفین بر دولت تبعه سندن اولورسه ، عکسی ظاهر
اولدقجه ، دولت متبوعه لری قانونی ترجیح ایتمش اولدقلری
استدلال اولنورق، انضباط عمومی دوری خللدار اولماق
شرطیله ، او قانون تطبیق اولنور . مع مافیه طرفین اوزون بر
مدتدن بری مملکتلرندن تبعه دایله اقامتگاه و مرکز تجارتلرینی
دیار اجنبی یه نقل ایتمش و بناءً علیه بولندقلری مملکت قوانینی
ایله ده ازیاده الف پیدا ایلش بولنورلرسه آرناق اقامتگاهلری
قانونی *lex domicilii* تطبیق ایدیلیر .

طرفین مختلف تابعیتده اولور و بریمکتنده بولنورلرسه مسئله نک
حلی براز مشکلدیر ؛ بوندن ناشی ده بو خصوصده آرای مؤلفین
مختلفدر . بعضاری مقاوله اموال غیر منقوله یه تعلق ایتمیکی
حالد اموالک بولندیقی محل قانونی ترجیح ایتمک استرلرسه ده ،
اموال مذکور عاقدرک بولندیقی یردن پک اوزاق و قوانینی
کندیلرنجه مجهول بریرده بولنه بیله جک سندن ، بونی صورت
مطلقه ده ترجیح ایتمک دوضری اولمز . بعض مؤلفلرده تعهد

حریت شخصی به نوعی تحدید است. بدینگونه مدیونك دولت متبوعه سی قانونی معتبر عد اولتمق لازم كله جكنی ادعا ایدرلر . حالبوكه تعهدات متقابله بی جامع اولان مقاولانده طرفین حقوق و تعهداتجه یکدیگره تماماً مساوی و هربری یکدیگره قارشی هم دائن هم مدیون اولدقلرندن ، هر ایکسینكده منسوب اولدینی دولتلر قانونی تطبیق لازم کلیر؛ دولتلرک قوانینی ایسه علی الاکثر احکام متضاده بی جاری اولدیغندن ، بر مقاوله یه یکدیگره ضد ایکی قانونی تطبیق ایتک مجبوریتی میدانه کلیر ؛ بو ایسه غیر جائزدر .

بناءً علیه مقاوله ده صراحت یوقسه محلی عقد قانونی *Lex loci contractus* ترجیح ایتک مناس-بدر . آنجوقاق-دلر بر مملکتده بولندقلری تقدیرده ، عقد ایجابک قبوله افترا نی ایله تمام اوله جغندن ، مقاوله تکلیف ایدنک دکل قبول ایلیانک بولندینی مملکتده منعقد اولمش دیمک اولور . ش-و حالده محل عقد قبول ایلیان طرفک بولندینی محل اولدیغندن ، مقاوله یه اورانک قانونی تطبیق اولتمق اقتضا ایدر .

عقد آچیق دگزده ویاخود هنوز هیچ بر دولت طرفندن اشغال اولنماش و بناءً علیه اوزرنده حاکمیت تأسس ایتماش بریده وقوعه کلیرسه ، مابه التطبیق اوله جق محل عقد قانونی مفقود اولدینی ایچون ، محل اجرا قانونی *Lex loci solutionis* مرعی اولمق لازم کلیر . بوندن بشقه انضباط عمومی دولی یه خال کلامکده شرطدر .

قاپیو مقاوله سی Contrat de change . - ادرنه ده بولنان
بر کیمسه یه معلوم بر زمانده ازمیرده معین بر مقدار پاره نك لزومی
اولورسه ، اوپارینی عیناً ازمیره کوندرمکده مشکلات اوله بیله-
جکندن ، مبالغ معینی ازمیرده کندینه احضار ایتیمی دیگر بر
شخصدن طلب ایدر . شخص مرقوم بوتکلیفی قبول ایله او
پارینی او وجهله احضار ایتیمی درعهده ایلرسه آره لرنده بر
قاپیو مقاوله سی منعقد اولمش اولور . بومقاوله نك موقع اجرابه
وضعی ده یولایه Lettre de change ایله اولور .

ادرنه ده کی شخص ازمیرده کی شریکته بر مکتوب یازهرق
استیلان پارینی اوراده طلب ایدن کیمسه یه ویا امرینه تأدیه
ایتیمی اخطار ایلر ، که ایشته بو مکتوب یولایچه در . مکتوب نك
مرسلته کشیده جی و مرسل الینه مخاطب دینیر ، بولایچه یی
مستصحباً مخاطبه مراجعتله بدلنی طلب و استیفا ایدن کیمسه ده
یولایچه نك مامی در .

یولایچه نك مطلقاً کشیده جی به مراجعتله اونی آلان
کیمسه نك النده بولیمی الزم دکلدر معاملات تجاریه نك تسهلی
ایچون یولایچه نك عادتا اوراق نقره کی ایدن ال کچمی
لارمدر . بونك ایچون یولایچه یی استحصال ایدن کیمسه اونی
میرور ، یعنی هواله ایدر نك دیگر بر کیمسه یه دور ایدر ، که
ایشته او شخص حامل اولور ؛ اوده بر دیگرینه و دیگریدی
بر بشقه سنه دور ایدر نك ، یولایچه ، وعده سی حلولته دین ،

حواله صورتیله بر چوق دفعه الدن اله کجر؛ بناءً علیه حامللر
تکثر وتعدد ایده بیلیر .

بزده جاری اولان اصوله نظراً ، شرائط سائره میاننده
پولیچه نك قارشولنی نقود وامته دئی عبارتدر یوقسه بر حساب
محسوبآمی ویا بشقه بر جهتمیدر بیان اولمق لازم [۱] اولدینی
کبی ، حواله خصوصنده ده پولیچه نك اوزرنده دور وحواله
نك تاریخی اولمق وپولیچه نك مبلغی اخذ اولندینی بیان ایدمک
و هر کیمک عهده سنه کچمش ایسه اونک اسمی ذکر اولمق
لارمدر [۲] ، فرانسه ایله اسپانیا ، ایتالیا ، پورتوغال ، رومانیاه
فلمنک ، مکسیقا ، یونانستان و جنوبی آمریکا حکومتلرینک
ا اثرنده بواصول جاریدر. آنجق پولیچه نك قارشیلغنی تصریح
و حواله سنی بر طاقم قیوده اتباع اتمک ، محل تأدیة سنی تعیین
ایمک کبی خصوصات داعی مشکلات کورلیدیکندن ، یکی بر
اصولده پولیچه عادتاً بانقوطلر کبی بر نوع نقد تجارتی حالته
کتیرملک استیلیور . بو اصولی آلمانیا ، آوستریا ، اسویچره ،
بلجیکا ، صربستان ، مجارستان قبول ایتشدرد. اشکاتره ایله شمالی
آمریقا حکومتات متحده سنده عرف وعادتدن اقتباس ایدیلهرک
بو خصوصده فرانسه و آلمانیا اصولاری مزاج اولمشدر.

ایضاحات مبسوطه دن پولیچه حقنده ده عمالک مختلفه ده
جاری اصول بر اولمدینی نمایان اولیور؛ بناءً علیه پولیچه ده علاقه دار

[۱] تجارت بریه قانوننامه مایونی، ماده ۷۰

[۲] تجارت بریه قانونی ، ماده ۹۴

اولانلرك اھايت شخصيه لری ايله پولیچه نك شكلی و بانلیچه تأثیراتی حقننده حقوق خصوصیه دول نقطه نظرندہ محتاج حل نه کی مشکلاته تصادف اولنه بیله جکندن بوراده برنبذه بحث ایتک فائده دن غیر خالی اولور .

فرانسه ده تجارتله مآلف اولمیان نسوانك پولیچه اوزرنده کی امضالری حقننده یالکیز عادی بروعد حکمی حائر در و پولیچه مقبول اوله بیلیمک ایچون صاحب امضانك تجارتدن اولسی شرطدر . ایتالیا ده بوبله اولدنی کی ، اسپانیا و پورتوغال قانونلری حکمنجه ده یالکیز تجارتله مآلف اولانلر پولیچه امضا ایده بیلیرلر . حالبوکه آلمانیا ده مقاوله عقدینه صالح اولان هر شخص پولیچه ده تعاطی ایده بیلیر ، حق تجارتده بولمیان قادینلر بیله پولیچه امضا ایده بیلیرلر . انکلتره ايله شمالی آمریکا قانونلری حکمنجه ذات الزوج اولان قادینلرك امضا ایتدکلی پولیچه نك اهمتی بوقدر . روسیه ده قادینلرك امضا ایتدکلی پولیچه بستیون حکمسز دکلسه ده ، یالکیز بر دینك اعترافی حکمنده عد اولسور — ممالک شاهانه ده پولیچه اوزرنده امضاسی بولانلرك ارباب تجارتدن اولملری ازومنه دائر قانونده صراحت بوقسه ده ، پولیچه سندینك تأمین ایتدیکی حق و امتیاز سندات سائر ايله تأمین اولنان مطلوباته نسبتله زیاده و بوندن متحصل اختلافاتک حلی سائر مصالح تجاریه کی تجارت قانوننامه سی احکانه تابع اولدیغندن ، پولیچه اوزرنده امضاسی بولانلر تجارتدن اولدقیری حالده ، مسلك قانونه نظراً ، او پولیچه اوراق تجاریه عداددن چیقهرق سند عادی حکمنده قالیر .

پولایچه بی امضا ایدنلرک اهلیت شخصی سی دولت متبوعه لری قانونی ایله تعین ایدر. بناءً علیه بر عثمانلی بر پولایچه سندی امضا ایتدیکی حالدده ، نروده امضا ایدر سه ایتسون و بدلی نروده تأدییه اولنور سه اولسون ، اهلیت شخصی جه قوانین عثمانیه به تابع قالیر . یالکیز بو خصوصده ده انضباط عمومی دولی به خلل کلامک شرطدر .

پولایچه حقنده آلمانیا ده جاری قوانین احکامنه نظراً ، بر کیسه ، دولت متبوعه سی قانونی نه اولور سه اولسون ، بولندی بی محل قانونی نظر نده پولایچه امضاسنه اهل ایسه اونک امضا ایتدیکی پولایچه مقبولدر . بعض دولتلر بونظریه بی قبول ایدرک قانونلرینه کچیر دکلی کی ، حقوق دول انجمنی ده قامیوسنداتی حقنده کی اخلاقات قوانینه دایر ۱۸۸۵ سنه سنده تنظیم ایتدیکی بر نظامنامه لایحه سنه بو نظریه به مستند احکام درج ایتشدیر .

پولایچه مک شکلی حقنده ده هر ده لتک احکام قانونیه سی بر دکلدیر . نروده پولایچه کاغدی بر محلدن دیگر محله جکیلوب البته بر تاریخی اولوق و تأدییه اولنه حق مبالغه مقدراری و کرک آقایی ویره حک شخصک اسمی و نه وقت و نه محله تأدییه اولنه جفی تصریح اولنوب قارشوانی قود و امتعه دنمی عبارتدر یوقسه بر حسابه محسوباً و یا بشقه بر جهته نمیدر بیان اولنوق لازمدیر و بر شخص غائبک امر بنه منوط میدر یوقسه چکن آدمک تصرفده میدر صراحة ذکر اولنوب آنجق بر ، ایکی

اوج ، درت و بوندن زیاده نسخه سی اولورسه اونی دخی ذکر ایدرک قاچچی نسخه اولدیغنی بیان ایتک لازمدر ، [۱].

قانون عثمانیده مندرج شرائط سالفه فرانسه قانونندهده تماماً موجود ایدهدده ، حکومات سائر قانونلرنده اویله دکلدر . مثلاً انکلترده پولیچه حاملک امرینه Au porteur اوله بیلوب ، نارنجی و محل تنظیم و تأدیسه سی تصریح اولمقی ایجاب ایتمز . آلمانیا ، انکلتره و بلجیقا قانونلرنده پولیچه نك قارشیلغنی ذکره لزوم یوقدر . انکلتره و بلجیقا قانونلرینه نظراً وعده سی معین اولمیان پولیچه لر آویسته A vue عدا اولنور . آلمانیا ، اسقاندیناویا و استویجرده پولیچه سمنری تعیرینک بولمنه احتیاج واردر . پولیچه قبول و هواله اولنه بیایر ، مخاطب آنجق پولیچه یی قبولدن صوکره محتویاننک تأدیسه سندن مسئول اولور . بناءً علیه حاملک پولیچه یی قبول ایتدیرمکده منفعتی بدیهی اولدیغنی کبی ، « پولیچه کاغذینی چکن و کرک حواله سی ایدن کیمسه لر پولیچه نك قبولی و وعده سنده تأدیسه سی ایچون بربرینه متکفلدرلر » ، [۲].

اسپانیا ، پورتوغا ، مکسیقا ایله بعض جنوبی آمریقا حکومتلرنده حامل پولیچه یی مخاطبک قبولنه عرضه مجبوردر . قبولک شکلنه کلنج ، « پولیچه نك قبولی کیفیتی امضا ایله تصدیق اولمقی و مقبوضه تعیریه بیان قلمق » [۳] لازمدر . فرانسه دهده

[۱] تجارت بریه قانونی ، ماده ۷۰

[۲] تجارت بریه قانونی ، ماده ۷۶

[۳] » » » » ۸۰

بویله اولوب ، آلمانیا ایله بلایچه قاده پولیچه اوزرنده مخاطبک یالکزی امضاسی کافیدر. انکلتزده کیفیت قبول پولیچه کاغدی اوزرینه تحریراً و مخاطب طرفندن امضا اولنهرق واقع اولمزه تماماً حکمسزدر .

پولیچه نك حواله سی جیرانته طرفندن پولیچه نك آرقد . سنه حقوقك ترك و دور اولندیغنی متضمن امضاسی آلتینده یازیلان برعبار ایله اولور . قانون عثمانی ینظر آ د پولیچه تحویللری اوزرنده دور و حواله نك تاریخی اولق و پولیچه نك مبلغی اخذ اولندیغنی بیان ایتك و هر کیمك عهده سنه کچمش ایسه اونك اسمنی ذکر ایتك لازمدرد [۱] . برچوق قوانین اجنبیه دهده بویله ایسه ده ، آلمانیا ده حواله تاریخنه لزوم اولدیغنی کبی ، آلمانیا ، انکلتز ، بلایچه قاده پولیچه نك قارشیلغندن بحثه محل یوقدر . پولیچه نك شکلنه عائد اولهرق ظهور ایدیه بیلن اختلافات

قوانین عقورده نافذ اولاره محل عقد قانونیدر . locus regit actum قاعده سنه توفیقاً حل اولمق لازم کلیر . غلافه داران بر دولت تبعه سندن اولدقلری حالدیه بو خصوصده کی اختلافات قاعده مذکوریه توفیقاً پولیچه نك تنظیم اولندیغنی محل قانونی موجبنجه حل اولمق و مختلف تابعیتده ایسه لر یا او قانون و یاخورد کیندی اختیارلرینه کوره دولت متبعه لری قانونی موجبنجه حل ایدمك اقتضا ایدر .

پولیچه‌نک تاثیراتی بختنده مسئلہ تری نظره آلق لازم
 کلیر. پولیچه‌بی قبول ایدن مخاطب ایله جیرانته لک هر بری و کشیده جی
 پولیچه بدلنک تأدیہ سندن مسئلہ لرلر . بدلنک تأدیہ سی ایچون
 مهلت اعطاسی قانوناً مردود اولدیغندن [۱] وعده سنک حلولنده
 مخاطبه ابراز اولان پولیچه‌نک بدلی در حال تسویه اولنمزه
 حامی کشیده جی ایله جیرانته لر علیهنه محکمه یه مراجعت حقی
 احراز ایدره . بدلنک عدم تأدیہ سندن ناشی پولیچه‌نک حامی
 وعده سنک فرداسی کونی ، حق ادعاسی محافظه اتمک ایچون ،
 پروتستو دینیلن بر سندن ایله مراجعت ایتسی لازمدر [۲] .
 پولیچه‌دن متولد هر نوع دعاوی پروتستو تاریخ سندن واکر
 علیهنه حکم اولنماش و یا خود دین بشقه جه بر سندن ایله تبین
 ایتماش سه محکمه الکره وقوع بولان مراجعت وادعادن اعتباراً
 بسنه مندر مرورنده غیر مسموع اولور [۳] بو اصول فرانسه ده
 جاری اصوله تماماً مشابه اولدینی کی ، قوانین اجنبیه‌نک همان
 جمله سی بوکی احکامی جامعدر . یالکزانکلتره ایله شمالی آمریکا
 حکومت متحده سنده پولیچه‌بی قبول ایدنه تأدیہ ایچون اوج
 کون مهلت ویریلیر . پولیچه بدلنک عدم تأدیہ سی حالنده پروتستو
 تنظیمی لازم ایدره ، انکلتره ده یالکزانکلتره کشیده جی و مخاطب
 مملکت اجنبیه ده بولندینی حالده پروتستویه احتیاج وارددر . آلمانیا ده

[۱] تجارت بریه قانونی ، ماده ۹۲

[۲] » » » ۱۱۹

[۳] » » » ۱۴۶

عدم تأديه دن امتناع كونی پروتستو ايديله بيلير و نهايت ايرتسی كونی پروتستو لازم كلير . باچيقاده امتناع كونی دكل ، ايرتسی كونی پروتستو لازمدر . دعوی ایچون قبول اولسان مرور زمان مدتی هر یرده بر اولمیوب، ایتالیا ایله فرانسه و باچيقاده بو مدت بش ، اسپانیا ایله پورتوغاله درت ، انكلتر، ده آلتی ، آلمانیا ده اوج سنه در .

پولیچه نك تأثیراتنه متعلق اوله رق ظهور ایده بیلن اختلافات قوانینده ، اکر علاقه داران بر دولت تبعه سندن ایسه ، عقورده نافذ اولاره محل عقد قانونیمر قاعده سنه اتباع لازم كلير . علاقه دارلر بر دولت تبعه سندن اولمیوب ده مختلف تابعیتده بولندقلری حالده ، دولت متبوعه لری قانونی ترجیح ایتیشلرسه ، حق اختیارلرینه رعایتاً ، او دولت احکام قانونیه سی مرعی عد اولنور . شوراسنه دقت اولمق لازم كلير که برپولیچه ، ظهوری ، حواله سی ، قبولی کیفیتلری ایله ، برطاقم مقاولات احداث ایدره مقاوله لر محل عقد قانوننه تابع اولمق نظریه سنه کوره ، پولیچه دن متولد اشبو مقاولات عیدیه نك هربری ده — اکر بو معاملاتک جمله سی ایفا ایدنلر بر دولت تبعه سندن اولوب ده بو خصوصانده دولت متبوعه لری قانوننه تابع دکلر — عقد اولندقلری محل احکام قانونیه سنه موافق اولمق لازم كلير .

— ۳ —

من اهرات و افتراع

مقوق اديبه . — ملك شاهانده حق تاليف اصحاب
آثاره امتياز اعطاسى صورتيله ، طبع ونشر تاريخدن اعتباراً
قرق سنه اوله رق تعين اولندينى حالده [۱] ، بوحق فرانسه ده
يلچيه قتاده اصحابنه مادام الحيواة و وفاتنده ورنه سنه اللى سنه مدتله
تأمين اولمشدر ؛ آلمانيا ، اوستريا ، اسويچره و پورتوغالده صاحبنه
مادام الحيواة تاين اولان حق ورنه سنه اوتوز سنه بخش اولمشدر .
صاحبك وفاتندن صكره ورنه يه انتقال ايدن حق تاليف روسيه ده
قرق ، اسپانيه ايله قولومبياده سېسان سنه دوام ايدر . ايتاليا ده
حق تاليف قرق سنه دن عبارت ايسه ده ، ختامنده قرق سنه
دها سائر كيمسه لر طرفندن طبع اولنان اترك حاصلاتندن صاحبي
ويا ورنه سى يوزده بش حصه تمنع آير . انگلتره ده انگليز
مؤافلرك آتارى ايله ايلك دفعه اوله رق انگلتره ده طبع اولنان
مؤلفات ايچون اصحابنه يا قرق سنه ويا اصحابك مدت حياتيله
برده بعد الوفات يدي سنه مدتله تأمين حق اولنور . برده
غزته لر ايله رسائل موقوته ده نشر اولنان مقالات و معلملرك
تدريساتى بعض مملكتلرده حق تاليفه تابع طوالتدينى حالده
بعض يرلرده بوكي آثار حمايه كورمن . بونك كبي بعض عمللرده
حق ترجمه ايله تياترو بيه سلاينك اوينادلسى و موسيقى نوطه لر ينك

اجراسی حق عادتاً تصنیفات اوزرنده کی حقوق درجه سنده
اولدینی حالد بعض مملکتلرده یالکمز حق تألیف محفوظدر .
مختلف مملکتلر احکام قانونیه سنک تخالفی ده بر طاقم اختلافات
قوانینی انتاج ایتیمی طبیعیدر . اول امرده بر مملکتده اورایه
یبانجی اولان بر . مؤلفک طبع ایتدیره رک حق تألیفی احراز
ایلدیکی بر اتردیکر بر مملکتده تقلیداً طبع اولنسه اوراده صاحب
اثرک حق هانکی قانون احکامنه توفیقاً محافظه اولنه حق ؟ بونی
تدقیقدن اول شوراسنک اخطاری لازمدر که دولت علیه حقوق
ادبیه ایچون هیچ بر دولت ایله عقد معاهده ایلامش اولدینی
ایچون مملکت سائرده طبع ونشر اولنان آثار اوزرنده ، اصحابی
حق تبعه عثمانیه دن اولسه بیلر ، احراز اولنان حقوقه مملکت مزده
رعایت اولمز ؛ مملکت سائرده انتشار ایدن هر نوع آثار کرک
عیناً کرک ترجمه بوراده هر کس طرفندن طبع ایتدیر یله بیلر ،
بوکی آثاری طبع ایدن و ایتدیرنلر نظر قانونده اصلا مسئول
ومعاتب اولمز لر . اوروا دولتلری ایسه بو بایده عقدایتدکلری
معاهدات ایله یکدیگرینک مملکتده انتشار ایدن آثار اصحابنک
حقوقی ملکلری داخلنده محافظه ایتکی درعهده ایتشلردر .
اساساً مدونات اوزرنده احراز اولنان حقوقدن هر کسک
دولت متبوعه سی قانونلری احکامنه توفیقاً استفاده ایتسی لازم کلیر ؛
آنجق موجود موضوعات قانونیه ده تمقیب اولنان مسئله کوره
بر اثر ، صاحبنک تابعیتندن قطع نظر ، زرده طبع ونشر اولنورسه
اورانک احکام قانونیه سی دائره سنده اصحابی اکتساب ایتدیکی

حقوقدن استفاده ایدر . شو حاله ، مثلاً اسپانیالی بر مؤلفك
آلمانیاده طبع ایتدیردیکی بر اثر فرانسه ده تقلید اولورسه
مقدلر آلمانیا قانوننك تعیین ایتدیکی مدت ظرفنده تعقیباته تابع
اولورلر . فقط بومدت فرانسه قانوننك قبول ایتدیکی مدتدن
زیاده اولورسه معتبر اولمز ؛ چونكه فرانسه قانونی دیگرینه
نسبتله مدتی قصر اینكه اترك دهآز بر زمانده مال عمومی
اولسنی تأمین ایتشدیر ؛ بالعکس مدت مذکوره فرانسه قانونجه
معین اولان مدتدن آزا ایه او حاله مقبولدر ، زیرا قانوننك
تأمین چالش دینی منفعت بو صورتله دهآز اول میدانه کلمش
اولور دیمکدر .

مقروضه باریه و صنایع . — بر موجد ، حامل و تاجرك
ایجاد ، اعمال ایتدیکی ، مدار تجارت اتخاذ ایلدیکی شی اوزرنده
احراز ایتدیکی حقوقك ماهیت ومدت تأمینیه سی بمحمد دولتلك
احکام قانونیه سی متخالفدر . ممالك شاهانده اخذاع براتی ایلله
عثمانلی کاشف وموجدلره یکریمی بش سنهیه قدر حق استفاده
تأمین اولندیگی [۱] حاله ، فرانسه آلمانیا ، لوکسنبورغ ، برهزیلیا ،
اسوهج ونوروچده بو مدت اون بش سنهیی تجاوز ایدمز ؛
اوروغوایده اوج ، آلتی ، طقوز سنه در ؛ انکلترده هر حاله اون
دورت سنه دن دون اولق لازمدر ؛ آمریکا حکومتات متحده .

[۱] ۱۸۲ نجی صحیفه به مراجعت .

سندہ اون یدی سندہ در ؛ اسپانیا ایله باجیقاده یکرمی سنہ یه قدر دوامی جائزدر . برده بعض شیلر ایچون بر مملکتندہ اختراع براتی ویریلہ بیلیرکن بشقه بر مملکتندہ ویرلمز ؛ مثلاً آلمانیا، لوکسنبورغده مستحضرات کیمیویہ ایچون برات ویرلمز . قانون عثمانی حکمنجه ، که فرانسه ده دخی بویله در ، بر مملکت اجیبده استحصا اولان اختراع براتنک ختام مدتندہ بورادده ارشی ایچون آلمش اولان برات مدتی ختام بولمق لازم کلیر [۱] حالوکه ، مثلاً آلمانیا، لوکسنبورغده ، بویله دکدر .

علامات فارقه حقندہ کی احکام قانونیہ ده متخافدر . پورتوغال ایله فلمنکده حروف وارقام علامت اتخاذ اولنه من . اسویچرمده تجدید اولنیا ن علامت فارقه اون بش سنہ ضرورنده مال عمومی اولور ؛ آلمانیا، دانمارق ، لوکسنبورغ ، اسوچ ایله نوروجده علامت متخذہ یالکز اون سنہ حمایه قانونیہ دن مستفید اولور ؛ آمریقاده ایسه بوحق استفادہ اوتوزسنه دوام ایدر . باجیقاده بونک ایچون معین بر مدت اولیوب محاکمک تقدیرینه براقلمشدر .

حقوق صناعیه وتجاریه بمخندہ ده دولتلرک احکام قانونیہ سی بینندہ ، بالاده کورلدیکی اوزره ، مهم فرق لار واردر . بوندن اختلاف ظهوری حالنده اختراع براتنک استحصا اولدینی ،

علامت فارقہ نك قيد و تصديق ايدلديكى محل قانونى نظره آلمق
 مقتضيدر . آنجق انضباط عمومى دولى خلددار اولماق الزم
 اولديغندن ، مثلاً بر مملكتده مال عمومى صرہ سنہ كيرمش
 اولان بر شى ايچون كاشفك ديكر بر مملكتده آلدینی اختراع
 بر اتك ، براتك آلدینی ير قانونه نظراً بر مدت دها
 دوام اتمك لازم كلسه بيله ، مال عمومى عد اولندينى محله
 آرتق حكمی اولمز .

— ۴ —

تصرفات استغمر فیہ نك انتقالی

بر شخصك وفاتنده موروثاتی بولندينى مملكت قانونه می
 توفیقاً اداره اولمق يوقسه بوخصوصده متوفاك رزوسی ،
 درجات ارتباطی و یاخود عائله سنك منافع خصوصیه سی می نظره
 آلمق لازم كله جكنی تعیین اتمك اقتضا ایدر . اكر بوبابده
 اموالك بولندينى مملكت قانونی ترجیح اولنسه و بو خصوصده
 اموالك منقول و غیر منقول قسمی تفريق ایدلمسه اموال
 مذکورہ نك هر برینی بولندقلری محل قانونه تابع طوتمق
 و بناءً عليه موروثاتك هیئت مجموعه سنی مختلف قانونلر احكامنه
 تابع قیلحق لازم کلیر . بعض مؤلفلر موروثاتك غیر منقول
 قسمی بولندقلری محل قانونه Lex rei sitae تابع طوتمقلری
 حالده منقولاته متوفاك اقامتسكاهی قانونی تطبیق اتمك استرلر .

حالبوکه موروثاته متعلق قانونلر قوانین سیاسیه دن ایسه اموال منقوله یی بولندقلری محل قانونه غیر تابع عد ایتکه جائز اولمز ؛ بوکا قابل موروثات منافع خصوصیه دن ایسه منقولات بشقه و اموال غیر منقوله بشقه قانونلرک تحت تأثیرنده بولنمق موافق اولمز . برده بوخصوصده اموالک بولندینی محل قانونی ترجیح اولندینی حالده اموال مختلف یرلرده بوله جنی کی ، ورته ده تعدد ایدم بیله جکندن ، دین حالنده دانلرک حالی ، قوانینک تخالف احکامندن دولایی ، پک زیاده کسب مشکلات ایدر . بناءً علیه ، اک یکی نظریه اولمق اوزره درمیان اولنوب بزجه ده معقول کورینان بر فکره کوره ، اموال ابتر منقول ابتر غیر منقول اولسون و زرده بولنورسه بولسون ، متوفانک منسوب بولندینی دولت و یا خود مقیم اولدینی مملکت قانونه تابع اولمق لازم کلیر [۱] .

۱

ممالک شاهانه ده تبعه مسلمه دن بلا وصیت وفات ایدنلرک اموال متروکه سی ، کتب فقهمده نقضیل اولندینی وجهله ، صره ایله اصحاب فرائض ، عصبات ، معتق ، ذوی الارحام یننده تقسیم اولنور ؛ ونلر بولنمزسه اموال مذکوره بیت المالیه طائد اولور . اصحاب اموال وفات ایتدکجه مالی ترکه حکمنی احراز

[۱] Weiss , Traité élémentaire de droit international privé , صیفه ۶۸۳

ایده میوب ، وقائی ایله مالی ترکه احکامنه تابع اولور وورثه سی او آندن اعتباراً ترکه اوزرنده احرار حق ایلر .

رق ، قتل ، اختلاف ملت [۱] و اختلاف دار مانع ارثدر .
توارثده نکاح مشروعك وجودی شرط اولدیقندن ،
ولدزنا وولدملاعنه آنجق والده لرینه وارث اولورلر ؛ چونکه
بونلرك بر پدردن نسبی ثابت دکلدر .

فرانسه ده ترکه ورثه héritiers یه و برده اخلاف غیر منتظمه
successeurs irréguliers یه عائددر . ورثه اون ایکنجی
درجه یه قدر اولان اقربادرکه ، قانون بونلری درت صنفه
آیرمیشدر ؛ اولاً فروع ؛ ثانیاً پدر ، والده ، برادر و همشیره
ایله بونلرك فروعی ؛ ثالثاً پدر و والده دن ماعدا اولان اصول ؛
رابعاً پدر و همشیره دن ماعدا اقارب ایله فروعی . اخلاف غیر
منتظمه ورثه نك قسمأ ویا تمامأ تورثدن محروم ایده یله چکی
کیمسه لدرکه بونلرده استلصاق اولنان اولاد غیر مشروع
(بونلر ورثه نك وجودی حالده مشروعأ تولد ایتسه لر
حصه لرینه اصابت ایده چك مقدارك نصف ، ثلث ویا اوچ ربی
مقداری توارث ایدرلر) ایله زوج و زوجه (بونلر آنجق
ورثه ویا استلصاق اولنمش اولاد غیر مشروع بولمادینی حالده
توارث ایدرلر) در . هیچ کیمسه سی اولیان برش خصك

[۱] بوزاده کی ملت تبیری اسلام ، کتابی اولان اقوام ، مشرک لری ،
مذهباً متحد اولان اقوامی افاده ایدر .

وفاتی حالده اموالی دوله قالیر. بر شخصی قتل ویا او کیمسه نك حیاته قصد ایدن و یا خود افتراء جنایتله اتهام ایلیان کیمسه حق توارثدن محروم اولور. میراثی قبول ایدن کیمسه متوفانك بتون دیوتی تأدیه یه مجبور و فقط رد ایدن شخص دیون مذکوریه یی تسویه دن وارسته اولور ؛ ترکه مقدارینی تحریر و قید استدرین کیمسه متوفانك دیونندن یالکز ترکه مقدارینی تأدیه ایدر .

انکلتزده بر کیمسه اموالنك مجموعنی وصیت ایله ترك ایدم بیلیر ؛ اونك ایچون ورثه یالکز وصیتسز وفات ایدنلرك ماننی توارث ایلر ؛ فقط امر انتقالده اموال منقوله ایله غیر منقول اولان اموال مختلف احکامه تابعدر . وفات ایدن بر کیمسه نك کنديسنه وصیتسز قالمیوب ، فقط اجدادینك برندن استحصال ایتمش اولدینی اموال غیر منقوله سی اوجده ایقین بولنان اقراریندن برینه استقال ایدر . وارث اولان کیمسه عهدسینه انتقال ایدن متروکاتی رد ایدم مز. اموال منقوله یه کلنجه، زوج زوج سنك غیر از دیون بالمله اموالی توارث ایدر. زوج، اگر چو جققلر وارسه، زوجنك اموالنك ثلثه، یوقسه نصفنه وارث اولور. اولاد والده لرینك حصه سی بعدالافراز، بلا تفریق جنس و سن متساویا حصه ارثیه یه نائل اولور. اشبو وارثلر بولمדיنی حالده متروکات منقوله سائر ورثیه واونلرده اولمزسه دوله قالیر .

آلمانیاده بعض حکومتلر درجه قرابتی نظره آلیرلر سده . بعضلرنده ورثه شخص متوفانك فروعی ، والدینی ایله اونلرك

فروعی، جدینی ایله اولنرك فروعی وجدالجدینی ایله کذا
اولنرك فروعی اولق اوزره درت صنفه منقسمدر. ذکور
واندن اولان ورته بیننده فرق یوقسده، بعض یرلرده غیر
منقولانده ذکوره حق رجحان ویا تقسیمده براززیاده حصه
ویررلر. اولاد غیر مشروعه والدهرینه اولاد مشروعه ایله
برابر وارث اولورلر. آلمانیاك بعض قسمنده ورته شخص
متوفانك دیونندن مسئول اولورسده، بعض یرلرنده اولمز.

اسپانیاده متروكات شخص متوفانك اولافروع مشروعه سنه،
ثانیاً وفات ایدن والدنك اولاد غیر مشروعه سنه، ثالثاً فروعك
فقدانده شخص متوفانك اصوله، رابعا اقرباء سائریه انتقال
ایدر. بونلرك فقدانی حالده شخص متوفانك استلصاق ایتدیکی
اولاد غیر مشروعه سی، بوندن صکره تفریق ایدلامش اولان
زوجیه سی، بعده اونجی درجهیه قدر اولان اقرباسی وهیچ بری
اولمزسه دولت توارث ایدر. ورته متروكاتی قبول ایدرسه
متوفانك دیونندن مسئول اولورسده، متروكاتی ثبت دفتر
ایتدیردیکی حالده دیونك یالکز اومقدارینی تأدیهیه مجبور اولور.
زوجیه وارث اولوبده سوء فعل وحرکتمده واثان رامله،
ایزینی سقیل ایدن اولاد حق توازنن محروم اولور.

ایتالیا قانوننك موروثاته متماق احکامی فرانسهك احکام
قانونیه نه مشابه ایدر، استلصاق واثان اولاد غیر مشروعه
ایله زوجین حقنك کی حکامی دهامساء کارانه در. شخص

متوفایی برویتنا، تنظیم و یا تعدیلنه اجبار ابدن، بروصیتنامه بی
تنظیم و یا فسخن منع ایلام، موجود بروصیتنامه بی محر و یا
تخریف ایدن کیسه حق تورندن محرومدر.

روسیده حقوق ارثیه بی اولانلر اول شخص متوفانک
اولاد ذکوری ایله فروعی، ثانیاً انانندن اولان اولادی ایله
فروعی، ثالثاً برادرلری ایله فروعی، رابعاً همشیره لری ایله فروعی،
خامساً لام برادرلری ایله فروعی، سادساً لام همشیره لری ایله
فروعی، سابعاً اقارب سائر سیدر. ابون اولادک متروکاتی
اوزرنده اساساً حقوق ارثیه مالک اولوب، آنجق بونره
بخش ایتمن اولدقلری اموالی، اگر چو جقری یوقسه، اترداداید
بیلیلر. زوجینک هر بری غیر منقول اموالی سبع ومنقولاتی
نصف درجه نده تورث ایدر. ورثه ک فقدانده متروکات
دولته قایر سده، معلمینک متروکاتی منسوب اولدقلری مؤسسات
علمیه، رعیانک کلیساره، شهر اهالیسنک بلده لره انتقال ایدر.
بر شخصک وفاتی، حقوق مدنی دن محرومینه محکومتی، مناتره
کیرمیسی ایله املی ترکه حکمنی کسب ایدر بر شخصک وفاتده
بر حیات و یا حال حمده ارمیان، کورک و یا بریایه نفی جزارینه
محکوم اولان، مناستره کیرن کیسه رک حقوق ارثیه سی یوقدر.
ترکه بی قبول ایدن کیسه مترفاتک دیونندن مسؤل اولور سده،
ترکه نک ردی ایله بوندن قورتلن ممکندر. لهستانده تماماً فرانسه
اصولی جاریدر.

تصرفات استخلافیه‌نک انتقالنندن نشئت ایدہ‌جک اختلافات قوانین وفات ایدن کیمسه‌لرک منسوب اریلدق‌لری دولت قانونه توفیقاً حل اولمق لازم کاریکنی بحشمزک بدایتدره سویلشیدک . کړک منقول کړک غیر منقول اریلسون، اموال متروک‌نک ترکہ حالته کیرمسی اصحابنک دولت متبوعه‌سی احکام قانونیه‌سنه کوره در . بناءً علیه ترکہ شخص متوفانک دولت متبوعه‌سی قانونه کوره حین وفاتده باشلارسه، اموال نروده بولنورسه بولونسون، ورثه او آندن اعتباراً حق توارثی احرار ایدر . متوفانک دولت متبوعه‌سی قانونی ایلہ اموالک بولندیفی محل قانونی بیننده فرق بولندیفی، ومثلاً هر ایکیمسی ده آنجق شخصک وفات ایتدیکی ویاخود مفقودی ثابت اولدیفی کون ترکہ‌سنک آجلدیفته قائل اولدیفی، حالده اختلاف اولمزسه‌ده، مثلاً روسیه تبعه‌سندن بری موت معنوی‌یه دوچار اوله‌رق بونک بو طرزی قبول ایتیمان بر مملکتده اموالی بولنورسه مشکلات ظهوره کملک طبیعی اولوب، هر حالده انضباط عمومی دولی‌یه رعایت اتمک مجبوریدر . دیگر طرفدن ورثه‌نک صلاحیتی شخص متوفانک دکل، ورثه‌نک دولت متبوعه‌لری قانونی‌الله تعین ایدر . حالوکه قانون محلینک منافع عمومیة محلیه‌یه مغایر اولدیغندن دولای رد ایتدیکی بر سبیلہ دولت متبوعه‌سنک حق توارثدن محروم ایتدیکی برکیمسه مثلاً مناس‌تره کیرن بر روسیه‌لی، اموالک بولندیفی اومملکت قانونه توفیقاً حق توارثی حائزدر .

وارثك صلاحیت شخصیه سی موضوع بحث دكلسه ، شخص متوفانك منسوب بولندینی دولت قانونسه توقیفاً افراد عائله دن كیملك حق توارثی اولوب بین الورثه کیفیت رجحانلری تعیین اولنق ، فقط انضباط عمومی دولیه رعایت ایدملك لازم کلیر . ابونی بر اولان قرداش لر ایله لاب و یاخود لام اولان برادر و همشیره لرك درجه وراثتلی ، زوجینك حقوق ارثیه سی اولوب اولدینی ، بخش اموال ایتمش اولانلرك حق استردادی و اولاد غیر مشروعه نك حق وراثتی اولوب اولدینی کذا شخص متوفانك دولت متبوعه سی قانونه توقیفاً تعین ایدر ؛ فقط بالخاصه اولاد غیر مشروعه نك حقوق ارثیه سی بمحمد انضباط عمومی دولیه رعایت شرطدر .

بر شخص بلا وارث وفات ایدر و دولت متبوعه سی قانونی ایله اموالک بولندینی محل قانونی ده بمقوله اشخاصك متروکاتی دولته ویررسه ، دولت متبوعه سی عادتاً ورثه سائره کی توارث ایلدیکی تقدیرده متروکات مذکور ، بولندینی محل قانونی مساعد اولدینی حلد ، دولت متبوعه یه انتقال ایتک لام کلیر . بالعکس متوفانك دولت متبوعه سی اموال متروکه کی عادتاً صاحب سر مال کی ضبط صورتیه آلیورسه و حالده اموال مذکور بولندقلری محل صاحبی اولان دولته عائد اولق اتضا ایدر . بر شخصك دولت متبوعه سی بلارارث وفات ایدن تبعه سنك اموالی قانوناً توارث ایتدیکی تقدیرده ده او دولت تبعه سندن بلاوارث وفات

ایندلرک اموالی بولندقلری ملکک صاحبی اولان دولته قالمق طبیعیدر .

ترکیبی قبول ویا رد ایتک صلاحیتی ایله بوکا متعلق اولان مهملات، متروکات شخص متوفانک منسوب اولدینی دولت ملککی خارجنده اولسه بیلر، هر حالده متوفانک دولت متبوعه سی قانونی ایله تعین اولنور، فقط قبول وردک طرز اجراسی، محل عقد قانونی معتبر اولمق قاءده سنه بناء، اموالک بواندینی محل قانونه توفیق اوانه جنی کی ورنه نك دولت متبوعه لری قانونه ده موافق اوله بیلیر .

تکالیفه صاحب ملک اولان دولتک بیوک بر منفعتی اولد-
ینندن متروکاتدن آله حق رسمک تعین مقـدارى متروکاتک بواندینی محل صاحبی اولان دولتک قانونه عائد اولدینی کی، رسمده ینه او دولتک خزینه سنه عائد اولور .

— ۲ —

احکام شرعییه نظرآ وصیت د بدالموت اولان شیئه مضاف اولان تمایکدر « [۱] . بونک ایچون موصی به، یعنی وصیت اولان شی موصینک وفاتندن صکره قابل تمایک اولمق، موصی تمایک ایچون اهلیت شخصییه صاحبی اولمق، وصیت مالک نلشدن زیاده یه شامل اولماق، وموصی له موصینک وارثی

اولیوب ییاجی 'ولق، قتلی' ولامق و بر حیات بولمق شرطدره.
ارث خلافتنه اوله رق، مسامک ذمی یه و ذینک مسله و صیتی
جائزدره. موصی مدیون اولور و دینی بتون اموال و املاکندن
دون اولمازسه وصیت جائز اولمز. موصینک قبل الوفات وصیتدن
رجوع ایتسی ممکندر.

فرانسه ده اون آلتی یاشنه واصل اولمیان صیلر وصیت
ایده مدکلری کبی، بوندن صکره سن رشده واصل اولنجیه
قدرده یا یکز نصف ماللرینی وصیت ایده بیلیرلر. موصینک
حین وفاتنده رحم مادرده موجود اولوب ده بر حیات اوله رق
تولد ایدن هر شخص موصی له اوله بیایر. خسته خانلر و سائر
مؤسسات خیریه منفعتنه ایدیلن وصیتلر آنجق رئیس دولتک
مساعده سیله مقبول اولور. بر پدر ویا والدنک اولاد غیر
مشروعه یه، وصیتسز وفات حالده حصه لرینه اصابت ایده جک
مقدار ارثدن فضله، وصیتی مقبول اولمدنی کبی، برخسته نک ده
کندنی تداوی ایدن طیبیه، اجرت مقایلی اولمز ویا طیب
اقریاسندن بولمزسه، وصیتی معتبر غر اولمز. موصینک بر
چو جنی اولورسه مالنک نصفی، ایکی چو جنی اولورسه ثلثانی
واوچ ویا زیاده چو جنی اولورسه اربع ربعی چو جق لرینه عائد
اولدیندن مالنک او مقدارلری وصیت اولنه من.

انکلمترده صیلر ایله مجنون و محجور اولانلر وصیت ایده منلر.
ذات الزوج قادینلر یا یکز استعمال ذاتیلرینه مخصوص اولان

اموالی وصیت اید بیلیرلر . بر حیات اولان ویاخود حین وصیتده رحم مادرده حصول بولمش اولان هر شخص موصی له اوله بیلیر . اشخاص معنویه ده ، موصی له اوله بیلیمده ، موصی به مال غیر منقول اولدینی حالد اذن حکمداری لازمدر . موصی مالک کافه سنی وصیت اید بیلیر . وصیتنامه نك معتبر ایلسی وموصی طرفدن ایکی شاهد حضورنده امضا ایدلسی وشاهدلر كده آیریجه امضا ایتلری مقتضیدر .

آلمانیا و اوستریا قانونلری وصیت خصوصنده روماقانونندن اقتباس احکام ایتمش اولدقلرندن ، موصی ورثه سنك حقوق ارثیه سنی آن لم یکن عدایله اموالک تکمیلانی وصیت ایدمه . بو خصوصده ورثیه عائد مقدار هریرده ، بر دکلدر . آوستریاده آنحق اصول وفروع ایچون بوبایده حق موجود اولوب بونلره عائد حقوق ارثیه مالک نصیفی ویا ثلثیدر . ساقسونیاده زوجیندن هر برینك ده حصه ارثیه لرینه ، که نصف ایله ربع درجه سنده در ، رعایت اولنوب اونك فضلای وصیت اولنه بیلیر . اسپانیاده وصیت یا مقاولات محرری ایله شهود حضورنده شفاهی ویاخود کذا شهود حضورنده بالظیم مقاولات محررینه مودوع تحریری اولمق لازم کلیر . سنی اون درتدن دون اولان ارک و هنوز اون ایکی یاشنه واصل اولیان قزچو ققار ایله مجنونلر و مناسترلر سکانی وصیت ایدمه زلر . رخصتمیز اولان شرکترلر ایله مناسترلرده مقیم اولانلر موصی له اولدقلری

کبی ، مناسبتر لرده اموال غیر منقوله وصیت اولنلارمز . زما
وسفاح محصولی اولان چوجقلر پدرلرینک و بیگارک نذرنده
بولنلش اولانلارک چوجقلری ابویلرینک و بر خسته نك مرض
موتنده نذرنده بولنلش اولان راهب او خسته نك موسى الهی
اوللارمز .

ایته ایاده ارن سکیز یاشنی اکمال ایدن نام الشعور هر شخص
وصیت ایتمک حقى حائزدر . یالکیز بلا وصیت وفات حالده توزر
ایده جک اولان کیمسه لر موسى له ارله بیلیر . اولاد طبعیه یالکیز
حقوق ارثیه لری مقدارى وصیتدن استفاده ایده بیلیر . وصیتنامه
کندینه تودیم اولنان مأمور ایله حاضر بولنان شاهدلرو وصیتنامه
تحریر ایایان کیمسه موسى له اوللارمز . وصیتنامه لر شاهد
حضورنده تنظیم اولنور و ایته ایاده مقم اجنبیلرکده شهادتی
جائزدر . موصلینک فروعى اولدینی حالده مالک یالکیز نصفنى
واصولی اولدینی حالده ثلثانی وصیت ایده بیلیر ، قصوری
اصول و فروغنه قالیر . کذا بر حیات بولنان زوج و یا زوجه
ایله استلصاق اولنلش اولان اولاد طبعیه یده بر حصه ارثیه
قالق لازمدر .

روسیه ده وصیتنامه لر رسمی و مقصودى اولق اوزره ایکی
نوعدر : رسمی اولانلر موسى طرفندن مأمورین حکومت
بالابراز قید ایتمدیلمک و یا خود مقاولات محررینه ویریلوب

اوراقی میبایست حفظ ایتدیرلمک لارمدر ؛ مقاولات محررینه ویرلدیکی حالد شاهداقتضا ایدر . خصوصی وصیتنامه لار روسیه ده معتبر اوله بیللمک ایچون موصینک وفاتندن صکره مأمورین عدلیه یه ابراز اولنمق ایجاب ایدر .

وفات ایدن کیمسه لار یالکیز کندی مملکتلرنده دکل ، خارجدهده وصیت ایدرلر ، وصیتلری وطنلری خارجده بولنان اموالده شامل بولنور ، تبعة اجنبیه دن بولنان کیمسه لرده موصی له اوله بیلیر ، بوندن ده قوانین مختلفه احکامک یکدیگره مشابه اولمامه سندن دولایی اختلافات ظهور ایدر .

اول امرده موصینک وصیته ، موصی الهک وصیتدن استفاده یه دولت متبوعه لری قانونی نظرنده اهل وصال اولملری اقتضا ایدر . بناءً علیه دولت متبوعه سی قانونی حکمنجه وصیت ایتمکه صلاحیتی بولنمیان بر شیخص بر مملکت اجنبیه ده وصیت ایدمه من . آنجق بوندهده انضباط عمومی دولی به رعایت شرط اولدیغندن ، مثلاً مناستر سکانندن بولنان بر اسپانیول فرانسه ده وصیت ایتسه ، بو وصیت اسپانیایا قانونری نظرنده مقبول اولمه بیله ، فرانسه ده معتبر اولور . - وصیتنامه لارک شکلنه متعلق اوله رق ظهور ایدن اختلافانک حانده محل عقد قانوننه نظر اولنور سه ده ، بو خصوصده موصینک دولت متبوعه سی قانونی ترجیحده کی حق اختیاری ده غیر منکردر . بونک کی موصی اموالی استدیکی کی اداره وترکده سربستدر ؛ بناءً علیه حین

وصیتده هانکی قانونی ترجیح ایدرسه اوکا توفیقاً وصیت ایده۔
 بیلیر۔ آنجق تنظیم ایتدیکی وصیتنامه ده بوباید صراحت بولمزرسه
 احکامی کندیسنبجه اک زیاده معلوم اولق لازم کلن ، دوات
 متبوعه سی قانونی ترجیح ایتدیکی فرض اولنورسه ده، بونک دم
 انضباط عمومی دولی بی اخلاص ایتامسی مقتضیدر .



دردنجی باب

صلاحیت و اصول محاکمه

مباحث سالفه ده دوات متبوعه سی ملکی خارجنه چیمش
 اولان بر شخصک سا کن بولدینی مملکت اجنبیه ده حائز اولدینی
 حقوق ووظائف نهدن عبارت اولدینی و بو حقوق ووظائف
 هانکی قانونلر ایله تعین ایتدیکی کورلمشیدی . بوبایدده بر
 یرلنک بر اجنبیده و بر اجنبینک بر یرلیده و یا خود بر اجنبینک
 بر اجنبیده مطلوبی اولدینی حالدده دائن محاکمه مراجعت ایدوب ده
 استحصال حقوق ایده بیلیرمی ، بر محکمه نک مقررانی بر مملکت
 اجنبیه ده حائز تاثیر میدز و نه صورت و شرائط ایله اجرای تاثیر
 ایدر بوجهتلر تدقیق اولنه حقدر .

برنجی فصل

ممالك عثمانیه ده سا که تبعه اجنبیه همند
محاکم عثمانیه نیک صومعه

— ۱ —

عثمانی ایدر اجنبی آرد سنده مخرج دعاوی

ممالك شاهانده تبعه عثمانیه دن بری ایله بر اجنبی بیننده
تحدث ایدن اختلافاتک محل رؤیتی محاکم عثمانیه در ؛ یالکفر
بوکی اختلافاندن متولد دعاوی نیک محکمه عثمانیه ده حین
رؤیتنده اجنبینک منسوب بولندی فی دولتک قونسلسخانه سی
طرفندن بر ترجمانک حاضر بولنمی اقتضا ایدر . ۱۱۵۴ سنه
هجریه سی ربیع الاولنک در دینه تصادف ایدن ۳ مایس ۱۸۴۰
سال میلادی سنده و سلطان محمود خان اول زماننده فرانسه
ایله منعقد عهدنامه (قایتولاسیون) ده « فرانجه تجاری ایله
برکیمسه نیک نزاعی اولسه قاضی به وارد قدده فرانجه لونک ترجماندری
ماضر بولنمزایه قاضی دعوالرک استماع اتمیه » [۱] دینلمشدر .
قایتولاسیون دینیلن شو عهد قدیمه ایله بر دولت تبعه سنده
بخش اولنان مساعدات ، الکی زیاده مظهر مساعده اولاره ملت

[۱] مجموعه مقالات : جلد ۱ ، صفحه ۱۴

مأمور سی قیدیلہ حکومت سنیہ ایلہ معاہدہ عقد ایلیان حکومت
سائرہ تبعہ سنہ دہ تاملین و تشمیل اولندیغندن ، بالادہ مندرج فقرہ
عہدیہ حکمی دول مذکورہ نک ممالک عثمانیہ دہ مقیم تبعہ سی
حقندہ دہ تماماً جاریدر . بوققرہ نک دلاتندن صریحاً آکلاشیلیرکہ
بورادہ عثمانلیلر ایلہ اجنبیلر بینندہ ظهور ایدہ بیلن هر نوع
دعای و اختلافاتک رؤیت وحدلی محاکم عثمانیہ عائد فقط
استر مدعی اولسون استر مدع علیہ بولسون - اجنبینک
منسوب اولدینی دولت قونسلوس - خانہ سی طرفندن ترجمان
بولندیرلسی لازمدر .

شور اسی شایان تذکاردرکہ فقرہ عہدیہ دہ استماع تعبیری
قولالائشدر ؛ یعنی ترجمان دعوانک حین استماعندہ ، تعبیر
آخرلہ اتناہ محاکمہ حاضر بولنق عہداً لازمدر . بناءً علیہ
محاکمہ نک ختامی ایلہ ہیئت حاکمہ مذاکرہ سالونہ چکدکن
صکرہ مذاکرہ نک دواہی اتناشدہ قونسلوسخانہ ترجماننک
اورادہ حضورینہ لزوم یوقدر . حالوکہ محاکمہ نک ختامی
ایلہ ہیئت حاکمہ لاجل المذاکرہ سالونہ چکدکن صکرہ دہ
ترجماننک حضورینہ مؤخرأ عدلیہ نظارتہ تبلیغ اولنان برتذکرہ
سامیہ ایلہ مساعدہ اولندیغندن ، بوکون اجنبیلرہ تعلق اولان
دعایینک عثمانلی محکمہ لرنده محاکمہ مذاکرہ سی اتناشدہ ترجماننر
حاضر بولنیور .

تبعه عثمانیه دن بری ایله بر اجنبی آرمسندده وقوعه کلن
 براختلافك حلی هر حالده محاکم عثمانیه عائد بولندیغنی صراحتاً
 تعیین ایدن بوقرعه عهدیه ده «... نزاعی اولسه قاضی به وارد قدده
 .. قاضی دعوا الرک استماع ایتیه ...» دنیلمش اولدیغنه نظراً ،
 هر نوع اختلافاتك حلی مطابق صورتده محاکم عثمانیه عائد اولدیغنی
 شبهه سز اولدیغنی کبی ، بوبایدنه کبی دعاوی ویا اختلافاتك هانکی
 محکمه لرده رؤیت اولنه جغنی تصریح اولمندیغندن ، بونک ایچونده
 نظریات ایله اصول محاکماته متابعت اولنق طبیعیدر . بناءً علیه
 دعاوی جزائیه نك محاکم جزائیه ده ، حقوق دعوا الرینك محاکم
 حقوقیه ده و مصالح تجاریه به تعلق ایدن اختلافاتك تجارت محکمه لرنده
 رؤیت وحل اولنسی اقتضا ایدر . حالبوکه طرفیندن برینك اجنبی
 اولدیغنی اختلافاتك جزایه متعلق اولانلر ، مساعدۀ عهدیه به
 بناءً ترجمان حضور یله محاکم جزائیه ده رؤیت اولنورلر سده ،
 دعاوی حقوقیه اصولاً حقوق محکمه لرنده کورملك لازم کلیرکن
 تجارت محکمه لرنده رؤیت اولنیور و بوجهله اجنیدلرک علاقهدار
 اولدقلری حقوق ایشلری ایله مصالح تجاریه مزج ایدلیور . بوده
 کافی دکلش کبی برده تجارت محکمه سندده اجانبیدن برینك علاقهدار
 بولندیغنی حقوق ویا تجارتیه متعلق برایشك رؤیتده اجنیه نك
 منسوب اولدیغنی سفارت ویا قونسلسخانه طرفندن صاحب
 رأی ایکی ذات اعضا صفتیله هیئت حاکمه میانده اخذ موقع ایدیور .
 ذاتاً عهدنامه (قایتولاسیون) ، طرفینجه وظائف متقابله

اساسنه مستند اولديغندن ، هيچ بر وقت معاهده قوتى حائز
 برسند دولى حكمنده عد اولنه مز ؛ ميحك اباحه سندن هر زمان
 حق رجوعى اولديغندن ، دولتك عهدنامه ايله اجانبه بخش
 اينديكى فواندى هر زمان استرداده حق اولق طبعيدر . داخل
 ممالك عثمانيه ده تيمه عليه نسبتله اجنيلره بويولده برطاقم منافع
 استثنائيه تامين ايليان بو عهد نامه لك بركون تماماً رفع والفا
 اولنسى وحدود ملكيه سى داخلنده دولت عثمانيه لك هر كس
 حقنده حق حاكميتنى مطلق صورتده وسياناً تطبيق واجرا ايتسى
 لازمدر ؛ ذاتاً هيچ بر دولت اجنيلره تبعه سندن زيا حقوق
 ومنافع تامين ايتمز . مع مافيه ، مادامكه شو عهد نامه لر هنوز الفا
 اولنما مشدر ، دولتك امضا اينديكى واحكامى اليوم مرعى برونيقه
 حكمنه رعايت ايتسى الزم اولديغندن ، اجنيلرك علاقه دار اولدقلى
 دعاوينك محاكم عثمانيه ده حين رؤيتنده مساعدۀ عهديه بناء
 يالكوز محاكم اتناسنده ترجمانك حضورينه برشى دينله مز ؛ فقط
 تذكرة ساميه لر سندات دوليه حكمنده هيچ بر وقت طوتيله ميه .
 جقارندن ونصوص عهديه مستند اولقسز ين مساعدات استثنائيه لك
 توسيعى قواعد كلييه منافي بولنديغندن ، مز اكره ايله حكمتك
 قرار لاشديرلدينى صروده ترجمانرك حضورى تجويز اولنماق
 لازم كلير . حقوق وتجارت ايشلرى بسبتون بشقه اولوب ، حتى
 هرايكيسنه عائد اصول محاكمه ده بشقه اولديغندن ، برنده پيداي
 اختصاص ايدن بر حاكم ديكرينه اودرجه ده واقف اوله مز ؛ ذاتاً

بولندن دولاییدر که بوايشلری رؤیتہ مأمور اولان محاکم فریق ایدلمشدر . بوبایدہ نصل عہدی دخی بولمديغندن ، دعاوی حقوقیہ نك تجارت مجاسلرندہ رؤیتی جائز اولماق طبیعیدر . ہلہ دعوانك براجنبیہ تعلق سبیلہ ہیئت حاکمہ میانہ صاحب رأی اعضاء اجنبیہ ادخالی — حاکمیت ملیہ و استقلال محاکمہ مداخلہ اولدینی کی هیچ بر مجبوریٔ عہدیہ یہدہ مستند اولمديغندن — قطعاً شایان قبول اولماق اقتضا ایدر .

اجانبك علاقہ دار اولدقلری خصوصاتدن جزایہ متعلق بولنان اختلافات ، بالادہ کورلدیکی اوزرہ ، ترجمان حضوریلہ محاکم جزائیہدہ رؤیت اولنورسہدہ ، حقوق ایشلرندہ مسئلہ نك منقولاتہ و اموال غیر منقولہ یہ تعلق اعتباریلہ شکلی دکشیر . اگر ایشدہ علاقہ دار اولان اجنبی ممالک شاہانہدہ املاک صاحبی اولور و اختلاف اواملاکدن نشئت ایدر و یا نتیجہ اعتباریلہ او املاکہ تعلق ایدرسہ ، ایش آرتق ، سائر دعاویء حقوقیہ کی ، تجارت محکمہ سنہ کیتمیوب ، طرفینی عثمانلی بولنان دعاویء حقوقیہدہ اولدینی کی ، حقوق محکمہ سنہ رؤیت اولنور ؛ چونکہ بالادہ ذکر اولدینی اوزرہ [۱] ، ممالک عثمانیہدہ املاک صاحبی اولان اجنبیلر ، او بابدہ کی نظامنامہ احکامنہ توفیقاً ، «املاکہ عائد کافہ خصوصاتہ تبعہ دولت عثمانیہ نك مکلف اولدقلری کافہ خصوصاتہ مجبور» اولوب «کرك

کندیلری مدعی و کرک مدعی علیه اولسون و «کرک ایکی طرف دخی تبعه اجنبیه دن بولنسون دوشریدن دوشریه دولت علیه محکمه سنه مراجعت اولنور» بناء علیه اجانبه عائد دعاویدن اموال غیر منقولیه متعلق بولنانلر عثمانلی محکمه لرنده رؤیت اولنور کن اجنبیتک منسوب بولندیفی سفارت ویا قونسلوسخانه طرفدن ترجمان بولنمز ؛ بوقیل دعاویدن حقوقه تعلق ایدنلری تجارت محکمه سنه سوق اولنمز ؛ بو باده صادر اولان حکم وقرارلر لاجل الاجرا قونسلوسخانهیه تبلیغ ایدلمز . حاصلی اجنبیتک صفت اجنبیه سی اصلا نظره آلمیوب حقنده تماماً عن اصل اهالیء محلیه دن بولنان عثمانلیلر کی معامله اولنور .

تبعه اجنبیهیه تعلق اولان بر حقوق دعواسی اموال منقولیه عائد بولنور سه او وقت حکم عهدی ایله تعهدات عهدیهیه غیر غیر مستند بولنان معناسر تعامل تماماً مرعیدر . اشته اوزمان اصلاف حقوق محکمه سنه بدل تجارت محکمه سنه و صاحب رأی اعضای اجنبیه حضورنده رؤیت اولندیفی کی ، اجنبیتک منسوب بولندیفی سفارت ویا قونسلوسخانه نک ترجمانی ده موجود بولنور و صادر اولان حکم اجرا اولنق اوزره قونسلوسخانهیه تبلیغ اولنور . چونکه عهداً اجانبه عائد مسائلک محاکمه انشای رؤیتنده ترجمان حاضر بولنه جفی کی ، محاکم عثمانیه دن صادر اولان حکوملرک اجرایی ده قونسلوسخانه محکمه لرینه

عائد در ۱۷۸۳ تاریخ میلادی سنه تصادف ایدن ۱۱۹۸ سنه هجریه سنده
وسلطان عبدالحمید اول زماننده اسپانیا ایله عقد اولنان معا-
هده نك بوكا دائر اولان برفقره سنده «رعایا لرندن برکمنه اخذ
اولندقد» وکیلی وقونسلوسی طرفندن طلب اولنور ایسه تسلیم
اولنوب تهمتلرینه کوره تادیب اولنه» دینلرک اجنبیلر
حقنده صادر اوله حق اعلاماتک تنفیذی قونسلوسخانه محکمه لرینه
ترك وتودیع اولنمشدر.

حقوق عادیه دعوالرنده برعثمانلی داتشک تبعه اجنبیه دن
بری ذمتده آله جنی اولدینی حالد مدیونك سندی ابراز
اولندقجه محکمه شهادته اعتبار ایله رؤیت اختلاف واعطای
حکمدن ممنوعدر. بو باده حکمی حاوی الك اسکی وثیقه رسمیه
۱۵۳۶ سنه میلادی سنه متصادف ۹۳۸ سال هجری سنده وسلطان
سلیمانی قانونی زماننده فرانسیه اعطا اولنان خط شریفدر، که
بوكا نظراً مدیون فرانسز اولان بوکی حقوق دعوالرنده
فرانسزك یا کمندینك ویا قونسلوسنك خط دستیله محرر برسند
ابراز اولدقجه قاضینك دعوی واقعینی رؤیت وفصل ایتمسی
جائز دکلدرد. بالاده ذکر اولنان ۱۷۴۰ عهدنامه سنك بو حکمی
تأیید ایدن برفقره سنده «دوات علیه تابع اولانلر فرانجه او
ایله دعوا صد دنده اولدقلرنده مدعیلرک شرعی سندات
وتمسکاتلری اولدقجه دعوالری استماع اولنیه» دنیلنمشدر. آنحق
اصول محاکمات حقوقیه قانونی حکمنجه اساساً مقداری ۵۰۰۰.

غروشی تجاوازایدن حقوق دعوالرنده، طرفین تبه عثمانیه دنده اولسه، اقامه شهود ایله اثبات مدعا جائز اولوب همه حال سندن ابرازی لازم کلدیکندن اجانبه برنوع امتیاز تأمین ایدن بوققره عهدیه نک حکمی یالکنز کوچک مطلوبات حقنده الیوم مرعی بولنقددهر.

محاکم عثمانیه نک اجنبیه نک اقامتگاهنه دخول امری اعطاسی خصوصنده کی صلاحیتنه کناجه، بوبابده قایتولاسیونه نائل اولان اجانبه نک حائر اولدقلری مساعده ممالک سائرده غیر جاریدر. ۱۷۴۰ عهدنامه سنک فقره مخصوصه سنده بوکا دائر شو عباره موجوددر: «طرف محاکدن ودولت علیهم ضابطانی جانبلرندن واهل عرف طائفه سندن فرانجه لو اولانلرک ساکن اولدقلری خانیه بلا موجب جبراً دخول اولنمیوب خانه سنده دخوله حاجت مس ایلدیکی حالد ایلچی وقونسولوس بولنان یرلرده آنلره اخبار و طرفلرندن تعیین اولنان آدملر ایله اولدینی محله واریلوب بوخصوصه خلافتیه حرکت ایدن بولنور ایسه بعدالت حقیق تأدیب اولنلر». دیمک که اجانبدن برینک مسکننه دخول ایچون منسوب اولدینی سفارت ویا قونسولوسخانه طرفندن برامور مخصوصک حضوری لازمدر. بوققره عهدیه نک حکمی، بالاده کورلیدیکی اوزره [۱]، ممالک شاهانه اجنبیلرک استملاک املاک ایتملری حقنده کی

نظامنامه‌یه مربوط پروتوقول ایله تعدیل اولمشددر . مذکور پروتوقول حکمنجه ، خانه‌سنه دخولی لازم کلن اجنبنك اقامتکاهی منسوب اولدینی دولتك قونسلسخانه‌سنك بولندینی محله طقوز ساعتدن زیاده مسافده ایسه قونسلسه اخبار ایله طرفندن برآدم کلمسه انتظاره محل اولقمزین ضابطه عدلیه مأمورلری ، بوکی احوالده تبعه عثمانیه اقامتکاهنه نصل داخل اولورلرسه او وجهله ، اجنبنك اقامتکاهنه کیره بیلرلر . آنجق قونسلسخانه‌نك بولندینی محل ایله اجنبنك اقامتکاهی ییتندهکی مسافه طقوز ساعت ویا اکیسک ایسه او حالده قونسلسه اخبار کیفیت ایله بر مأمورک ورودینه انتظار ایتمک اقتضا ایدر . مع مافیه بو معامله مذکور پروتوقولی امضا ایدن دولتر تبعه‌سی حقنده جاریدر ؛ قایتولاسیونه نائل اولان دولتردن پروتوقوله وضع امضا ایتمیان دولتر تبعه‌سی حقنده بو معامله تطبیق اولنه‌مز ، اوکیلر حقنده فقره عهدیه حکمنك بلاتعدیل اجرایی ضرور ایدر . محاکم عثمانیه‌نك تبعه اجنبیه‌یه تعلق ایدن صلاحیتی بمحتمده نظر دفته آلمنسی مقتضی بعض نقاط واردر ، که بو نقطه‌لر ایران و یونان دولتری تبعه‌سنه عائددر . ممالک شاهانه‌ده ساکن تبعه ایرانیه‌دن بری ایله بر عثمانلی ییتنده حقوق و تجارتیه متعلق ظهور ایدن براختلافک محاکم عثمانیه‌ده اصولاً حین رؤیتنده ایران شهنشدر خاه‌سی طرفندن ترجمان بولمنسه انتظار ایتمک مجبوری اولمیوب ، یالکیز ترجمانک حضورینه مساعدده اولنه بیلر ؛

مواد جزائیه ده تبعهٔ ایرانیه عثمانی معامله سینه تابعدر وحتی مادهٔ جزائیه ایکی ایرانی آره سنده ظهور ایتسه حقارنده تبعهٔ عثمانیه کی معامله اولنور ؛ مواد حقوقیه و تجاریه ده محاکم عثمانیه دن صادر اولان اعلاماتک اجرایی ایران شهیندرخانه سینه عائد ایهده ، مأمورین ایرانیه طرفندن حکم اعلام تنفیذ اولنمز و یا اولنه مرسه مأمورین اجراییه عثمانیه معرفتیه موقع اجرایه وضع اولنور . خارجیه نظارتی ایله درساعات ایران سفارتی بیننده ، ۷ محرم ۱۲۹۱ تاریخنده عقد اولنان مقاوله نك بوكا دائر اولان ماده سی شویله در : « ممالك دولت علیه ده بولنان تبعهٔ ایرانیه جنایت و جنحه و قباحته متعلق کافهٔ خصوصاتده طوغریدن طوغرییه قوانین و نظامات دولت علیه ده و به واسطه ضابطه و محاکم سلطنت منیه تابع اوله جقدر » یعنی مواد جزائیه ده محاکم عثمانیه دن صادر اولان احکامک اجرایی مأمورین عثمانیه عائد اولوب ، بونلر لاجل الاجرا مأمورین ایرانیه ده تبلیغ و تودیع اولنمز . « تبعهٔ ایرانیه ایله تبعهٔ دولت علیه بیننده تجزرت و حقوق عادییه متعلق تگون ایده بیله جک بالجمله دعاوی و اختلافات محاکم دولت علیه ده فصل ورؤیت اولنه جق و بو مثلو دعاوی نك حین رؤیتنده شهیندرلر طرفندن ترجمان بولندیر مق ماز اوله جقدر و تبعهٔ ایرانیه علیه ده ویریه جک حقوق و تجارت اعلاماتک احکامی مأمورین دولت علیه طرفندن سفارت و شهیندرلر واسطه سینه مراجعتله اجرا اولنه جق ایهده

اعلامات مذکور منك اجرا سنه لازم كله جك مدته نظراً شاید
سفارت و شهیندر لر طرفدن اجرا اولمیه جفی و یا خود اولمیه جفی
تعیین ایلدیکی حالدہ بلا واسطہ مأمورین دولت علیہ طرفدن
اجرا اولنه جقدر « بو مقاوله نك دیگر بز فقره سنده ده » ممالك
محروسه ده اقامت ایدن تبعه ایرانیہ دولت علیہ تبعه سی مثللو
حرف و صنایع اجرا ایتک و اصنافلق صنفنه کیرمک استرلر
ایسه علی العموم اصناف حقنده مرعی الاجرا اولان کافه
نظامات و قوانیندن مستفید اوله جقلرندن اصنافلق و حرقت
و صناعت اجرا ایتدیکه ذکر اولنان نظامات و قوانین و اصوله
تابع و بوجهتله تبعه دولت علیہ دن بولنان اصنافک مکلف
اولدقلری رسوماتی نأبیه مجبوره اوله جق و اصنافلق متعلق
مقصودات و ماموریه طوغری به طوغری به محاکم و مأمورین
دولت علییه نابع اوله جقلردر « [۱] ديه مندر جدر . کړک
حقوق کړک جزا ایشلرینه عائد اختلافانده طرفین ایرانلی
اولدینی حالدہ بو کبی اختلافاتک رؤیت و حلّی و صادر اولان
اعلاماتک تنفیذی ایران شهیندر خانهلرینه عائد ایسه ده ، جرم
مشهود حالنده بوکامتعلق تحقیقات و محاکماتک اجرا و فاعللری حقنده
مجازات قانونیه نك ترتیب و ایفاسی « کما کان بلا واسطه ضابطه
و محاکم دولت علییه » عائددر [۲]

[۱] معاهدات مجموعه سی : جلد ۳ ، صفحه ۲۲

[۲] معاهدات مجموعه سی : جلد ۲ ، صفحه ۳۳

ممالك شاهانده متمكن تبعه يونانيه حقنده محاكم عثمانيه نك
 صلاحيتنه كلنجه: تبعه عثمانيه دن برى ايله بر يونانلى يئننده ظهور
 ايدوب محكمه عثمانيه ده رؤيتى اقتضا ايدن اختلافاتده يونان
 قونسلسخانه سندن بر ترجمان بولمق لازم ايسه ده ، ايكي دفعه
 اخطار ايدلديكي حالده ترجمان كلزسه محكمه اختلاف واقعي
 رؤيت وبوبايده حكمنى اعطا ايتك صلاحيتنى حازدر . ۱۹۰۱
 سنه ميلاديه سنده دولت عليه ايله يونانستان يئننده عقد اولنان
 قونسلسلق مقاوله سنك يكرمى ايكنجى ماده سنك بر فقره سنده
 « ... اكر بوايكنجى دعوته رغماً قونسلسخانه مأمورى اثبات
 وجوددن امتناع ايدمك اولور ايسه محكم مذكوره آرتق
 بونك ورودينه انتظار ايتماك صلاحيتنى حاز اوله جملر وحكم
 واعلام ويا قرارلرني اعطا ايدمك جملر در » ديه محرر در .
 بونك كي محاكم عثمانيه دن تبعه يونانيه عليه صدر اولان حكملرك
 اجراسى يونان قونسلسخانه لرينه حاند ايسه ده تعيين اولنان
 مدت ظرفنده قونسلسخانه جه اجرا اولنزسه مأمورين عثمانيه
 او حكم ويا قرارلرى اجرا ايدمك بيليرلر . مارالذكر قونسلسلق
 مقاوله سنك بوكا دائر اولان يكرمى در دنجى ماده سنك بر
 بر فقره سنده « ... اكر قونسلس مارالذكر حكم واعلام ويا
 قرارلرى نهايت ايكي آى مدت ظرفنده موقع اجرايه وضع
 ايتكدن امتناع ايدر ايسه مأمورين عائد عثمانيه امر اجرايه
 مباشرت ايدمك جملرى يوم وساعتى اولجه وتحريراً قونسلسخانه

مأمور لر بنه بالاخبار مارالذکر حکم و اعلام و قرارلرک بالذات
اجراسنه ابتدار ایتک صلاحیتی حائر اوله حققردر « دینلش
اولسنه کوره ، بو وجهله محاکم عثمانیه دن صادر اولان حکم
و اعلاملرک اجرایی اساساً قونسلوسخانه یه مائد اولوب فقط
قونسلوسخانه جه اجرادن امتناع اولندیغی حالده بوکی حکملر
مأمورین عثمانیه معرفتیه اجرا اولنور . جرم مشهود حالنده ،
مذکور مقاوله نیک یکر می یدنجی ماده سی حکمنه نظراً ، قونسلوس
خانه یه اخبار کیفیت اولنور سه ده ، اورادن بر مأمور کله سنه انتظاره
حاجت اولمقسزین مأمورین عثمانیه مجرم اولان یونانی بی ذردست
وتوفیف ایده بیایر لر ؛ بونک ایچون یالکیز کیفیتک بلاتأخیر یونان
قونسلوسخانه سنه اخباری لازمدره ممالک عثمانیه ده تبعه اجنبیه نیک
اصنافلق ایتسی اساساً جائز دکل سه ده ، من القدیم اصنافلق
ایتمکده بولنان تبعه یونانیه بوندن منع اولنمز ؛ آنجق ۱۲۷۱
سنه هجریه قریه سنده یونان دولتی ایله منعقد معاهده نیک اون
یدنجی ماده سی حکمنه نظراً ، ممالک شاهانه ده ذاتاً اصنافلق
ایتمکده بولنان یونانیلر حقننده تماماً تبعه عثمانیه دن بولنان
اصناف کی معامله اولنور ، یعنی بوقبیلدن اولان یونانیلر تبعه
عثمانیه نیک مکلف اولدیغی باجمله رسومی ایفا و بوکا دائر موجود
مقررات و نظامات احکامنه رعایت ایدر لر ، بوخصوصلردن
دولایی حققرنده محاکم عثمانیه یه مراجعت اولندیغی حالده ایشک
حین رؤیتنده دولت متبوعه لر قونسلوسخانه سی طرفندن

مأمور بولنمز و حقارنده بو خصوصاته متعلق صادر اولان حکملر
دوغریدن دوغری یه مأمورین عثمانیه معرفتیه اجرا اولوب
بونک ایچون قونسلسخانیه معلومات اعطا اولنمز . یونان
تبعه سنک اقامتگاهلرینه مأمورین عثمانیه نك دخولی خصوصی ده
سائر تبعه اجنیه نك اقامتگاهلرینه دخولدن فرقلیدر؛ بو خصوص
استمالک املاک نظامنامه سنه مربوط پروتوقوله امضاسی بولنان
دولتله تبعه سنک اقامتگاهنه کیرمک ایچون موجود بولنان اصوله
بکزه من: قونسلسلق مقاوله نامه سنک یکر می بشنجی ماده سی
حکمنه نظراً، بر یونانلینک مسکنته دخوله لزوم کورلیدی حالده
مأمورین عثمانیه اسباب دخولک اشعاریه برابر کیفیتدن یونان
قونسلسنی خبردار ایتک مقتضیدر؛ مع مافیه « قونسلسخانیه
اخبار کیفیت ایدلیدی آندن دلکهنک وقت ورودینه قرر آتی
ماعتبره زیاده بزمانه مرور ایدر ایسه عثمانلی مأمورینی ایله
ضابطه مأمورلری ایفای وظیفهیه مباشرت ایده جکلر و بعده
قونسلسخانیه اخبار کیفیتله برابر قونسلسخانیه مأمورینک
عدم وجودینی مثبت ضبطنامه نك مصدق بر صورتی تبایغ
ایله جکلر . »

اتیده بحث مخصوصنده کوریهلر چکی اوزره، ممالک
شاهانه ده اجانبه تعلق اولان مصالح افلاسیه ده ده محاکمه عثمانیه نك
صلاحیتی بشقه بر طرزده در . اگر اظهار افلاس ایدن تاجر
تبعه اجنیه دن ایسه افلاس ایشنک رؤینی مفلسک منسوب

بولندی فی دولت قونسلوسخانه سی محکمه سنه عا ندر ؛ مفسک
دائری مبانده تبعه عثمانیه دن کیمسه وارسه اونک ده
دو غریجه قونسلوسخانه محکمه سنه مراجعت ایدرک سائر اصحاب
استحقاق کبی مطلوبی اثبات ایتسی لازم کلیر ؛ حال بو که تبعه
عثمانیه بی ممالک دولت علیه داخلنده بر اجنبی محکمه سنه مراجعت
مجبور ایدرک هیچ بر حکم عهدی اولیوب ، بو یوله
حرکت تعاملدن نشئت ایتشدرد . بوکا مقابل اظهار افلاس ایدن
کیمسه تجار عثمانیه دن ایسه دائری میانده بولنه بیلرک اولان
اجنبیلرک محکمه عثمانیه مراجعتله استحصال حقوق ایلری
مشروطدر ؛ یالکز بو وجهله محاکم عثمانیه مراجعت ایدن
اجنبیلرک صفت اجنبیه سی اصلا نظر التفاته آلمیوب حقلرنده
بو خصوصده تماماً عثمانی معامله سی اولنور .

قایمولا سیونه نائل اولیان دولتر تبعه سنه کلنجه ، بونلرک
ممالک شاهانه مظهر امتیاز اولان اجانب کبی هیچ برحق و امتیاز
فوق العاده سی اولدیغندن ، حقلرنده محاکم عثمانیه نک حاکمیتی
مطلقدر . بناء علیه بونلر آرمسند و یا خود بو کبی اجنبیلر ایلر
عثمانیلر بینده حقوق و یا جزایه متعلق تگون ایدن هر نوع
اختلافاتک محل رؤیت وفصلی محاکم عثمانیه در ؛ محکمه عثمانیه ده
بوقیلدن بر دعوانک حین رؤیتند قونسلوسخانه طرفدن ترجمان
و یاسا تر بر مأمور بولمز ؛ بو کبی بر دعوا اوزرینه محکمه نک ویرمچکی
حکم و قرارک اجرایی دوغریدن دوغری به مأمورین عثمانیه

عائدر . حاصلی ، نائل امتیاز اولیان اجنبیلر ایله افراد عثمانیه نك
مقروءه مریه . نظر قانونده فرقی اولیوب ، یالکیز ، ابحات سالفه دن
آ کلاشلمش اولدینی وجهله ، مقروءه عمومیه به بعض مرتبه
فرقلر واردر .

ممالك شاهانده دول اجنبیه قونسولوسلری حقنده محاکم
عثمانیه نك صلاحیتی غیر منکر در وقونسولوسلری علیه محکمه یه
مراجعتله اقامه دعوی اولنه یلیر ؛ یالکیز بو خصوصده قونسولوسلر
ایله سائر افراد اجنبیه بینده فرق واردر . ۱۸۶۳ سنه هجریه سنده
(.) سلطان محمود خان اول زماننده فرانسه یه
اعطا اولنان عهد نامه نك بر فقره سنده « دولت علیه نك زیر
حکمنده اولان کرك اهل اسلام و کرك رعایان هر یکم اولور ایسه
فرانجه وی الاصل اولان فرانجه قونسولوسلرینی مادام ترجمانلری
بوله بالنفس مراجعه یه جبرایتمیوب قونسولوسلرینک تعیین ایلدکاری
ترجمان ایله حین اقتضاده مراجعه اوله لر » دنیلمش اولسنه بناء
بر قونسولوس ، علینده تبعه عثمانیه دن بری طرفندن اقامه اولنان
بر دعوی اوزرینه ، بالذات محکمه یه کلیکه اجبار اولنه مز . فقط
بو استثناء ، عهدک صراحتندن آ کلاشلدینی اوزره ، عن اصل
منسوب بولندینی دولتک تبعه سندن اولان مسلکدن یتشمش
موظف قونسولوسلره Consul de carrière منحصر در ؛ اساساً
مسلکدن یتشماش ، بولندینی یرده تجارتله مألوف ویرلی اولان
فخری قونسولوسلری بو مساعدده دن مستفید اوله مز ؛ آنجق

عهد نامه نك ديكر بر فخره سنده « وایلچیلری خدمتنده اولان
ترجمانلر فرانجه لولره عنایت اولنان معافیت آنلرك حقنده دخی
مقرر اوله » دنیایدیکندن، یرلیدن بولنان ترجمانلر بيله ترجمانلق
خدمتنده بولند قچه اشبو معافیات و مساعداتدن مستفید اولدقلری
جهتله، بوكیاسا یرلیدن اولان فخری قونسلوسلرده، فقط سائر افراد
اجنبیه درجه سنده، قایتولا سیونلرك تبعه اجنبیه یه تأمین ایتدیکی
حقوقدن مأموریتلرینك دوامی مدتیجه استفاده ایدرلر .

اساساً یرلیدن بر کیمسه نك اجنبی بردواتك قونسلوسلق
خدمتنه کیرمسی نظاماً جائز دکلدر . آنحق «معاملات تجارتدن
نشئت ایتمش بعض اسباب مجبوره مبنی بر محله قونسلوسلق
بشقه سنه و یريله میوب مطلقاً تبعه دولت عثمانیه دن برینه توجیه
اولنق لابد کورندیکی حالده بویله بر حال استثنائیده تعلق
اوله جق دولتك در سعادتده مقیم سفیری واسطه سیله بو بابده
باب عالی ایله مذاکره ایلمسی جائز » [۱] در . شو جواز نظامی یه
مبنی بو کون الکای عثمانیک بعض نقاطنده تبعه عثمانیه دن
اجنبی قونسلوس وکیل ویا مامورلری مستخدمدر .

بونلر کی قونسلوسلرخانه لرده یرلیدن ترجمان ویساجقی
(قواص) دخی استخدای جائز اولوب ، اشبو امتیازلی مأمورلر
«عادی محیلرك نائل اولدقلری حقوقدن مستفید» درلر ؛ فقط

[۱] قونسلوسلق نظامنامه سی : برنجی ، بشنجی ، آلتنجی ،

طقوزنجی ماده لر .

بو استفاده مدت ماموریتلرینه منحصر اولوب ، «خدمتدن انصاللری و یا خود و فائلی ایله زائل» اولور و «مدت حیاتلرنده اقربا و متعلقاتلرینه و وفاتلرندن صکره و رتبهلرینه انتقال» ایتمز [۱]. بوبله خدمات اجنبیهده بولنان عثمانیلر «محول عهدلری اولان مصالح اجنبیه خارجنده صفت تابعیت سلطت سینهدن بر آن خالی اوله میوب مصالح مخصوصه لری و ذاتلری حکومت دولت علیه به تابع» در [۱]. بونلردن بری بر جرم ایقاع ایدوب ده مامورین عثمانیه طرفندن طلب اولنورسه در حال مامورین اجنبیه طرفلرندن حکومته تسلیم اولنورلر .

ممالك شاهانده بولنان دول اجنبیه سفراسی ایله خارج از محاکم امتیازندن استفاده ایدن بالجمله سفارت معیت و مستخدمینی حقنده محاکم عثمانیه نك ادعای صلاحیته ، قواعد حقوق دوله نظراً ، حق یوقدر . بناءً علیه امتیازه مظهر اولان بو ذوات هیچ بر وجهله ممکنمز محاکمه تابع طوتیله مز . آنجق اشبو ذوات ممتازدن برینك بوراده کندی اقامتنه مخصوص اولیان برملکی اولورسه بوندن دولایی املاک ویرکوسی ویرمی و بوگه عائد بر اختلاف ظهور ایدرسه اونكده اصول وقواعد واحکام عهدیه دائره سنده محاکم عثمانیهده رؤیت اولمنسی لازم کلیر . مع مافیه بو وجهله مظهر امتیاز اولا کی مسهلرک صفت

[۱] قونسولوسلق نظامنامه سی : برنجی ، بشنجی ، آلتنجی ، طغرزنجی ماده لر .

ماموریتلرینه تعلقی اولمقسنزین صرف شخصلرینه عائد خصوصیاتده محاکم محلیهیه متابعتلری مسئلهسی هنوز بین المؤلفین حل اولنماش مواددن اولدیغندن وعهود موجودده بوکا دائر بر حکمده بولمادیغندن بوباده قطعی برشی سوبلك ممکن دکلدر . فقط رأیمزه قالیرسه ، اشبوامتیازدن استفادهسی اولان ذوات حقنده هر نوع دعوی و اختلاف ایچون منسوب اولدقلری دولت محکمهسینه مراجعت اولمق و آنجق مملک عثمانیهده اقامتلرینه مخصوص اولمقسنزین صرف عقار نوعندن املاکی اولورسه املاک مرقومه حقنده قوانین عثمانیه احکامی اجرا و اصحابی ده یالکیز بوندن دولایی محاکم عثمانیهیه تابع عد اولمق اقتضا ایدر .

ممالک شاهانهده مقیم ، کرک ر دولت کرک مخلف دولتلر تبعهسندن ، اجانب آرهسندمه ظهور ایدمک اختلافانک امر حلتده محاکم عثمانیه حائر صلاحیت دکلدر . ذاتاً بوخصوصده بعض علماء حقوق دول محاکم محلیه نك صلاحیتنی تسلیم ایتور . چونکه دنیلورکه اولا بر مملکتده توزیع عدالتدن یالکیز تبعه محلیه مستفید اولق و بوندن اجنبیلره بر حصه استفاده افراز اولنماق لازم کلیر؛ ثانیاً بویله اجنبیلر آرهسندمه حادث اوله جق اختلافانک حلی ایچون طرفینک منسوب اولدقلری دولتلرک احکام قانونیهسینه وقوف لازم اولوب، محاکم محلیه ايسه قوانین اجنبیهیی بیلهمز؛ ثالثاً محاکم محلیه برده زمان اشتغالندن بر قسمی اجانب آرهسندمه ظهور ایدن اختلافانک رؤیتنه تخصیص ایتمک

و بوزماندن تبعه محلیه بی استفاده سز بر افاق لازم کلوب ، بوده
غیر جائزدر . واقعا بو ادا لرتما ماً موافق حقیقت اوله رق قبول
اولنه مز ؛ دولتر ملک لری داخلنده اجرای عدالتله مکلف
اولد قلرندن بوندن یالک ز یر لیلری مستفید ایدرک اجنیلری
محروم ایتک دوعری اولمز . اجاب آره سنده وقوع بوله جق
دعاوی بی رؤیت ایچون هر خصوصده منسوب اولد قلری ولت
قانونلرینی بیلیمکه لزوم اولیوب ، بعض احوالده بوکا لزوم
کورلسه بیله ، اهلیت شخصییه تعیینده محکمه لر قوانین اجنیه بی
نصل نظره آله بیلیور لرسه ، اختلافات متحده ده او وجهله
حرکت ایتک ممکندر . زمان اشتغالک کفایت سزلکی ادعاسی ده
محروح اولوب ، اگر محاکم موجوده کرک یرلی کرک اجنبی
آره سنده تگون ایدن بالجمله دعاوی بی رؤیت کفایت ایتزسه
بونلرک مقدارینی تزید ایتک اقتضا ایدر .

بزده بردولت تبعه سندن بولنان ایکی اجنبی آره سنده ظهور
ایدن اختلافاتک امر حلنده ذاتاً محاکم عثمانیه نک صلاحیتی تسلیم
اولنماشدر . ۱۷۴۰ عهد نامه سنک بوکا دائر اولان فقره سی
شویله در : « اگر فرانجه لولرک بری بری ایله نزاع لری اولسه
ایلچیلری وقونسوسلری عادت لرنجه کوروب فصل ایدر کسنه مانع
اولیه » .

بونک کبی ممالک عثمانیه ده وفات ایدن اجانبک متروکاتی حقننده
مأمورین عثمانیه نک صلاحیتی مفقوددر . عهد نامه نک بوکا دائر

اولان فقره سنده «اگر مرد اولسه اثواب و اموالنه کمسنه داخل ایتیمه ، کیمه وصیت ایدر ایسه آکا و یریله . اگر وصیتسنز مرد اولور ایسه قونسولوسلری معرفتیه اولیرلویولداشنه و یریله . بیت المالجیلر و قساملر دخل ایلیمه » دیه مندر جدر . شو حکم عهدی به نظر آ بوراده وفات ایدن اجنبیلرک متروکاتی حقننده یاییله حق معامله شخص متوفاتک منسوب اولدینی قونسولوسخانه محکمه سنه عائد و بناء علیه بو خصوصده او دولتک قانلری حکمی نافذدر . آنجق متروکات میاننده ممالک عثمانیه داخلنده اموال غیر منقوله بولنورسه عهد حکمی اجرای تأثیر ایتز ؛ چونکه اجنبیلرک استملاکنه دائر اولان نظامنامه حکمنجه داخل ممالک شاهانه ده املاک صاحبی اولان اجنبیلر املاک خصوصاً ستدن دولایی تماماً عثمانلی معامله سی کوردکلری کی بوراده بولنان املاک حقننده تماماً قوانین عثمانیه احکامی تطبیق اولندیقندن ، وفات ایدن اجنبینک متروکاتی میاننده بوقیلدن املاک بولنورسه بولنرک کیفیت انتقالی ایله حق وراثتی حائز اولان ورثه ییتنده صورت توزیع و تقسیم قواین عثمانیه موجبجه اجرا اولنور .

اگر آرهلرنده اختلاف ظهور ایدن اجنبیلر مختلف تابعیتده بولنورسه ینه محاکم عثمانیه صورت مطاقده حائز صلاحیت دکلدر . عهدنامه نک بوبابده کی فقره سنده «قونسولوسلرک و تبارک سائر ملل نصاری قونسولوسی و تجاری ایله یینلرنده نزاع واقع اولدقده طرفینک رضا و طلبلریله دعوالری آستانه سمادتمده مقیم

ایلیچیلرینه حواله اولمغه جواز ویریلوب و مادام مدعی و مدعی
 علیک رضای اولیه بومقوله بینلرنده اولان دعوی و لایه و حکام
 و قضاء و ضابطان و کربک امناسی بزر استماع ایدرز دیو جبر
 ایلیله دیه مسطور اولدیغندن ، بویله مختلف تابعیتده ایکی
 اجنبی آره سنده متحدث اختلافاته طرفینک رضای خلافت
 اوله رق محاکم عثمانیه ایفای وظیفه ایتکدن ممنوعدر . آنجق
 بویکی دعاوینک قونسلوسخانه محکمه سنده رؤیتده ینه طرفینک
 رضاسنه منوطدر . شوندن آکلاشلدیغنه نظراً اگر طرفین
 بینلرنده متحدث اختلافک قونسلوسخانه محکمه سنده رؤیتده
 راضی اولمز لسه فصل نزاع ایچون مسئله نک محکمه عثمانیه
 تودییی لازم کلیر . بوده ظنمزجه پک مناسبدر ؛ چونکه
 اختلافات متحدثده حل مسئله ایچون مدع علیک تابع اولدینی
 محکمه یه مراجعت ایتک قواعد کلیه ایجابندن ایسه ده ، او محکمه
 مدعینک دولت متبوعه سی محکمه سی اولدینی کی ، مقیم بولندینی
 مملکت محکمه سی اولان محکمه عثمانیه ده دکلدر ؛ شو حالده مدعی
 رضای خلافت اوله رق محکمه محلیه نک غیری اولان بر اجنبی
 دولت محکمه سنه مراجعت مجبور اولمش اولور که جائز دکلدر .
 بناءً علیه ممالک عثمانیه ده مختلف تابعیتده بولنان ایکی اجنبی
 آره سنده براختلاف ظهور ایدرده طرفین بو اختلافک مدع
 علیک منسوب بولندینی قونسلوسخانه محکمه سنده رؤیتده راضی
 اولمز سه مسئله نک محاکم عثمانیه ده رؤیتی لازم کلیر . مختلف

تابعیتده ایکی اجنبی آره سنده ظهور ایدن بوکی اختلافاتک محاکم عثمانیه ده لدی الحاحه کیفیت رؤیتی حقنده عهدنامه ده صراحت یوقسه ده، اجانبه متعلق اوله رق محاکم عثمانیه ده رؤیت اولنه جق دعاوی حقنده موجود احکام عهدیه نک بوقیلدن اولان دعاوی یه ده تطبیقی اقتضا ایدم چکی طبیعیدر . بناءً علیه محاکم عثمانیه ده بویله بر دعوی رؤیت اولنور کن دعوانک حین استماعنده طرفینک منسوب اولدقلری قونسلسرخانه لر ترجمانلری حاضر بولنق ولاحق اوله جق حکم وقرار لر لاجل الاجرا طرف محکومک منسوب اولدینی قونسلسرخانه محکمه سنه تودیع اولنق اقتضا ایدر . مسئله ممالک شاهانه داخلنده ا لاکه تعلق ایلدیکی حالده، طرفین استر بر دولت استر مختلف دولتلر تابعیتنده اولسون ویا خود طرفینک بری عثمانلی دیکری اجنبی بولنسون، حل اختلافده هر حالده محاکم عثمانیه نک صلاحیتی غیر منکر اولدینی کی طرفینده بوخصوصده ، طلقاً تبعه عثمانیه معامله سنه تابعدر و بوکی خصوصاتده اجانبک منسوب اولدقلری قونسلسرخانه محکمه سنک قطعاً حق مداخله سی یوقدر .



ایکنجی فصل

امپیریه تطبیقی اولنامه اصول محاکمه

— — —

— ۱ —

بر مملکتده اجانبه متعلق اختلافاتده یالکز محاکم صلاحیتنی تعیین ایتک کافی اولیوب ، دعوا ایله مشغول اولان محکمه نك تطبیق ایتدیکی قانونی یوقسه علاقه دار اولان اجنبینك منسوب اولدینی دولتک قانونی تطبیق اولنق لازم کله جکنی تعیین ایتک اقتضا ایدر . بونی تعیین ایچون اصول محاکمه اصول اساسیه و اصول فرعیه اولق اوزره ایکی قسمه آیریلیر .

اصول اساسیه *Formes décisaires* منازع فیه اولان مسئله نك اساسنه تعلق ایدرک مسئله مذکورده نك کیفیت حلنه دوغریدن دوغری یه اجرای تاثیر ایلر ؛ بونده حاکم اولان شی اصل وسیله نزاع اولان حقه تعلق ایدن قانوندر . اصول فرعیه *Formes Ordinatoires* حلی مطلوب اولان مسئله ایله تعلق ایتدیکی حکمه و قراره بیکانه قاهره منحصراً دعوانك طرز جریاننه اجرای نفوذ ایدر ؛ قانون محلی *Lex fori* بو باده حاکمدر . اقامه شهود ویا ابراز وثائق کبی ایراد دلائل کیفیتنك مقبولیتی اصول اساسیدن اولوب ، حالبوکه اشبو دلائلک طرز ایرادی اصول فرعیه دندر .

بناءً علیه اصول محاکمه نك لزوم كوردیكى و نائك نوع
و شكلى ايله بونلرك مدت ابرازى ، دعوایه ختام و یرن حككم
صك و سبكى ايله بونك قضیه محكمه حالنى كسب ایتسی ، حككم
اجراسى ايله استیناف و اعتراض مدتلى و بونلرك جمله سنك
نتائج و تأثیراتى قانون محلى ايله تعیین اولنور .
بوندن دولایى بونلرك جمله سى اصول فرعیه دندر .

— ۲ —

مشروعیتى مختلف فيه حقه تعلق ایدن قانون وظیفه
اشهادكده هانكى طرفه ترتب ایتدیكنى تعیین ایلر ؛ بونك كى
نه نوع دلائل مقبول اوله جغنى ده ینه او قانون كسديرر . واقعا
ییتادن مقصد حاكمك قناعتنى تأمیندن عبارت اولدیغنه نظراً
قوانین محلیه نك مقبول عد ایتدیكى بیناتى قبوله حاكم مجبور
اولمز ؛ فقط بر شخص ده اقامه شهود ايله اثبات مدعاى مقبول
عد ایدن بر قانونه تبعاً حقتك محفوظیتندن امین بولنوركن ،
مدیونك نقل مكان ایدمرك شهودك مقبول اولدینى بر محل
حاکمى حضوری نه چیقمسى كى بر سبيله ، اثبات حقدن
محروم اولورسه اوده حقسز اولور .

بینه وجودینى تبیین ایدمركى حقدن آیری اوله ماز ؛ بناءً
علیه حقتك وجود بولدینى آنده او حقه وجود و یرن قانون
موجبجه تعیین ایتك لازم کلیر . شو حالده ماهیت مسئلهیه

کوره بو بایده یا قانون شخصی ویا قانون محلی احکامی کوزه -
 دیلیر . مثلاً بر چوجق والده سنی تحری ایتدیکی حالده بو
 خصوصده انضباط عمومی دولی به رعایت ایتک شرطیه
 چوجفک تابع اولدینی قانون معتبردر . آلمانیاده بر فرانسز
 ایله بر روسیه لی آره سنده بر مقاوله عقد اولمش بولنسه بالاخره
 بینه نك طرز و کیفیت اتیاننی تعیین ایدن ، عقودره نافذ اولوره
 محل عقد قانونیبر قاعده سنه توفیقاً ، آلمانیا قانونیدر .

نه نوع بینه اتیان اولنه جفی ، بالاده کوسترلدیکی اوزره ،
 تعیین ایتدکن صکره بو بیناتک طرز اتیاننه صره کلیر . بوراده
 اجرای تاثیر ایدن قانون محلیدر . خطک ، تحریفاتک ،
 تحقیقاتک طرز تدقیق و اجراسنی تعیین و تحلیفک صورت
 اجراسنی ارانه قانون محلی ایله اولور . بعضاً قانون محلی نظرند
 حقه وجود ویرن قانونک تعیین ایتدیکی بینات مقبول اولور
 فقط بو عدم مقبولیت انضباط عمومی دولی بی ده اخلا ایتمز .
 اشته او زمان حکام ترده دوشر .

— ۳ —

بر دولت محاکمی حضورنده اقامه اولنان دعاوی بعضاً
 بر مملکت اجنبیه ده ، اقامه شهود ایتک ، استنطاق ایتک ، اهل خبریه
 مراجعت ایلک ، تحلیف ایتک کی ، بعض معاملات عدلیه اجراسنی
 استلزام ایدر . اشته اوزمان راینه مراجعت اولنان حاکم معاملات

عدلیہ نك اجرا واکمال اولئہ جنی محلہ کی دولت متبوعہ سی
قونسلسونہ ویاخود اورانك مأمورین عملیہ سنہ بر وکالتنامہ
ارسالی ایله خصوصات مذکورہ نك اجراسنی تمنی ایدرکہ ، بو
وکالتنامہ یہ استنباب مذکورہ سی *lettre , commission rogatoire*
دینیلیر .

زمانمزدہ اشبو استنبابہ مذکورہ سی اصولنہ مراجعت کثیر
الوقوعدر ؛ آنجق استقلال دول بر محکمہ اجنبیہ نك اصدار
ایتدیکی بر استنبابہ مذکورہ نك مخاطبی اولان مأمورین نظرندہ
مجبوری الانفاذ عد اولئمنسنہ مانعدر ، مکرکہ بو بابده بر
معاهدہ مخصوصه موجود اوله .

استنبابہ طریقہ اجرا اولئہ جق معاملات مذکورہ نك ارسال
اولئدینی محل قانوننہ توفیق اولئق طبعیدر .

استنبابہ مذکورہ لرینك صورت ترتیب وتبلیغی هر یرده بر
دکلدرد . بعض یرده محکمہ رئیس دیکر بر مملکت محکمہ سی
رئسی ویا مدعی عمومیسنه دوعزیدن دوعزیری یہ مذکورہ بی
ارسال ایدر ؛ حالبوکه ، دولت علیہ دخی داخل اولدینی حالده ،
بعض دولئرده محکمہ عدلیہ نظارتنه تودیع ایتدیکی مذکورہ
اوزرینه خارجیه نظارتی واسطه سیله دیکر مملکت خارجیه
وعدلیہ نظارتلرینك وساطتته بالمراجعه محکمہ یہ تبلیغ مذکورہ
اولئور .



اوجنچی فصل

اعومات اجنبیه نك تاثیرانی

بر محکمه دن صادر اولان بر حکم ایله او حکمک تعلق ایتدیکی مسئله قضیه محکم chose jugée حالتی کسب ایدر و آرتق بر دها یکیدن موقع بحث و مناظره قونه من ؛ محکوم اولان طرفده بو حکمه رعایته مجبور اولور .

فقط بر دولت محکمه سندن صادر اولان بر حکم او دولت ملکی خارجتدهده حائز تاثیرمیدر ؟ محاکم اجنبیه او حکمه قضیه محکم نظریله باقاری ؟ حکومت اجنبه مأمورلری او حکمک موقع اجرایه وضعنه معاونته مجبورمیدر ؟ اجرا ایچون مدیونک ممالك اجنبیهده بولنه بیله جک اولان املاکی جز اولنه بیلمیری ؟ اشته بو نقطه لک حلی لازمدر .

حکمی اصدار ایدن محکمه نك منسوب بولندیفی دولت مستقل اولدیغندن ، او یله بر محکمه دن صادر اولان حکمک قضیه محکم عد اولمنسی طبعیدر . بونده شبهه اولیوب ، یالکیز بو قضیه محکمه نك بر مملکت اجنبیهده اجراسنی تأمین کیفیتی محتاج تدقیقدر . بر مملکتک حاکملری اصدار ایتدکلی حکملری یالکیز او مملکت حدودی داخلنده تنفیذ سلاحتینی حازدرلر ؛ حق استقلال دول بر محکمه حکمنک حدود مملکیه خارجنده مرعیتنی مانعدر .

بو قاعده صورت مطلقه ده تطبیق اولنسه بوندن بر چوق
محذور لر میدانه کلیر ؛ مثلاً دائن بر محکمه حضورنده اثبات
حق ایدرک مدیوبک دیگر بر مملکتده بولنان املاکی اوزرنده
استحصال حق ایلدیکی حالد او مملکتده او املاکه وضع ید
ایده من ، حجز وضع ایتدیره من . بوکا چاره اولق اوزره یا مملکت
اجنبیه محاکمی طرفندن بر حکم دیگر استحصال اولنور یا خود
قوانین و یا معاهدات مخصوصه ایله بو خصوص تأمین اولنور .

بر مملکت اجنبیه محکمه سندن برقرار استحصال اولنور سه
بو قرار ایله اصل محکمه نك ویردیکی حکم او مملکت اجنبیه ده ده
مجبوری الاجرا اولور و مامورین محلیه اونك اجرا سنه معاونته
مجبور اولور .

بو خصوصده بغض جهاته دقت ایتك ضرور یدر . بر محکمه دن
صادر اولان حکم بر مملکت اجنبیه ده موقع اجرایه وضع اولنه
بیلمك ایچون او حکمك اصول محاکمه یه موافق اولمسی لازمدر ؛
بناء علیه طرف محکوم حکمه اعتراض ایدر بیلمك ایچون حکمی
اعطا ایدن محکمه نك تابع اولدینی قانون نظرنده موافق اصول
اولمادیفی اثبات ایتك اقتضا یدر .

حکم صلاحیتدار اولان بر محکمه دن صدور ایتك لازمدر .
حکم اعطا اولندیفی مملکتده قضیه محکمه حالی کسب ایتمش
اولق مقتضیدر .

حاصلی حکم انضباط عمومی دولتی اخلال ایتامك
مشروطدر .

بویولده صادر اولان برحکمک برملکت اجنبیهده
اجراسنه اعطای قرار ایدمک اولان محکمه یا لکز شرائط
مذکورمک موجود اولوب اولمیدیفنه باقوب بمده اجراسنه
قرار ویرمک لازم کلیر؛ یوقسه، بعض مؤلفینک ادعای
وجهله، تحت حکمه آلمش اولان مسئلهمک ماهیتنی تدقیق
وتشکیل طرفین ایله یکدن اعاده محاکمه ایتک و صکره
داخل مملکتده اجراسنه قرار ویرمک اقتضایتمز؛ زیرا بو
حالده هم حکمی بدایه اصدرایدن محکمه نک استقلالنه تجاوز
ایتمش اولور، هم تحقق ایتمش اولان برحق یکدن تردده دو-
شورمش اولور، همده تبعه محلیه حقنندهده محاکم اجنبیه
طرفندن معامله متقابله اجراسنه سبب ویرمک تبعه محلیه
ممالک سائرده زیاده سیله مشکلاته دوچارایلر.

بو بابدهده دولتمک طرز حرکتی بردکلدر. بضلری
محاکم اجنبیه حکملرینی عادتاً معدوم عدایده مک علاقه دارانی
محاکم محلیه حضورنده یکیدن اثبات حقوقه مجبور ایدرلر؛
دائیمارقه، شمالی آمریکا حکومت متحده سی، فلمک، اسوچ
نوروچ دولتلری بو اصولی تعقیب ایدر. دیگرلری محاکم
اجنبیه حکملرینی موجود عدایمکله برابر محاکم محلیه مسئله
یکدن رویت وتدقیق حقنی ویررلر؛ لوکسمبورغ، پورتوغال
دولتلری بویله در. اسپانیا، آلمانیا، اوستریا، برهزیلیا،
بلجیقا، رومانی دولتلری آرهلرند. معاهده ایله معامله

مقابلہ تأمین اولئش ایسہ محاکم اجنبیہ حکمرینک محاکم
محلیہ جہ رؤیت و تدقیقہ لزوم کورمز لر . انکلتره ، ایتالیا ،
روسیہ ، یونانستان دولتری ایسہ محاکم اجنبیہ دن صادر
اولان حکمرک محاکم محلیہ جہ رؤیت و تدقیقہ کلیاً زاعد عد
ایدر و معاملہء مقابلہ یہدہ احتیاج کورمز لر .



در دنجی فصل

مقروض مخصوصیہ دول نقطہ نظر نمہ افروس

حقوق خصوصیہ دولک مابہ الاشتغالی اولان مسائلک اک
اہمیتیلیرندن بری دہ افروس faillite متعلق اولان مباحثدرہ
برمدیون تأدیہ دیندن عاجز قالدینی حالہ دائسارک حقوق
تصل محافظہ اولنہ حق ، بوبایدہ ہانکی قوانین تطبیق ایدیلہ جک ،
ہانکی مامورلر بونکلہ مشغول اولہ حق ، ہانکی مملکتلردہ
بونک تأثیراتی کوریلہ جک ؟ اشته بونلرک و دہا بوکا مشابہ
نقاطک حلی — ایش اجنبیہدہ تعلق ایتدیکی حالہ —
حقوق خصوصیہ دولہ عائددر .

بر تاجرك [*] دیونی مطلوباته فائق اولور و وارداتی فضله
 دیونی تادیبه کافی اولمزه او مدیون حقنده آریجه بر معامله
 اجرا ایدیلیر: کندیمی افندار مالینک عدم کفایتی حکومت
 اخبار ایدر و افموسی اعلان اولنور. بوندن اعتباراً دانشر
 بورجلرك عدم ایفا سندن دولای مدیونك شخصی علیهنده
 تعقیبات قانونیه ده بولنه مزله: مدیون ده معاملات تجاریه سنه
 دوامدن ممنوع اولور؛ صلاحیتدار اولان مامورین طرفندن
 وکیلر تعیین ایدیلهرك مفلسك حساباتی رؤیت ایدیلیر و اموالی
 دانشر بیننده غراما صورتیله تقسیم اولنور.

[*] افلاس تجارتله مألوف اولان کیمسه لر حقنده تطبیق اولنور
 و معاملات تجاریه ده بولنمیان مدیونلرك افلاسنه حکم اولنمیوب بونلر
 حقنده حقوق عادیه احکامنه رعایت ایدیلیر. بو اصول تجارت بریه
 قانونك قبول ایتدیکی مسلك اولوب، آرژانتین، حکومتی، اسپانیا،
 ایتالیا، بره زلیا، بلجیقا، بولیویا، پورتوغال، بهزو، رومانی، شیلی،
 قولومبیا، لوکسمبورغ، مکسیقا، و نه زوئلا دولتلرنده بو اصول
 جاریدر. انکاره و شمالی آمریکا حکومتلری ده مفلسلر حقنده بسبتون
 بشقه اصوله تابعدرلر. آلمانیا، اسوچ، آوستریا، دانیمارقه، روسیه،
 نورودج، صربستان ایسه افلاسی تجاره حصر ایتیبو بالجه مدیونلره
 تشمیل ایدرلر.

افلاس هم دائن هم مدیون حقنده خیرلیدر ؛ زیرا
 افلاسك اعلان اولنمسه بيله بر طاقم کیمسه لرك آرتق آلدانوب
 مدیونك ذمته پاره کچیرملرینه امکان قالمز. واقعا مفلس اولان شخص
 مطلقا هر زمان داینلری اغفال کبی سوء حرکتده بولنماز ،
 علی الاکثر اداره سزلیکه و یا خود طالعتك عدم مساعدنه مبنی
 ایشلری بوزولور ، بوندن دولایی کمدینی مؤاخذه ایتماک
 و هرکسی آلداتیوردیماک لازم کلیر ؛ آنجق ، کمدی قصوری
 اولمسه بيله ، مادامک اصحاب مطلوبك مطلوبانی تأدیهدن عاجز
 قالمشدر ، آرتق او معامله سنه دوام ایده مامسی لازمدر . بوندن
 انضباط عمومی ده مستفیددر ؛ زیرا معاملات تجاریه ایله اعتبار
 مالی خصوصاتنده تأمین مضبوطیت ایچون امر تجارتك احتیاط
 وعفت ایله اجرا اولنمسی و اشخاص سائره نك ضرر لرینی انتاج
 ایده جك اولان خطیئانك وقوعه کله مامسی منافع عمومیه
 مقتضیاتنددر . افلاس مفلسه ده تأمین استفاده ایدر ، چونکه
 قوتقورداتو عقدی ایله علی الاکثر دیوننك بر مقدارینی تنزیل
 ایتدیرمکه و حق داینلرندن تأمین معیشتنه مدار اوله جق مقدار
 معاونت استحصالنه موفق اولدینی کبی شخصی ده تعقیبات
 قانونیه دن قورتولور .

شو احواله کوره افلاسك رؤیتی و کیفیت اعلانی کیمه
 عائد اولق و بونکله کیملر مشغول بولنق لازم کله جکمنك اول
 امرده تعینی اقتضا ایدر . بو خصوصده علماء حقوق بیننده
 اتحاد فکر موجود دکلددر . بعض مؤلفین افلاسی امنیت عمومیه

نقطه نظرندن کوره رک بونک رؤیتی ، مفلسک تابعیتی نه اولورسه اولسون ، داخل ملکده حقوق عمومیه نك محافظه سی وظیفه سیله مکلف بولنان ، مأمورین محلیه حواله ایتک استرلر . بعض ارباب تالیف ده افلاس کیفیتنی استاتو جمله سنه ادخال ایتک آرزو ایلرلر .

برنجی فکره کوره مفلس اولان شخص دانلرک حقوقنی اخلال ایتدیکندن مأمورین محلیه ، تدابیر ضابطه قیلندن اوله رق ، ایشه مداخله ایتک و ماده افلاسی رؤیت ایلک ایجاب ایدر . حالبوکه محاکم محلیه نك حق حاکمیتی حدود ملکیه ایله محدود اولوب او حدود خارجه تجاوز ایده من . بناءً علیه بر تاجرک افلاسنه محاکم محلیه دن حکم صادر اولدینی تقدیرده ، بو حکمک خارچ ملکده قوتی اوله میه جغندن ، او تاجر یالکیز او ملک داخلنده مفلس عد اولسوب ، خارجه اولنمز . حالبوکه بر مفلسک معاملاتنی ودانلری یالکیز داخل ملکده اولیوب خارجه ده بولنور ؛ بو تقدیرده خارچ ملکده بولنان دانلر محاکم محلیه نك ویردکلی افلاس حکمندن استفاده ایده میه رک ، بولندقلری محللرک محاکمه مراجعتله تاجر مفلس حقنده آیری آیری حکملر استحصال ایتک لازم کلیر . بو حالده ده افلاس تعدد ایتمش اولور . حالبوکه افلاس متعدد اوله من ، بر اولق لازمدر . برده افلاس حکمی تاجرک اموالنه دکل ، شخصنه عائددر . بر شخص حقنده ایشه بر فعلدن دولایی بر قاچ حکم صدوری جائز دکلدر . اکر افلاسنه حکم اولنان تاجرک بو حکمی استلزام ایدن

معاملاتنده کندی قصور و جرمی وارسه، یعنی تقصیراتلی ویا حیلله لی مفلس ایسه، او حالده فعلی حقوق عمومیه یه تعرض عد ایتک و ماده افلاسه اونقظه نظردن باقمق موافق اولور .

افلاس کیفیتنک استانو عدادینه ادخالنه کلانجه، بو فیکرک حروج لری اعلان افلاس ایدمک کیمسه نک اموال و املاکی زده ایسه اورا قانونلرینه توفیقاً افلاسنه باقلمق لازم کله چکی ادعاسنده بولنیورلر . بو فیکرک دوعری اولمز ؛ چونکه بر ناجرک برچوق یرده املاکی بولنه بیلیر ، شو حالده بر چوق محکمه دن افلاس حکمی اعطاسی لازم کلیر ؛ بوده افلاسک تعددینی استاج ایدر .

افلاس حکمی تعدد ایتک جائز اولدینی حالده بر تاجر مدیون بر ملکیتده مفلس اولوب دیکرندن اولمز ؛ یا خود بر یرده بر ماسه دیکرنده بشقه بر ماسه تشکل ایدوب بری دانشلره دها آز دیکری دها چوق حصه افراز ایلر ؛ بر یرده بر قونقوردانو عقد اولمدینی حالده بشقه بر محله طرز آخرده معامله اولنور ، دانشلر مساواتدن محروم قالیر و بونلرک موقع قانونیلرینی تعین ایتک امکان خارجه چیقار .

حالبوکه افلاسدن مقصد مفلسک سوء اداره سنه نهایت و یروب یرینه دها احتیاطکار بر طرز اداره اقامه ایتک، دانشک مطلومات و دیوننی علاقه دار لریننده صورت متساویهده تقسیم ایتک و مدیوندن آرتق دانشلرک منافعی اخلاص ایدمکله چک افعاله بولنمق صلاحیتتی آلمق اولدیغندن ، و مفاس ایسه

شخص واحد اولدینی جهتله مترکات حکمنده بولنان اموالی ده برعد اولتمق اقتضا ایتدیکندن، دأشترك مديونك بالجمله اموالی اوزرنده درجه متساویه ده برنوع حقلری بولتمق مقتضیدر . افلاس حکمنه معروض اولارشی مفلسك اموالی دكل شخصیدر بو حکم ایله مفلس برطاقم محرومتره محکومدر . مفلس شو محرومیت اعتباریله مفقود محجور وصی به مشابه اولوب بونلر حقنده برقانون حکمنه توفیقاً رحلده اعطا اولنان حکم نصل هر یرده مرعی ایسه مفلس حقنده ده وبریلن حکم بو وجهله برو هر یرده معتبر اولمق لازم کلیر .

افلاسك بر وعمومی اولسی بونك اعلانی ایله معاملات متفرع سنی اجرا حقنه مالك اولار قانونك ده بر اولمسی انتاج ایتك طبیعدر . بو قانون مديونك اموالك بولندینی محل قانونی *lex rei sitae* اوله من ، چونكه اموال برچوق محللرده بولنه بیله چکی ایچون قوانین تعدد ایدر . مديونك اقامتگاهنك بولندینی ویاخود ایفای معاملات ایلدیکی محل قانونی ده اوله من ، چونكه او حالده ده قانون محلینك خارج حدوده نفوذی تجاوز ایده مر حدود ملیکه خارجنده اجرای تأثیر ایدن آنجق مفلسك شخصنه تعلق ایدن قانوندر ، دأشترك تابع اولدقلری، قانونلر بوراده موضوع بحث اوله من ، چونكه او قانونلر متعدد و متخالف اولدینی کی ییدلرنده یکدیگر لرینه سبب رجحان ده یوقدر . شو حالده افلاس ایشنی رؤیت ایده چك قانونك افلاسك میدان چیقدینی محل قانونی اولاسی لازم کلیر، چونكه تاجرك

بالجمله اموالی ایله دفاتری اوراده بولنور و معاملات اوراده جریان ایدر؛ بونک ایچون احوال مالیه سی و تعطیل تادیاتنک تأثیریاتی اوراده دها سهولتله آکلاشیلیر. فرانسه قانون تجارتی بواساس قبول ایدرک افلاس امرنده مفلسک اقامتسکا. هنک بولندیفی محل محکمه سی ایشه باقه جغنی تصریح ایلشدر. بناءً عایه فرانسه ده اقامتسکا اتخاذا ایلین اجنیلرک دخی فرانسز محکمه لری معرفتیه افلاسنه حکم اولنور.

بواساسه نظراً عن اصل تبعه جنیه دن اولوب ده اقامتسکا هی ده حدود خارجنده بولنان و فقط داخل ممالکده تجارتخانه سنک بر شعبه سی اولان تجارک افلاس معاملاتنه محاکم محلیه جانبندن مداخله اولنماق اقتضا ایدر. حاله وکه افلاس ایشلرنده اقامتسکا هی نظر اعتباره آلان فرانسه قانونی، فرانسه داخلنده یالکیز بر شعبه اداره سی بولنان تجار اجنیه نک افلاسنه ده فرانسز محکمه. لری نک باقسی لازم کله جکفی قبول ایدرک، قاعده اساسیه دن آیرلش و افلاسک وحدتی اساسنه خلل کلمسنه میدان آچمشدر، چونکه بو حالد بویله بر تاجرک فرانسه خارجنده کی اقامتسکا. هنک بولندیفی محل محکمه سی جانبندن ده مرقومک افلاسی اعلان اولنمقله برابر فرانسز محاکمی جانبندن ده افلاسنه قرار ویرملک احتماله میدان ویرمشدر.

بونک کی تبعه محلیدن اولوب ده اقامتسکا هی ممالک اجنیه ده بولنان تجارک افلاس ایشلرینک رؤیتی اوممالک محاکمه عائددر؛ بونده صفت تابعینک تأثیری اوله مز، داتلر میاننده تبعه دن

بولناتلرك استحصل حقوق ايجون مفلسك مصالح افلاسيه سنى
رؤيت ايدن محكمه يه مراجعت ايللرى لازم كالير.

افلاس ايشلرنده هانكى محكمه نك صلاحيتدار اوله جنى
مسئله سى ۱۸۶۹ ده فرانسه واسويچره حكومتلرى بيننده عقد
اولنان معاهده تجاريه نك اتلى مذاكره سنده نظره چاريمش
وطرفيندن برينك تبعه سندن اولوب ديكرينك ملاكندمه مركز
معاملاتى اولان تاجرك افلاسنه ساكن اولدينى محل محكمه لرى
معرفتيه باقيله جنى معاهده به درج اولمشدر حالبوكه بر تاجرك مملكتين
مذكوره نك برنده قامة تكاهى اولقله برابر ديكر نده ده تجارخانه سنك
بر شعبه سى بولنه بيلير وشو حالده هر ايكي سنده ده افلاس ايشنه
باقيله بيلير. تنكيم مركز معاملاتى پارسده اولقى اوزره اسويچره نك
جنوره بلده سنده تشكىل ايتمش اولان قورده سى فونسيه سويس
Crédit foncier suisse نامنده كى آنونيم شركتك بر آراق
هم پارس هم جنوره محكمه لرى جانبندن افلاسنه حكم اولمش
وايكى طرف ادعاسنده اصرار ايتلش ايدى. نهايت مسئله اسويچره
مجلس عموميسنه عرض اولنمى اوزرينه مجلس. شركت
مذكوره نك اسماً اسويچره ايله علاقه سى اولوب يوقسه بالجله
معاملاتى فرانسه ده جريان ايتديكندن وباشليجه مركز معاملات
نره سى ايسه اورا محاكى افلاس مصالحنده صلاحيتدار اولقى
لازم كلديكندن، بو ايشه اسويچره محاكمك مداخله سنه محل
اولديغه قرار ويرمشدر. [*]

دیمک اولیور که بر تاجرک، قاچ یرده معامله سی بولنورسه بولنسون، باشلیجه اقامتگاهی اولان یرده افلاسنه حکم اولنور. صلاحیتدار اولان بر محکمه طرفندن بر مفلسک افلاسی حقنده صادر اولان حکم یالکمز او محکمه مک بولندیفی مملکت داخلنده می حائر تأییدر، یوقسه بو حکمک تأییراتی خارج ملکده تجاوز ایدرمی؟ اگر افلاس معامله سی تداییر ضابطه دن عد اولنسه و یا خود Statut réel • تابع طوتلسه حکمک تأییری بالطبع حدود ملکیه داخلنه منحصر قالمق لازم کلیر • بو ایسه افلاسک عمومی اولسنه منافیدر • بناءً علیه تاجرک اقامتگاهی محکمه سنک اصدار ایتدیکی افلاس حکمی هر یرده مقبول و معتبر عد اولنوب حائر تأییر اولمق اقتضا ایدر؛ یالکمز، سائر اعلامات و مقررات حقنده اولدیفی کبی، افلاس حکمنکده بشقه بر مملکتده موقع اجرایه لزوم وضعی حالنده حکم موافق اصولیدر، صلاحیتدار بر محکمه جانبدمی صادر اولمشدر، و انضباط عمومی دولیه مغایرتی یوقیدر، بورالری محاکم علیه طرفندن بالتدقیق اجراسنه امر ویرمک لازم کلیر • [۱]

شورای شایان قیددر که بر مملکت محکمه سندن صادر اولان بر افلاس حکمنک دیگر بر مملکتده حائر تأییر اولمی ایچون او مملکت محکمه سی طرفندن امر ویراسی یالکمز حکم مذکورک دوغریدن دوغرییه اجرایه تعلق ایتسی حالنه منحصر در؛

یوقسه یالکمز بر شخصک مفلس عداولتمسنه تعلق ایدن حکملرک
 مرعینی ایچون محاکم محلیه دن آیریجه امر اصدارینه حاجت یوقدره .
 افلاس حکمی ایله مفلسک مقدار دیونی تحقیق و دانلرک
 درجه جقوق تعین اولنور و اموالی ایله مطلوباننک مقداری ده
 میدانه چقاریلیر . بو معاملاتک اجر اسنده ده هانکی قواعد
 اتباع اولنق اقتضا ایدر ؟ مردان مدیون عاجزک افلاسنه حکم
 اولنسنی طلب ایده بیله چکی کبی مطلوباننک تأدییه سی ده طلب
 ایده بیلیر ، آنجق مطلوباتی اولجه اثبات ایتسی لازم کلیر [۱] .
 بر تاجرک اعلان افلاس ایتزدن مقدم عقد ایتدیکی مقالانک
 تعین مقبولتی خصـوصـنـده ، بو مقالاتی عقد ایتیش اولان
 کیمسه لرک اهلیتلی دولت متبوعه لری قانونه توفیقاً تعین
 اولنور و قوانین مذکورده موجبجه و یا خود مقالانک محل
 عقدی قانونه *Lex loci actus* توفیقاً مقالات مذکورده نک
 موافق اصول وقاعده اولدیغنه حکم ایدیلیر .

بو مقالانک تأثیر اتجده طرفیتک آرزو و اختیارلرینه
 باقیله رق ، اکر مقاله ده متابعت ایده چکلری قانون تصریح
 اولنمش ایسه قانون مذکور تطبیق اولنور . بوبله بر صراحت
 اولمدینی حالده ، طرفین بر دولت تبعه سندن ایسه لر ، دولت
 متبوعه لری قانونی تطبیق ایدیلیر ؛ مختلف تابعیتده بولندقلری

[۲] « افلاس اعلانی تاریخندن اعتباراً آلاچقلورک ادعا ایتدکلی
 مبالغه مفردات دفتریله دین تمسکیرینی تجارتخانه یه تسلیم ایتدک آلاچقلور
 مجبوردر . . . » تجارت بریه قانوننامه هایونی ، ماده ۱۹۸

تقدیرده مقاوله نك محل عقدی Lex loci contractus قانونی ترجیح ایتـ دکاری فرض ایدیله رك او قانونه توفیقا معامله اولنور . مع مافیه بو خصوصاتك جمله سنده انضباط عمومی دولی یه خلل کلامسغه دقت شرطدر .

تجارت بریه قانوننامه هایونی حکمنجه « مفاسه ارسال اولنش اولان امتعه مادامکّه مفلسك حسابنه محسوباً فروخته مامور اولان قومیسوونجینك مخزنلرینه نقل وایصال اولنماش اوله استرداد اولنور » [۱] و « مفلسه بیع و فروخت اولنوب هنوز یدینه تسلیم اولنماش و كرك مفلسه و یا مفلسك حسابنه محسوباً آخره کوندرلماش اولان امتعه نك توقیفنه یا یك صلاحیتی درکاردر . » [۲] بو حکم مشتری مییی قبض و تمی تأدیه ایتمدن مفلساً قوت اولسه یا یع ثمنی مشتری نك ترکه سندن استیفا ایدنجیه دك مییی حبس ایده بیلور » [۳] قاعده اساسیه سنه موافق اولوب ؛ دأنك استرداد اموال ادعاسی ، بو اساسه توفیقا ، کیفیت عقده متعلق اولورسه حلی ضمننده محل عقد قانوننه مراجعت ایدیلیر . بالعکس بو ادعا کیفیت عقده تعلق ایتمزده یا لکز ظهور افلاسله مدیونك تأدیه دیونده عجزندن نشئت ایلمش بولورسه او وقت اعلان افلاسله تطبیق اولنان قانون معتبردر ؛ نئکیم تجارت قانوننامه سنك بر فقره سی ده بوکا موافقدر . [۳]

[۱] ماده (۲۸۲) .

[۲] ماده (۲۸۳) . [۳] کتاب البیوع ماده ۲۹۶

[۳] « استرداد ادعاسنده اولان کسه اول وقته قدر كرك علی

مفلسك عقد ايتديكى مقاولات منفسخ ويا قابل انفساخ
اولوب اولمديغنى تعين ايدن قانون ده افلاس معامله سته تطبيق
اولنان قانوندر . مقاولات مذكوره نك فسخي بونلرك شرائط
اساسيه سندن انبعاث ايتديكمندن بو بابتده محل عقد قانونى
Lex loci actus جارى اولمز .

بر مفلسك ممالك اجنبیه ده بولنان اموالى اوزرينه رهن ،
امتياز ، استغلال صورتيله ادعاى حق اولنديغى حالده ، انضباط
عمومى دولتيه منافع اولماق شرطيله ، اموال مذكوره نك
بولندقلرى محل قانونى نظره آلمز . انجق حق رجحانك
ماهيتى ايله شروط و ترتيبى اموالك بولنديغى محل قانونلرينه
توفيقاً تعين اولنور . اسباب رجحان ايسه يا ، استغلالده
اولدني كى ، دائنك قوانين شخصيه سته ، يا طرفينك حين
مقاوله ده اختيار ايتدكلرى قانونه ، يا خود ويردىكى حكم قضيه
محكمه شكلى المش اولان محكمه نك تطبيق ايتدىكى قانونه توفيقاً
تقدير اولنور .

مفلسك اموال و اشيا سيله امور و معاملات تجاريه سنى كندينه
اعاده ايچون بزمهلت تعين ايدن و يا خود دائنلر جانبدن ديونك
بر قسمندن فراغت اولنديغنى متضمن اولان قونقور
داتو Concordat نك شرائط تنظيمى ايله بونك عقدى ايچون

الحساب اخذ ايلدىكى مبالغى و كرك نول سفينه و عربه كراسى و قوميسيون
وسيفورطه و سائر مصارف ناميله مفلس طرفندن خرج اولنان اچقنى
آلاجلولرك ماسه سته رد و تسليمه مجبوردر ... ماده (۲۸۲)، فقره اولى

اقتضا ایدن مقدار اکثریت، فسخ و الغاسفی انتاج ایلیان اسباب افلاس حکمتك اعطاسنده مابه التطبيق اولان قانون ایله تعیین اولنورسده ، انضباط عمومی دولی به نظراً ، قونقور داتو سندینك تنظیمنده اساس تطبيق اوله حق اصول قانونی محلی به Lex fori تابع طوتولور . بو مملکتده تنظیم اولیان قونقور - داتونك حکمی هر یرده جاری اولور ، بر مملکت اجنبیهده موقع اجرایه وضع ایتمك ایچون آریجه بر معامله ایله احتیاج یوقدر . آنجق بونکله جز کی صرف اجرایه متعلق معاملاتیه تشبث ایدیلیرسه او حالده محاکم محایه طرفدن بالاستنباه اجرا امری استحصال لازم کلیر .

تعطیل تأدیات ایله اعلان افلاس ایتمش و بناءً علیه بر چوق حقوقدن محروم اولمش اولان بر تاجرك تکرار حقوق مبحوثه سنی استحصال ایله معاملات تجاریه به ابتدار ایلیه بیلمسند اعاده اعتبار Rehabilitation ذیلیر . اعاده اعتبارده افلاس حقنده حکم و برن محکمه اعطای حکم ایتمك اقتضا ایدر . چونکله یالکیز او محکمه افلاسك اساس و ماهیتی ایله بونی انتاج ایدن اسبابی و اعاده اعتبار اشدعاسنك کیفیت مقبولیت وجوازی بیلیر [۱] اکر بر دائن بشقه بر یرده اعاده اعتبار حکمی استحصال ایدر . بیلمسه هر دائنك افلاسك اساس و اسبابندن معلومات مکمله سی بولنمیان بر محکمه به مراجعتله اعاده اعتبار ایلمی ممکن اولور که بوندن بر چوق سوء استعمالات میدان کلیر ذاتاً اعاده اعتبار

[۱] Despegnat, Précis de droit international privé,

کیفیتی دوغریدن طوغری به اجرایه متعلق بر حکمی متضمن اولمدیغند، بوکا دائر بر محکمه نك ویردیکی حکمك ممالك سائرده تامین مقبولیتی ایچون استابایه ده حاجت یوقدر . افلاسك وحدت وعمومیتی ایله اعاده اعتباركده، بر وعمومی اولسی يك طبیعی بولمنسنه نظراً بوكاده، تأثیری هربرده جاری اولمق اوزره ، بر محکمه جانبدن حکم اولمق لزومی اشکار اولوب ، او محکمه نكده افلاس حکمی ویرن محکمه اولسی طبیعت مصلحت اقتضاسنددر .

افلاس بمحند شورایه قدر ویریلن تفصیلات اك زیاده نظریاته متعلق اولمقله برابر ، درمیان اولنان مطالعات دول متمدنه دن اکثرینك قانونلرینه کیرمش وعلی الخصوص بلجبقا، ایتالیا ، آلمانیا ، فلمنك تجارت قانونلری احکامی مطالعات مسروده اساسلرینه استناد ایتمکده بولمنش سده ، فرالسه کبی ، دیگر دولتلر هنوز قانونلرنده نظریات مبسوطه یی اساس اتخاذ ایتمکه موفق اوله مدقلرندن ، تخالف احکامدن اختلاف قوانین حدوشه میدان وبرمامك ایچون اشبو افلاس خصوصاتی حقنده دولتلرك معاهدلر عقدی ایله شمديلك اداره مصاحبت ایللری قائده دن خالی اولمز .

ممالك شاهانه ده ایسه تبعه اجنبیه عهد قدیمه ایله کندیلرینه ویریلن بر طاقم امتیازدن استفاده ایتمکده اولوب افلاس ایشلرنده ده حقلرنده مامله استثنایه اجرا اولنورسده بواسطتنا عهده مستند بر امتیاز دکلدرد . عهد قدیمه حکمنجه ممالك شاهانه ده

وفات ایدن تبعه اجنبیه متروکاته متعلق معاملات منسوب اولدقلری قونسلوسخانه معرفتیه اجرا اولنور ومتروکات مذکوره به مأمورین عثمانیه مداخله ایتمز . اجنبیلر ، افلاس بر موت معنوی اولوب بوکا دوچار اولان تاجر وفات ایتمش عد اولنق لازم کله چکی ادعاسیله وبو امتیاز عهدیه قیاساً ، افلاس خصوصاً تنک دخی قونسلوسخانه محکمه لرنجه رؤیتی لازم کله چکنی ادعا ایتشلردر . واقعا بوا دعا حد ذاتنده اصلا حائر اهمیت اولوب هیچ نظره آلمغه دکر سه ده ، بونک ایلری سورلدیکی زمانلرده حکومت ، سند بیقاء مامور ایدوره ، اجانبک هر سوزخی نظر التفاته آلدیغندن ، بو ادعاده مع الناسف رهین قبول اولمشدر . بناءً علیه بو کون ممالک شاهانه ده متمکن اجنبیلرک افلاسه متعلق معاملاتنه منسوب اولدقلری قونسلوسخانه محکمه لرنجه باقیلیر . تأدییه دینده اظهار عجز ایدن بر اجنبی تاجرک منسوب اولدینی قونسلوسخانه محکمه سی تاجر مومی الیهک افلاسنه حکم ایدر ، سند یقا تشکیل ایدر ، افلاس حکمنی ، یالکز مفلسک ممالک شاهانه داخلنده متصرف اولدیعی اموال غیر منقوله مسئنا اولق اوزره ، اجرا ایلر ، دائلردن تبعه عثمانیه دن بولانلر تامین حقوق ایچون دوزیردن دوزیری به او قونسلوسخانه محکمه سنه مراجعت ایدرلر ، ینه او قونسلوسخانه محکمه سی معرفتیه مفلس اعاده اعتبارلر . بتون بو خصوصاً تنده قونسلوسخانه نک منسوب اولدینی دولنک قوانینی تطبیق اولنور . محاکم عثمانیه یالکز تبعه دولت علیه دن اولان تاجرک افلاس

خصوصاتی رؤیت ایدر؛ آنجق تعطیل تأدیات ایلان بر عثمانلی
 تاجرك دانشلری میانده اجنبی بولندینی حالده او دائن اجنبی
 آلاجنی اثبات ایله ماسیه داخل اولق وتأمین حقوق ایلک
 ایچون تبعه عثمانیه دن بولنان سائر دانشلردن استثا ایدلز ،
 بو خصوصده حقنده تماماً تبعه عثمانیه معامله سی اجرا اولور .
 حتی عثمانلی تاجرك افلاس ایشلریله مشغول اولان محکمه عثمانیه یه
 مراجعتده مذسوب اولدینی سفارت ویا قونسلوسخانه نك ترجمانی
 برلکده بولماز وتبعه عثمانیه ایله تبعه اجنبیه یه متعلق دعاوی
 حقوقیه ونجاریه یی رؤیت ایدن مختلط ایکنجی مجلس تجارت بوکی
 خصوصاته باقیوب دائن اجنبی دخی اولسه افلاس ایشی ایله
 برنجی مجلس تجارت مشغول اولور . مع مافیه صراحت عهدیه
 بولنمان خصوصاته علی طریق القیاس توسیع امتیاز ادعاسی
 کلیاً واهی وغیر مسموع اولق وبوکی شیلرده حقوق دول
 قواعدینه توفیق معامله ایتمک لازم کلدیکندن ، ممالک عثمانیه
 داخلنده بالجمله افلاس معاملاتنده محاکم عثمانیه نك صلاحیت
 قطعیه سی غیر قابل انکاردر وتبعه اجنبیه حقنده ، همده هیچ بر
 مجبوریت عهدیه یوق ایکن ، بو معامله مساعدہ کارانه دن واز
 یکمک زمانی امید ایدر که کمشدر .



لاحقه

سلطان محمد رابع مضر ندری زمانه فرانسیه غطاباً

اصرار اولنامه ۱۰ صفر سنه ۱۰۸۴ تاریخى عشره نامه :

چون حضرت حق جل و علانك علو عنایت بی غایانی و سرور
 انبیا علیه و علی آله افضل النجیاتك معجزات كثيرة البركات
 ايله بن كه سلطان سلاطين و خواقين دوران و تاج بخش خسروان
 اورنك نشین زمان و اشرف مداین و امصار و ابرك و ایمن دیار
 اولان حرمین شریفین خادمی و قدس مباركك حامی و حاكمی
 و روم ایلی و طمشوار و ولایت بوسنه و سكتوار و قلعه اكر استوار
 و ولایت آناتولی و قرمان و دیار عربستان و عموماً كردستان
 جانبلینك و قریم و دشت قبیچاق اقلیم لرینك و جزیره کرید
 و ردوس و قبریس و ذوالقدریه و شهر زور و دیار بكر و حلب و اورفه
 و قارص و وان و چلدر و ارض روم و زهت رسوم و شام دار السلام
 و دار الخلافه بغداد بهشت آباد و كوفه و بصره و لحسا و سوا كن
 و حبش و مصر و ادر العصر و لایترینك و دار الجهاد جزایر و تونس
 و حلق الواد و طرابلس غرب و سائر ممالك و بلدان و خصوصاً
 دار الامن و الامان و حسرت الملوك اولان شهر استانبول و دار الحربدن
 قوه خسروانه و سطوت باهره ملوكانه من ايله بعون الملك النصیر
 قبضة فتح و تسخیر كتوریلان مداین و امصار و ممالك و دیار
 شهر یاری و اورنك عزت دتارك تاجدارى و آف دكز و قره دكز

ونجيه ممالك وجزاير وبنادر ومعارك وقبائل وعشايرك وبوندن
 ماعدا حصص حصين نامدارك پادشاه معونات پناهى وشهنشاه
 نصرت دستكاهى (سلطان محمد خان بن سلطان ابراهيم خان
 ابن سلطان احمد خان بن سلطان محمد خان بن سلطان مراد
 خان بن سلطان سليم خان بن سلطان سليمان خان بن سلطان
 سليم خان بن سلطان بايزيد خان بن سلطان محمد) خانم حضرت
 وهاب مالك الرقاب تعالى شأنه عن الثواب والارتياك كمال فضل
 وعنايتى ايله ملجأ سلاطين عاليتبار وماوى خوافرين ذوى الاعتبار
 اولان عتبة غلبة دولتمدارمزه افتخار الامراء العظام العيسويه
 مختار الكبراء الفخام فى الملة المسيحية مصلح مصالح جماهير
 الطائفة النصرانية صاحب اذيان الحشمة والوقار صاحب دلائل
 المجد والافتخار ولايت فرانجه پادشاهى لوزير ختمت عواقبه
 بالخير والرشاد كندونك مدبر ومقبول ومعتبر بگزاده لرندن اولوب
 ولايتلرينك جميع امور لرنده وپارس ديوننك مشير ومستشارى
 وحالا آستانه سعادتده ايلچيلك خدمتمنده اولان قدده امراء
 الملة المسيحية عمدة كبراء الطائفة النصرانية اولان شارل فرانسوا
 ماركى دونوانتل ختمت عواقبه بالخير بويله خلوص قواد وكمال
 اتحادى مشرنامهسى كلوب عهديشين ودور ديريتدن الى هذه
 الحين آباء كرام واجداد عظام زائر براهينهم ايله فرانجه پادشاهلرى
 ماينلرنده منعقد اولان دوستلق اسلوب سابق اوزره مرعى
 اولوق مومى اليهك قصوى آمال واتصاى مافى البالى اولوب بوندن
 اقدم فرانجه پادشاهنك ايلچيلر وقونسلموسلرينه وتاجرلرينه

و ترجمانلرینه و سائر رعایالرینه دخل و تعرض اولمبوب ظل ظمیل
معدلت اتمامزده آسوده حال و مرفه البال اولالردیو سعیدالحیات
شهید الممات مرحوم و مغفور له (سلطان محمد) خان زمان
سعادتلرنده و یریلوب بعده مرحوم و مغفور له جدمز (سلطان
احمد) خان طاب ثراه زماننده تکرار تجدید اولوب اللرینه
و یریلان عهدنامه هایونی کتوروب و موسی الیه آستانه سعادتمزک
دوستی اولوب اتحاد و خلوص و داد اوزره اولمقله ذکر اولنان
عهدنامه هایونی تجدید و بعض موادالحق اولنق بابنده استدعای
عنایت اتمکله النامسی حیز قبولده واقع اولوب و مقسما و یریلان
عهدنامه هایونه الحاق اولنق اوزره خطهایون شوکت مقرونمز
ایله فرمان قضا جویانمز صادر اولوب فرانچهلودن قدس شریف
زیارتنه کلوب کیدنله و مقامه نام کنیسهده اولان رهبانلره دخل
و تعرض اولنیه و فرانچه پادشاهی اولنلر قدیمدن آستانه سعادتمزله
دوستلق اوزره اولوب دوستلغه خلل و یرر سیرو و وضعلری اولماقله
مرحوم و مغفور له (سلطان سلیم) خان طاب ثراه زماننده
منوع اولان متاعدن پنبه ورشته بند و سیختیان و یریله دیو حاکم
هایون و یریلانش ایمن حالا آستانه سعادتمز اولان کمال
اخلاص و اختصاصلرینه بناء اجداد عظام نورالله مراقدهم
زماننده ممنوعاتدن آقچلری ایله بال موسی و کون و یریلوب بر فرد
مانع اولنیه دیو عهدنامهده قید اولمغین بن دخی کما کان مقرر
طوتم و ولایتلرندن آدملری و تجاری کوتوردکاری غروشدن
مالک محروسهده اولندن رسم آلمانقله حالا دخی طلب اولنیه

و ضرر و شرین آنچه قطع ایدرزدیو خزینه دارلر و ضرر بخانه امینلری
 دخل ایلمه لر و فرایچه تجارت ایدرندن بعض حربی کیملرینه کیروب
 کندو حاللرند. تجارت اوزره ایکن حربی کیمده بولندیکز دیو
 کندولرین اسیر و اسبابلرین گرفت ایلمک شرع شریفه مخالف
 اولمغین مادامکه کندی حاللرند. تجارت اوزره اولوب قورسان
 کیمسندن فساد اوزره اولیه لر اول بهانه ایله اسبابلری گرفت
 و کندولری اسیر اولیه و فرایچه لودن بری ملک کیمسینه حربی
 ولایتده ذخیره تحمیل ایدوب یسه حربی ولایت کیدرکن اهل
 اسلام کیملری راست کلدکلرند. دشمنه ذخیره ایلدرسنر دیو
 کیمسی گرفت و کندولرین اسیر ایتیمه لر و ذمیلردن بری ممالک
 اسلامیه دز ذخیره آلوب کیدرکن گرفت اولندقد. فرایچه لولردن
 کیمده اولان اجیرلر اسیر اولیه و فرایچه لولر اهل اسلام کیملرند
 اختیاریه ذخیره صاتون آلوب حربی ولایت آلوب کیتیموب
 کندو ولایتلرینه کیدرکن اهل اسلام کیملری راست کلدکلرند
 اخذدن صکره کمی بی گرفت و ایچنده اولنلری اسیر ایلمه لر و آنک
 کبی فرایچه لولر اسیر بولنور ایسه اطلاق اولنوب اسبابی و بریه
 و مشارالیه فرایچه پادشاهنک و ضاسی اوزره ناجرلری ولایتلرندن
 کتوردکلری و آلوب کیتدکلری متاعلردن قدیمدن نه بهایه
 طوتوب کمرک الله کلدی ایسه کیرو اولنوال اوزره آلتوب
 زیاده بهایه طوتوبه و بیع ایچون اخراج اولنان متاعدن ماعدا
 آخر اسکله به کیتیمک استدکلرند. متاعلردن کمرک طلب ایلمه لر
 و آخر اسکله به ایلمه که مانع اولیه لر و حادث اولان قصابیه

ورفت و باج یساق قوی او چو زانچه دن زیاده سلامتک رسمی طلب
اولمیه جزایر غرب قورصانلری لیمانه وارد قلمزنده رعایت اولوب
باروت و قورشون و یلکن و سائر آلات و یریلوب لکن مزبورلر
فرانچہ تجارلرینه راست کلدکلر زنده اسیر و ماللرین غارت ایدرلر
ایمش مرحوم جد بزرگوار من طاب ثراه زماننده بالدفعات تنبیه
اولوب متنبه اولیوب تعدی اوزره ایملر بو خصوصه دخی
رضای هابونم یوقدر او مقوله فرانچہ لوردن اسیر واریسه
اطلاق اولوب ماللری بیقصور ویرله من بعد متنبه اولیمان
قورصانلرک شاعت ایلدوکن مشارائیه نامه ایله اعلام ایلدکده
فنی بکلر بکی زماننده اولورایسه اولسون اول بکلر بکی معزول
اولوب غارت اولنان آتلی ترضمین ایتدیریله بوخصوص ایچون
دفعاله تنبیه اولمش یکن مفید اولدقلری اجلدن امر شریفه
امثال ایتزلر ایسه آنلر دخی فرانچہ ولایتنه وارد قلمزنده
فرانچہ پادشاهی طرفندن قلعه لرینه و لیمانلرینه قبول ایلوب
فسادلرک دفع ایچون تقید ایلدکلر زنده عقد اولنان عهده خلل
ویرمن دیو اجداد من زماننده ویریلان حکم شریفک مضمونی
کماکان مقرر اوله و جزایر و تونسہ تابع اوستورغه کورفرزین نام
محللر ده اجداد عظام طاب ثراهم زمانلر زنده فرانچہ لویه مرجان و بالق
صید ایللریچون حکملر ویریلش اولندن جاری اولان عادت اوزره
اول محللر ده کماکان مرجان و بالق صید ایللر و خارجدن کسنه به دخل
ایتدیرلمیه و ایاجیلری خدمتده اولان ترجمانلری اولیکلدوکی
اوزره خراجدن و قصابیه دن و سائر تکالیف عرفیه دن معاف

اوله لرو فرانجه تجارت کیمیلرینه تحمیل ایلدکلی متاعدن ایلیچیلرینه
 وقونسلوسلرینه عائد اولان رسملرین ویایلاج حقلرین بیقصور
 ویروب عیاد و مخالفت ایلیه لر فرانجه لورک بری بری اراسیمه
 قانه یاخورد آفریناقت واقع اولور ایسه ایلیچیلری وقونسلوسلری
 آیینلری اوزره کوروب فصل ایلیچوب ضابطه لرنه بر فرد دخل
 و تعرضه ایلیچیلر و تاجرلرینک احوالی ایچون نصب ایلدکلی
 قونسلوسلردن بعض کیمیلر دعوا ایتدکلرنده کمدولرین حبس
 ایدوب اولرین مهرلوب تعدی ایتیلر قونسلوسلری ایدو عواسی
 اولنلرک مخصوص آستانه سعادتیمزه استماع اولنه ذکر اولنان
 موادک خلافتیه مقدم ومؤخر امر شریف ابراز اولنور ایسه
 استماع اولنمیوب عهد نامه هابون موجبجه عمل اولنه و مشارالیه
 سلسله نسلی ملت مسیحیه و ملوک طوائف عیسویه میاننده
 مشهور اولان قرالر و بانلردن مقدم مقالید حکومت مفوض
 و مسلم اولدیغدن ماعدا آبا واجداد عوالی نشانمزه زماندن
 بو آنه کلنجه عتبه علیه عدالت عنوانمزه دخی جمله قرالردن
 زیاده خلوص بال ایله دوستلق ایدوب شیمدی به دئ مایتمده
 نقض عهد و امان و نکث میثاق و ایمان اولمیوب سده سعادتیمزه
 کمال اخلاص ایله اختصاصده ثابت قدم و راسخ دم اولیکلدوکی
 اجلدن آستانه سعادت آشیانمزه مقیم اولان فرانجه ایلیچیلری
 دیوان بلند ایوانمزه کلدکلرنده وزرای عظام و مشیران ذوی
 الاحتراممزه وارد کلرنده اسپانیا و سائر قراللرک ایلیچیلرینک

اوزرلرینه قدیمدن اوله کلدیکی اوزره تقدم وتصدر ایلیهلر
 وهرایا دلبا-لری وداگو لات وروپاتلری مسخری ایچونه ائچیلرینه
 کتور دکلری نسنلرده مرک و باج طلب اولنیه و بندرلرده اولان
 بایلو-لری دخی اسپانیا و سائر قورلارک بایلو سلیرینه آستانه
 سعادتنده جاری اولدنی اوزره تقدم وتصدر ایلیهلر و فرانیجه
 لولرک کندی ماللری - سائر اسبابلریله قالیونلری و سائر کیملری
 جمیع زمانده اسکلهلره وایانلره و سائر ممالک محروسه منه
 ایشلیانلر امن و امان اوزره کلوب کیدوب انک کبی دریاده
 فورتنه مضایقه و یروب کیلرینه معاونت لازم اولدقده اول محله
 حاضر بولنان اکر خاصه کیملر خلقدیر و اکر غیریدر معاونت
 و مظاهرت ایلیهلر و قالیونلرینک سرداری و رؤسائینک مختاری
 قبودانلرک قائممقامی رعائتک اهتمای خصوصنده دقیقه فوت
 اولمییوب اچهلری ابله زاد و زوادلری تدارکنده - حی و اهام
 ایلیهلر و اکر شدت روزکار ابله دکز کیملرین قرایه آتارایسه
 بکلر و قاضیلر و غیریلر معاونت ایدوب قورتولان اسباب و اموال
 کیر و کندولرینه ویریلوب دخل اولنیه و بالجله اکر قوریده
 و اکر دریاده کندو حالنده یوریان فرانچهلر اولوب امان
 اوزره کلوب کیدن تجارتخانه سی و اول دیار تاجرلری و ترخانلری
 و سائر آدملری دریادن و قره دن ممالک محروسه مه کلوب بیع
 و شرا و تجارت ایلیوب شولکه رسوم عادی و قونسلوسلق حقیدر
 عادت و قانون اوزره ویردکلرندن سکره کلیدشه و کیدشده
 قبودانلردن و دریاده یوریان خاصه و کوللو رئیسلردن و غیریدن

وعسا کر خلقندن کمنه مانع اولمیه وتجار طائفه نك رضالری
 یوغیکن بعض متاع جبراً اوزر لرینه بیراغوب تعدی اولنیه
 وفرانچهلودن بری مدیون اولسه بورجلودن طلب اولنوب اگر
 کفیل دکل ایسه آخر کمنه طوتیلوب طلب اولنیه واکر
 مرد اولسه ایجاب داموانه کمنه دخل ایتمیه کیمه وصیت ایدر ایسه
 اولدوب اکر وصیتنیز موت اولور ایسه قونسلسلری معرفتیه
 اول بیرلورلر ایه و بیه بیت المطاییر و قساملر دخل ایلمیه فرانچه
 تاجرلری و ترجمانلری وقونسلسلری ممالک محروسه مده بیع
 و شرا و تجارت و کفالت خصوصلرنده وسائر امور شرعیده
 قاضیه واروب ثبت ساجل ایتدیروب و یا حجت آلالر صکره
 نزاع اولورسه حجت و ساجله نظر اولنوب موجبی ایله عمل
 اولنه ایکیسندن بری اولیوب مجرد شاهد زور اقامت ایدوب
 خلاف شرع شریف نسنه دعوا ایدر لر ایسه مادامکه قاضیلردن
 حجتلری اولیوب ساجله مقید بولنیه انک کی تزویر ایتدیربلیوب
 خلاف شرع شریف اولان دعوالری استماع اولنیه و بهض
 کمنه لر بزه شتم ایلدیکز دیو مجرد جلب و اخذ ایچون خلاف
 شرع شریف رنجیده ایدر لر ایسه منع و دفع اولنه بونلردن بری
 دین ایدنسه و یا خود بروجهله متهم اولوب غیت ایلسه انک ایچون
 کونا هسنر کفیل اولمیان آخردن کمنه رنجیده اولنوب طوتلیه
 وفرانچهلویه متعلق اسیر بولنور ایسه ایلاچیلری وقونسلسلری تعین
 ایللیوب فرانچهلودر درلر ایسه انک کیملر صاحب لری و یا وکیللری

ایله سده سعادتیه کوندریله قضیه سی کوریه فرانیچ لودیه ممالک
مخروسه مده تمکن ابرنلودیه خراج طلب اراچییه اسکندریه و طرابلس
شام و جزایر و سائر یرلرک اسکله لرنده نصب اولمش قونسلو -
سنلرینک یرینه اول خدمت عهد سندن کلور بر آدم لک تعیین
ایدوب کوندردکارنده کمنه مانع اولیه و تکالیف عریفه دن معاف اوله
فرانیچ بجاری ایله بر کمنه نلک نزاعی اولسه قاضی به وارد قده فرانیچ
لورنک ترجمانلری حاضر بولماز ایسه قاضی دعوا لک استماع اچمیه
اگر ترجمانلری مهتم مصاحفه ایسه کلنجه توقف اولنه اما آنلردخی
تعامل ایدوب ترجمانم حاضر دکار دیو عوق ایتوب ترجمانلرین
احضار ایلیه و اگر فرانیچ لوزارک بری بری ایله نزاعلری اولسه
ایلیچیلری و قونسلولری عادلانه کوروب فصل ابره کمنه مانع اولیه
و فرانیچ کیمیلری عادت و قانون اوزره استانبولده ارا نوب کیتد کده
نصکره قانون قدیم اوزره بر دخی بوغاز حصارلری اوکنده
ارا نوب اجازت و یریلورایمش حالا قانون قدیمه مخالف کلیو لیده
دخی ارا نورا یمش من بمعدادت قدیمه موجنبجه بوغاز حصارلری
اوکنده ارا نوب کیده و ممالک محروسه مدن دریا یوزینه چیقان
کیمیلر اوقدر غلرود و نملر دریاده فرانیچ کیمیلرینه بولشد قده بری
بری ایله دوستلق ایدوب ضرر و زیان ایتیمیلر مادامکه کندو
رضالری ایله هدیه و یرمیهلر جبراً الت و اسبابلرین و امر داو غلا -
نلرین و غیره نسنه لرین آلوب امدی ایتیمیلر و ند کلوبه و یریلان
عهد نامه هایونده مسطور اولان خصوصلر فرانیچ لودیه حقننده

دخی مقرر اولوب شرع قويم وعهد نامه ها بونمه مغاير کلمسه مانع ومناحم و متخاصم اوليه مزبور قاليونلر و کيلر ممالك محروسه مه کلامکارنده ضبط وصيانت اولنوب امين و سالم کيرو کيده لر و اکر اسباب و اموال يغبما اولنمش بولنور ايسه غارت اولنان اسباب و اموالک و آدمليک ظهوره کلمسي بابتده سعي اقدام اولنوب اهل فساد مرکيم اولور ايسه اولسون کرکی کي حقلرندن کلنه بکلر بکلر و سنجاق بکلري و قيودانلر قوللرم و قاضيلر و امينلر و خاصه و کملور رئيسلر و عموماً ممالك محروسه مه اهايليسي اشبو عهد نامه ها بونمک مضمون معدلات مقروني ايله عمل ايليوب قطعاً خلافته جواز کوسترلميه شوييله که فرمان قضا جريانه مخالفت و معاندت اوزره اولوب ساعي بالفساد اولان طائفة طاغيه دن اوله لر اولمقوله لر امان و زمان و يرليوب حقلرندن کلنه که سائرلرينه موجب عبرت واقع اوله و بالجه مرحوم و مفقور له (سلطان سليمان) خان واجداد عظام انارالله تعالي براهنهم زمان شريفلرنده عنايت اولنان عهد نامه لر موجبجه عقد اولنان عهد و امانه مخالف اصلا دخل و تعرض ايتد بيلميه و بوندن اقدام استانه سعادت مزده مستقل اياچيلري اولميان حربی طائفة فرانجه پادشاهی بير غي آلتده تجارت و زيارت اينچون ممالك محروسه مه کلوب کتمکه اجداد عظام طاب تر احم زمانلرنده اذن ها بون و يرليوب فرانجه لولره و يريلان عهد نامه لرده دخی مسطور ايکن بعده بعض علت سبي ايله طائفة مزبوره ممالك محروسه مه کليت اوزره کلمکدن منع وعهد نامه لرندن اخراج

اولنمشلر ایدی مقدا مشارالیه فرانجه پادشاهی سده سعادت
 مابلرینه نامه کوندروب حربیلر تجارتن منع اولندقلری
 تقدیرجه قدس شریف زیارتنه اولدن واره کلدکلری اوزره
 واروب کلوب رنجیده اولنیهلر وبعد زمان طائفة مزبوره به تجارت
 ایچون مالک محروسه مه کلوب کتمکه رخصت ویربلور ایسه
 اول زمانده کیروفرانجه بیراخی آلتنده کلوب کیدوب تجارت ایدملر
 دیو التماس ایتمکین مومی الیه فرانجه پادشاهنک اباعن جد اجداد
 عظام زمانندن الی هذه الآن عقبه علیه منزه اولان قدیمی دو-
 ستلغه رعایتاً رجاسی مقبول هایونلری اولوب فرمان عالیشانلری
 شویله صادر اولمشکه ملت نصارادن مشارالیه فرانجه پادشاهی
 ایله دوستلق اوزره اولان حربیلردن قدس شریف زیارتنه
 عزیمت ایلایانلر اولدن کلدکلری اوزره کیرو امن وامان ایله
 کندو حاللرنده کلوب کیدوب زیارت ایتمک استدلرکونده کلشده
 و کیدشده رنجیده و درمیده اولنیهلر وبعد زمان طائفة مزبوره به
 مالک محروسه مه تجارت ایچون کلوب کتمکه اذن هایون ویرملک
 اقتضا ایدر ایسه اول زمان اسلوب سابق اوزره فرانجه پادشاهی
 بیراخی آلتنده کلوب کیدوب آخرک بیراخی آلتنده کلوب کتمکه
 قطعاً رضا کوسترلمیه و بو وجه مشروح اوزره قدیمدن اجداد
 عظام زمانلردن بو آنه دکین لارنده اولان مفصل و مصرح
 عهدنامه هایونلری حالا تجدید و فیما بعد ذکر اولنان موادی
 الحاق اولنمغه خط هایون سعادت مقر و نماله صادر اولان فرمان

جالیشام موجبنجه جمله دن بری فرانچیه تابع اولاده یسقیوسلر
وسائر فرنک مذهبنده اولاده رهبان طائفه سی هر نه منسیره اولور
ایسه اولسوره محالک یا شاهیده قدیمره اولور قلمی برلرده کنندو
ماللر نه اولوب آیینلرین اهر ایلد کلر نه کسنه مانع اولوب
وقدس شریف داخلنده و خارجنده وقامه نام کایساده قدیمدن
اوله کلدیکی اوزره تمکن ایلیان فرنک راهلرینک حالاسا کن
اولوب اللرنده اولان زیارتگاهلرینه کجا کان فرنک راهلرینک
اللرنده اولوب کسنه دخل ایلیه و تکالیف طلبیه رنجیده ایلیه لر
ودعوالری ظهور ایلد کده محلنده فصل اولمز ایسه استانه سعاده
حواله اولنه و قدس شریف وارنه فرانسه و آنده تابع اولاده هر
نه منسیره اولور ایسه وارنده و کلر نه دخل ایلمه لر حالا غلطه ده
اولان یزویت و قیوچین نام ایکی فرانچیه رهبان طائفه لر ی قدیمدن
اللرنده اولان ایکی کلیسالی ینه اللرنده ضبط و تصرفلرنده
اولوب اول کلیسارک بری احراق اولنقله اذن شرعه تعمیر
اولنوب ینه کل اول قیوچین اللرنده اولوب رنجیده اولنیه لر
کذلک ازمیرده و صیداده واسکندریه ده وسائر اسکله لرده اولان
فرانسز طائفه سنک کلیسالی ینه دخل اولنیه و بو بهانه ایله اچمه لرین
آلمیه لر و غلطه ده اولان بیمار خانه لر نه کنندو حاللرنده انجیل
تلاوت ایلد کلر نه رنجیده اولنیه لر فرانچیه تجاری ممالک محروسه یه
کتورد کلری و آلوب کوتورد کلری امتعه لر دن قدیمدن بو آنه
دکین یوزده بش و یروب لکن دولت علیه نک قدیمی دوستلرن دن

اولمغله یوزده اوچ کمرک و برمک اوزره مجدداً اللرنده اولان عهدنامه هایونلرینه الحاق اولمق بابنده استدعای عنایت ایتیمکین رجاری حیز قبولده واقع اولوب وجه مشروح اوزره ووروب زیاده طلب اولمیه و کمرکلرین ادا ایلدکلرنده ممالک محروسه ده جاری اولان نقود خزینه عامریه آلتدینی منوال اوزره آلوب نقصان و زیاده طلبیه رنجیده اولمیه لر و آستانه سعادته ایلچیلری و قونسولوسلری و کتبخداری اولمان پرتقال و صجلیه و قاتالان و مسنه و انقونه و سائر حربی طائفه سندن فرانجه پادشاهنک پیراخی آلتنده قدیمدن کلبکری اوزره اختیارلری ایله کلنلر کندو حاللرنده اولوب صلح و صلاحه مغایر وضع و حرکت کندولردن صادر اولمقچه سائر فرانسزلر کی کمرکلرین ووروب کمسنه دخل ایلیه مصدیری بی انگلیز تجاری ویردکلری اوزره انلر دخی استانبولده و غلطده اولان مصدیره جیلره ووروب زیاده طلب اولمیه و امانا زیاده کمرک تحصیل ایچون متاعلرین زیاده بهایه طوترلر ایسه اچقه یرینه متاع آلوب مخالفت ایلیه لر و برکله کمرکی ادا اولمش ایپک و چتک تکرار کمرکی طلب اولمیه و کمرکلرین امانا آلدکلرنده ادا تدر کمرکلرین ووروب آخر اسکله یه کونورمه که مانع اولیوب و تکرار بر اسکله ده کمرک طلبیه رنجیده اولمیه و فرانجه قونسولوسلری و انلره تابع اولان رهبان و تجار طائفه سی و ترجمانلری کندو نفسلر ایچون معتاد معینه قدر اولرنده شیره حیقوب و طشره دن خمر کتوروب استعمال ایلدکلرنده رنجیده اولمیه لر و دیرت بیك اچقه دن زیاده اولان دعوالری

دیوان هایبونده استماع اولنوب غیری یرده استماع اولنیه و فرای
 نچه لولر اولدینی محله لرده قان واقع اولسه اول محله لرده بولنان
 فرانچه لولره مادامکه اوزرینه رزنه ثابت اولدقچه جریمه نامیه
 من بعدرنجیده ورمیده اولنیه وایلیجه لری خدمتیه اولسه برهماندر
 فرانجه لولره عنایت اولنانه معافیت انلرک مقننه دخی مقرر اوله
 ذکر اولنان عهد و میثاق اوزره مادامکه مشرالیه فرانچه پادشاهی
 سده سعادت پناه مزه صدقت و اخلاصده ثابت قدم و راستخ دم
 اوله بندخی دوستلنی قبول ایدوب عهد ویمین ایدرکه یرلزی
 و کوکلی یوقدن وار ایدن خدای متعال حقیچون واجداد
 عظام طاب راهم روحلریچون بو طرفدن دخی خلاف عهد
 و میثاق و مغایر عهد و وفاق ایش اولیوب اشبو عهد نامه
 هایون سعادتمقرو نمک مضمون شرافتی ایله عمل اولنه تحریر آ
 فی الیوم العاشر شهر صفر الحیر سنه رابع وثمانین و الف .



فهرست

صفحه

۵ افاده مؤلف

۹ مدخل

﴿ برنجی باب — تابعیت ﴾

۳۱	برنجی فصل — مطالعات عمومی
۴۱	ایکینجی فصل — تابعیت اصلیه
۴۱	۱ - نسل اساسی
۵۱	۲ - مولد اساسی
۵۴	۳ - بعض قوانین اجنبیه
۶۸	۴ - تابعیت اولیه تعییننده اختلاف ظهوری
۷۶	اوچینجی فصل — تابعیت مکسوبه
۷۶	۱ - تلمیق
۷۹	معلومات تاریخیه
۸۲	ممالک عثمانیه در تلمیق
۸۹	۲ - تابعیت عثمانیه نک ضیاعی
۹۵	۳ - ازدواج ک قادی نک صفتیه تأثیری
۱۰۱	۴ - الحاق اراضینک تابعیتیه تأثیری
۱۰۸	۵ - بعض قوانین اجنبیه
۱۲۸	۶ - تابعیت مکسوبه به متعلق اختلاف قوانین
۱۳۳	در درنجی فصل — تابعیتیه متعلق دعاوی مختلطه

صحیفه

﴿ ایکسجی باب — اجنیلر ﴾ ۱۳۵

۱۳۸ برنجی فصل — معلومات تاریخیه
۱۵۴ ایکسجی فصل — ممالک شاهانده اجنیلرک حقوق عمومیه دن
صورت استفاده سی

۱۷۳ ارجنجی فصل — ممالک شاهانده اجنیلرک حقوق خصوصیه
دن صورت استفاده سی

۱۸۶ دردنجی فصل — ممالک شاهانده مظهر مساعدہ اولان اجنیلر

۱۹۱ بشنجی فصل — ممالک شاهانده اشخاص معنویہ اجنبیه

۲۰۱ آلتنجی فصل — بعض ممالک اجنبیه ده جاری اصول

۲۰۱ ۱ — انکلترا و شمالی آمریکا اصولی

۲۰۶ ۲ — اروپا دہ انتری اصولی

۲۱۷ ۳ — جنوبی آمریکا اصولی

﴿ اوچنجی باب — اختلاف قوانین ﴾ ۲۱۹

۲۲۱ برنجی فصل — قواعد نظریہ

۲۲۱ ۱ — استاتو نظریہ سی

۲۲۳ ۲ — شخصیت قوانین

۲۳۳ ۳ — قوانین عثمانیہ نک حاکمیت ملکیہ سی

۲۳۶ ۴ — بعض قوانین اجنبیه

۲۴۲ ایکسجی فصل — افرادک شخصلرینہ متعلق اختلاف قوانین

۲۴۲ ۱ — نفوس و قوعاتی

۲۴۴ ۲ — احکام مفقود

۲۴۹ اوچنچی فصل — افرادك عائله ايله اولان مناسباتنه متعلق
اختلاف قوانین

۱ - نکاح ۲۴۹

نکاهك مراسم خارجیه سی ۲۵۸

ازدواجك زوجین ايله اولادك مناسباتنه ۲۶۳

تأییری

۲ - طلاق، افتراق، فسخ نکاح ۲۶۷

۳ - نسب ۲۷۷

۴ - اولاد طبیعیه نك، مشروعیت اکتسابی ۲۸۸

۵ - دعی ۲۸۹

۲۹۲ دردنجی فصل — افرادك تصرفاتی ايله اولان مناسباتنه
متعلق اختلاف قوانین

۱ - حقوق عینیه ۲۹۲

حق تصرف ۲۹۴

قیود ۲۹۸

تأمینات عینیه ۳۰۳

۲ - حقوق شخصیه ۳۰۷

قامیو مقاوله سی ۳۱۱

۳ - حق احداث و اختراع ۳۱۹

حقوق ادبیه

حقوق تجاریه و صناعیه ۳۲۱

مجموعه

۴ - تصرفات استخلافیه نك انتقالی

۳۲۳

۳۳۶ ﴿ در دنجی باب - صلاحیت و اصول محاکمه ﴾

۳۳۷ برنجی فصل - ممالک عثمانیه ده کی تبه اجنبیه حقننده محاکم

عثمانیه نك صلاحیتی

۱ - عثمانلی ایله اجنبی اره سنده متحدث

۳۳۷

دعاوی

۲ - اجنبیلر آراسنده متحدث دعاوی

۳۵۵

۳۶۰ ایکنجی فصل - اجنبیلره تطبیق اولنان اصول محاکمه

۳۶۴ اوچنجی فصل - اعلانات اجنبیه نك تأیقاتی

۳۶۷ در دنجی فصل - حقوق خصوصیه دول نقطه نظر نده افلاس

لاحقه

۳۸۳





